



4a



T. 169052

C. 1219030

200 €

el del Alquiler de
el número 3 del
Tambor de la Barbería

(anterior)



DE ARTE
RHETORICA
LIBRI QUINQUE,

LECTISSIMIS VETERUM AUCTORUM
atatis aureæ, Perpetuisque exemplis
illustrati;

AUCTORE

P. DOMINICO DECOLONIA
Societatis Jesu Presbytero.

ACCESSIONE IN HAC NOVISSIMA EDITIONE
Institutiones Poëticæ,

AUCTORE

P. JOSEPHO JUVENCIO
ex eadem Societate.

VILLAGARSIÆ.

TYPIS SEMINARII, M DCC LX II.

Superiorum Permissu, ac Privilegijs.

1993-1994 学年 第一学期

8.133247

TYPOGRAPHUS

LECTORIBUS S. D.

A Rtem Rheticam Dominici Decolonia s^epius multorum typis editam , atque incredibili plausu semper exceptam , dolebant nonnulli , minùs facilè induci in gymnaſia posse , quod & mole grandior videretur , quām quæ commodè posset à Pueris gestari , & nihil in ea de Arte Poëtica , quæ una cum Rheticā tradi solet , nisi obiter p. ecipere tur. Nos , detractis minus necessariis , adjunctis que Josephi Juvencii Institutionibus Poëticis , quæ multis partibus breviores erant , quām ea quæ diversis ex locis , præfertim ex ipso fine , suffulera- mus , utrique incommodo occurrimus. Nec verò veremur , ne sapientissimo Auctori , si adhuc in vivis ageret , consilium hoc nostrum minùs probaretur. Nam , quum non nisi hac ratione adolescentium studiis , quibus unicè favere studuit , satisficeri potuisse intelligeret , mallet profecto has tamquam epulas , à se structas , paulo aliter conditas apponi , quām omnino mensæ non inferri. Si quos verò sincera illa ac veluti autographia magis delectarint , eos quidem nobis molestos fore nequaquam putamus. Ita enim hæc paululum immutata damus , ut nativa illa ac vetera non tollamus : quibus , si volent , concedentibus nobis , utantur , nosque his uti , queis volumus , sine interpellatione finant. Valete.

A U C T O R

LECTORI.

Præceptis paucis brevibusque , exemplis verò
benè multis constat hæc Ars Rhetorica.

Præcepta hausimus ex vetustissimis Greco-
rum, Latinorumque Rhetorum fontibus : Aristote-
lem dico , Ciceronem , Quintilianum , Demetrium
Phalereum , Hermogenem, atque Longinum. Exem-
pla , quæ lectissima sunt perpetuaque, summo stu-
dio , singularique diligentia selegimus ferè ex ele-
gantissimis ætatis aureæ Scriptoribus. Atque hoc
exquisito veterum exemplorum delectu copiaque,
nostrum hunc qualemcumque laborem speramus pos-
se commendari , si cetera omnia desunt ; illumque
etiam politioribus & urbanis hominibus nec iniuti-
lem , nec injucundum , hoc saltem nomine , fore
confidimus.

FACULTAS RELIGIONIS.

E GO Eugenius Colmenares Præpositus Provin-
cialis Societatis Jesu in Castellana Provin-
cia, potestate ad id mihi facta à Reveren-
do admodum Patre Laurentio Ricci Præposito nos-
tro Generali, facultatem facio, ut *Ars Rhetorica à*
P. Dominico Decolonia composita, & ejusdem Societatis
gravium, doctoruinque hominum judicio approba-
ta, typis mandetur: in quorum fidem has litteras
manu nostra, ac Secretarii nostri subscriptas, &
Sigillo nostro munita dedimus. Villagarsia die 18.
Februari. ann. 1761.

†

I H S.

Eugenius de Colmenares.

†

I H S.

Laurentius Uriarte.

Secr.

CENSURA R. P. FR. JOSEPH A JESU MARIA LECT.

Theologie, Examinatoris Synodalis Diœcesis
Valentinae.

DE commissione, & mandato D. D. Emmanue-
lis Rubin de Zelis Præbendati, Proto-Notarii
Apostolici, Provisoris, Vicariique Generalis
ejusdem Dioecesis Auctoritate fulciti, habui pro of-
ficio post lectionem censuram dare cuidam operi,
Ars Rhetoricae nuncupato, à P. Plæclaro Dominico
Decolonia Soc. Jesu elaborato; Institutionibus Poë-
ticis additis à P. Magno Josepho Juvencio ejusdem
Societatis elucubratis: pleno fateor levore: sine ulla
Palponis affectione dico, excusationem malle. Cum
enim recta methodus fandi; sapientia eloquens in
hoc opere elucescat, videtur meam rationem ins-
tructam à filiis Societatis. Jesu, excusationem posse
petere, dum vult eloquentes corriger. Sic loquor,
ô Patres! sic ô Jesu Societas Piissima fateor: ab
infantia tu dedisti mihi potum: dedisti mihi lac tu:
à te Peripatetica elementa accepi: Doctrina Catholica
imbuiisti me: ex te primus exiit director, qui me recto
tramite tulit. Cæteraque bona consilia omitram, ut
interim accipias hoc breviculum obsequium pro
tanto munere debito. Vocat me jam laudati Do-
mini Reverens Ordo. Proque ejus adimpletione re-
pondeo, quod accurate, & delebetabiliter perlegi
quinque libros Artis Rhetoricae; & alios quinque
Poëticæ artis in hoc opere contentos. Opus breve,
sed magnum. Magnum, quia spatiolum, & la-
tum: brevē, & ideo perutile. In primis quinque
datur doctrina ad ornata, graviter, & copiose lo-
quen-

quendum. Tale esse proprium Rethoricæ munus inquit Quintilianus lib. 2. Ejus materia tanta est circundata vastitate, ut nihil sit in rerum natura de quo ornate, eleganter, & copiose disputare non posset quivis Orator: audi eloquentem Tullium lib. 2. de Orator. loquentem: *bene dicendi ars non habet definitam aliquam Regionem, cuius terminis septa teneatur.* Nec Philosophiæ Princeps dissonat: Rheticæ materiam esse quamlibet quæstionem ad dicendum propositam, quando proclamat: Hoc idem evenire in metrico ordine satis indicat tanta Odarum Horatii varietas: aperte quoque cognoscet regulis in tanta varietate metri variatis quivis imbutus. Opus prædictorum PP. Magnum, quia spatiolum, & vastum. Opus breve, sed quia breve perutile. Utilitatem Reticæ valde ponderat Cicero, ut potest videri in lib. 1. de Orat. jure optimo inter cordatos urbana verba; perpolita vocabula proferenda necesse agnoscit politus. Crede D. Hieronymo eloquentiæ dilectori, qui in præfatione in Isaiam sic ait: *Sciendum, quod in sermone suo dissertus sit, quippe ut vir nobilis, & urbana eloquentia; nec habet quidquam in eloquio rusticitatis admixtum.* Utilitatem Reticæ, ecce. Sic est hoc opus breve; verba polita docet in quolibet ratiocinio; ergo quia breve, perutile, nam est magna utilitatis breviloquentia: tanta autem utilitas non recte cognoscitur, nec penetratur, si ab initio eloquentia non venit, sine subsidio Reticæ Artis, cuius muneris est præcepta benedicendi tradere, & Orator in quavis materia potest accommodare. Bene dicere est dicere plura, dicendo pauca:

bene dicere est, quomodocumque dicatur, parvum
numquam fieri dictum: sic valde Rheticus August.
qui in lib. 3. Contra Academicos de Platon. Div.
sic loquitur: *Vir sapientissimus, & eruditissimus tem-*
pum suorum qui ita locutus est, ut quaecumque di-
cerei magna fierent; & ea locutus est, ut quomodo-
cumque diceret, parva non fierent. Stilus Laconicus,
Asiatico spreto, diligatur; eloquentiaeque utili-
tas cognoscetur. Clasicorum Poëtarum elegan-
tiam velut de fonte uterque ebibit Pater; sed istam
in lucem clariorem Pater dedit uterque. Discat an-
xiosa juventus: Proficiant sermonis latini Dilectores:
breviloquentes fiant, triumphum Rheticæ con-
secuti sunt Patres. Quid mirum quod suum opus sit
magnum, quia ex una parte spatiösus, & vastum;
ex alia breve, & quia breve perutile. Propter obli-
gationem Cenforis concludo, quod istud opus est
utilissimum latinitatem scire cupienti; poëmata trif-
tia lyrice, comica, tragica, &c. anxianti; rheto-
rico stilo uti volenti. Propter hoc nihil contra puri-
tatem fidei invenio, nec contra bonos mores, aut
augusta edicta. Sic sentio (*salvo meliori*) in hoc
Conventu D. Bonaventuræ à 9. de Abril de 1761.

Signatur: Fr. Joseph de Jesus Maria.

LICENCIA DEL ORDINARIO.

NOS el Lic. D. Manuel Rubin de Zelis, Canónigo en la Santa Iglesia Cathedral de esta Ciudad de Palencia, Provisor, y Vicario General de ella, y su Obispado por el Ilmo. Sr. D. Andres de Bustamante Obispo de dicha Diócesis, Conde de Pernia, del Consejo de su Magestad, &c.

Por la presente, y por lo que à Nos toca damos licencia para que pueda imprimirse, y se imprima el libro, cuio titulo es: *De Arte Rhetorica libri quinque &c.* compuesto por el R. P. Domingo Decolonia, y añadido por el R. P. Joseph Juyen-
cio, ambos de la Compañía de Jesús, mediante, que habiendo visto, y reconocido de nuestra orden, y mandato, no parece que contiene cosa al-
guna contra nuestra Santa fe, y buenas costum-
bres. Dada en Palencia à 10. de Abril de 1761.

Lic. RUBIN.

Por su mandado
Bernardo Facundo Vazquez.

DON Joseph Antonio de Yarza Secretario del Rei N. Sr. su Escribano de Camara mas antiguo, y de Gobierno del Consejo.

Certifico, que habiendo visto por los Señores d'el el Libro intitulado, *Arte de Retorica*, su Autor el P. Domingo Decolonia de la Compañía de Jesùs, que con licencia de dichos Señores concedida à el P. Rector del mismo Colegio de la Villa de Villagarcia ha sido reimpresso, tafaron à siete mrs. cada pliego, y dicho libro parece tiene treinta y medio fin principios ni tablas, que à este respecto importa doscientos y trece mrs. y à el dicho precio y no mas mandaron se venda, y que esta certificacion se ponga al principio de cada libro, para que se sepa el à que se ha de vender. Y para que conste lo firmé en Madrid à veinte y tres de Diciembre de mil setecientos sesenta y uno.

D. Joseph Antonio de Yarza.

FIDES CORRECTORIS.

Pag.	lin.	errata.	corrige.
40.	17.	sigilatim	sigillatum.
49.	ult.	Amici	Amicis.
60.	3.	condonabuntur	condonabantur.
64.	14.	populusque	populoisque.
86.	13.	arbitrantut	arbitrantur.
144.	25.	utitut	utitur.
163.	13.	Ecloga 4.	Ecloga 9.
167.	21.	iræ,	ira.
277.	8.	calumnis ,	calumniis.
319.	6.	otimates	optimates.
346.	17.	cum fictione ?	cum fictione.
350.	15.	pingit	pingi.
387.	17.	Epopoje.	Epopœje.
396.	20.	nihil ,	nil.
403.	21.	indebile,	indelebile.

Liber, inscriptio cuius est : *De Arte Rhetorica*:
 Auctore P. Dominico Decolonia Societatis Jesu
 mendis cum his correspondet suo exemplari , &
 sic fidem facio Matriti die vigesimo secundo Octo-
 bris anno millesimo septingentesimo sexagesimo
 primo.

Dott. D. Emmanuel Gonzalez Oller,
 A C. M. Gen. Correct.

EL REY.

POR quanto por parte del Rector , y Religiosos del Colegio de la Compañía de Jesus de la Villa de Villagarcia de Campos , se representó en el mi Consejo había obtenido licencia d'el para reimprimir , y vender el Libro intitulado *De Arte Rhetorica libri quinque &c.* compuesto por el P. Domingo Decolonia de dicha Compañía , y recelando se le reimprimiesen , suplicó fuese servido concederle licencia , y Privilegio por tiempo de diez años para continuar en dicha reimpresion : y visto por los de mi Consejo (y como por su mandado se hicieron las diligencias , que por la Pragmatica ultimamente promulgada sobre la impresion de los libros se dispone) se acordó expedir esta mi Cedula , por la cual concedo licencia , y facultad al espresado Rector , y Religiosos del Colegio de la Compañía de Jesus de dicha Villa de Villagarcia de Campos , para que sin incurrir en pe-

pena alguna por tiempo de diez años primeros
siguientes, que han de correr, y contarse desde
el dia de la fecha de ésta , los susodichos , ó
la persona , que su poder tuviere , y no otra
persona alguna , pueda reimprimir ; y vender el
referido libro intitulado : *De Arte Rhetorica libri*
quinque &c. Su Autor el P. Domingo Decolonia
de dicha Compañía , con que se haga en papel
fino , y por el original , que en el mi Consejo
se vió , que ba rubricado , y firmado al fin de
D. Joseph Antonio de Yarza mi Secretario , y
Escribano de Camara mas antiguo , y de Gobierno
dél , con que antes que se venda se traiga ante
ellos juntamente con dicho original para que se
vea si la reimpresión está conforme à el ; traiendo
asimismo fé en publica forma , como por Cor-
rector por mi nombrado se vió , y corrigió dicha
reimpresión por el original , para que se tase el
precio à que se ha de vender : y mando al Im-
presor , que reimprimiere el referido Libro , no
reimprima el principio , y primer pliego , ni en-
trege mas , que uno solo con el original à los
dichos Rector , y Religiosos del Colegio de la
Compañía de Jesús de Villagarcia à cuia costa
se imprime , para efecto de dicha corrección , hasta
que primero esté corregido , y tafado el citado
Libro por los de mi Consejo ; y estandolo así ,
y no de otra manera , pueda reimprimir el princi-
picio , y primer pliego , en el cual seguidamente se
ponga esta licencia , y la aprobación , tasa , y
fé de erratas , pena de caer , è incurrir en las

Pragmaticas , y Leies de estos mis Reinos , que sobre ello tratan , y disponen : y mando , que ninguna persona sin licencia de los nominados Rector , y Religiosos , pueda reimprimir , ni vender el citado Libro , pena que el que le reúneprimiere haia perdido , y pierda todos , y cualesquier libros , moldes , y pertrechos , que el citado Libro tubiere , y mas incurra en la de cincuenta mil maravedis , y sea la tercera parte de ellos para la mi Camara , otra tercera parte para el Juez , que lo sentenciare , y la otra para el Denunciador ; y cumplidos los dichos diez años los referidos Rector , y Religiosos de la Compañía del Colegio de Villagarcia , ni otra persona en su nombre , quiero no use de esta mi Cedula , ni profigan en la reimpreſion del citado Libro sin tener para ello nueva licencia mia , so las penas en que incurren los Concejos , y personas , que lo hacen sin tenerla ; y mando a los de mi Consejo Presidentes , y Oidores de las mis Audiencias , y Chancillerias , Alcaldes , Alguaciles de la mi Casa Corte , y à todos los Corregidores , Asſistente , Gobernadores , Alcaldes Maiores , y Ordinarios , y otros Jueces , Justicias , Ministros , y personas de todas las Ciudades , Villas , y Lugares destos mis Reinos , y Señorios , y à cada uno , y cualquier de ellos en su distrito , y Jurisdicion , vean , guarden , cumplan , y egecuten esta mi Real Cedula , y todo lo en ella contenido , y contra su tenor , y forma no baian , ni pasen , ni confientan ir , ni pasar en manera alguna , pena


de la mi merced, y de cada cincuenta mil maravedis para la mi Camara. Dada en Aranjuez
à 7. de Julio de 1757.

TO EL REY.

Por mandado del Rei N. Sr.
*D. Agustín de Montiano,
y Lujando.*

L. SECTANUS SERM. I.
vers. 194.

Quid peccat mundus , nitidusque Colonia, cuius
Omnia scita ab Aristotele , & Cicerone revulsa,
Primævisque aliis , aureo cratero propinant
Consulibus dignam gravitatem , artemque loquendi?



ELEMENTA RHETORICÆ.

CAPUT PRIMUM.

DE FAEULA.

Quid est Fabula?

R. Est Oratio falsa veritatem effingens. Talis est apud Horatium (1) elegantissima illa Fabella equi, hominis opem adversus cervum implorantis :

Cervus equum, pugna melior, communibus herbis
Pellebat; donec minor in certamine longo
Imploravit opes hominis, frenumque recepit.
Sed postquam victor (2) violens discessit ab hoste,
Non equitem dorso, non frenum depulit ore.

A

Vi-

(1) Epist. 10. Lib. 1.

(2) Violens *præ* violentus, *vix parum usitata*.

Vide quām solerter Horatius sub illis Fabulæ involucris, & quasi integumentis, verum ac rectum nos doceat, & nos repente à levi illa in speciem narratiuncula ad veritatem traducat, tribus illis, qui sequuntur, versibus:

Sic qui pauperiem veritus, potiore metallis
Libertate caret, dominum vehet improbus, atque
Serviet æternum, quia parvo nesciet uti.

§. I. De variis Fabularum generibus.

Quot sunt genera fabularum?
R. Tria numerantur ab Aphthonio, & à Théone Sophista, qui Rheticas exercitationes, seu progymnasmata (sic enim appellant) Tironibus admodum utilia, nobis scripto reliquere. Tria igitur statuunt genera Fabularum. Aliæ sunt Rationales, aliæ Morales, aliæ Mixtæ.

§. II. De Fabula Rationali, sive Parabola.

Quid est Fabula Rationalis, seu Parabola?
R. Fabulæ Rationales sunt illæ, quibus ad mores instruendos, fingimus ab homine dictum, vel factum quidpiam; quod tamen re ipsa neque dictum fuit, neque factum, sed tamen dici, vel fieri omnino potuit. Hujusmodi sunt Divinæ illæ Parabolæ de Virginibus decem, de Divite & Inope, de Filio Prodigo, aliæque, quibus Christus Dominus Apostolos, & circumfusam plebem ad om-

omnem virtutem erudiebat : (1) *Sine Parabolis non loquebatur eis*, inquit Sacra Pagina ; tum ut se ad rudem populi captum accommodaret ; tum etiam in primis ut serviret Palæstinorum moribus, ac consuetudini, apud quos nimirum hujusmodi Parabolæ majorem in modum erant usitatæ, & unde in reliquas Orientis partes dimanarunt.

Rationales id genus Fabulas, seu Parabolas circiter duodecim habes in aureolo Phædri libello, Exemplum esto hæc, quam hic affero,

Æsopus, & petulans.

(2) *Æsopo* quidam petulans lapidem impegerat: Tanto, (3) inquit, melior: assem deinde illi dedit, Sic prosecutus: plus non habeo mehercule; Sed unde accipere possis, monstrabo tibi. Venit ecce dives & potens: huic similiter Impinge lapidem, & dignum accipies præmium. Persuasus ille fecit, quod monitus fuit. Sed spes fefellit impudentem audaciam; Comprensus namque pœnas persolvit cruce.

§. III. De Fabula Morali, sive Apologo.

Quid est *Fabula Moralis*, seu *Apologus*?

R. Est illa, quæ belluarum mores, & indeolem exprimit ad mores hominum informandos. Morales hujusmodi Fabulæ dicuntur *Æsop*.

A 2

pi-

(1) *Mattb.* 13. (2) *Lib.* 3. *Fab.* 4.
(3) Inquit *Æsopus*.

pice, non quod Æsopum auctorem habeant, ut vulgus existimat, cum longissimè ante Æsopi tempora (1) ab Homero (2) & Hesiodo fuerint usurpatæ; sed quod valde fuerint in deliciis Æsopo, qui illas admodum ingeniose traxavit. Interdum etiam non solum feræ, sed arbores quoque, & plantæ, mallei, incudes, aliæque res hujusmodi loquentes inducuntur. Exquisitissimum Fabulæ Moralis exemplum habes in hoc Phædri Apologo: (3)

Rana rupta, & Bos.

Inops, potentem dum vult imitari, perit.
 In prato quodam Rana conspexit Bovem;
 Et tacta invidia tantæ magnitudinis,
 Rugosam inflavit pellem; tum natos suos
 Interrogavit, an Bove esset latior?
 Illi negarunt: rursus intendit cutem
 Majore nisu; & simili quæsivit modo,
 Quis major esset? illi dixerunt, Bovem.
 Novissime indignata, dum vult validius
 Inflare sese, rupto jacuit corpore.

Quantopere valeat hic Apologus ad nostros mores emendandos, satis liquet ex primo versiculo:

Inops, potentem dum vult imitari, perit.

Qua-

(1) Æsopus floruit anno 185. à Roma condita.

(2) Homerus Poëtarum Græcorum princeps vixit mille circiter annis ante Christum.

(3) Lib. I. Fab. 23.

Quapropter vir antiquis comparandus Julius Cæsar Scaliger ait in sua Poëtica , Apologum sic appellari , quasi ἀπὸ λόγου λόγος , quasi si aliud palam , & aperte dicat , aliud clam innuat , doceatque , quemadmodum Allegoria.

Quid interest inter Apologum & Parabolam?

R. Hoc interest , quod Apologus sit earum rerum , quæ fieri omnino nequeunt ; neque enim belluæ loqui possunt ; Parabola vero est earum rerum , quæ si re ipsa non sunt , esse certe quidem potuerunt.

§. IV. De Fabula Mixta.

Quid est Fabula Mixta ?

R. Est ea , quæ ex Rationalis , & Moralis admixtione componitur , seu in qua homines cum brutis sermocinari finguntur . Eximum Fabulæ Mixtæ exemplum reperies apud Phæd. Lib. 4. Fab. 14.

Homo , & Colubra.

Qui fert malis auxilium , post tempus dolet .
Gelu rigentem quidam Colubram sustulit ,
Sinuque fovit contra se ipse misericors .
Namque , ut refecta est , necuit hominem protinus .
Hanc alia quum rogaret causam facinoris ,
Respondit : ne quis difcat prodeste improbis .

§. V. De legibus & artificio Fabulæ.

Quenam est prima , ac precipua Fabulæ lex ?

R. Prima hæc est lex , ut Fabula qualibet ad-

adjunctam habeat suam interpretationem , qua moralis illius sensus breviter explicetur : quam interpretationem quasi Fabulæ animam ausim appellare. Hæc interpretatio , si ponatur post Fabulam , vocatur *ἐπιμύθιον* , sive *Affabulatio* , si vero ponatur initio , vocatur *προμύθιον* , quasi *Præfabulatio* , si ita loqui fas esset. Ceterum initiatione ponas , an fine , non refert maximopere.

Quænam est altera lex Fabulæ ?

R. Secunda lex hæc est , ut Fabulæ narratio sit perspicua , probabilis , brevis , & jucunda. Verum de illis quatuor narrationis cum Fabulosæ , tum Historicæ virtutibus , itemque de Figuris , quibus utraque potest illuminari , capite subsequenti dicturi sumus.

Quomodo nam probabilis reddi potest , veroque similis Fabula , quæ nimirum ficta semper res est , & commentitia , ac persæpe etiam incredibilis , fideique prorsus absurda , quales sunt Apologi , qui bellum humum sermonem adsingunt ?

R. Fabulæ , quantumvis fictitiæ , quamdam tamen inesse probabilitatem , ac verisimilitudinem , si sua cuilibet animanti servetur indeoles , ac suum ingenium : si Vulpem facias versipellem , & subdolam ; Lupum rapacem , & truculentum ; Agnum mitem , & simplicem ; ac ceteræ demum belluae germanis , propriisque suis coloribus depingantur. Hinc sapienter monet Horatius in arte Poëtica , Poëtæ mendacia ad veritatem accedere omnino debere :

Ficta voluptatis causa sint proxima veris,

Et alio loco ejusdem Poëticæ :

Atque ita mentitur, sic veris falsa remiscet,
Primo ne medium, medio ne discrepet imum.

§. VI. De utilitate Fabulæ.

Quænam est utilitas Fabulæ?

R. Mirabiles quosdam usus habet Fabula, si in loco, ac tempore adhibeatur, ut par est. Primo enim mirum in modum valet ad exhilarandos, recreandosque auditorum animos, & ad conciliandam attentionem, quæ delectationi sollet esse conjuncta. Hac arte sibi paravit olim attentionem summus Orator Demosthenes.

Cum enim, licet de rebus gravissimis agens, fastidiose tamen, & oscitanter audiretur ab Atheniensibus, hac eleganti Fabella repente illorum aures, & animos ad audiendum convertit.

Aſini umbra. Fabula.

Adolescens aestivo tempore Athenis Megaram profecturus, Aſinum conduxit; cumque effervescente iam meridie, soiſ ardor cœpisset esse vehementior, vitandi caloris cauſa ſub Aſini ventrem ſe conjectit, ut umbram inde captaret. Aſt (1) Agafō, qui locaverat Aſinum, binc hominem ſerio proturbare, adſerens ſe nihil niſi Aſinum, non vero Aſini umbram locasse: alter contra

affir-

(1) Hispan. Arriero, Mozo de Alquiler.

affirmare, se cum Afino pariter illius umbram conduxisse: Cum autem vidisset Demosthenes captos hac Fabula Judices risu corruere, ac pene emori, discessum repente paravit, vel parare se finxit: sed roganibus enixe Atheniensibus, ut Fabulæ quod reliquum erat perficeret, *Itane vero, mutata voce inquit (1), de Afini umbra audire vultis, de rebus gravibus, & seriis non vultis?* & illos hoc artificio ab oscitantia, tædioque ad summam quamdam audiendi alacritatem traduxit.

Quænam est altera utilitas Fabulæ?

R. Fabula non solum valet ad delectandum, sed, quod caput est, facit etiam in primis ad docendum, ad movendum, & ad corruptos hominum mores emendandos. Hic etenim est, quem admodum Philosophiæ, sic etiam Fabulæ laudabilis scopus, ut utraque Mortales ad honestatis, ac virtutis studium à vitiorum fœditate traducat. Sed Philosophus, & Fabulator diversis itineribus eodem contendunt. Philosophus objurgat vitia palam, & aperte, sine ambagibus, & integumentis: unde offensi persæpe improborum animi salutare monitum aspernantur, ac respuunt, *castigatiq[ue] remordent*, ut inquit Juvenalis.

At Poëta vitium impugnat quasi aliud agens, ac veluti (2) per cuniculos; & monitorum austerritatem Fabularum condimento mitigat: ut nempe captus, ac delinitus innoxiae voluptatis illecebris ani-

(1) Plutarchus in vita Demosthenis.

(2) Hispan. *Por via de Mina.*

animus, salutarem medicinam libenter admittat,
ut sapienter monet Lucretius Lib. 1. & 4.

Nam veluti pueris absinthia tetra (1) medentes
Cum dare conantur, prius oras pocula circum
Contingunt mellis dulci flavoque liquore,
Ut puerorum ætas improvida ludificetur
Labrorum tenus; interea perpotet amarum
Absinthi laticem, deceptaque non capiatur;
Sed potius tali facto recreata valeat.
Sic ego, &c.

Quid enim aptius, v. g. ad inanium promissorum tumorem sine cuiusquam offensione castigandum, quam hæc lepidissima Phædri de monte parturiente Fabella (2)?

Mons parturiens.

Mons parturibat, gemitus immanes ciens;
Eratque in terris maxima exspectatio:
At ille murem peperit. Hoc scriptum est tibi,
Qui magna cum minaris, extricas nihil.

Quo etiam ingeniose alludit Horatius in arte Poëtica:

Quid dignum tanto feret hic promissor hiatu?
Parturient montes, nascetur ridiculus mus.

Ad

(1) Id est *Medici*.

(2) *Lib. 4. Fab. 18.*

Ad hanc Fabulæ utilitatem pertinet etiam quod ait idem Horatius in Sat. i. L. i.

Tantalus à labris sitiens fugientia captat
Flumina. Quid rides? mutato nomine, de te
Fabula narratur.

Quod veterum exemplo probari potest, Fabulam ad docendos animos, & affectus concitandos utilem esse?

R. Exemplo Menenii Agrippæ, qui plebem Romanam, quæ graviter offensa in montem Aventinum aliquando secesserat, ad Patrum auctoritatem, concordiamque revocavit narratiuncula Apologi de membris humanis adversus stomachum conspirantibus; & quod nec legum, nec magistratus auctoritas potuerat, id fictitiæ narrationis blandimento perfecit. Apologum sic narrat T. Livius Lib. 2.

Venter, & reliqua humani Corporis membra. Apologus.

Tempore quo in homine non, ut nunc, omnia in unum consentiebant, sed singulis membris suum cuique consilium, suus sermo fuerat, indignatas reliquas partes, sua cura, suo labore, ac ministerio ventri omnia queri, ventrem in medio quietum nibil aliud quam datis voluptatibus frui (1), conspirasse inde, ne

(1) *Supple* ajebat, vel narrabat.

manus ad os cibum ferrent, nec os acciperet datum, nec dentes conficerent. Hac ira dum ventrem fame domare vellent, ipsa una membra, totumque corpus ad extremam tabem venisse. Inde apparuisse, ventris quoque haud sègne ministerium esse; nec magis ali, quam alere eum, reddentem in omnes corporis partes hunc, quo vivimus, vigemusque, divisum pariter in venas, mature confecto cibo, sanguinem. Comparando hinc quām intestina corporis seditio similis esset iræ plebis in Patres, flexit mentes hominum.

CAPUT SECUNDUM.

DE NARRATIONE.

Quid est Narratio?

R. Est rei gestæ, vel quasi gestæ exposicio. Dicitur *rei gestæ*, vel *quasi gestæ*, ut nempe Narrationem tum Historicam, tum Fabulosam complectatur hæc nostra definitio.

§. I. De virtutibus Narrationis.

Quænam sum virtutes Narrationis?

R. Quatuor à Tullio recensentur: perspicuitas, probabilitas, brevitas, & suavitas.

Quomodo perspicua fit Narratio?

R. Fiet perspicua. 1. Si temporum servetur ordo, adeo ut quod primum gestum est, primum etiam referatur.

2. Si verbis propriis, & usitatis utamur.
3. Si res non interrupte narretur.
4. Denique si diligenter vitetur omnis verborum ambiguitas, qualis esset ista, v. gr. *Ajunt Regem*
(1) *Pyrrhum Romanos viciisse*. Quis enim inde victor, quis vicitus intelligi possit?

Quantum porro eniti, ac contendere debeat Orator, ut perspicue narret, & aperte, facile intelligere poteris ex aureo illo Fabii Quintiliani præcepto: *Prima sit Orationis virtus perspicuitas*. Quo spectat etiam quod eodem capite inculcat idem Fabius: *Dilucida, & negligenter quoque audientibus aperta sit . . . ut in animum, tamquam sol in oculos, etiam si non intendatur, incurrit*. Quare non ut intelligere possit auditor, sed ne omnino possit non intelligere curandum.

Quod si obscuritatis vitio laboret Narratio, iure ac merito cadet in illius auctorem, quod de obscurissimo quodam Scriptore jactatum est à nobilissimo (2) Poëta:

*Quid juvat obscuris involvere scripta latebris?
Ni pateant animi sensa, tacere potes.*

Quomodo fiet probabilis narratio?

- R. 1. Si is, qui narrat, sit notæ probitatis, & fidei.
2. Si rei gestæ seriem exponat sine fuso: qua sim-

(1) *Pyrrhus fuit Epirotarum Rex fortissimus, qui contra Romanos pro Tarentinis sex annos bellum gessit,*

(2) *Scævola Sammarthano.*

simplicitate nimirum , atque candore plus multo valebit ad persuadendum , quam aliis calamistris , lenociniis , & hyperbole.

3. Si nihil adferat fidei absonum , & quod abhorreat à communi hominum sensu ; quia ut recte admonet Horatius in arte Poëtica,

Quæcumque ostendis mihi sic , incredulus odi.

Quod si forte rei veræ , sed incredibili fidem facere velis , usurpare poteris sapiens illud cuiusdam Veteris dictum : *Multa esse vera , que tamen non sint verisimilia ; & probabile omnino esse , quam plurima contra probabilitatem contingere.*

4. Denique si clare , aperteque exponas rerum circumstantias , & adjuncta personarum , locorum ac temporum ; unde vel maxime pendet facti probabilitas. Ita Cicero in mirabili illa Narratione Miloniana , probabile reddit à circumstantiis personarum quod narrat de insidiis Miloni à Clodio paratis. *Cur agitur , inquit , vietus est (Clodius) ? Quia non semper viator à latrone , nonnunquam etiam latro à viatore occiditur : quia quamquam paratus in imparatos Clodius , tamen mulier inciderat in vios.*

Quid factō est opus , ut brevis sit Narratio ?

R. Brevis erit , si narrandi initium altius non repetas , & ab ovo . , ut ajunt : quemadmodum ineptus ille , quem ridet Horatius :

Qui gemino bellum Trojanum orditur ab ovo.

Sed

Sed si inde sumas exordium , unde necesse est. 2. Si non inutiles , putidasque circumstantias , quæ nihil faciant ad rem , in Narrationem tuam infarcias. Quid enim opus est dicere , v. gr. *In portum veni , navem paratam adspexi , de pretio conveni , sublatæ sunt anchoræ , è portu solvi ?* Satis erat dixisse : è portu solvi .

Vide tamen etiam atque etiam , ne nimia brevitas obscuritatem adferat orationi : ut observat Fabius. *Vitanda , inquit , illa Sallustiana brevitas , & abruptum orationis genus.* Et alio loco : *Narratio , inquit , præcisa non tam Narratio vocari potest , quam confusio.* Audi rursus Horatium nostrum:

— Brevis esse labore:
Obscurus fio.

Qua ratione suavis reddetur Narratio ?

R. Suavis erit , 1. si utamur verbis leniter , & numerose sonantibus. 2. Si ita collocentur verba , ut nec hiulcus , nec asper sit illorum concursus. 3. Si , quæ narramus , sint magna , nova , & inexpectata. 4. Si adhibeantur certæ quædam narrandi formulæ Tullio perfamiliares ; cum , v. gr. pro tempore præterito præsens usurpatur ; item cum plures infinitivi subauditio verbo junguntur , ut cum ait : *Rex primo nihil metuere , nihil suspicari , dies unus , & alter intercedere.* Ita etiam Cæsar , Lib. 1. de Bello Gallico : *Divitiacus multis cum lacrimis Cæarem complexus obsecrare cœpit , ne quid gravius in fratrem statueret : scire se illa esse vera ,*

*nec quemquam ex eo plus quam se doloris capere.
Supple, dixit. Ita Virgilius in mirificis hisce ver-
sibus Lib. VI. Aeneidos:*

At Danaum Proceres, Agamemnoniaque Phalanges,
Ut videre virum, fulgentiaque arma per umbras,
Ingenti trepidare metu: pars vertere terga,
Ceu quondam petiere rates; pars tollere vocem
Exiguam: incœptus clamor frustratur hiantes.

5. Denique suavis erit Narratio, si diversis
figuris illuminetur, & si habeat admirationes,
exspectationes, suspensiones, exitus inopinatos, &
interpositos motus animorum, dolorem, lætitiam,
metum, cupiditatem.

Harum omnium rerum admirabile quoddam
exemplum habes in jucundissima illa Narratione
de Dionysio Syracusarum Tyranno, & de Damo-
cle quodam illius Parasito, in quam intueri satis
non poterunt Tirones, ut suaviter, & festive nar-
rare discant.

Dionysius Syracusarum Tyrannus, & Damocles.

Jucundæ Narrationis Exemplum ex Tuscul. Lib. 5.

CUM quidam ex ejus assentatoribus Damocles com-
memoraret in sermone copias ejus, opes, ma-
jestatem, dominatus, rerum abundantiam, mag-
nificentiam ædium regiarum, negare et que umquam bea-
tiorem quemquam fuisse: vi/ ne igitur, inquit, Damo-
cle,

ele, quoniam hæc te vita delectat, ipse eamdem degustare, & fortunam experiri mean? Cum se ille cupere dixisset, colloqui jussit hominem in aureo lecto, strato pulcherrimo, (1) textili stragulo magnificis operibus picto, (2) abacosque complures ornavit argento, auroque cælato. Tum ad mensam eximia forma pueros delectos jussit consistere, eosque nutum ejus intuentes diligenter ministrare. Aderant unguenta, corone; incendebantur odores; mensæ conquisitissimis epulis extreabantur. Fortunatus sibi Damocles videbatur. In hoc medio apparatu fulgentem gladium è (3) lacunari, seta equina aptum demitti jussit, ut impenderet illius beatæ cervicibus. Itaque nec pulchros illos ministratores aspiciebat, nec plenum artis argentum, nec manum porrigebat ad mensam: jam ipsæ defluebant coronæ: denique exoravit Tyrannum, ut abire liceret, quod jam beatus nollet esse. Satis ne videtur declarasse Dionysius, nihil ei esse beatum, cui semper aliquis terror impendeat?

Ad hanc suavissimam Narrationem allusit Horatius, cum ait Odarum Lib. 3.

Districtus ensis cui super impia
Cervice pendet, non Siculæ dapes
Dulcem elaborabunt saporem,
Non avium, citharæque cantus
Somnum reducent &c.

§

(1) Hisp. con tapices bordados con gran primor.

(2) Aparadores.

(3) Del Zequizamj.

§. II. De Schematis, seu Figuris, quibus
illuminari potest Narratio.

Quid est Figura?

R. Figura, seu Schema est ornementum quoddam orationis, seu loquendi modus illustrior, à & communi consuetudine remotus, cuiusmodi sunt hæc Ciceronis verba: *o Dii immortales, ubinam gentium sumus! ... o scelus! o portentum in ultimas terras amandandum!* Itemque illa Virgilii verba in Ecloga II.

Ali Corydon, Corydon, quæ te dementia cepit?

Vel cum idem Virgilius Æneid. VI. Sibyllam ita loquentem inducit:

— Bella, horrida bella.

Et multo Tibrim spumantem sanguine cerno.

Quis enim non videt, hæc orationis lumina, & illas dicendi quasi faces in quotidiano communique sermone adhiberi nequaquam solere?

Quibus potissimum Figuris erit illuminanda narratio, ut sit suavis?

R. Præcipuae Narrationis Figuræ sunt Hypotyposis, Suspensio, five Sustentatio, Exclamatio, Comunicatio, & Sermocinatio, five Dialogismus.

Quid est Hypotyposis.

R. Est figura, qua aliquid tam vivis, spirantibusque, ut ita loquar, coloribus pingitur, atque

narratur, ut non tam audiri, vel legi, quam spectari, & oculis quasi subjici videatur. Ita Cicero V. in Verrem Gavii cuiusdam Civis Romani supplicium narrat per Hypotyposim: *Cædebatur virginis in medio foro Messanæ* (1) *Civis Romanus;* *cum interea nullus gemitus, nulla alia vox istius miseri inter dolorem, crepitumque plagarum audiebatur, nisi hæc: Civis Romanus sum.*

Sic etiam Virgilius narrator, & rerum imitator plane mirificus, Didonis, & Aeneæ venationem describens, rem quasi sub oculos ponit his versibus egregiis:

— Ostroque insignis, & auro
Stat sonipes, ac frena ferox spumantia mandit.

Idemque Poëta libro quinto, Entelli, & Daretis pugnam pæne sub adspectum ita subjicit:

Hæc fatus (2) duplicum ex humeris rejicit amictum,
Et magnos membrorum artus, magna ossa (3) la-
certosque

Exuit, atque ingens media consistit Arena.
Constitit extemplo in digitos arrectus uterque,
Brachiaque ad superas interritus extulit auras.

• • • • • • • • • • • •
Præcipitemque Daren ardens agit aquore toto,

Nunc

(1) *In Sicilia, vulgo Mecina.*

(2) Entellus.

(3) *Versus hypermetre.*

Nunc dextra ingeminans i^ctus , nunc ille sinistra.
 Nec mora, nec requies: quām multa grandine nimbi
 Culminibus crepitant, sic densis i^ctibus Heros
 Creber utraque manu pulsat, versatque Daret.

Ast illum fidi æquales genua ægra trahentem,
 Ja^ctantemque utroque caput, crassumque cruentem
 Ore rejectantem, mixtosque in sanguine dentes,
 Ducunt ad naves.

Quid est Suspensio?

R. Suspensio , seu Sustentatio , est Figura , qua Orator ad sibi conciliandam attentionem , & ad excitandos , atque erigendos auditorum animos , illos tenet aliquamdiu suspensos , & incertos quid dicturus sit. Ita Tullius contra Verrem : *Eiamnum mibi exspectare videmini , judices , quid deinde factum sit ... Exspectate facinus quām vultis improbum ; vincam tamen exspectationem vestram.*

Quid est exclamatio?

R. Est vocis elatio , sive contentio , qua interjectione vel exhibita , vel subaudita , vehementiorem animi motum significamus , & rei magnitudinem exprimimus. Ita Tullius , post narratum indignissimum illud Gavii , licet Civis Romani , supplicium , de quo paullo supra , in has doloris , & indignationis voces subito erumpit : (1) *O non dulce libertatis ! O jus eximum nostræ civitatis ! O lex Porcia , legesque Semproniae ! O graviter desiderata ,*

(1) *cic. in Verrem.*

& aliquando reddita plebi Romane Tribunitia potestas

Eodem plane modo Æneas apud Virgilium Lib. 2.
equi Trojani fatalem ingressum primo narrat:

Dividimus muros, & moenia pandimus urbis.
Accingunt omnes operi, pedibusque rotarum
Subjiciunt lapsus, & stupea vincula collo
Intendunt. Scandit fatalis machina muros
Fœta armis: circum pueri, innuptaque puellæ
Sacra canunt, funemque manu contingere gaudent.
Illa subit, mediaque minans illabitur urbi.

Deinde per summum dolorem repente sic exclamat:

O patria, ò divum domus Ilium, & inclita bello
Moenia Dardanidum! quater ipso in limine portæ
Substitit, atque utero sonitum quater arma dedere.
Instamus tamen immemores, cæcique furore,
Et monstrum infelix sacrata fistimus arce.

Quid est communicatio?

R. Est figura, qua Orator causæ suæ confidens deliberat cum iis ipsis, apud quos, vel contra quos dicturus est, illos numirum consulens quid acturus sit, vel etiam quid ipsimet in simili causa esset acturi. Ita Cicero per suminam fiduciam videtur consilia sua communicare cum adversario suo Verre, illumque quasi consulere in hunc modum: *si tu apud Persas, aut in extrema India deprehensus Verres, ad supplicium ducerere, quid alius*

clamitares, nisi te civem esse Romanum (1)? & si tibi ignoto apud ignotos, apud Barbaros, apud homines in extremis, atque ultimis gentibus positos, nobile & illustre apud omnes nomen tuæ civitatis profuisset; ille quisquis erat, quem tu in crucem rapiebas, qui tibi esset ignotus, cum civem se Romanum esse diceret, apud te Prætorem, si non effugium, ne moram quidem mortis mentione a que usurpatione civitatis adsequi potuit?

Quid denique est Sermocinatio, seu Dialogismus?

R. Est Figura, qua duo, vel plures homines inducuntur loquentes, aut secum ipsi, aut cum aliis. Lepidum illius exemplum habes in hac per elegantissimam Narratione Ciceroniana libri primi Tusculanarum quæstionum.

Diogenes, & amici. Narratio per Dialogismum.

Cum ab amicis rogaretur Diogenes, ubi vellet inhumari: Projicie me, inquit, inhumatum. Tum amici: Volucribusne, & feris? Minime vero, inquit, sed bacillum prope me, quo abigam, ponitote. Qui (2) poteris? illi; non enim senties. Quid igitur mibi ferarum laniatus obeyit nihil sentienti?

Nec minus festivum videbitur, quod hic subjicio, aliud exemplum ex eodem Tullio, Lib. 2. de Orat.

Sci-

(1) Una hac voce D. Paulus civis Romanus crucifixus, & mortem vitavit. Act. 22.

(2) Pro Quomodo.

Scipio (1) Nasica, & Ennius Poëta.

*Scipio Nasica cum ad Poëtam Ennium venisset, ei-
que ab ostio quærenti Ennium, ancilla dixisset domi
non esse, Nasica sensit illam domini jussu dixisse, &
illum intus esse. Paucis post diebus cum ad Nasicam
venisset Ennius, & eum à janua quæreret, exclamat
Nasica se domi non esse. Tum Ennius: Quid? ego non
cognosco vocem, inquit, tuam? Hic Nasica: Homo es
impudens: ego cum te quærerem, ancillæ tuæ credidi
te domi non esse: tu mibi non credis ipsi?*

§. III. Varia Narrationum genera, & selecta
illarum Exempla.

Quotuplex est Narrationis genus?

R. Triplex: alia est enim Narratio Poëti-
ca, alia Historica, alia Civilis, & Orato-
ria. Narratio Poëtica rem fictam exponit; His-
torica rem gestam; Civilis, & Oratoria rem ex-
ponit, quæ in controversiam adducitur.

Quid differt inter hæc tria Narrationum genera?

R. Hoc potissimum interest, quod His-
toricus, & Orator ordinem temporis, & rei gestæ
seriem in narrando sequantur, & servent; contra
quam facit Poëta, qui etiam à fine, aut à me-
dio rem solet ordiri, quomodo Virgilius ab
anno septimo excidii Trojani suam Æneidem auf-
pi-

(1) Erat cognomen Scipionis illius, qui etiam Corculum vocabatur ob summam prudentiam.

picatur; ut liquet ex hisce Didonis verbis ad Æneam, ad calcem Libri primi:

— Nam te jam septima portat
Omnibus errantem terris, & fluctibus æstas.

2. Hoc interest, quod Historicus veritatem conjectetur, Orator verisimilitudinem; Poeta vero commentitiis etiam fabulis veritatem adsparget.

3. Denique hoc interest, quod Historica Narratio sit ferme simplex, brevis, ac nuda; Orationia sit ornatior, & fusior; Poëtica vero ornamentis abundet, & omnibus artis coloribus picta sit, atque polita.

Adfer ex veteribus illustre quodpiam exemplum Narrationis Poëticæ.

R. Instar omnium esto Ovidiana illa Narratio de Dædalo, & de infelici Icaro, in qua omnes, quas diximus, virtutes dotesque optimo jure miraberis.

Dædalus, & Icarus. Narratio Poëtica.

Metamorph. Lib. 8.

(1) Dædalus interea Creten, longumque perosus Exsiliū, taetisque (2) loci natalis amore, Clausus erat pelago. Terras licet, inquit, & undas Obs-

(1) *Dædalus in labyrinthum, cuius auctor fuerat, conjectus fuit à Minoe, ab Theseus ejus consilio servatum.*

(2) *Patriæ, Athenarum.*

Obstruat, at cœlum certe patet; ibimus illac:
 Omnia possideat, non possidet aëra Minos.
 Dixit, & ignotas animum dimitit in artes,
 Naturamque novat: nam ponit in ordine pennas
 A minima cœptas, longam breviore sequente,
 Ut clivo crevisse putas: sic rustica quondam
 Fistula disparibus paullatim surgit avenis.
 Tum lino medias, & ceris alligat itas,
 Atque ita compositas parvo curvamine flectit,
 Ut veras imitetur aves. Puer Icarus una
 Stabat, & ignarus sua se tractare pericla,
 Ore residenti, modò, quas vaga moverat aura,
 Captabat plumas, flavam modo pollice ceram
 Mollibat, iusquæ suo mirabile patris
 Impediebat opus. Postquam manus ultima cœpto
 Imposita est, geminas opifex libravit in alas
 Ipse suum corpus, motaque pependit in aura.
 Instructus & natum; medioque ut limite curras,
 Icare, ait, moneo: ne, si demissior ibis,
 Unda gravet pennas; si celsior, ignis adurat.
 Inter utrumque vola: nec te spectare (1) Bootem,
 Aut (2) Helicem jubeo, strictumq. (3) Orionis enim.
 Me duce carpe viam: pariter præcepta volandi
 Tradit, & ignotas humeris accommodat alas.
 Inter opus, monitusque genæ maduere seniles,
 Et patriæ tremucre manus: dedit oscula nato
 Non iterum repetenda suo; pennisque levatus

An-

(1) *Signum septentrionale.*(2) *Ursam majorem.*(3) *Sidus quod pingitur cum ense stricto.*

Antevolat , comitique timet (velut ales , ab alto
 Quæ teneram prolem produxit in aëra nido)
 Hortaturque sequi , damnosasque erudit artes,
 Et movet ipse suas , & nati respicit alas.

Cum puer audaci cœpit gaudere volatu,
 Deseruitque Ducem , Coelique cupidine tactus
 Altius egit iter. Rapidi vicinia solis
 Mollit odoratas pennarum vincula ceras.
 Tabuerant ceræ ; nudos quatit ille lacertos ,
 (1) Remigioque carens non ullas percipit auras ;
 Oraque cœrulea patrium clamantia nomen
 Excipiuntur aqua , quæ (2) nomen traxit ab illo.
 At pater infelix , nec jam pater , Icare , dixit ,
 Icare , dixit , ubi es ? qua te regione requiram ?
 Icare , dicebat , pennas aspexit in undis ;
 Devovitque suas artes ; corpusque sepulcro
 Condidit ; & tellus à nomine dicta sepulti est.

Brevioris narrationis exemplum tibi suppeditat Horatius in Satyra 1. Lib. 1. , ubi narrat acerbissimam mortem avari illius Umidii , qui nummos plenis modiis metiebatur :

Umidius quidam (non longa est fabula) dives ,
 Ut metiretur nummos ; ita sordidus , ut se
 Non umquam servo melius vestiret , ad usque
 Extremum tempus , ne se penuria victus

Oppri-

(1) Alis , quibus quasi remigabat .

(2) Icarium mare vocatur .

Opprimeret metuebat. At hunc liberta securi
Divisit medium.

Nec minus elegans narrationis exemplum ha-
bes apud Virgilium L. 4. Georgicorum , ubi de
Corycio sene hæc narrat :

Namque sub Oebaliæ memini me turribus altis
Corycum vidisse senem , cui pauca relicti
Jugera ruris erant : nec fertilis illa juvencis,
Nec pecori opportuna seges , nec commoda Baccho.
Hic rarum tamen in dumis olus , albaque circum
Tilia , verbenasque premens, vescumque papaver,
Regum æquabat opes animis , feraque revertens
Nocte domum , dapibus mensas onerabat inemptis.
Primus vere rosam , atque autumno carpere poma;
Et cum tristis hiems etiam nunc frigore saxa
Rumperet , & glacie curius frenaret aquarum,
Ille comam mollis jam tum tondebat acanthi ,
Æstatem increpitans feram , zephyrosque morantes.

His addito mirabiles illas narrationes de Niso,
& Euryalo Æneidos 9.

Niſus erat portæ custos , acerrimus armis , &c.

De Laocoonte à serpentibus interempto L. 2.
Laocoon ductus Neptuni sorte sacerdos , &c.

De Priami morte L. 2.

Forfitan & Priami fuerint quæ fata requiras , &c.

De

De' Harpyis L. 3.

At subitæ horrifico lapsu de montibus adsunt &c.

De rusticana cœna Philemonis , & Baucidis
Ovidii Metamorphos. L. 8.

Sed pia Baucis anus , parilique ætate Philemon, &c.

De Polyphemo , cuius barbaram , & immanem
feritatem sic exprimit mirum in modum Achæ-
menides Æneid. 3.

Vidi egomet duo de numero cum corpora nostro
Prensa manu magna , medio resupinus in antro,
Frangeret ad saxum , sanieque adspersa natarent
Limina : vidi atro cum membra fluentia tabo
Manderet , & tepidi tremerent sub dentibus artus.

Cedo vetus quoddam exemplum Narrationis Historicæ.

R. Habes in veteribus Historiæ Romanæ Scrip-
toribus Narrationes bene multas , tam singulari
opera , artificioque elaboratas , ut nihil supra : in
T. Livio 1. Sabinarum raptum. 2. Horatiorum,
& Curiatiorum pugnam. 3. Lucretiæ mortem , exac-
tos à Bruto Tarquinios , interemptosque à patre
proprios filios. 4. Audax Mucii Scævolæ facinus
adversus Regem Porsenam. 5. Varios Coriolani
eventus. 6. Pugnam Cannensem. 7. Annibalis cum
Scipione congressum Ephesi apud Antiochum Re-
gem. 8. Supra cetera vero omnia , mirificum illud
ejusdem Annibalis iter in Italiam per Hispaniam,
per

per Pyrenæos, per Gallias, per Alpes, & Apenninum; quod exquisitissimum quodam artis opus existimo.

Habes præterea in Sallustio pugnam adversus Catilinam; in Q. Curtio Tyri obsidionem, singularē Abdalonymi eventum, Alexandri magni mortem, exercitus consternationem, & Reginæ Syfigambis dolorem, ac interitum &c.

Verum sat esto ex omnibus illis Narrationibus unam, aut alteram hoc loco commemorare. Tu ex duabus illis dīce omnes.

Horatiorum pugna cum Curiatiis.

Narratio Historica. Ex Livii Histor. Lib. I.

Datur signum; infestisque armis, velut acies, tertii juvenes magnorum exercituum animos gerentes concurrunt. Nec his, nec illis periculum suum, sed publicum imperium, servitiumque obversatur animo; futuraque ea deinde patriæ fortuna, quam ipsi fecissent. Ut primo statim concursu increpere arma, micantesque fulsere gladii, horror ingens spectantes perstringit, & neutro inclinata spe, torpebat vox, spiritusque.

Conseratis deinde manibus, cum jam non motus tantum corporum, agitatioque ances telorum, armorumque sed vulnera quoque, & sanguis spectaculo essent, duo Romani super alium aliis, vulneratis tribus Albanis, expirantes corruerunt. Ad quorum casum cum clamasset gaudio Albanus exercitus, Romanas legiones

jam

jam spes tota, nondum tamen cura deseruerat, exanimis vice unius, quem tres Curiatii circumsteterant. Forte is integer fuit, ut universis solus nequaquam par, sic adversus singulas ferox. Ergo, ut segregaret pugnam eorum, capessit fugam, ita ratus sequuturos, ut quemque adfectum vulnere corpus fineret. Jam aliquantum spatii ex eo loco, ubi pugnatum est, aufugerat; cum respiciens videt magnis intervallis sequentes; unum haud procul ab se abesse: in cum magno impetu redit; & dum Albanus exercitus clamamat Curiatiis, ut opem ferant fratri, jam Horatius cesa hoste, victor secundam pugnam petebat. Tunc clamore (qualis ex insperato faventium solet) Romani adjuvant militem suum, & ille defungi prælio festinat. Prius itaque quam alter, qui nec procul aberat, consequi posset, & alterum Curiatum conficit.

Jamque æquato marte singuli supererant, sed nec spe, nec viribus paties. (1) Alterum intactum ferro corpus, & geminata vittoria ferocem in certamen tertium dabant: alter fessum vulnere, fessum cursu trahens corpus, viclusque fratrum ante se strage, victori objicitur hosti; nec illud prælium sicut Romanus exultans, Duos, inquit, fratrum Manibus dedi; tertium caussam belli bujusce, ut Romanus Albano imperet, dabo. Male sustineni arma gladium superne jugulo desigit, jacentem spoliat. Romani ovantes, ac gratulantes Horatium accipiunt, eo majore cum gaudio, quo proprius metum res fuerat. Ma-

(1) Hæc est recta syntaxis: *corpus intactum ferro*, & *vittoria geminata* dabant alterum ferucem in certamen tertium.

Malus Pythii cuiusdam do!us.

Narratio Historica. Ex Cic. Lib. 3. Offic.

C. *Canius, eques Romanus nec infacetus, & sa-*
tis litteratus, cum se Syracusas otiandi, ut
ipse dicere solebat, non negotiandi cauſa-
contuliffet, dicitabat se hortulos aliquos velle emere,
quo invitare amicos, & ubi se oblectare sine interpel-
latoribus posset. Quod cum percrebuisseſſet, Pythius ei
quidam, qui (1) argentariam faceret Syracusis, ve-
nales se quidem hortos non habere, sed licere uti Ca-
nio, si vellet, ut suis, & simul ad cœnam hominem
invitavit in hortos in posterum diem. Cum ille pro-
misſisset, tum Pythius qui eſſet, ut argentarius, apud
omnes ordines gratiosus, pīcatores ad ſe convocavit,
& ab his petivit, ut ante ſuos hortulos poſtridie pi-
carentur, dixitque quid eis facere vellet.

Ad cœnam tempore venit Canius: opipare à Py-
thio apparatus convivium erat: cymbarum ante occu-
los multitudo: pro ſe quisque quod ceperat, adſere-
bat: ante pedes Pythii pīces abjiciebantur.

Tum Canius, Quæſo, inquit, quid eſt hoc, Py-
thi, tantumne pīcium? tantumne cymbarum? & ille,
quid mirum? inquit, hoc loco eſt Syracusis quidquid
eſt pīcium. Hic (2) aquatio: hac villa iſti carere
non poſſunt.

In-

(1) Hisp. Banqueros, que tratan en cambios.

(2) Aquí hacen Aguada.

Incensus Canius cupiditate contendit à Pythio ut venderet. Gravate ille primo : quid multa ? impetrat , emit homo cupidus , & locuples tanti , quanti Pythius voluit , & emit instruc̄t̄os : (1) nomina facit ; negotium conficit.

Invitat Canius postridie familiares suos. Venit ipse mature , scalmum nullum videt (2) ; querit ex proximo vicino , num feriæ quadam piscatorum essent , quod eos nullus videret. Nullæ (quod sciām) inquit ille ; sed hic piscari nulli solent ; itaque beri mirabar quid accidisset. Stomachari Canius. Sed quid faceret ? Nondum enim (3) Aquilius Collega , & familiaris meus protulerat de dolo malo formulas . . . Ergo & Pythius , & omnes aliud agentes , aliud simulantes , improbi & malitiosi sunt.

Cedo denique Exemplum Narrationis Oratoria.

R. Laudatur ab omnibus & in primis à Quintiliano celebris illa Miloniana Narratio , qua Cicero suspicionem infidiarum à Milo ne in Clodium tam callide , tamque ingeniose detorquet. Sic autem rem adgreditur.

Narratio Miloniana.

Milo autem , cum in Senatu fuisset eo die quoad Se-

na-

(1) Hisp. Hace la escritura.

(2) Ni rastro de barcos.

(3) Aquilius præstans jurisconsultus , prætor fuerat simul cum Cicerone.

natus dimissus est, domum venit; calceos, & vestimenta mutavit, paulisper, dum se uxor (ut sit) comparat, commoratus est. Deinde profectus est id temporis, cum jam Clodius, siquidem eo die Romam venturus erat, redire potuisset. Obviam fit ei Clodius expeditus in equo, nulla rheda, nullis impedimentis, nullis Græcis comitibus, ut solebat; sine uxore, quod numquam fere: cum (1) hic insidiator, qui iter illud ad cædem faciendam apparasset, cum uxore veheretur in rheda, (2) penulatus, vulgi magno impedimento, ac muliebri, & delicato ancillarum, puerorumque comitatu.

Fit obviam Clodio ante fundum ejus, hora fere undecima, aut non multo secus. Statim complures cum telis in hunc faciunt de loco superiore impetum: adversi rhedarium occidunt. Cum autem hic de rheda, rejecta penula, desiluisse, seque acri animo defendebret; illi qui erant cum Clodio, gladiis eductis, partim recurrere ad rhedam, ut à tergo Milonem adorarentur; partim, quod hunc jam interfelum putarent, cedere incipiunt ejus servos, qui post erant: ex quibus qui animo fidelí in dominum erant, & præsentes fuerunt, partim occisi sunt, partim, cum ad rhedam pugnari viderent, & domino succurrere prohiberentur, Milonemque occisum etiam ex ipso Clodio audirent, & ita esse putarent, fecerunt id servi Milonis (dicam enim non derivandi criminis cauſa sed ut factum est) neque imperante, neque sciente,

NC-

(1) Milo, ironice.

(2) Penula, seu pallio obvolutus.

neque præsente domino, quod suos quisque servos in talre facere voluisse.

Hæc, sicut exposui, ita gesta sunt, Judices; insidiator superatus; vi victa vis, vel potius oppressa virtute audacia est.

Miloniana illa Narratione nihilo inferiorem existimo hanc alteram Narrationem, qua Tullius Verris furtum ita describit L. 4. in Verrem.

Candelabrum è gemmis clarissimis opere mirabiliter perfectum, Reges hi quos dico, Romam cum adtulissent, ut in Capitolio ponerent; quod nondum etiam perfectum templum offenderant, neque ponere potuerunt, nec vulgo ostendere, ac proferre voluerunt: ut & magnificentius videretur, cum suo tempore in cella Jovis Optimi Max. poneretur, & clarius, cum pulchritudo ejus recens ad oculos hominum, atque integras perveniret. Statuerunt id secum in Syriam reportare, ut cum audissent, simulacrum Jovis Optimi Maximi dedicatum, legatos mitterent, qui cum ceteris rebus illud quoque eximium, atque pulcherrimum donum in Capitolum adsererent. Pervenit res ad istius aures, nescio quomodo; nam Rex celatum voluerat, non quod quidquam metueret, aut suspicaretur, sed ut ne multi ante illud perciperent oculis, quam populus Romanus. *Iste* petit à Rege, & eum pluribus verbis rogat, ut id ad se mittat; cupere se dicit inspicere, neque aliis videndi potestatem esse facturum.

Antiochus, qui animo & puerili esset, & regio, nihil de istius improbitate suspicatus est: imperat suis, ut id in prætorium involutum quam occultissime deferrent. Quo posteaquam adulterunt, involucrisque

rejectis constituerunt, iste clamare caput, dignam rem esse regno Syriæ, dignam regio munere, dignam Capitolio. Eienim erat eo splendore, qui ex clarissimis, & plurimis gemmis esse debebat: ea varietate operum, ut ars certare videretur cum copia: ea magnitudine, ut intelligi posset, non ad hominum apparatus, sed ad amplissimi templi ornamentum esse factum. Quod cum satis jam perspexisse videretur, tollere incipiunt, ut referrent. Ille ait, se velle illud etiam atque etiam considerare: ne quaquam se esse satiatum. Jubet illos discedere, & candelabrum relinquere. Sic illi tum inanes ad Antiochum revertuntur.

Rex primo nihil metuere, nihil suspicari. Dies unus, alter, plures: non referri. Tum mittit Rex ad ipsum, si sibi videatur, ut reddat. Jubet iste posterius ad se reverti. Mirum illi videri. Mittit iterum: non redditur. Ipse hominem appellat: rogat ut reddat. Os hominis, insignemque impudentiam cognoscite. Quod sciret, quodque ex ipso Rege audisset in Capitolio esse ponendum; quod Jovi Optimo Maximo, quod populo Romano servari videret, id sibi ut donaret, rogare, & vehementer petere coepit. Cum ille se, & religione Jovis Capitolini, & hominum estimatione, impediri diceret, quod multæ nationes testes essent illius operis, ac muneris, iste homini minari acerrime coepit. Ubi videt eum nihilo magis minis, quam precebus permoveri, repente hominem de provincia jubet ante noctem decedere: ait se comperisse ex ejus regno piratas in Syciliam esse venturos.

Rex maximo conventu Syracusis in foro, ne quis forte me in crimine obscuro versari, atque adsingere alii-

aliquid suspicione hominum arbitretur , in foro , inquam , Syracusis flens , ac Deos hominesque contestans , clamare cœpit , candelabrum factum è gemmis , quod in Capitolium missurus esset , quod in templo clarissimo populo Romano monumentum suæ societatis , amicitiaeque esse voluisset , id sibi C. Verrem abstulisse : de ceteris operibus ex auro , & gemmis , quæ sua penes illum essent , se non laborare : hoc sibi eripi , miserum esse , & indignum . Id etsi antea jam mente , & cogitatione sua , fratrisque sui consecratum esset , tamen tum se in illo conventu Civium Romanorum dare , donare , dicare , consecrare Jovem Optimo Maximo , testemque ipsum Jovem suæ voluntatis , ac religionis adhibere .

CAPUT TERTIUM.

§. I. DE CHRIA.

Quid est Chria ? R. Est brevis commemoratio facti , vel dicti cuiuspiam utilis & memoria digni : unde etiam Chria suum nomen invenit à Græco vocabulo Χρέα (1) quod usum , utilitatem , commodium significat .

(1) Sunt qui scribunt Chreja , sed male .

Quotuplex est Chriarum genus?

R. *Triplex.* Aliæ versantur in verbis, aliæ in actione, aliæ in utroque consistunt. Seu, ut vulgus Rhetorum loqui solet, aliæ sunt *Verbales*, aliæ *Activæ*, aliæ *Mixtæ*.

Quid est *Chria Verbalis?*

R. Ea est, quæ explicat verba graviter ab aliquo, & sententiose prolata: qualis est v. gr. Virgilii versus: (1)

Discite justitiam moniti, & non temnere Divos.

Vel hoc effatum Senecæ: *Nulla est honesta avaritia, nisi temporis;* itemque hi Horatii versus: (2)

Pallida mors æquo pulsat pede pauperum tabernas,
Regumque turrem.

Aut denique sapientissima illa Juvenalis sententia:

Orandum est, ut sit mens sana in corpore fano.

Quid est *Chria activa?*

R. Ea est, quæ memorabile aliquod factum exponit, & verbis exornat, ut: Sapiens Pythagoras interrogatus aliquando, quam long-

(1) *Aeneid.* 6.

(2) *L. I. Od. 4.*

longa esset hominum vitæ, sese paulisper conspiciendum exhibuit; tum subito ex spectantium oculis evolavit; ut nimirum celeri illa fuga caducæ, & fugacis mortalium vitæ brevitatem designaret.

Sic etiam Cotys Thraciæ Rex, cum quidam pardalim, seu pantheram, ferociissimum animal, illi dono misisset; ipse vici sim leonem misit, ne verbum quidem addens: sed malam bestiam sic male penſando, re ipsa hominem prudenter admonuit, par pari, ut est in veteri proverbio, esse omnino referendum.

Memorabile quoque in primis, & omnibus notum, quod referunt Livius, & Florus de duobus Tarquiniis patre, & filio. Cum enim Sextus Tarquinius Tarquinii Superbi regis ultimi Romanorum filius, acceptam à patre contumeliam, & injuriam simulans, ad (1) Gabios transfugisset, breveque ad summam apud illos, regiaeque pene parem potestatem pervenisset, misit clanculum Romam unum è suis, sciscitatum à patre, quidnam demum se facere vellet. Rex ad hæc nihil voce respondit, sed veluti deliberabundus in hortum axium transiit, sequente filii nuntio. Ibi inambulans tacitus eminentia papaverum capita baculo decussit, & per hasce ambages filium admonuit, primores civitatis esse interficiendos. Quod cum à filio non ita multo post variis artibus factum

esset

(1) Gabii Volscorum urbs, LX. millia passuum ab urbe Roma distans.

esset, brevi & consilio, & præsidio orbata ci-
vitas, fuit in Tarquinii potestatem nullo labore
redacta.

Rem sic narrat Ovidius nativo quodam, ut
solet, simplicique candore, Lib. 2. Fastorum.

Ultima Tarquinius Romanæ gentis habebat
Regna; vir injustus; fortis ad arma tamen.
Ceperat hic alias, alias everterat urbes,
Et Gabios turpi fecerat arte suos.

Namque trium minimus, proles manifesta superbi,
In medios hostes nocte silente venit.

Nudarant gladios: occidite, dixit, inermem;
Hoc cupiunt fratres, Tarquiniusque pater,
Qui mea crudeli laceravit verbere terga.

(Dicere ut hoc posset, verbera passus erat.)
Luna fuit; spectant juvenem, gladiosque recondunt,
Tergaque deducta veste notata vident.

Flent quoque, & ut secum tueatur bella, precantur:
Callidus ignaris annuit ille viris.

Jamque potens misso genitorem appellat amico,
Perdendi Gabios quod sibi monstrat iter.

Hortus odoratis suberat cultissimus herbis,
Septus humum rivo lene sonantis aquæ.

Illic Tarquinius mandata latentia nati
Accipit; & virga lilia summa metit.

Nuntius ut rediit, decussaque lilia dixit;
Filius, agnosco iusta parentis, ait.

Nec mora, principibus cæsis ex urbe Gabina,
Traduntur ducibus moenia nuda suis.

Quid est Chria mixta?

R. Est ea, quæ factum aliquod sermoni con-junctum exponit. Exempla si quæris, aliquot se-lecta hic damus.

Exempla Chriæ mixtæ. I.

Marmoream statuam cum aliquando vidisset in foro Diogenes Philosophus, ad illam supplex accessit, & manum illi quasi ad stipem diu multumque porrexit. Mirantibus valde amicis, & interrogantibus quid porro faceret, respondit: Ad repulsam me experior.

II. Exemplum.

Idem Diogenes cum aliquando consertissimam populi turbam sese è theatro effudentem vidisset, adversus illam solus ingredi totis viribus cœpit, & objurgan-tibus respondit: Hoc in omni vita facere studeo.

III. Exemplum.

Miles Spartanus (1) intempesta nocte tumulum præ-teriens, cum horribile quoddam spectrum vidisset, stricta lancea, in illud audacter irruit, ita verbis compellans: Quo me fugis anima bis moritura? Hoc singulari facto docemur, Faunorum terriculamenta, & inania larvarum, ac lemurum ludibria à cordatis, fortibus-que omnino rideri.

Quot

(1) Hisp. *A deshora de la noche.*

Quot sunt Chriæ partes, seu capita? in his
 R. Chriæ five Verbalis, five Activa, five
 Mixta, continetur partibus octo, inquit
 Aphthonius in Progymnasmatis. Sunt autem par-
 tes illæ, *Encomium*, *Paraphrasis*, *Contrarium*, *Simile*,
Exemplum, *Testimonium veterum*, & *Epilogus*.

Sive ut trita illa, usitataque formula potius
 utamur: Chria tractanda est

1. A Laudativo.
2. A Paraphrastico.
3. A Causa.
4. A Contrario.
5. A Simili.
6. Ab Exemplo.
7. A Testimoniio Veterum.
8. A brevi Epilogo.

Quæ singula Capita siglatim enucleare ne-
 cessit est.

Quid sibi vult, à Laudativo?

R. Significat, in ipso Chriæ initio laudandum
 esse dicti, vel facti auctorem; ut scilicet ex
 auctoris laudatione major illius seu dictis, seu
 factis auctoritas, ac veluti pondus accedat.

Quid hoc sibi vult, à Paraphrastico?

R. Idem prorsus, ac si dices, *Ab expositione*
dicti, vel *facti de quo agitur*. Paraphrasis enim, ut
 vox Græca satis indicat, est liberior, ac copio-
 fior rei explanatio.

Quid illud est, à Causa?

R. Indicat, diligenter investigandam esse, & adferendam causam illius seu dicti, seu facti, quod pertractandum, & amplificandum suscipimus: v. gr. Chriæ Verbalis argumentum esto hæc sapiens sententia: *Ferenda sunt amicorum vitia;* erit in promptu hæc causa justissima, quod scilicet *vitiis sine nemo nascitur;* *optimus ille est quæ minimum urgetur,* ut ait Horatius.

Quid est à Contrario?

R. Admonet, sententiam nostram ex contrariarum rerum confictione esse confirmandam; v. g. postquam probaveris *dulce*, ac *decorum esse pro patria mori*, (1) dices è contrario rem esse turpissimam, ac (2) propudosam, si miles pro patria pugnans, inhonesta mortis formidine, terga fugæ convertat. Item postquam ostenderis, otium, & desidiam omnium vitiorum fontem, ac somitem esse, dices è contrario labore, & vigilias esse firmissimum morum, integritatis, innocentiaeque præsidium.

Quid à simili?

R. Monet, propositam sententiam apta quapiam similitudine exornandam, ac illustrandam esse. Ita si laborem, & diligentiam commendare velis, dices cum Tullio: *ut ad cursum equus, ad arandum*

(1) Horat. L. 3. Od. 2.

(2) Hisp. *infame, vergonzosa.*

dum bos , ad indagandum canis ; sic homo ad intelligendum , & agendum natus est .

Quid vocas , ab Exemplo ?

R. Hujusce vocis sensus est , rem , quam per tractamus , illustris cujuspiam exempli adpositione confirmandam esse . Sit tibi v. gr. amplificandum illud : *Dulce , & decorum est pro patria mori* , ad feres exemplum Codri (1) Atheniensium Regis , de quo cecinit Horatius Ode 14. Lib. 3. *Codrus pro patria non timidus mori* : vel adferre poteris exemplum Decii Consulis Romani , qui se velato capite , certisque verbis pro patriæ salute ultro devovit .

Quid , à Testimonio Veterum ?

R. Ostendit , nostram sententiam veterum Auctorum verbis , ac testimonio comprobandam esse . Sit hoc argumentum v. gr. *Injurias esse condonandas potius , quam uicendas* : usurpabis aureum illud Taciti verbum : *Multa contemptu curantur* ; vel hanc ejusdem sententiam homine Christiano dignissimam : *Convicia spreta* (2) exolescunt .

Quid demum sibi vult , à brevi Epilogo ?

R. Indicat , apta quadam , & rotunda verborum conclusione comprehendenda esse quæcumque fusius dicta sunt . Est enim Epilogus brevis , &

(1) *Codrus ultimus Atheniensium Rex seipsum neci obtulit pro patriæ salute in bello contra Dorierenses.*

(2) Hisp. *Luego se olvidan , y no hacen impresion.*

artificiosa clausula , qua colligimus in pauca , quæ fusiūs commēmorata fuere .

Sed quoniam , ut initio diximus , per præcepta longum est iter , per exempla vero expeditum , & facile , idcirco operæ pretium est aliquod Chriæ exemplum hoc loco subjicere .

§. II. Chria verbalis in hanc Virgiliī sententiam. Æneid. 10.

— Breve , & irreparabile tempus
Omnibus est vitæ.

A Laudativo.

CUM optimo cuique Poëtæ propositum illud fuerit semper , ut misceat utile dulci , hoc est , ut delectando doceat , & docendo delectet ; neminem tamen adhuc legi Poëtam hac in re Poëtarum principi Virgilio comparandum . Ille enim non solum ceteros omnes ante se , & post se Græcos , Latinosque Poëtas facile vincit elegantia , suavitate , judicio , splendore , numero , delectuque verborum ; non solum hoc habet , ut illius versibus perfectis ingenio , elaboratis industria nihil addi posse , nihil detrahi , nihil mutari , verissimèque de illo dictum olim fuerit , Musas , & Apollinem non aliter in suo choro loqui , Jovemque ipsum , si sit Poëta , non alio modo locuturum ; verum etiam , quod caput est , sententiarum gravitate , & frugiferorum , quibus abun-

abundat, præceptorum sapientia, hoc adsecutus est, ut optimus vitæ, virtutisque magister jure merito possit à nobis appellari.

Inter cetera vero documenta, ad vitam insituendam, & ad mores informandos idonea, quibus adspersum est passim divinum illius Poëma, saluberrimum in primis est, atque laudabile, quod ait Æneidos libro decimo de brevitate temporis, fluxaque, & caduca mortalium vita:

— Breve, & irreparabile tempus
Omnibus est vitæ.

A Paraphrastico.

Ita est profecto; tam exiguum, tamque arcum vivendi curriculum nobis à natura circumscriptum est, ut vix bene lucem ingressis sit de hujus mortalis mundi statione decadendum, & vita cum morte commutanda. Nihil nisi temporis punctum quoddam est caduca hæc, quam tantopere deperimus (1), vita, minimumque est, ac pene nullum intervallum illud, quod ortum inter, & occasum nostrum interjacet. Fugit retro levis hora, truditur dies die, præcipiti casu fugaces anni sese mutuo pellunt, & adolescentiæ senectus, senectuti mors obrepit improvisa semper & inopinata: quodque gravius est, cum semel effluxit brevissimum hoc vitæ tempus tam irreparabilis est illius lapsus, ut nulla deinde possit ratione revocari.

(1) Hispan. Que tan locamente amamos.

A Causa.

Neque vero est cur adeo parvam temporis usuram nobis ad vivendum concessam jure merito conqueramur. Præterquamquod enim vita, si scias uti, latis longa est, præterea hac certa, stabilique lege natos nos esse scimus, ut denique moriamur. Quis enim tam vecors esse potest, qui nesciat hanc esse tristissimam peccati mercedem, pœnamque justissimam: hanc esse mortalium conditionem, ac sortem: humana omnia caduca esse, & fluxa, atque mobilia: nihil, quod ortum sit, sempiternum esse posse: definitum esse cuilibet certum quoddam, breveque temporis spatium ad felicem in cœlo vitam promerendam? Cumque olim amplioribus terminis circumscripta esset nostra hæc mortalis vita, & in sæcula bene multa propagaretur, eam nostris flagitiis, sceleribusque breviorem effecimus; *Semotique prius tarda necessitas Leti corripuit gradum.*

A Contrario.

Contra vero, cum semel post miseræ hujuscæ vitæ decursum terreni corporis contagione solutus erit noster animus, cum demum inter felices spiritus ævo sempiterno perfruemur in cœlo, nulla jam amplius pertimescenda nobis neque vicissitudo rerum, neque conversio temporum, nec ætatum commutatio: nullus jam erit neque horarum lapsus, nec fluxus diorum, nec apnorum sibi met mutuo succedentium

tiūm cursus. Sed eodem semper h̄erentes & felicitatis, & temporis vestigio, stabili, certaque beatitate, æternis sæculorum æstatibus cum Deo ipso potiemur.

A Simili.

O nos igitur male cautos! O numquam satis deplorandam fortem nostram, si æterna hæc solidaque oblii, nihil nisi umbras, imaginesque consectemur! Si enim ex veritate magis, quam ex opinione res velimus æstimare, quid demum aliud est fragilis hæc, fugaxque vita, nisi levius quidam fumus, qui puncto temporis evanescit? nisi præceps torrens, qui cum vano strepitu celeriter effluit? nisi flosculus brevi marcescens, qui mane oritur, vespere floret, & nocte cadit? nisi umbra quædam, & larva inanis, quæ nostras effugit manus,

Par levibus ventis, volucrique simillima somno? (1)

Ab Exempla.

Testes hoc loco possem appellare ab omni memoria Christianos illos Heroes, virosque sapientissimos, qui mirificam fugacis vitæ brevitatem tot laboribus, tot vigiliis, tot indefessis curis redemptam compensarunt. Testes appellare possem tot Virgines, tot viros principes, tot nobiles.

(1) Æneid. 2.

les adolescentes, qui fragilem hanc rerum humana-
narum mobilitatem, atque inconstantiam pertexsi,
quæcumque apud cæcos mortales prima putantur,
pro nihilo duxere; & voluptatum illecebras, ac
pernicioſa rerum caducarum blandimenta generofa
quadam alacritate conculcarunt.

A Testimonio Veterum.

Hoc inculcare Corinthiis voluit Divus Paulus,
cum dixit: *Tempus breve est.* Hoc ipsum nos re-
monet summus ille vir Jobus, dum adflatus divi-
no Spiritu sic loquitur: *Breves dies hominis sunt.*
Hæc eadem erat mens vel ipsi quoque Horatio,
profano licet homini, cum amicum sapienter sic
admonet:

(i) *Omnem crède diem tibi dilaxisse supremum.*

Et alio loco:

Quid brevi fortes jaculamur ævo Multa?

Hoc denique sentiebat Phædrus, cum in elegan-
tibus suis Fabulis hanc verissimam protulit vocem:

Abiturus illuc, quo priores abierunt,

Quid mente cæca miserum torques spiritum?

(i) Epist. 4. lib. i.

A brevi Epilogo.

Cum igitur adeo breve tempus sit, adeoque irreparabile, relinquitur id unum, ut cogitemus etiam atque etiam nihil esse loci socordiæ, neque segnitia; nobis inter tantas angustias nequaquam licere esse otiosos: miseros esse, qui se, per summam incuriam, re una omnium pretiosissima defraudari patiuntur. Restat denique id unum, ut cum celeritate temporis, utendi celeritate certemus, & tamquam ex torrente quodam, qui rapide dilabitur, celeriter hauriamus.

§. III. Argumenta Chriarum verbalium.

Ex Horatio.

1. **O**Mnes eodem cogimur. 2. Vivitur parvo bene. 3. Levius fit patientia Quidquid corrigere est nefas. 4. Magnas inter opes inops. *De avaro.* 5. Ira furor brevis est. 6. Multa senem circumveniunt incommoda. 7. Fortes creantur fortibus. 8. Omnem crede diem tibi diluxisse supremum. 9. Quanto quisque sibi plura negaverit, A Diis plura feret.

Ex Virgilio.

10. Quid non mortalia pectora cogis
Auri sacra fames?

11. Facilis descensus Averni.

12. Labor omnia vincit.

Ex

Ex Ovidio.

13. Principiis obsta : sero medicina paratur.
 14. Otia si tollas , periere cupidinis arcus.
 15. — Dicique beatus
 Ante obitum nemo , supremaque funera debet.
 16. — Paupertatemque ferendo
 Effecere levem.
 17. Livor , iners vitium , mores non exit in altos.

Ex Juvenali.

18. Fronti nulla fides. 19. Crescit amor nummi,
 quantum ipsa pecunia crescit. 20. Nemo repente
 Fit turpisimus. 21. Res est sacra miser. 22. No-
 bilitas sola est atque unica virtus.

Ex Seneca.

23. Tota vita discendum est mori. 24. Etiam sine
 magistro vitia discuntur. 25. Qui genus jactat
 suum , aliena laudat. 26. Sequitur superbos ulti-
 or à tergo Deus.

Ex Persio.

27. O curas hominum , ò quantum est in rebus
 inane ! 28. Virtutem videant , intabescantque
 relicta. *De sceleratis.*

Ex Martiali.

- 29 Extra fortunam est quidquid donatur (1) egenis:
 Quas dederis , solas semper habebis opes.
 30. Non est , crede mihi , sapientis dicere , vivam:
 Sera nimis vita est crastina ; vive hodie.

Ex Terentio.

31. Crescit in adversis virtus.

D

Hac

(1) Legitur Amici.

Hæc igitur , aut alia id genus argumenta per tractare si velis , facies sedulo quod supra dictum est.

1. Laudabis breviter auctorem Sententiae. 2. Planius , & copiosius explicabis sententiam , illamque variis verborum coloribus pictam bono , ut ajunt , lumine collocabis. 3. Adferes causam aliquam , quamobrem res ita se habeat. 4. Ex contrariorum confictione & quasi concursu illam confirmabis. 5. Illustrabis eam similitudine , quæ in rem aptissime quadret. 6. Probabis illam singulari quodam exemplo. 7. Veteris auctoris testimonio , & auctoritate illam confirmabis. 8. Denique ex omnibus hisce capitibus rem ita se habere con cludes.

Quomodo nam tractanda est Chria activa?

R. Eadem prorsus ratione , qua Chria verbalis. Eadem enim est utriusque ars , eademque plane regula. Itaque actum ageremus , si de Chria activa separatum , ac seorsum tractaremus.

Idem plane dicio de Chria mixta.



CAPUT QUARTUM.

DE AMPLIFICATIONE.

Quid est Amplificatio?

R. Inepte prorsus , ac ridicule facere mihi videntur , qui perperam interpretantes illo-

eratis (1) verba, Amplificationem cum vulgo ita definiunt: Amplificatio, inquit, est oratio, quæ ex parvis magna facit; seu, quæ res exiguae verbis exaggerat, & in majus adtollit. Puerilis, inquam, & (2) præstigiatore, ac Sophista potius quam Oratore digna mihi semper via fuit hæc vulgaris definitio, quæ res mendacio, falacibusque pigmentis (3) supra meritum veht augeri. Ut enim facete ajebat Spartanorum rex Agesilaus: Ego pessimum eum futorem arbitrabor temper, qui magnos calceos pedibus parvis inducat.

Nos igitur cum Tullio (4) sic Amplificationem commodiūs longe definimus: *Amplificatio est gravior quedam adfirmatio, quæ motu animorum conciliat in dicendo fidem.* Quia vero subobscura cuiuspiam forte videri posset hæc definitio, & quia vis, & facultas Oratoris potissimum in amplificando consistit; idcirco definitionem illam, & totam amplificandi artem planius, & apertius explicare operæ pretium existinamus.

Quid igitur sibi volunt hæc verba: Gravior quedam adfirmatio?

R. Gravissima illa adfirmatio, de qua hic agitur, nihil aliud est, quam vehementius quoddam, copiosiusque dicendi genus, quo rei vel dignita-

D 2. *admodum* *et* *difficile* *est* *tempus*,

(1) *Isoerates*, pater et iugentiae dictus à Tullio, vivit annos centum.

(2) Hisp. *Embaucador*.

(3) *Con aderezos, y coloridos saídos*.

(4) *De Partit. Orat.* 13.

tem , & amplitudinem , vel indignitatem , & atrocitatem , pondere verborum , & enumeratione circumstantiarum ita demonstramus , ut non animos auresque prætervolet , ut ferme fit , cum res leviter , ac strictim adtinguntur , sed ut ferriat animos , permoveat affectus , & audientium memorie penitus infideat .

Cedo illustre quodpians exemplum Amplificationis hujusmodi.

R. HABES IUCULENTISSIMUM IN ATROCISSIMA ILLA DIDONIS ADVERSUS ÆNEAM ABEUNTEM QUERELA. POTES-
TAT DIDO SIMPLICITER , & NUDE ÆNEAM APPELLARE *durum* , *inhumanum* , *ferreum* ; sed querimoniam illam sic amplificat mirifice VIRGILIUS ÆNEI-
DOS LIB. 4.

Talia dicentem jamdudum aversa tuetur,
Huc illuc volvens oculos , totumque pererrat
Luminibus tacitis , & sic accensa profatur :
Nec tibi Diva (1) parens , generis nec Dardanus (2)
auctor ,
Perfide : sed duris genuit te cautibus horrens
Caucasus , Hyrcanæque admirunt ubera tigres.

Sic etiam Libro 2. poterat Æneas exiliter , &
jejune dicere se amissam conjugem Creufam clamo-
ribus maximis per noctis tenebras appellasse ;
verum rem ita verbis exaggerat :

AU-

(1) *Venus.*

(2) *Dardanus primus Rex Trojanorum , Jovis filius.*

Ausus quin etiam voces jactare per umbram,
Implevi clamore vias, moestusque Creusam (1)
Nequidquam ingeminans, iterumq. iterumq. vocavi.

Quotuplex, est Amplificatio?

R. Duplex: alia est verborum, alia rerum: seu, quod idem est, alia fit rebus, ac sententiis, alia verbis tantum. De utroque genere seorsim agendum nobis est.

§. I. De Amplificatione rerum.

Quot modis fit Amplificatio rerum?

R. Octo præcipuis. 1. Fit per congerient definitionum, seu per definitiones congregatas. 2. Per congeriem adjunctorum. 3. Per congeriem, seu per enumerationem partium. 4. Per congeriem causarum, & effectuum. 5. Per congeriem consequentium. 6. Per congeriem simillium, comparationum, & exemplorum. 7. Per contrariorum, dissimillium, & inter se pugnantium confictionem. 8. Denique per incrementum. Singula hæc capita sigillatim persequamur.

§. II. De Amplificatione per congeriem Definitionum.

Quid est definitio?

R. Est brevis, & circumscripta rei explicatio; seu, ut ajunt Philosophi, est oratio, qua rei naturam breviter explicat. *Quid*

(1) Creusa Priami, & Hecubæ filia, Æneæ conjux, Ascanii mater.

Quid est Amplificatio per congeriem definitionum, sive à definitionibus congregatis?

R. Est ea, in qua variae ejusdem rei definitiones congeruntur, & quasi coacervantur; ut cum ait Cicero (1); *Historia est testis temporum, lux veritatis, vita memorie, magistra vitae, nuntia vetustatis.* Ex iisdem definitionibus congregatis, Curiae ac Senatus Romani majestatem sic amplificat idem Orator in Oratione pro Milone: *curia templum sanctitatis, amplitudinis, mentis, consilii publici, caput urbis, ara sociorum, portus omnium gentium, sedes ab universo populo Rom. concessa uni Ordini.*

Poteris tu vicissim, ad illarum definitionum congregatarum imitationem, dicere quid sit eloquentia, quid poësis, quid amicitia, quid vita hominis, quid Deus ipse,

§. III. De Amplificatione per congeriem adjunctorum.

Quid est Amplificatio per congeriem adjunctorum?

R. Est ea, quæ ducitur ab omnibus seu rerum, seu personarum adjunctis, ac circumstantiis simul coacervatis. Cicero 2. Agraria: *Ego qualis Kalendis Januariis accoperim Remp., Quirites, intelligo; plenam sollicitudinis, plenam timoris; in qua nihil erat mali, nihil adversi, quod non boni meruerent, improbi exspectarent: omnia turbulenta consilia contra hunc Rcip. statum, & contra nef-*

(1) 2. de Orat.

vestrū otium partim iniri, partim, nobis Consulibus designatis, inita esse dicebantur: sublata erat de furo fides, non ictu aliquo novæ calamitatis, sed suspicione, ac perturbatione judiciorum, confirmatione rerum judicatarum: novæ dominationes, extraordina-ria non imperia, sed regna quæri putabantur.

Virgilius sub finem libri I. Georgicorum Julii Cæsaris interitum lugubriter admodum, & tragicē lamentatur, coacervando funestissima prodigia, monstraque, quæ vel antecessere, vel mox subse-
cuta sunt:

Ille (1) etiam extincto miseratus (2) Cæsare Roman,
Cum caput obscura nitidum ferrugine texit,
Impiaque æternam timuerunt sacula (3) noctem,

Vox quoque per lucos vulgo exaudita silentes
Ingens; & simulacra modis pallentia miris
Visa sub obscurum noctis, pecudesque locutæ:
(Infandum) fistunt amnes; terræque dehiscunt,
Et mœstum illacrimat templis ebur, æraque sudant.

Totum hunc locum, ut eximum amplificationis exemplar, & ad excitandam commiserationem in primis idoneum, tu consulito, si me audis.

Amplificationis per congeriem adjunctorum op-

ti-

(1) *Sol.*

(2) *Subaudi est.*

(3) *Dictatore Julio Cæsare à conjuratis occiso, solis globum dia subpallidum appariisse narrant Plutar-chus, & Plinius.*

timum habes exemplum apud Tibullum L. i. Eleg.
2. ubi ætatem auream sic describit:

Quam bene Saturno vivebant Rege , priusquam
Tellus in longas est patefacta vias !
Nondum cœruleas pinus contempserat undas ,
Effusum ventis præbueratque sinum :
Nec vagus ignotis repetens compendia terris
Presserat externa navita merce ratem .
Illo non validus subiit juga tempore taurus :
Non domito frenos ore momordit equus ;
Non domus ulla fores habuit , non fixus in agris ,
Qui regeret certis finibus arva , lapis .
Ipsæ melia dabant quercus , ultroque ferebant
Obvia securis ubera lactis oves .
Non acies , non ira fuit , non bella , nec enses
Immiti sœvus duxerat arte faber .

Livius etiam L. i. Albæ excidium ita per congeriem adjuncctorum mirifice describit.

Inter hæc jam præmissi Albam erant equites , qui multitudinem traducerent Romam . Legiones deinde duclæ ad diruendam urbem . Quæ ubi intravere portas , non quidem fuit tumultus ille , nec pavor , qualis captarum esse urbium solet , cum , effractis portis , stratifice ariete muris , aut arce vi capta , clamor hostilis , & cursus per urbem armatorum omnia ferro flammaque miscet ; sed silentium triste , ac tacita mætitia ita defixit omnium animos , ut præ metu oblitio quid relinquenter , quid secum ferrent , desolente consilio , rogitantesque alii alios , nunc in liminibus stan-

rent, nanc ekrabundi domos suas, ultimum illas visuri, pervagarentur. Ut vero jam equitum clamor exire jubentium instabat, jam fragor teclorum, que diruebantur ultimis urbis partibus, audiebatur; pulvisque ex distantibus locis ortus, velut nube inducta, omnia impleverat: rapim quibus quisque poterat elatis, cum Larem, ac Penates, teclaque, in quibus natus quisque, educatusque esset, relinquentes exirent, jam continens agmen migrantium impleverat vias, & conspectus aliorum mutua miseratione integrabat lacrimas, vocesque etiam miserabiles exaudiebantur, mulierum præcipue, cum obsessa ab armatis tempora angusta præterirent, ac velut captos relinquerent Deos. Egressis urbem Albanis, Romanus passim publica, priuataque omnia tecla adæquat solo, unaque hora quadringentorum annorum opus, quibus Alba steterat, excidio, ac ruinis dedit; templis tamen Deum (ita enim edicatum ab Rege fuerat) temperatum est.

§. IV. De Amplificatione per congeriem, seu enumerationem partium.

Quid est Amplificatio ab enumeratione partium?

R. Est illa, quæ fit, dum totum aliquod in suas partes distribuitur; seu, dum rei alicujus partes vel omnes, vel præcipuae certe quidem, sigillatim enumerantur. Ita Cicero funestum Pisonis Consulatum describit: *Omnes memoriam consulatus tui, facta, mores, faciem denique, ac nomen à Rep. detestantur. Legati, qui una fuere, alienati: Tribuni militum, inimici: Centuriones*

nes, & si qui ex tanto exercitu reliqui milites existunt, non dimissi abs te, sed dissipati, te oderunt, tibi pestem exoptant, te execrantur. Achaja exhausta, Thessalia vexata, lacerata Athenæ, Apollonia exinanita, Ambracia direpta, Bullienses illusi, Epirus extensa, Locri exusti, Athamanum gens vendita, Macedonia condonata barbaris, Ætolia amissa, Dolopes, finitimiique montani oppidis, atque agris exterminati, Cives Rom., qui in iis locis negotiantur, te unum, solum suum depeculatorum, vexatorem, prædonem, hostem venisse senserunt. Ovidius Lib. II. Metamor. dilatat sententiam hanc;

Rex Midas omnia quaecumque tangit

in aurum converit,

Lætus abit, gaudetque malo Berecynthius heros, (1) Pollicisque fidem tangendo singula tentat.

Vixque sibi credens, non alta fronde virentem Ilice detraxit virgam; virga aurea facta est.

Tollit humo saxum; saxum quoque palluit auro.

Contigit, & glebam; contactu gleba potenti (2) Massa fit. Arentes Cereris decerpserunt aristas;

Aurea messis erat. Demptum tenet arbore pomum; (3) Hesperidas donasse putes. Si postibus altis Admovit digitos, postes radiare videntur.

Ille etiam liquidis palmas ubi laverat undis,

Un-

(1) *Midas Phrygiæ Rex, ubi mons Berecynthus.*

(2) *Auri moles.*

(3) *In earum hortis erant aurea poma.*

Unda fluens palmis (1) Danaen cludere possit.

Sic etiam Cicero Phil. 2. ea , quæ Antonius in Rempublicam gesserat , ita per partium enumerationem describit:

O miserum te , si intelligis ; miseriorem , si non intelligis , hoc litteris mandari , hoc memorie prodi , bujus rei ne posteritatem quidem omnium sacerdotum unquam immemorem fore ; consules ex Italia expul- sos ; cumque his Cn. Pompejum , qui imperii populis Romani decus , ac lumen fuit ; omnes consulares , qui per valetudinem exequi cladem illam , fugamque po- tuissent ; prætores , prætoriqs , tribunos pl. , magnam pariem Senatus , omnem sobolem juventutis , unaque verbo , rempublicam expulsam , atque exterminatam suis sedibus.

Paullo inferius ejusdem effusiones maximas pari ratione exponit;

Incredibile , ac simile portenti est , quonam modo illa tam multa , quam paucis , non dico mensibus , sed diebus , effuderit. Maximus vini numerus fuit , per magnum optimi pondus argenti , pretiosa vestis mul- ta , & lauta supellex , & magnifica multis locis , non illa quidem luxuriosi hominis , sed tamen abundantis. Horum paucis diebus nihil fuit. Quæ Charybdis tam vorax ? Charybdin dico ? quæ si fuit animal , num fuit. Oceanus , mediis fidius , vix videtur tot res , tam dissipatas , tam distantibus in locis positas , tam

(1) Jupiter in auream pluviam mutatus illam de-
luisit , converso in pretium Dco. Horat. L. 3. Od. 11.

eito absorbere potuisse. Nihil erat clausum, nihil ob-signatum, nihil scriptum; apothecæ totæ nequissimis hominibus condonabuntur, alia mimi rapiebant, alia mimiæ; domus erat aleatoribus referta, plena ebrium, totos dies potabatur, atque id locjs pluribus suggerebantur etiam sœpe (non enim semper iste felix) dama aleatoria; conchyliatis Cn. Pompeji peristromatis servorum in cellis lectos stratos videres. Quamobrem definite mirari, hæc tam celeriter esse consumpta. Non modo unius patrimonium, quamvis amplum, ut illud fuit, sed urbes, & regna celester tanta nequitia devorare potuisset.

Adde his Virgilianam illam Deiphobi descriptionem Lib. 6. Æn.

Atque hic Priamen laceratum corpore toto
Deiphobum vidi: lacerum crudeliter ora.
Ora, manusque ambas, populataque tempora raptis
Auribus, & truncas inhonesto vulnere nares.

§. V. De Amplificatione per congeriem
caussarum, & effectuum.

Quid est Amplificatio per congeriem caussarum,
& effectuum?

R. Est ea, in qua multæ simul unius rei
caussæ, & effectus multi congregantur; ut si di-
ceres cum Sallustio in Conjur. Catil. Quod si Re-
gum, atque Imperatorum animi virtus in pace ita,
ut in bello, valeret, æquabilius, atque constantius se-
fæ res humanæ haberent, neque aliud alio ferri, ne-
que

que mutari, ac misceri omnia cerneret. Nam imperium facile iis artibus retinetur, quibus olim partum est: verum ubi pro labore desidia, pro continentia, & aequitate libido, atque superbia invadere, fortuna simul cum moribus immutatur. Ex hoc eodem loco Mezentii crudelitatem amplificat Virg. Aen. 8^v.

16

*Quid memorē infandas cædes, quid facta Tyranni(1)
Effera? Dii capiti ipsius, generique reservent.
Mortua quin etiam jungebat corpora vivis,
Componens manibusque manus, atque oribus ora,
(Tormenti genus) & sanie, taboque fluentes,
Complexu in misero, longa sic morte necabat.*

§. VI. De Amplificatione per congeriem consequentium.

Quid est Amplificatio per congeriem consequentium?

R. Est ea, in qua plura ponuntur acervatim ex eadem re consequentia. Ex hoc loco Virg. noctem egregie describit Aeneidos 4., amplificando res varias, quæ noctem ferme consequuntur:

Nox erat, & placidum carpebant fessa soporem
Corpora per terras, silvæque, & sœva quierant
Æquora: cum medio volvuntur fidera lapsu,

Cum

(1) Mezentius immanissimus Tyrrhenorum, seu Hetruskorum Tyrannus, qui pro Turno contra Aeneam pugnavit.

Cum tacet omnis ager , pecudes , piæque volucres ,
 Quæque lacus late liquidos , quæque aspera dumis
 Rura tenent ; somno , (1) positæ sub nocte silenti ,
 Lenibant curas , & corda oblita laborum .

§. VII. De Amplificatione per comparationes ,
 similitudines , & exempla .

Quid est Amplificatio per comparationes , similitudines , & exempla ?

R. Est ea , quæ sit per unam , vel per multas comparationes , ac similitudines , & per unum exemplum , vel per plura .

Hujus exemplum habes apud Cic . in Oratione de Prov . Conf .

Negat me vir optimus inimicorem Gabinio debere esse , quam Cæsari ; omnem enim illam tempestatem , cui cesserim , Cæsare impulse , atque adjuvatore esse excitatam . Cui si primum sic respondeam , ne communis utilitatis habere rationem , non doloris mei , possim ne probare , cum id me facere dicam , quod exemplo clarissimorum , & fortissimorum civium facere possim ? Annon Tib . Gracebus (Patrem dico , cuius utinam filii non degenerassent à gravitate paterna) tantam laudem est adeptus , quod tribunus pœbis solus ex toto illo Collegio L . Scipioni in auxilio fuit , inimicissimus & ipsius , & fratris ejus Africani , juratique in concione , se in gratiam non rediisse , sed alienum sibi videri dignitate imperii , quo duces essent hos-

(1) Positæ , id est jacentes .

hostium Scipione triumphante ducti, eodem ipsum duci, qui triumphasset? Quis plenior inimicorum fuit C. Mario? L. Crassus, M. Scaurus; alii ne inimici? omnes Metelli: at hi non modo illum inimicum ex Gallia sententis suis non detrahebant, sed et propter rationem Gallici belli, provinciam extra ordinem decernebant. Quia si ipsas inimicitiias depono Reip. causa, quis me tandem jure reprehendat? præsertim cum ego omnium meorum consiliorum, atque factorum exempla semper ex summorum hominum faciliis mibi censuerim petenda. An non M. ille Lepidus, qui bis consul, et Pontifex maximus fuit, non solum memoria, et testimonio, sed etiam annalium litteris, ac summi poëtae voce laudatus est, quod cum M. Fulvio Collega, quo die censor esse facilius, homine inimicissimo, in campo statim rediit in gratiam, ut commune officium censuræ communi animo, ac voluntate defenderent? Atque ut vetera, que sunt innumerabilia, mittam; tuus pater, Philippe, nonne uno tempore cum suis inimicissimis in gratiam rediit? quibus cum omnibus eadem resp. reconciliavit, que alienarat?

Brevius exemplum invenies in Orat. in Pisonem. Ego non te recordem; non furiosum, non mente captum, non tragico illo Oreste, aut Athamante dementiorem putem?

Fit Amplificatio per unam tantum similitudinem in hoc Virgilii loco, ubi fortissimam Amazonem Camillam de imbelli hoste nullo labore triumphantem sic exprimit Æneid. 11.

Quam facile accipiter saxo facer ales ab alto

Conf-

Consequitur pennis sublimem in nube columbam,
Comprehensamque tenet, pedibusque eviscerat uncis;
Tum crux, & vulsa labuntur ab æthere plumæ.

Itemque in Lib. septimo, ubi Reginæ Amatæ (1) furorem, ac circumcursationes depingit lepidissima turbinis verbere a pueris agitati similitudine:

Ceu quondam torto volitans sub verbere turbo,
Quem pueri magno in gyro vacua atria circum
Intenti ludo exercent: ille actus habena
Curvatis fertur spatiis: stupet infacia turba,
(2) Impubesque manus mirata volubile buxum.
Dant animos plagæ. Non cursu segnior illo,
Per medias urbes (3) agitur, populusque feroceſ.

Addito denique pulcherrimam istam juvenis (4)
Pallantis à Turno occisi cum flosculo decerpto
comparisonem, quam Scaliger quovis nectare
dulciorem non veretur appellare.

Hic juvenem agresti sublimem in stramine ponunt.
Qualem virginœ demessum pollice florem,
Seu mollis violæ, seu languentis hyacinthi,
Cui neque fulgor adhuc, necdum sua forma recessit.

§.

(1) Erat Latini Regis conjux.

(2) Impuberum, id est puerorum turba.

(3) Regina Amata.

(4) Erat Evandri Regis filius. Æneid. 11.

§. VIII. De Amplificatione per conflictionem
contrariorum.

Quid est Amplificatio per conflictionem contraria-
rum, & inter se pugnantium?

R. Est ea, qua plura contraria per anti-
theses opponuntur, ut illa Ciceronis in Catilinam:
*Hoc vero quis ferre possit, inertes homines fortissi-
mis insidiari, stultissimos prudentissimis, ebriosos so-
brios, dormientes vigilantibus?* In idem est illud ejus-
dem Ciceronis in Pisonem, & Gabinium Consu-
les: *Qui latrones igitur, siquidem vos Consules? qui
praedones? qui hostes? qui proditores? qui Tyranni
nominabuntur? Magnum nomen est, magna species,
magna majestas Consulis. Non capiunt angustie pectoris
tui; non recipit levitas ista, non egestas, non infir-
mitas ingenii sustinet, non insolentia rerum secunda-
rum tantam personam, tam gravem, tam severam.*

§. IX. De Amplificatione per incrementum.

Quid est Amplificatio per incrementum?

R. Est ea, qua oratio veluti per gradus
videtur augeri, & adscendere, donec ad
summum pervenerit. Ita Tullius Verris crudelita-
tem eo per incrementum deducit, ut verba ex-
planando crimi non ultra suppeditent: *Facinus est,*
*inquit, vincire civem Romanum, prope parricidium
necare: quid dicam, in crucem tollere?* Nihil addi jam
videtur ad hanc amentiam, improbitatem, crudelita-
temque posse.

Sic etiam Horatius Lib. 3. Od. 6. de corruptis Romanorum moribus loquens, ait:

Damnosa quid non imminuit dies?

Ætas parentum pejor avis tulit

Nos nequiores, mox datus

Progeniem vitiosiorem.

De Amplificatione verborum.

De hoc toto Capite tametsi sumus propediem accuratissime dicturi, postulat tamen instituti nostri ratio, ut cursim illud in antecessum delibemus.

Quomodo fit amplificatio verborum?

R. Fit sex præcipue modis. 1. Per verba translata, seu metaphorica. 2. Per verba superlata. 3. Per verba synonyma. 4. Per verba graviora, & illustriora. 5. Per periphrasim, seu circumlocutionem. 6. Per repetitionem.

§. X.

FIT igitur primum Amplificatio verborum per verba metaphorica, quæ nempe mirum in modum valent ad excitandos animos, & ad orationem grandiorem efficiendam.

Quid est metaphoræ, seu translatio?

R. Est quoddam loquendi genus, quo vox aliqua à propria sua significatione transfertur ad alienam; v. g. si dicas: *Prata ridere, parietes ges-*
ti-

tire gaudio, aliquem esse ira incensum, inflammatum cupiditate, errore lapsum: voces illæ omnes sunt metaphoricæ, quia tribuunt pratis, & parietibus risum & gaudium, quæ propria sunt hominis solius. Idem plane dicio de ceteris locutionibus, quæ tribuunt homini flamمام, & incendium igni proprium &c. Fiet igitur Amplificatio per Metaphoram, si cum Virgilio dicas de Ænea irato:

(1) — Irarumque omnes effundit habenas.

Vel si dicas de Didone:

(2) — Magnoque irarum fluctuat æstu.

Quia habenas, & æstum, quæ proprie conveniunt equis, ac fluctibus, tribuit Æneæ, & Didoni. Idem si de homine impavido, & imperterritu dicas cum Horatio in Odis: (3)

Illi robur, & æs triplex

Circa pectus erat, qui fragilem truci

Commisit pelago ratem

Primus.

§. XI.

Fit Amplificatio per verba superlata, hoc est, quæ veritatem superant, & plus dicunt, quam reapse esse possit. Ut cum ait Tullius de

E 2

Ju-

(1) Lib. 12.

(2) Lib. 4.

(3) Lib. 1. Od. 3.

Julio Cæsare in Oratione pro Marcello : *Domuisti gentes immanitate barbaras, multitudine innumerabiles, locis infinitas, omni copiarum genere abundantes.* Itemque cum dicit de Pompejo in Oratione pro lege Manilia : *Qui sèpius cum hoste confixit, quam quisquam cum inimico concertavit : plura bella gessit, quam alii legerunt : plures Provincias consecit, quam alii concupiverunt : cuius adolescentia ad scientiam rei militaris non alienis præceptis, sed suis imperiis ; non (1) offensionibus belli, sed victoriis ; non stipendiis, sed triumphis est erudita.*

Hanc amplificandi aitem adhibuit Virgilius Æneidos Libro 12. cum de Turni equis dixit per hyperboleum :

Qui candore nives anteirent, cursibus auras.

Item cum de equo Trojano dixit Libro 2.

*Instar montis equum divina Palladis arte
Ædificant.*

Sed nusquam magis indulsisse videtur huic schemati (2), quam cum Amazonem (3) Camillam laudans Libro septimo dixit per verissimam hyperboleum :

Illa

(1) Hisp. *Con Batallas perdidas.*

(2) Hisp. *Figura.*

(3) *Camilla Volscorum Regina bellicosissima, que Turno adversus Æneam tulit auxilium.*

Illa vel intactæ segetis per summa volaret
 Gramina , nec teneras cursu læsisset aristas :
 Vel mare per medium , fluctu suspensa tumenti
 Ferret iter , celeres nec tingeret æquore plantas.

§. XII.

Quomodo fit Amplificatio per verba synonyma?

R. Fit per congeriem verborum , & sententiarum idem pæne significantium : ut cum ait Cicero pro Ligario : Quid enim , Tubero , tuus ille districtus in acie Pharsalica gladius agebat ? cuius latus mucro ille petebat ? qui sensus erat armorum tuorum ? quæ tua mens ? oculi ? manus ? ardor animi ? quid cupiebas ? quid optabas ? Vide quam multa sint hic verba idem pæne significantia : gladius , mucro , arma , sensus , mens , animus , cupiebas , optabas . Quæ sane Synonymorum coacervatio acrem in primis , & illustrem reddit orationem , ut liquet ex hoc alio ejusdem Ciceronis exemplo in Catilinam : Non feram , non patiar , non sinam ; & ex duobus hisce Virgili versibus Æneidos Lib. I. , ubi Ilioneus Æneæ fortis adhuc ignarus , sic de illo ad Didonem :

Quem si fata virum servant , si vescitur aura
 Ætheria , nec adhuc crudelibus occubat umbris.

§. XIII.

Quomodo fit Amplificatio per verba graviora , &
 illuftriora ?

R. Fit, cum adhibentur verba splendida, quæ rem significantius exprimant, & in quibus plenum quiddam, numeroium, & sonans esse videatur: curjusmodi sunt ista: *Polluerat stupro sanctissimas religiones;* *Senatus gravissima decreta perfregerat.* Itemque illa in Verrem: *Non enim furem, sed ereptorem;* *non adulterum, sed expugnatorem pudicitiae;* *non sacrilegum, sed hostem sacrorum, religionumque;* *non sciarium, sed crudelissimum carnificem civium, sociorumque in vestrum judicium adducimus.* Et Philip. 4. *Non est, non est vobis, Quirites, cum eo hoste certamen,* quocum aliqua pacis conditio esse possit; neque enim ille servitutem vestram, ut antea, sed jam iratus sanguinem concupiscit: nullus ei ludus videtur esse jucundior, quam crux, quam cædes, quam ante oculos trucidatio civium. *Non est vobis res, Quirites, cum scelerato homine, atque nefario, sed cum immani, tetraque bellua;* quæ, quoniam in foveam incidit, obruatur.

Ejusdem etiam generis sunt magnifica illa Horatii verba, quibus Junonem de Romano imperio loquentem inducit Lib. 3. Od. 3.

Ilion, Ilion
Fatalis, incestusque judex,
Et mulier peregrina vertit
In pulverem, ex quo destituit Deos
Mercede pacta Laomedon, mihi,
Castæque damnatum Minervæ
Cum populo, & duce fraudulentio.
Jam nec Lacenæ splendet adulteræ
Famosus hospes, nec Priami domus

Perjura , pugnaces Achivos
 Hectoreis opibus refringit :
 Nostrisque ductum seditionibus
 Bellum resedit protinus ; & graves
 Iras , & invisum nepotem ,
 Troica quem peperit sacerdos ,
 Marti redonabo. Illum ego lucidas
 Inire fedes , ducere nectaris
 Succos , & adscribi quietis
 Ordinibus patiar Deorum ;
 Dum longus inter saeviat Ilion ,
 Romamque pontus : qualibet exsules
 In parte regnanto beati .
 Dum Priami , Paridisque busto
 Insultet armentum , & catulos feræ
 Celent inultæ ; stet Capitolium
 Ingens , triumphatisque possit
 Roma ferox dare jura Medis .
 Horrenda late nomen in ultimas
 Extendat oras , qua medius liquor
 Secernit Europen ab Afro ,
 Qua tumidus rigat arva Nilus :
 Aurum irreptum , & sic melius situm ,
 Cum terra celat , spernere fortior ,
 Quam cogere humanos in usus
 Omne sacrum rapiente dextra .
 Quicumque mundo terminus obstitit ,
 Hunc tangat armis , visere gestiens ,
 Qua parte debaccentur ignes ,
 Qua nebulæ , pluviique rores .
 Sed bellicosis fata Quiritibus

Hac lege dico , ne nimium pii,
 Rebusque fidentes , avitæ
 Tecta velint reparare Trojæ.
 Trojæ renascens alite lugubri
 Fortuna tristi clade iterabitur,
 Ducente vītrices catervas
 Conjuge me Jovis , & sorore.
 Ter si refurgat murus aheneus
 Auctore Phœbo , ter pereat meis
 Excisus Argivis , ter uxor
 Capta virum , puerisque ploret.

Adde Virgilii magnifica quoque illa de Dido-
 ne moritura Lib. 4. Æneid.

At trepida , & cœptis immanibus effera Dido ,
 Sanguineam volvens aciem , maculisque trementes
 Interfusa genas , & pallida morte futura ,
 Interiora domus irrumpit limina , & altos
 Conscendit furibunda rogos , ensemque recludit
 Dardanium , non hos quæsitum munus in usus.

§. XIV.

18 **Q**uomodo fit Amplificatio per periphrasim , seu
 circumlocutionem ?

R. Fit , cum longiori verborum ambitu ,
 circuituque dicimus , quod brevius , ac simplicius
 dici poterat. Ita Cicero pro Milone cum gravius
 videretur dicere , Clodium à Milone fuisse occisum ,
 maluit illud hac verborum circuitione mollire :

*In quos incensos ira, vitamque domini desperantes cum
incidisset, hæsit in iis pœnis, quas ab eo servi fide-
les pro domini vita expetierunt.*

Circumlocutione Virgilius utitur Æneid. 12.
cum pro hac una voce *Moritur*, sic ait :

*Olli dura quies oculos, & ferreus urget,
Somnus : in æternam clauduntur lumina noctem.*

Et in Ecloga prima , ubi pro hac una voce
Jam advesperascat, longiori hac , tritaque utitur
periphrasi.

*Et jam summa procul villarum culmina fumant,
Majoresque cadunt altis de montibus umbræ.*

Nota , Periphrasim apud Poëtas esse frequentio-
rem , quam apud Oratores. Quod si non idonea
sit , vel si nimis redundet , jam non appellabitur
Periphrasis , sed *Periæstologia*. (1)

§. XV. De Amplificatione per repetitionem.

Quomodo fit *Amplificatio per repetitionem* ?
R. Fit, cum verbum idem , sive ornatus
caussa , sive ad motus excitandos iteratur,
duplicaturque vel in principio , vel in fine , vel
in medio dictionis. Ut cum ait Tullius : *Vidi enim,*
vidi, penitusque perspexi. Sed utitur in primis hoc

Am-

(1) Id est Sermonis redundantia.

Amplificationis genere in exordio Orationis pro Roscio Amerino , cum ait : *Accusant ii , qui in fortunas ejus invaserunt : caussam dicit is , cui præter calamitatem nihil reliquerunt. Accusant ii , quibus occidi patrem Sexti Rosci bono fuit: caussam dicit is , cui non modo luetum mors patris adulit , verum etiam egestatem. Accusant ii , qui hunc ipsum jugulare sunime cupierunt : caussam dicit is , qui etiam ad hoc ipsum judicium cum presidio venit , ne ibidem ante oculos vestros trucidetur. Denique accusant ii , quos populus poscit: caussam dicit is , qui unus relitus ex illorum nefaria cœde restat.*

Hanc etiam adhibet in exordio Lib. 4. in Verrem.

Nego in Sicilia tota tam locupleti , tam vetere Provincia , tot oppidis , tot familiis , tam copiosis , ullum argenteum vas , ullum Corinthium , aut Deliacum fuisse , ullam gemmam , aut margaritam , quidquam ex auro , aut ebore factum , signum ullum æneum , marmoreum , eburneum : nego ullam picturam neque in tabula , neque textili fuisse , quin conquiserit , inspicerit ; quod placitum sit , abstulerit . Magnum video dicere : attendite etiam quemadmodum dicam ; non enim verbi , neque criminis augendi causa complector omnia . Cum dico nihil istum ejusmodi rerum in tota provincia reliquisse , Latine me scitote , non accusatorie loqui : etiam planius : nihil in ædibus cuiuscumque , ne in oppidis quidem , nihil in locis communibus , ne in fanis quidem , nihil apud Siculum , nihil apud Civem Romanum , denique nihil istum , quod ad oculos animumque acciderit , neque privati , neque publici , ne-

que profani, neque sacri, tota in Sicilia reliquisse.

Quantopere vero valeat Repetitio ad addendam vim pondusque orationi, & ad affectus ciendos, discere poteris ex sequentibus exemplis. Priora tria sunt ex heroicis Ovidii Epistolis, in quibus, si quid judico, præ ceteris omnibus illius operibus, elegantiæ, ingenii, & eloquentiæ lumen quoddam elucet. In primo sororem Annam sic compellat infelix Dido:

Anna foror, foror Anna, meæ male conscia culpæ.

In altero Demophoontem (1) ita compellat Phyllis.

Credidimus blandis, quorum tibi copia, verbis;
Credidimus generi, nominibusque tuis.
Credidimus lacrimis: an & hæ simulare docentur?
Hæ quoque habent artes, quaque jubentur, eunt?

In tertio conjux Herculis Dejanira, cum illi per imprudentiam mortem intulisset, in has justi doloris voces erumpit identidem:

*Impia quid dubitas Deianira mori.
Hei mihi quid feci? quo me furor egit amantem?
Impia quid dubitas Deianira mori?*

(1) *Demophoon Thesei ex Phædra filius, à Phyllide Lycurgi Regis filia hospitio, & lecto susceptus, data prius futuri conjugii fide.*

Illita (1) Nesseo misi tibi texta veneno.

Impia quid dubitas Deianira mori?

Quibusnam potissimum figuris varianda erit, & distinguenda Amplificatio?

R. Præcipua, quæ Amplificationem ornant Schemata, sunt Hypotyposis, & Exclamatio, de quibus supra dictum à nobis est. Quibus additum tria alia, nempe Protopopœjam, Apostrophem, Interrogationem, ceterasque id genus vehementiores figuræ, de quibus agendum nobis erit in Libro de Elocutione.

§. XVI. Quid sit in Amplificatione vitandum.

Duo sunt in primis vitia, ac veluti scopuli quidam duo, in quos incurrire solent Tipones, dum orationem amplificant. Primus scopulus est illorum, qui minutissima quæque singulatim, exiliter, & peregrine consequuntur; quod certe est in Oratore vitium vel maximum. Ut enim recte monet Cicero, in Amplificationibus nihil est nimis tenuiter enucleandum, quia hic locus grandia potius, quam exilia, minutaque requirit.

Alter scopulus est illorum, qui ad explendum orationis numerum, nihil nisi vacuas voces, & inanem verborum sonitum in illam in-

(1) Centauri Nessi ueste, qua induitus Hercules in furorem versus est.

infaciunt. Hoc vulgare vitium fugies , si nihil prorsus dicas , quod vim , & pondus non addat orationi , & sensum non augeat : *Quid est enim tam furiosum* , (inquit Tullius Lib. i. de Oratore) *quam verborum vel optimorum sonitus inanis* , nulla subiecta sententia ? Et , ut sapientissime præcipit Horatius in Arte Poëtica , si sint tibi provisæ , paratæque , & ad manum , ut ita dicam , sententiæ , voces ipsæ ultro fese offerent , & ad exprimenda animi sensa nullo labore succurrent:

Verbaque provisam rem non invita sequentur.

Quamquam , ut dicam id , quod res est , si Tironi peccandum sit in alterutram partem , malim certe ut , instar Ovidii , peccet potius ubertate quadam , copiaque verborum , quam eorumdem jejunitate , atque inopia : quia , ut optime notat Tullius , nimia hæc , & redundans verborum ubertas , & quasi luxuries stilo , atque exercitatione brevi depascetur.



APPARATUS SEU PROOEMIUM RHETORICÆ.

Rhetoricæ Proœmium, sive Apparatum appellamus ea omnia, quæ pertinent universim ad Artes Rheticas. Quinque autem sunt, quæ de Rhetorica generatim, & universæ, prolusionis more, quæri possunt.

1. Quæ sit natura, & finis Rheticæ.
2. Quæ sit illius materia.
3. Quæ sint illius partes.
4. Quæ sit dignitas, vis, & utilitas Rheticæ.
5. Quibus rebus, ac subsidiis possit facile comparari.

§. I. De natura, & fine Rheticæ.

Quid est Rheticæ?

R. Est ars, seu disciplina bene dicendi: hoc est ornata, graviter, & copiose loquendi. Ita Quintilianus Lib. 2.

Unde nomen suum traxit Rheticæ?

R. A voce Græca ῥέω, dico, loquor, unde ῥήτωρ Rheter, Orator, & ῥητωρικὴ ars Oratoria.

Quare vocatur ars?

R. Quia certis quibusdam, & nunquam fallen-tibus præceptis continetur.

Quare dicitur ars bene dicendi?

R. Quia docet quomodo optimis sententiis, verbisque lectissimis dici possit.

Vnde nām orta est ars illa bene dicendi?

R. Notatio naturæ, & animadversio peperit artem. Cum enim aliqui nativa quadam facultate, sine ullo artis subsidio, bene dixissent, alii contra insulse omnino, & male extitit aliquis, qui discrimen illud observaret attentius, qui causias illius indagaret sedulo: atque ita rem sensim ad artem, ac præcepta revocaret, & quasi viam traderet, quæ ad eloquentiam tuto ferret. Unde liquet, non esse eloquentiam natam ex artificio; sed potius artificium ex eloquentia natum, atque profectum.

Quid differunt inter se Rhetor, & Orator?

R. Hoc differunt, quod Rhetor fit, qui bene dicendi præcepta tradit; Orator vero fit is, qui accommodat ad persuadendum dicere potest: tametsi erretur persæpe in nomine, & aliud pro alio indiscriminatum accipiatur.

Quisnam est finis ultimus artis Oratoria?

R. Est persuadere dictione: hoc est, diserta oratione quempiam impellere ad aliquid vel credendum, vel agendum, vel omittendum.

Quodnam est officium Oratoris?

R. Est dicere adpositæ ad persuadendum; quod fiet docendo, & delectando, & movendo. Doce-mus

mus argumentis, & argumentatione; delectamus ornato, illustri, & apto dicendi genere; flectimus amplificatione, & affectibus. Docere necessitatis est; delectare suavitatis; movere vero, seu flectere victoriae; atque hic demum est verissimus eloquentiae triumphus.

Unde erit ille summus, & perfectus Orator, qui cum adposite dixerit ad persuadendum, hoc est, ad docendum, delectandum, & movendum; re ipsa tamen, sive auditoris vitio, sive quacumque demum alia de causa, non persuaserit.

§. II. De Materia Rhetorica.

Quænam est materia cuiusque artis in genere?

R. Ea est, circa quam versatur ars; ut Medicinæ materia sunt morbi, quia in iis curandis Medicina versatur.

Quænam est speciatim materia Rhetoricae?

R. Nihil omnino est in rerum natura, de quo ornate, eleganter, & copiose disputare non possit Orator. Ut enim observat Cic. 2. de Orat. *Bene dicendi ars non habet definitam aliquam regionem, cuius terminis septa teneatur.* Unde ajo cum Aristotele, Rhetoricæ materiam esse (1) quamlibet quæstionem ad dicendum propositam.

Quotuplex est quæstio, quæ Oratori ad dicendum proponi potest?

R. Duplex. Alia est infinita, seu universalis; alia

fi-

(1) Τὸ ἔκτασον.

finita , seu singularis. Quæstio infinita , quæ vocatur etiam *Thesis* , ea est , quæ nullis adligatur temporis , loci , & personæ circumstantiis : ut si queratur generatim , atque universe , *Sitne bellum gerendum , vel pax facienda.*

Quæstio finita , quæ etiam vocatur *Hypothesis* , & *causa* , sive *controversia* , ea est , quæ universalem questionem restringit , ac revocat ad certas quasdam personæ , temporis , loci , reique circumstantias : ut si queratur , *Sit ne hoc anno nobis pax facienda , iis , que ab hostibus feruntur , legibus , ac conditionibus.*

Quæstio autem sive finita sit , sive infinita , dividitur quadrisfariam : primo in questionem cognitionis , & actionis. Quæstio cognitionis ea est , quæ instituitur solius scientiæ gratia : ut , *Quæ sit causa defectus solis : Sitne terra major quam luna.* Quæstio actionis ea est , cuius finis est aliquid efficere : ut , *An liceat vim vi repellere : An sit inimicus ignoscendum.*

Præterea quæstio vel est principalis , vel incidentis. Principalis ea dicitur , quæ præcipue venit in controversiam : Incidens vocatur , quæ tractatur propter aliud.

Quot sunt universim genera questionum , sive causarum , in quibus versari potest Orator ?

R. Tria. Genus judiciale ; genus deliberativum ; & genus exornativum , seu demonstrativum , quod à Græcis vocatur Epidicticum.

Quid spectatur in genere judiciali ?

R. Accusatio , & defensio.

Quid spectatur in genere deliberativo?

R. Suasio, & dissuasio.

Quid in exornativo?

R. Laus, & vituperium. Unde generis judicialis finis est æquitas; Deliberativi utilitas; Demonstrativi honestas. Judiciale genus versatur circa tempus præteritum; Deliberativum circa tempus futurum; Demonstrativum vero circa præteritum simul & præsens.

§. III. De Partibus Rhetoricae.

Quæ, & quot sunt primariae partes Rhetoricae?

R. Quatuor: Inventio, Dispositio, Elocutio, & Pronuntiatio; quemadmodum sunt præcipuae quatuor Oratoris partes. 1. Argumenta invenire. 2. Inventa disponere. 3. Disposita verbis exornare. 4. Exornata pronuntiare. Sunt qui pro quinta parte memoriam statuant; sed nos cum Aristotele illam ad pronunciationem revocamus.

Quid est Inventio?

R. Est excogitatio rerum verarum, aut verisimilium, quæ valeant tum ad faciendam fidem, tum ad motus excitandos.

Quid est dispositio?

R. Est rerum inventarum in ordinem distributio.

Quid est Elocutio?

R. Est idoneorum verborum, & sententiarum ad res inventas accommodatio.

Quid

Quid est pronuntiatio?

R. Est vocis ac corporis ea moderatio, quam res inventæ, ac verba requirunt.

§. IV. De dignitate, & utilitate Rhetoricæ.

Quænam est Rheticæ dignitas, vis, & utilitas?

R. Nihil addi potest ad hæc illustria Tullii verba Libro 1. de Oratore: *Quid est, inquit, aut tam admirabile, quam ex infinita multitudine existere unum, qui id, quod omnibus natura sit datum, vel solus, vel cum paucis facere posset? aut tam jucundum cognitu, atque auditu, quam sapientibus sententiis, gravibusque verbis ornata oratio, & polita? aut tam potens, tamque magnificum, quam populi motus, judicium religiones, Senatus gravitatem unius oratione converti?*

Quid majus, quid splendidius dicere posset eloquentia, si pro se ipsa loqueretur?

De subsidiis Rheticæ.

Quibus potissimum subsidiis omnes illæ, quas diximus, Rheticæ partes comparari poterunt?

R. Quatuor: natura, arte, exercitatione, & imitatione.

Quid natura confert ad eloquentiam?

R. Ex parte animi confert celeres motus, ad excogitandum acutos, ad ornandum uberes, ad memoriam firmos, ac diuturnos. Ex parte vero corporis confert latera firma, canoram vocem,

solutam linguam, aptamque oris, & totius corporis conformatiōnem.

Quid facit ars ad eloquentiam?

R. Excolit, quæ dedit natura; supplet, quæ illi defunt; quæ vero redundant, luxuriantque, castigat, atque coercet. Uno verbo; certissimam, veluti digito, monstrat viam, qua ad eloquentiam tuto perveniat.

Quid adser exercitatio?

R. Conservat, & auget, quæ ars expoliavit, aut emendavit in natura. Multi enim naturæ virtutum exercitatione sustulere, ut olim Demosthenes, aliquæ sexcenti.

Quid est exercitatio?

R. Est adsiduus usus, & consuetudo dicendi, vel scribendi; quod quidem valde facit ad eloquentiae laudem adipiscendam. Ut enim ait Cicero: *Stilus est optimus dicendi effector, & magister.* Triplex est autem exercitationis genus, nempe Scriptoris, actionis, & memoriae.

DE IMITATIONE.

Vñnam est Imitationis utilitas?

R. Facit imitatio, ut optimo cuique auctori similes in dicendo evadamus, & quæ sunt in eo summa, diligenter persequamur. Et quoniam imitatio, si recte fiat, multum adfert ad eloquentiam, & pauci admodum imitari sciunt, ut par est; ideo de imitandi ratione fusius aliquid, & uberioris disputandum nobis esse existimamus.

Quæ-

*Quænam igitur est vera, rectaque imitandi via,
& ratio?*

R. Multiplex.

1. Cave vulgare quoddam, ac mediocre tibi proponas exemplar, *Mox daturum progeniem vitiōsiorem*, sed diligatur imitandus summus aliquis, & excellens auctor, in quem tota mente intuearis. Is autem erit, in Poëtis ferme Virgilius, qui ceteros omnes Poëtas longe post se reliquit, &, ut ipse loquitur de Turno, *Toto vertice supra est.* In oratoria vero arte diligatur unus Cicero, de quo, quam tritum, ac pervulgatum, tam verum est illud Quintiliani dictum: *Ille sciat se profecisse, cui Cicero valde placere cœperit;* & in quem bellissime cadit magnifica illa Senecæ (1) de illo vox: *Ingenium, quod solum populus R. par imperio suo habuit:* &, ut non minus splendide de eodem Tullio dictum fuit à Vellejo Paterculo: *Vir ingenio maximus; qui effecit, ne, quorum arma viceramus, eorum ingeniis vinceremur.*

2. Non optimos solum auctores imitaberis, verum etiam quæ in illis optima sunt, ac præstantissima. Si v. g. scribenda tibi sit oratio latina, habebis præ oculis loca illa eximia, in quibus se plurimum amavit Cicero, & in quibus se ipse videtur quodammodo viciſſe, cujusmodi sunt illius pleraque perorationes. Illas inter scribendum lectitabis identidem, ut illarum adſidua lectio Tulliani ſtil germanum tibi ſaporem, & gulfum adſperget. Ut

(1) *Controv. Lib. 2.*

Ut vero semper habeas in promptu selectissima, quæ subinde possis imitari, luculentissimorum auctorum loca; copiosum, summaque cura elaboratum illorum indicem tibi ad nostræ Rhetoricæ amplioris calcem exhibemus.

3. Illustria hæc, quæ dixi, loca neque pueriliter imitaberis, neque serviliter, putideque, ut solent homines illi, quos jure optimo ridet Horatius, dum ait: *O imitatores, servum pecus;* & ut à bene multis fieri video, qui cum picarum, aut psittacorum more easdem omnino voces reddiderint, tum demum magnos fe veterum imitatores arbitrantut. Tu vero quæcumque imitaberis, sic facies tua, ut eruditis, & emunctæ naris hominibus appareat imitatio, sed tamen res omnino alia, tibique propria facta jam esse videatur.

Tua autem facies hæc veterum scriptorum loca, tibique illa quasi jure tuo poteris vindicare,

Primo, si vim, ac pondus sententiaæ retineas; verba vero vel omnia, vel magna ex parte saltem immutes. Dixerat olim Tullius: *Virtus est una altis desixa radicibus, quæ nulla umquam vi labefactari potest.* Hanc egregiam Tullii sententiam vide quam scienter, mutatis omnino verbis, exprimat Horatius, cum dicit de homine probo, & in colenda virtute constanti:

(1) Si fractus illabatur orbis,
Impavidum ferient ruinæ.

Sic

Sic etiā cum dixisset idem Cicero Philippica no-
na: *Vellem, Dii immortales fecissent, ut vivo potius
Servio Sulpitio gratias ageremus, quam mortuo hono-
res quereremus*; hanc eandem sententiam, mutatis
omnino verbis, ingeniose admodum expressit Ovi-
dius Lib. 13. *Metamorphoseon*, ubi Ulyssem de
Achillis mortui armis certantem cum Ajace, &
pro se ita loquentem inducit:

Si mea cum vestris valuerint vota, (1) Pelasgi,
Non foret ambiguus tanti certaminis heres:
Tuque tuis armis, nos te potiremur, Achille.

Secundo, si, eadem ferme servando verba,
transferas illa ad alium sensum vel similem, vel
contrarium: v. gr. dixit Tullius in Antonium: *O
audaciam immanem!* Tu ingredi illam domum ausus
es? tu illud sanctissimum limen intrare? tu illarum
eadum Diis Penatibus os importunissimum ostendere?
Poteris verba haec paullulum immutata in Judam
hortos, ad Christum prodendum, subeuntem
opportune transferre.

Sic etiam Catilinariæ primæ exordium ad aliud
argumentum nullo labore ita convertent vel ipsi
mehercule tirunculi: Quousque tandem, homo
nequam, atque improbe, intemperanter abutere
divina patientia? Quamdiu illam eludet vita ista
tua omni scelerum genere cooperta? Quem ad
finem te inveterata tua jactabit impietas? Nihil ne-

(1) Sic appellati vetustissimi Græcie populi.

te impendentis mortis pericula, nihil Inferorum
poenæ, nihil intentus in te Divinæ justitiæ gla-
dius, nihil terror conscientiæ, nihil severissimi
Judicis tribunal, nihil illius os, vultusque move-
bunt? Patere tua flagitia non sentis? &c.

Tertio, recte imitaberis, si figuras, si perio-
dos, si transistiones, si commissuras, incisaque, &
totum orationis ductum, ac filum potius imiteris,
quam verba ipsa, vel ipsas sententias. Dixit v. gr.
Cicero Philippica 2. *Non placet Antonio Consulatus*
meus; at placuit P. Servilio, ut eum primum no-
minem ex illius temporis Consularibus, qui primus
mortuus est: placuit Q. Lutatio Catulo, cuius sem-
per in hac Republica vivet auctoritas: placuit duobus
Lucullis, M. Crasso, Q. Hortensio, C. Curioni ...
Maxime vero Consulatum meum Cn. Pompejus probavit.
Hanc figuram transferre poteris eleganter in eos,
quibus non placent humaniores litteræ, quas om-
nium ordinum, ac ætatum viri sapientissimi in
deliciis habuerunt.

Quarto, laudem habebit imitatio, si propo-
situm exemplar vel in pauca contrahas, vel am-
plificando fusius, uberiorisque dilates. Ita cum Vir-
gilius dixisset 1. Georgicorum:

Prima Ceres ferro mortales vertere terram
Instituit.

Hunc eundem locum imitando fusius, mo-
re suo, amplificavit Ovid. 5. Metamorph.

Prima Ceres unco glebam dimovit aratro :
 Prima dedit fruges , alimentaque mitia terris :
 Prima dedit leges ; Cereris sunt omnia munus.

Contra vero , cum à Tullio fusius , ac uberior
 dictum fuisset de Cæsare in oratione pro Marcello :

*Bellicas laudes solent quidam extenuare verbis ,
 easque detrahere ducibus , communicare cum militibus ,
 ne propriæ sint Imperatorum. Et certe in armis mi-
 litum virtus , locorum opportunitas , auxilia sociorum ,
 classes , commeatus multum juvant. Maximam vero
 partem quasi jure suo fortuna sibi vindicat , & quid-
 quid est prospere gestum , id pene omne dicit suum.
 At vero hujus gloriæ , C. Cæsar , quam es paullo an-
 te adeptus , socium habes neminem. Totum hoc , quan-
 tumcumque est , quod certe est maximum , totum est ,
 inquam , tuum. Nihil sibi ex ista laude centurio , nihil
 præfectus , nihil cohors , nihil turma decerpit. Quin
 etiam illa ipsa rerum domina Fortuna in istius se glo-
 riæ societatem non offert : tibi cedit ; tuam esse totam ,
 ac propriam fatetur : totam hanc ornatissimam lau-
 dationem in duos versiculos ita collegit Poëta
 egregius :*

Gloria vincendi juncta est cum milite , Cæsar:
 Cæsar , parcendi gloria tota tua est.

Quinto , laudabitur imitatio , si quæ ab Ora-
 toribus scripta fuere , solerter transferas in ora-
 tionem adstrictam. Ita facile crediderim cum

M. (1) Antonio Mureto , perfectissimo talium rerum æstimatore , Virgilianum illum versum :

Quamquam animus meminisse horret, luctuque refugit :

Ciceronem imitatum fuisse. Ita enim ille Philippica 14. scripsérat in Antonium : *Refugit animus, P. C., eaque dicere reformidat, quæ L. Antonius in Parmensium liberis, & conjugibus effecerit.*

Sexto, bonus imitator eris, si vel ex Græcis Latina facias , vel ex Latinis , aut etiam Græcis vernacula. Ita Tullius tam multa singulari quodam artificio exp̄ressit ex Demosthene , quem mirabatur , & quo ne Athenas quidem ipsas magis Atticas fuisse , urbano quodam , & liberali joco dictitabat. Sic etiam Virgilius acer , & diligens Græcorum imitator in Æneide Homerum est imitatus , & in Bucolicis (2) Theocritum. Sic Terentius ex Menandro , & ex Aristophane tam multa invexit in Latium. Ita Horatius Pindari , (3) Callimachique vestigia persecutus est in suis Odis ; & nominatim in secunda quarti Libri :

Quem tu Melpomene semel
Nascentem placido lumine videris &c.

Quam

(1) Fuit Orator , & criticus celeberrimus s̄ec. 16.

(2) Theocritus Poëta Syracusanus scripsit Græce Idyllia in genere bucolico laudatissima.

(3) Callimachus nobilis Poëta Græcus vixit post Alexandri tempora.

Quam quidem tantis laudibus ornavit summus ille vir Julius Cæsar Scaliger, ut mallet à se similem scriptam fuisse, *Quam esse totius Tarragonensis Rex.* Sic enim (per Iudum opinor) dictitare consueverat.

Atque, ut hisce elementis tandem aliquando finem imponamus, laudem maximam habitura est imitatio, si, quos imitaris, eos, non dicam adæquare, sed vincere etiam omni ope coneris: ut ait Quintilianus Lib. 10. *Conandum est aliquid supra eos, quos imitaris;* &c, ut etiam admonet vetus proverbium: Invenire, rem admodum difficultem esse: perfacilem vero, inventis addere.

Ita Virgilius, cum exiliter admodum, ac jejune de Hectore dictum fuissest à veteri poëta Ennio (1):

O lux Trojæ germane Hector.

Quid ita cum tuo lacerato corpore miser?

Versus eosdem, vel potius eandem sententiam ex plumbea fecit auream Æneid. Lib. 2.

O lux Dardaniæ, spes o fidissima Teucrum!
Quæ tantæ tenuere moræ? Quibus, Hector ab oris,
Exspectate venis? ut te post multa tuorum
Funera, post varios hominumque, urbisque labores
Defessi adspicimus! quæ caussa indigna serenos
Fœdavit vultus? aut cur hæc vulnera cerno?

Hunc

(1) Ennius Poëta antiquissimus vixit tempore secundi belli Punici, centum & amplius ante Cicronem annis.

Hunc eundem Ennii, Virgiliique de Hectore locum apertissime imitari conatus est Seneca in (2) Troade, ubi viduam illius Andromachen ita loquentem inducit:

Cum subito nostros Hector ante oculos stetit.

Non qualis ultro bella in Argivos ferens,

Grajas petebat facibus Idæis rates :

Nec cæde vasta qualis in Danaos furens,

Vera ex Achille spolia simulato tulit.

Non ille vultus flammeum incendens jubar,

Sed fessus, ac dejectus, & fletu gravis,

Similisque nostro, squalida obiectus coma.

Quæ imitatio, quamquam non infelix, tu vide tamen quantum à Virgiliana distet: Verum quanto inferior Virgilio videtur in hoc loco Seneca, tanto sane jure videbitur Ennio superior in hac altera ejusdem imitatione in eadem Troade:

Columen Patriæ, mora Fatorum,

Tu præsidium Phrygibus fessis,

Tu murus eras, humerisque tuis

Stetit illa decem fulta per annos.

Tecum cecidit, summusque dies

Hectoris idem, Patriæque fuit.

Hanc Ennianam imitationem aliquando migrantibus amicis, festive admodum respondit

Vir-

(2) *Tragœdia sic inscripta.*

Virgilius: *Se ex Enniī stercore gemmas, aurumque colligere.* Cum vero adsidua hæc, diligensque veterum imitatio vitio illi verteretur, ut sit, ab invidis, & obtrecentoribus, cumque illi malevolentia livore suffusi palam jactarent in vulgus, illum pleraque ab Homero sumpsisse, hoc uno responso calumniatoribus os obstruere, illosque penitus elingues reddere consueverat Virgilius: *cur non ipsi quoque eadem furtæ tentarent?* Verum intellecturos, facilius esse Herculi clavam detrahere, quam Homero vel unum eripere versus illumque ad rem suam accommodare.

Ratio tamen quedam est Tironibus præfertim adhibenda, ne, dum propositum sibi exemplar conantur vincere, & dum ab illo paullulum, sed in melius aberrare satagunt, prava quadam imitatione ab illo prorsus defiant, & in pejus aberrent, quod Lucano præfertim contigisse videmus.

Cum enim mirifice, sed sobrie tempestatem ita descripsisset Virgilius Aeneidos primo:

Incubuere mari, totumque à sedibus imis
Una Eurusque, Notusque ruunt, creberque procellis
Africus, & vastos volvunt ad litora fluctus.
Eripiunt subito nubes cœlumque, diemque
Teucrorum ex oculis; ponto nox incubat atra:
Intonuere Poli, & crebris micat ignibus æther,
Præsentemque viris intentant omnia mortem.

Hunc Virgilii locum cum sibi vel imitandum,
vel

vel superandum proposuisset Lucanus; immodo quodam calore raptus, suoque nimium velificatus ingenio, & laxatis illi velut habenis, sic aberavat in pejus.

Ah, quoties frustra pulsatos æquore montes
Obruit illa dies! quam celsa cacumina pessum
Tellus victa dedit! Non ullo litore surgunt
Tam validi fluctus, alioque ex orbe voluti;
A magno venere mari mundumque coercens
Monstriferos agit unda finus.

ARTIS

RHETORICÆ

LIBER PRIMUS.

DE ELOCUTIONE.

Quid est Elocutio?
R. Elocutio, inquit Tullius, est idoneorum verborum, & sententiarum ad res inventas accommodatio.

Cur tandem, & quorsum ab Elocutione, contra quam fieri solet, exordimur? **TU QD**

R. Tametsi ex quatuor Rheticæ partibus, ordine naturæ, prima sit Inventio; qua tamen plusculum difficultatis habet, idcirco eam Elocutioni postponendam esse cum erudito Vossio, aliisque artis Rheticæ magistris bene multis, judicavimus.

Cum enim verborum delectus origo sit eloquentiæ, ut ait Julius Cæsar in suo de analogia, seu de ratione Latine (1) loquendi libro, quem Ciceroni nominatim nuncupavit; & cum verborum cura, quæ ad Elocutionem pertinet, sit longe facilior, quam cura rerum, quæ spectat ad

In-

(1) Cicero in Bruto.

Inventionem ; liquet profecto nos Tironum com-modis , utilitatique servire , dum Aristotelis ordine nonnihil immutato , ab Elocutione ducimus initium , & in primo artis oratoriæ quasi limine , vestibuloque paulisper hæremus , priusquam in intima illius penetralia pedem audeamus inferre.

Ut huic eidem Tironum utilitati consulatur , nostrum hunc de Elocutione librum trifariam di-vidimus. Agendum nobis est primo de figuris , in quibus nullo ferme negotio se solent exercere vel ipsi Tirunculi. Secundo dicetur de Periodo , in qua videtur plusculum esse negotii. Tertio tractabitur de Stilo , à facilioribus , ut par est , ad difficiliora sensim progrediendo.

CAPUT PRIMUM.

DE FIGURIS , SEU SCHEMATIEUS.

Figura , ut diximus in Elementis , est orna-mentum quoddam Orationis , seu loquendi modus illustrior , & à communi consuetu-dine remotus ; cuiusmodi sunt hæc Ciceronis verba in Catilinam : *Vivis , & vivis non ad depo-nendam , sed ad confirmandam audaciam.* Itemque illa Didonis (1) verba:

Mo-

(1) Æneid. 4.

— Moriemur inultæ?

Sed moriamur, ait. Sic sic juvat ire sub umbras.

Aut hæc ejusdem Didonis:

Litora litoribus contraria, fluctibus undas

Imprecor, arma armis: pugnant ipsique nepotes.

Quot sunt genera figurarum?

R. Duo. Aliæ enim versantur in (1) sententiis,
& sensu ipso, aliæ in verbis tantum. Quia vero
res prius animo, menteque concipiendæ sunt,
quam verbis exprimantur, ideo de Figuris senten-
tiarum, quæ ad mentem pertinent ante dicendum
nobis est, quam de Figuris verborum.

§. I. De Figuris Sententiarum.

Inter Figuras Sententiarum aliæ videntur aptio-
res ad movendum, aliæ ad docendum, aliæ ad
delectandum. Initium faciamus ab his, quæ
ad movendum, seu ad animos flectendos præcipue
valent.

§. II. De Figuris ad movendum idoneis.

DE EXCLAMATIONE.

Cur ex omnibus figuris Exclamationem primam
ordine collocamus. G R.

(1) Λέξεως, καὶ διανοίας.

R. Primam collocamus, quod vehementiores animi motus exclamando soleamus exprimere.

Quid est exclamatio?

R. Est vocis elatio, seu contentio, qua, interjectione vel adhibita, vel subaudita, vehementiorem animi affectum significamus, reique magnitudinem exprimimus. Ita Tullius Oratione 1. in Catilinam per summam indignationem sic exclamat: *O tempora! o mores! senatus hæc intelligit, consul videt: hic tamen vivit! Vivit? Immo vero etiam in Senatum venit.* Et Oratione 2. in Antonium: *O miserum me! consumptis enim lacrimis, infixus tamen animo hæret dolor.* Et Lib. 4. in Verrem. *O rem ridiculam! o desertum hominem! o desperatum, ac relictum à magistratu Siculo!*

Exclamatio adjunctam ferme habet aliquam ex hisce interjectionibus, *o! heu! ab! vah! prob Superi! prob Superum, atque hominum fidem!* Persæpe tamen subauditur interjectio, ut si dicas, *Miserum me! vel, Hoccine sæculum!* Veteres pro interjectione, *o,* sæpe adhibebant voces istas (1) *Ædepol! Hercle! Mehercule! Jupiter! Mecastor! Medius fidius!* Catullus:

Chartis
Doctis, Jupiter!, & laboriosis.

Heu, & Eheu triste aliquid, & molestum indicant.

(1) *Quasi dicas, per ædem Pollucis ... ita me Hercules, me Jupiter, me Jovis filius juvet.* (1)

cant. Ita (1) Cicero : *O domus antiqua, ehen quam
dispari domino dominaris!* Virgilius vero Æneid. 4.

— Tu nunc Carthaginis altæ
Fundamenta locas, pulchramque uxorius urbem
Exstruis; heu regni, rerumque oblite tuarum!

Prob adhibetur s̄epe ad obtestandum. Ita Terentius : *Prob Deum atque hominum fidem! quid est,
si non hæc contumelia est?*

Mirum in modum facit Exclamatio ad significandam indignationem, doloremque ex re atrocí conceptum; ut Tullius pro Cœlio : *Prob Di immortales! cur interdum in hominum sceleribus maximis, aut connivetis, aut præsentis fraudis pænam in diem reservatis?*

Servit etiam misericordiæ. Ita pro Sylla : *O miserum, & infelicem diem illum, quo consul omnibus Centuriis P. Sylla renuntiatus est!* O fallacem, o volucrem fortunam! O cæcam cupiditatē! O præpostaram gratulationem! quam cito illa omnia ex lætitia, & voluptate ad luctum, & lacrimas redierunt! Et pro Milone : *O terram illam beatam, quæ hunc virum exceperit; hanc ingratam, si ejecerit; miseram, si amiserit!* Sic etiam perfidus ille Sinon Trojanorum misericordiam exclamando captat (2):

Heu, quæ nunc tellus, inquit, quæ me æquora possunt
Accipere? aut quid jam misero mihi denique restat?

(1) *De Officiis.* I. (2) (2) *Æneid.* 2.

Aliquando etiam latitiam , animique hilaritatem exprimit Exclamatio : v. g. Cicero ad Atticum (1): *O suaves epistolas tuas , uno tempore mihi datas, duas! quibus Evangelia quæ reddam , nescio; deberi quidem plane fateor.* Evangelia vero (si queris) erant merces allati jucundi nuntii ; vel etiam sacrificia, & supplicationes , quæ pro lato nuntio decerni olim à Romanis consueverant. Unde non immrito à Christianis *Evangelium* appellatum est salutiferum illud nuntium à Christo veracissimo Patris Nuntio nobis allatum.

Denique Exclamatio servit interdum Ironiæ. Ita (2) Tullius : *O præclarum custodem ovium , ut ajunt , lupum ! & in Pisonem : O stultos Camillus , Curios , Fabricios , Scipiones , Marcellos , Maximos ! O amentem Paullum ! rusticum Marium ! nullius consilii patres istorum amborum Consulum , qui triumpharunt !*

Quibus possumus in locis utendum est Exclamatione?

R. Adhibenda est præsertim in Amplificatione, in Perorationibus , ubi res magnas auditori persuaderis. Exclamare enim in rebus minutis frigidum esset , ac puerile.

22. §. III. De Dubitatione.

Q uod est Dubitatio ? R. Dubitatio est Figura , qua Orator fluctuans , animique pendens dubitat aliquamdiu , quid sibi agendum , dicendumve sit.

Ita

(1) Lib. 2. Ep. 8.

(2) Philipp. 3.

Ita Scipio apud Livium (1) milites adloquitur quasi dubitans: *Apud vos quemadmodum loquar, nec consilium, nec oratio suppeditat, quos ne quo nomine quidem appellare debeam, scio. Cives? qui à patria vestra descivistis. An milites? qui imperium auspiciumque abnuistis, Sacramenti religionem rupistis. Hostes? corpora, ora, vestitum, habitum civium agnoscō; facta, dicta, consilia, animos hostium video.* Ita Cic. pro Quintio: *Quo te nomine appellemus? Improbum? At etiam si desertum vadimonium esset, tamen in ista postulatione, & proscriptione bonorum, improbissimus reperiebare. Num malitiosum? Negas. Fraudulentum? Jam id quidem adrogas tibi, & praeclarum putas. Audacem? cupidum? perfidiosum? Vulgaria, & obsoleta sunt: res autem nova, atque inaudita.*

Illustre omnino Dubitationis exemplum suppeditat nobis Virgilius, cum Didonem ita dubitatem inducit: (2)

*En quid agam? rursus ne procos irrisa priores
Experiar? Nomadumque petam connubia supplex,
Quos ego sum toties jam deditata maritos?
Iliacas igitur classes, atque ultima Teucrum
Jussa sequar?
An Tyriis, omniisque manu stipata meorum
Insequar? Et quos Sidonia vix urbe revelli,
Rurius agam pelago, & ventis dare vela jubebo?*

De

(1) Decade 3. l. 8.

(2) Aeneid. 4.

Deinde sequitur electio ; quæ fit nimirum , cum
is qui dubitat , subito consilium capit , quasi ob-
orta sibi nova quadam luce :

Quin morere , ut merita es , ferroque averte dolorem .

Est item apud Ciceronem egregium aliud ejus-
dem Schematis exemplum in Oratore : *Vtrum dif-
ficilius , aut majus esset , negare tibi saepius idem ro-
ganti , an efficere id , quod rogaes , diu multumque ,*
Brute , dubitavi . Nam & negare ei , quem unice di-
ligerem , cuique me carissimum esse sentirem , præser-
tim & justa petenii , & præclara cupienti , durum
admodum mihi videbatur ; & suscipere tantam rem ,
quantam non modo facultate consequi difficile esset ,
sed etiam cogitatione complecti , vix arbitrabar esse
ejus , qui vereretur reprehensionem doctorum , atque
prudentium .

Sed nullum est præclarus dubitationis exem-
plum , quam tota Ciceronis Ep. 3. Lib. 8. ad Att. ,
qua secum ipse dubitat , quid sibi faciendum sit ,
si Pompejus Italia excedat , suamque dubitationem
Attico communicat , ejusque consilium exquirit .

*Maximis , & miserrimis rebus perturbatus , cum
coram tecum mihi potestas deliberandi non esset , ut
tamen tuo consilio volui . Deliberatio autem omnis hæc
est . Si Pompejus Italia cedat , quod eum facturum esse
suspicio , quid mihi agendum putas . Et , quo facilius
consilium dare possis , quid in utramque partem mi-
hi in mentem veniat , explicabo brevi . Cum merita
Pompeji summa erga salutem meam , familiaritasque ,*
qac

quæ mibi cum eo est, tum ipsa reipub. caussa me ad-
ducit, ut mibi vel consilium meum cum illius consilio,
vel fortuna cum fortuna conjungenda esse videatur.
Accedit illud: si maneo, & ilium comitatum optimo-
rum, & clarissimorum civium deserbo, cadendum est
in unius potestatem: qui, et si multis rebus significat
se nobis esse amicum; &, ut esset, à me est (tute
scis) propter suspicionem imminentis hujus tempestatis
multo ante provisum; tamen utrumque considerandum
est, & quanta fides ei sit habenda, & si maxime
exploratum sit cum nobis amicum fore, sine viri for-
tis, & boni civis esse in ea urbe, in qua cum sum-
mis honoribus, imperiisque usus sit, res maximas ges-
serit, sacerdotio sit amplissimo prædictus, non futurus
sit sui juris, subeundumque periculum sit, cum aliquo
forte dedecore, quando Pompejus remp. recuperarit.
In hac parte hæc sunt: vide nunc, quæ sint in al-
tera. Nihil actum est à Pompejo nostro sapienter, nihil
fortiter; addo etiam, nihil nisi contra consilium, auc-
toritatemque meam. Omitto illa vetera, quod istum
in remp. ille aluit, auxit, armavit; ille legibus per
vim, & contra auspicia ferendis auctor; ille Gallie,
ulterioris adjunctus; ille gener; ille in adoptando
P. Clodio augur; ille restituendi mei, quam retinendi
studiosior; ille provinciae prorogator; ille absentis in
omnibus adjutor; idem etiam tertio consulatu, post-
quam esse defensor reip. cœpit, contendit, ut decem
Tribuni pl. ferrent, ut absentis ratio haberetur; quod
idem ipse sanxit lege quadam sua; Marcoque Marce-
lo Consuli, finienti provincias Gallias, Cal. Mart. resti-
tit. Sed ut hæc omittam; quid fædus, quid pertur-
ba-

batius hoc ab urbe discessu , sive potius turpissima fuga? Quæ conditio non accipienda fuit potius , quam relinquenda patria? Malæ conditiones erant ; fateor : sed numquid hoc pejus? At recuperabit remp.. Quando? aut quid ad eam spem est parati?... Age jam cum fratre , an sine? cum filio , aut quomodo? In utraque enim re summa difficultas erit , summus animi dolor. Qui autem impetus illius erit in nos absentes , fortunasque nostras? Acrior quam in ceterorum; quod putabat fortasse in nobis violandis aliquid se habere. Age jam has compedes , fasces , inquam , hos laureatos efferre ex Italia , quam molestum est? Qui autem locus erit nobis tutus (ut jam pacatis utamur fluctibus) antequam ad illum venerimus? Qua autem , aut quo nihil scimus. At si restitero &c.

§. IV. De Obscuratione.

Quid est Obscuratio?

R. Obscuratio , ut nomen ipsum per se satis indicat , fit cum alicujus sive Dei , sive hominis opem imploramus. Hoc Schemate mirum in modum utitur Tullius pro Rege Dejotaro: *Quam obrem* hoc nos primum metu , c. Cæsar , per fidem , & constantiam , & clementiam tuam libera , ne residere in te ullam partem iracundiae suspicemur. Per dexteram te istam oro , quam Regi Dejotaro hospes hospiti porrexisti ; istam , inquam , dexteram , non tam in bellis , & in præliis , quam in promissis , & fide firmiorem. Tu illius domum inire , tu vetus hospitium renovare voluisti : te ejus Dii penates accepterunt ; te amicum , & placatum Dejotari Regis ara ,
fo-

focique viderunt. Et pro Plancio. Non ego meis
ornatum beneficiis à vobis deprecor , judices , sed
custodem salutis meæ ; non opibus contendō , non
auctoritate , non gratia ; sed precibus , sed lacrimis,
sed misericordia : mecumque vos simul hic miserri-
mus , & optimus obtestatur parens , & pro uno filio
duo patres deprecamur. Nolite , judices , per eos , per
fortunas , per liberos vestros , inimicis meis , his præ-
sertim , quos ego pro vestra salute suscepī , dare læ-
titiam , gloriantibus vos jam oblitos mei , salutisque
ejus , à quo mea salus conservata est , hostes exti-
tisse. Nolite animum meum debilitare tum luctu,
tum etiam metu commutatae vestræ voluntatis erga me:
finite me , quod vobis fatus huic sæpe promisi , id
à vobis ei persolvere. Teque , C. Flavi , oro , & ob-
testor , qui meorum consiliorum in consulatu socius,
periculorum particeps , rerum , quas gessi , adjutor
fuisti , meque non modo salvum semper , sed ornatum,
florentemque esse voluisti , ut mihi per hos conserves
eum , per quem me tibi , & his conservatum vides.

Vehemens est etiam , atque flexanima (1) Pa-
linuri ad Æneam obtestatio apud Virg. Æneid. 6.

Quod te per Cœli jucundum lumen , & auras,
Per genitorem oro , per spem surgentis Iūli,
Eripe me his , invicte , malis , aut tu mihi terram
Injice , namque potes , portusque require Velinos:
Aut tu , si qua via est , si quam tibi Diva creatrix
Oſ-

(1) Palinurus Æneæ navis gubernator , qui somno
oppressus , una cum gubernaculo in mare delapsus est.

Ostendit (neque enim credo sine numine Divum
Flumina tanta paras , Stygiamque innare paludem)
Da dextram misero , & tecum me tolle per undas.

Ita Ulysses , ut Achillis arma à Græcis impe-
tret , hunc in modum eos post longam oratio-
nem obtestatur apud Ovidium Metamor. L. 13.

At vos , o proceres , vigili date præmia vestro,
Proque tot annorum cura , quos anxius egi,
Hunc titulum meritis penſandum reddite nostris.
Jam labor in fine est ; obſtantia fata removi;
Altaque , posse capi faciendo , Pergama cepi.
Per ſpes nunc ſocias , caſuraque moenia Trojæ,
Perque Deos oro , quos hoſti nuper ademi;
Per ſi quod ſupereſt , quod ſit ſapienter agendum;
Si quid adhuc audax , ex præcipitique petendum;
Si Trojæ fatiſ aliquid reſtare putatis ,
Eſte mei memores.

Hæc figura p̄æ ceteris vehemens eſt , & in
perorationibus potiſſimum ſolet adhiberi.

§. V. De Imprecatione

Quid eſt Imprecatio?
R. Eſt exſecratio quædam , qua malum
imprecamus alicui , vel etiam nobis meti-
pſis. Tale eſt illud Ciceronis pro Dejotaro : *Dii te*
perdant , fugitive. Ita non modo nequam , & impro-
bus , ſed etiam fatuus , & amens eſt. Et in Antoniu-
mum:

nium: *Quin tu abi in malam rem, malumque cruciatum.* Tale est etiam illud Didonis: (1)

Sed mihi vel tellus optem prius ima dehiscat,
Vel Pater omnipotens adigat me fulmine ad umbras,
Pallentes umbras Erebi, noctemque profundam,
Ante, pudor, quam te violem, aut tua jura resolvam.

§. VI. De interrogatione, & subjectione.

Quid est interrogatio? R. Fit, cum interrogamus aliquem, non tam ad rem dubiam quærendam, quam ad urgendum, instandumque, & ad vehementiorem affectum exprimendum. Ita Cicero Catilinam urget hisce verbis: (2) Patere tua consilia non sentis? Constrictam jam horum omnium conscientia teneri conjurationem tuam non vides? Quid proxima, quid superiore nocte egeris, ubi fueris, quos convocaveris, quid consilii ceperis, quem nostrum ignorare arbitraris?

Quibus sane interrogationibus Catilinam multo acrius pungit Cicero, quam si frigide diceret: Patent, Catilina, tua consilia; conjuratio tua omnium conscientia constricta tenetur; quid egeris, nemo ignorat.

Hac etiam figura usus est in Pisonem: An vero reliquo tempore Consulem te quisquam duxit? quisquam

ti-

(1) Æneid. 4.

(2) In Cat. 1.

tibi paruit? quisquam in curiam venienti adsurrexit? quisquam consulenti respondendum putavii? Numerandus est ille annus denique in rep., cum obmu uisset Senatus; judicia conticuissent; mōrerent boni; vis latrocinii vestri tota urbe volitaret; neque civis unus ex civitate, sed ipsa civitas tuo, & Gabinii sceleri, furorique cessisset?

His adde Orationem in Vatinium, quæ tota fere interrogationibus constat, unde & nomen habuit.

Similiter poterat, dicere Virgilius:

Ipse ego te vidi Damonis, pessime, caprum
Excipere insidiis, multum latrante Lycisca.

Sed plus spiritus, nervorumque habet hæc interrogatio: (1)

Non ego te vidi Damonis, pessime, caprum
Excipere insidiis?

Quod si interrogationi subjiciatur responso, Subjectio vocabitur. Sic Tullius pro lege Manilia:
Quid tam novum, quam adolescentulum privatum, exercitum difficulti Reipublicæ tempore confidere? Conficit: huic præesse? Præfuit: rem optime ductu suo gerere? Gessit. Quid tam præter conjectudinem, quam homini adolescentii, cuius à Senatorio gradu ætas longe abesset, imperium, atque exercitum dari, Siciliam permitti, atque Africam, bellumque in ea administrandum?

(1) Ecl. 3.

dum? Fuit in his Provinciis singulari innocentia, aequitate, virtute: bellum in Africa maximum consecit, victorem exercitum deportavit.

Et Phil. 2. Doletis tres exercitus populi Romani imperfectos? Interfecit Antonius. Desideratis clarissimos cives? Eos quoque eripuit vobis Antonius. Auctoritas hujus ordinis adficta est? Adfixit Antonius. Omnia denique, quæ postea vidimus, (quid autem mali non vidimus?) si recte ratiocinabimur, uni accepta referemus Antonio.

§. VII. De Præteritione, & Reticentia.

Quid est Præteritio?

R. Præteritio, quæ Ciceroni videtur in amore, & in deliciis fuisse, fit cum simulamus nos vel nescire, vel nolle dicere id, quod vel maxime dicimus. Ita Tullius suum Pompejum magnifice laudat per præteritionem:

Itaque non sum prædicaturus, Quirites, quantas ille res domi, militiæque, terra, marique, quantaque felicitate gesserit: ut ejus semper voluntatibus non modo Cives adsenserint, socii obtemperarint, hostes obedierint, sed etiam venti, tempestatesque obsecundarint: hoc brevissime dicam...

Habes etiam luculentam ejusdem Tullii præteritionem in Vatinium: *Atque illud tenebricosissimum tempus ineuntis ætatis tuae patiar latere. Licet impune per me, parietes in adolescentia perfoderis, vicinos compilaris, matrem verberaris. Habet hoc præmium tua indignitas, ut adolescentiæ turpitudo obscuritate, & sordibus tuis tegatur.*

Et

Et pro Lege Man. Non dico hoc loco , maiores nostros semper in pace consuetudini , in bello utilitati paruisse ; semper ad novos casus temporum novorum constitiorum rationes accommodasse : non dicam , duo bella maxima , Punicum , & Hispaniense , ab uno Imperatore esse confecta ; duas urbes potentissimas , quæ huic imperio maxime minabantur , Carthaginem , atque Numantiam , ab eodem Scipione esse deletas : non commemorabo , nuper ita vobis , patribusque vestris esse visum , ut in uno C. Mario spes imperii poneretur ; ut idem cum Jugurtha , idem cum Cimbris , idem cum Theutonis bellum administraret. In ipso Cn. Pompeo , in quo novi constitui nihil vult Q. Catulus , quam multa sint nova , summaque Catuli voluntate constituta , recordamini .

Præteritioni vicina est , & ad finis Reticentia , Aposiopesis Græce dicta : quæ fit , cum orationem abrumpimus subito , & reticemus aliquid , ut majora auditoribus cogitanda relinquamus , quia nimis latent , graviora putantur .

Illustre omnino hujusc Schematis exemplum nobis suppeditat Virgilius Æneid. 1. ubi Neptunus ventos tumultuantes sic increpitat :

Jam cœlum , terramque meo sine numine , venti ,
Mīscere , & tantas audetis tollere moles ?
Quos ego... sed motos præstat componere fluctus .
Post mihi non simili poena commissa luetis .

Sic etiam Lib. 5. Mnestheum ita loquentem inducit :

Non jam prima peto Mnestheus, neque vincere certo;
 Quamquam o! sed superent, quibus hoc Neptune
 dedisti.

Hac figura Terentius etiam utitur, cum ait in
 Eun. Act. 5. Scen. 6.

Ego te, furcifer,
 Si vivo ... sed istud quidquid est primum expedi.

§. VIII. De Expolitione.

Quid est Expolitio?

R. Expolitio, sive Commoratio, & Exor-
 natio (nam tria hæc vocabula unum, at-
 que idem sonant) est figura ad motus excitan-
 dos valde insignis.

Fit autem, cum eandem sententiam variis mo-
 dis versamus, ut altius in auditorum animis defi-
 gatur. Ita Cicero pro Sextio : *An mihi ipſi, ut*
quidam putant, fuit mors aequo animo appetenda?
Quid? tum mortem ne fugiebam? an erat res illa,
quam mihi magis optandam putarem? tam eram rudis?
tam ignarus rerum? tam expers consilii, aut ingenii?
nihil audieram? nihil videram? nihil ipse legendo,
quærendoque cognoveram? Nesciebam vitæ brevem esse
cursum, gloriæ sempiternum? cum esset omnibus de-
finita mors, optandum esse, ut vita, quæ necessita-
ti deberetur, Patriæ potius donata, quam reservata
naturæ videretur? Nesciebam, inter sapientissimos
homines hanc contentionem fuisse, ut alii dicerent,
animos hominum, sensusque morte restinguī; alii au-
tem, tum maxime mentes sapientum, ac fortium vi-

rorum, cum è corpore excessissent, sentire, ac vigere? quorum alterum fugiendum non esse, carere sensus; alterum etiam optandum, meliore esse sensu.

Sic etiam Cic. Phil. 14. eos laudat, qui in Mutinensi prælio fortiter mortem obierant: *O fortunata mors, quæ, naturæ debita, pro patria est potissimum reddita!* Vos vero patriæ natos judico, quorum etiam nomen à Marte est; ut idem Deus urbem hanc gentibus, vos huic urbi genuisse videatur. In fuga fœda mors est, in victoria gloria. Etenim Mars ipse ex acie fortissimum quicunque pignerari sollet. Illi igitur impii, quos cæcidistis, etiam ad Inferos pœnas parricidii luent: vos vero qui extremum spiritum in victoria effudistis, piorum estis sedem, & locum consecuti. Brevis à natura vobis vita data est; at memoria bene redditæ vitæ sempiterna; quæ si non esset longior, quam hæc vita, quis esset tam amens, qui maximis laboribus, ac periculis ad summam laudem, gloriamque contenderet? Abitum igitur præclare vobiscum, fortissimi, dum vixistis, nunc etiam sanctissimi milites, quod vestra virtus nec oblitione eorum, qui nunc sunt, nec reticentia posterorum inseulta esse poterit, cum vobis immortale monumentum suis pene manibus Senatus Populusque Romanus exstruxerit. Multi saepe exercitus Punicis, Gallicis, Italicis bellis clari, & magni fuerunt; nec tamen ullis tale genus honoris tributum est. Atque uinam majora possemus, quandoquidem à vobis maxima accepimus! Vos ab urbe furentem Antonium avertistis; vos redire molientem repulisti. Erit igitur exstructa moles opere magnifico, inciseque litteræ divine virtutis

tis testes sempiternæ: nunquam de vobis eorum, qui aut videbunt vestrum monumentum, aut audient, gratissimus sermo conticescet. Ita, pro mortali condizione vitæ, immortalitatem estis consecuti.

§. IX. De Epiphonemate.

Quid est Epiphonema?

R. Est exclamatio sententiosa, quæ fieri solet post rem aliquam insignem vel narratam, vel probatam. Ut cum Virgilius, post narratos classis Trojanæ labores, sic exclamat sententiose: (1)

Tantæ molis erat Romanam condere gentem.

Sic etiam Lucretius Lib. I. post commemorationum exemplum Agamemnonis, filiam suam Iphigeniam immolantis, hac gravi sententia claudit narrationem:

Tantum Relligio potuit suadere malorum.

Simile est illud Ciceronis in libro de Senectute: *Senectutem ut adipiscantur, omnes optant; eandem accusant (2) adeptam: tanta est inconstans, stultitia, atque perversitas.* Sic etiam Virgilius, postquam Apum, in melle confiendo, industriam, labo-

(1) *Aeneid.* I.

(2) *Alii Adepti, quæ lectio videtur melior.* (3)

resque descriptis, hoc addit Epiphonema:

Tantus amor florum, & generandi gloria mellis.

Itemque hoc 2. Georgicorum:

— Adeo à teneris confuscer multum est.

Et alio in loco, de crudeli, atque impio Polymnestore loquens (1):

Fas omne abrumpit; Polydorum obtruncat, & auro
Vi potitur. Quid non mortalia pectora cogis,
Auri sacra fames?

CAPUT SECUNDUM.

DE FIGURIS AD DELECTANDUM MAGIS IDONEIS.

§. I. De Apostrophe.

Quid est *Apostrophe*?
R. Est Schéma, quo sermonem ad aliam personam, vel quasi personam convertimus, quam instituta oratio requirat. Ita Cicero pro Milone: *Vos, vos appello, fortissimi viri, qui multum pro Republica sanguinem effudistis: vos in vi-*

(1) *Aeneid.* 3.

ri, & civis invicti appello periculo, centuriones, vosque milites. Vobis non modo inspectantibus, sed etiam armatis, & huic iudicio præsidentibus, hæc tanta virtus ex hac urbe expelletur?

Apostrophe fit aliquando ad Superos, ad invocandum. Ita Tullius r. in Catilinam: *Tum tu, Jupiter, qui iisdem, quibus hæc urbs, auspiciis à Romulo es constitutus, quem Statorem hujus urbis, atque Imperii vere nominamus; hunc, & hujus socios tuis aris, ceterisque templis, à teētis urbis, ac monibus, à vita, fortunisque omnium Civium arcebis; & omnes inimicos honorum, hostes Patriæ, latrones Italiae, scelerum fædere inter se, ac nefaria societate conjunctos, æternis suppliciis vivos, mortuosque mactabis.*

Et pro Domo sua. *O Dii immortales! (vos enim hæc audire cupio) P. Clodius vestra sacra curat? vestrum numen horret? res omnes humanas religione vestra contineri putat?*

Non tantum ad personas fit Apostrophe; sed etiam ad res inanimes, sensuque carentes, aut aliquando etiam ad belluas. Ejusmodi est apud Virgilium notissima illa Mezentii Apostrophe ad equum suum, nomine Rhœbum:

Rhœbe, diu (res si qua diu mortalibus ulla est)
Viximus . . .

Ita Propertius Lib. 4. El. 7. Alcidem, postquam boves recuperasset, eos sic adloquentem inducit:

. Alcides sic ait: Ite boves,

Herculis ite boves, nostræ labor ultime clavæ,
 Bis mihi quæsitæ, bis mea præda boves;
 Arvaque mugitu sancite boaria longo :
 Nobile erit Romæ pascua nostra forum.

Ita Cicero pro Milone: *Vos enim jam Alba-ni tumuli, atque luci, vos, inquam, imploro, atque obtestor, vosque Albanorum obrutæ aræ, sacro-rum Populi Romani sociæ, & æquales.* Poëtis porro nihil familiarius est, quam illa ad res sensu carentes Apostrophe. Ita Dido moriens Æneid. 4.

Dulces exuviae, dum Fata, Deusque sinebant,
 Accipite hanc animam, meque his exiolvite curis.

Ita etiam Sinon Lib. 2.

*Vos æterni ignes, & non violabile vestrum
 Testor numen, ait, vos aræ, ensesque nefandi,
 Quos fugi, vittæque Deum, quas hostia gessi.*

& ibid. Æneas:

Iliaci cineres, & flamma extrema meorum,
 Testor in occasu vestro nec tela, nec ulla
 Vitavisse vices Danaum; & si fata fuissent
 Ut caderem, meruisse manu.

Quænam sunt Apostrophes regulæ?

R. Tres. 1. Raro est usurpanda. Si enim crebrius adhibeatur, inepta erit, & frigidiuscula.

2. Tametsi multis videatur, Apostrophem in ipso diceendi principio nequaquam adhiberi posse, interdum tamen Orationem inchoat egregie, ut docet initium primæ Catilinariæ : *Quousque tandem abutere, Catilina, patientia nostra?*

3. Fas est Poëtis, solius metri causa, Apostrophem adhibere. Ita Ovidius Lib. 3. Tristium Eleg. 8.

Nunc ego jaētandas optarem sumere pennas,
Sive tuas, (1) Perseu, Dadale, sive tuas.

§. II. De Hypotyposi.

Quid est Hypotyposis?

R. Est figura, qua res ita graphice describitur, ut non tam audiri, vel legi, quam ante oculos versari videatur. Splendidum in primis, ac illustre illius exemplum habes in septima Verrina, ubi Tullius Verris inhumanitatem oculis ita subjicit : *Ipse inflammatus scelere, & furore in forum venit. Ardebant oculi; toto ex ore crudelitas eminebat. Exspectabant omnes quo tandem progressurus, aut quidnam acturus esset; cum reente (2) Hominem corripi, atque in foro medio nudari, ac deligari, & virgas expediri jubet. Clamat ille miser, se Civem esse Romanum.*

Sic etiam in Pis. Meministi ne, canum, cum ad te

(1) Perseus Jovis filius, talaribus à Mercurio denatus, Andromedam liberavit.

(2) Gavium Civem Romanum.

re quinta fere hora cum C. Pisone venissim , nescio
 quo è gurgusio te prodire , involuto capite , soleatum
 & cum isto ore fætido teterrimam nobis popinam in-
 halasses , excusatione te uti valetudinis , quod dices ,
 vinolentis te quibusdam medicaminibus solere curari?
 Quam nos caussam cum accepissimus , (quid enim
 facere poteramus ?) paullisper stetimus in illo genea-
 rum tuarum nidore , atque fumo ; unde tu nos cum
 improbissime respondendo , tum turpissime eructando ,
 ejecisti. Et Philip. 2. Tu ipsis faucibus , ipsis lateri-
 bus , ista gladiatoria totius corporis firmitate , tantum
 vini in Hippæ nuptiis exauferas , ut tibi necesse esset
 in populi Romani conspectu vomere postridie. O rem
 non modo visu fædam , sed etiam auditu ! Si inter
 cænam , in tuis immanibus illis poculis hoc tibi acci-
 disset quis non turpe diceret ? In cætu vero populi Ro-
 mani , negotium publicum gerens , magister equitum ,
 cui ruclare turpe esset , is vomens frustis esculentis ,
 vim redolentibus , gremium suum , & totum tribu-
 nal implevit.

Brevioris hypotyposis exemplum habes in Ora-
 tione in Catil. 2. Facet ille nunc prostratus , Quiri-
 tes , & se perculsum , atque abjectum esse sentit ; &
 retorquet oculos sæpe ad hanc urbem ; quam ex suis
 faucibus ereptam esse luget ; quæ quidem lætari mihi
 videtur , quod tantam pestem evanuerit , forasque pro-
 jecerit.

Hypotyposim creberrime solent usurpare Poë-
 tæ , ac præfertim Virgilius , qui res adeo vivis , &
 spirantibus , ut ita dicam , coloribus describit , ut
 pene sub oculos cadant. Ita Cyclopes depingit
 Æneid. 8. Fer-

Ferrum exercebant vasto Cylcopes in antro ,
Brontesque,Steropesque,& nudus membra Pyramon.

— Alii ventosis follibus auras
Accipiunt redduntque : alii stridentia tingunt
Æra lacu : gemit impositis incudibus antrum.
Illi inter se , multa vi , brachia tollunt
In numerum , versantque tenaci forcipe massam.

Sic etiam Lib. 2. Laocoontem à serpentibus in-
teremptum describit.

..... jamque arva tenebant ,
Ardentesque oculos suffecti sanguine , & igni ,
Sibila lambebant linguis vibrantibus ora.
Diffugimus visu exsangues ; illi agmine certo
Laocoonta petunt ; & primum parva duorum
Corpora natorum serpens amplexus uterque
Implicat , & miseros morsu depascitur artus.
Post ipsum auxilio subeuntem , ac tela ferentem
Corripiunt , spirisque ligant ingentibus ; & jam
Bis medium amplexi ; bis collo squamea circum
Terga dati , superant capite , & cervicibus altis.
Ille simul manibus tendit divellere nodos ,
Perfusus sanie vittas , atroque veneno ;
Clamores simul horrendos ad sidera tollit ;
Quales mugitus , fugit cum saucius aram
Taurus , & incertam excussit cervice securim.

§. III. De Protopopœja.

Quid est Protopopœja? R. Protopopœja est fictio personæ, seu Schema, quo personæ mortuæ, vel absenti, aut etiam rei sensu carenti sermonem tribuimus, per quandam licentiam oratoriam; v. g. cum indicamus loquentem Urbem, Provinciam, Angelum, Beatum, parietem, aliaque id genus.

Sic Tullius in prima Catilinaria ita loquenter Patriam inducit: *Quæ (Patria) tecum, Catilina, sic agit, & quodammodo tacita loquitur: Nullum jam tot annos facinus existit, nisi per te: nullum flagitium sine te. Tibi uni multorum neces, tibi vexatio, direptioque sociorum impunita fuit, ac libera. Tu non solum ad negligendas leges, & quæstiones, verum etiam ad evertendas, perfringendasque valuisti. Superiora illa, quamquam ferenda non fuerunt, tamen, ut potui, tuli. Nunc vero me totam esse in metu, propter te unum, (1) quidquid increpuerit, Catilinam timeri; nullum videri contra me consilium iniiri posse, quod à tuo scelere abhorreat, non est ferendum. Quamobrem discede, atque hunc mibi timorem eripe. Si verus, ne opprimar; si falsus, ut tandem ali-*

(1) Hisp. *Que al menor ruido, que haia en la ciudad, se haia de temer à Catilina.*

aliquando timere desinam. Hec si tecum, ut dixi,
Patria loquatur &c.

Venustissimum est, & aurea Augusti ætate dignissimum Epitaphium hoc, in quo viventem maritum per Prosopopœjam sic adloquitur uxor mortua:

Immatura peri; sed tu felicior annos

Vive tuos, conjux optime, vive meos.

§. IV. De Ethopœja.

Quid est Ethopœja?

R, Ethopœja est expressio morum, seu Schema, quo alicujus studia, mores, indolem, ingenium verbis exprimimus. Ita Sallustius (1) Catilinam omnibus artis coloribus egregie pingit in illa Ethopœja, tantopere omnium consensione laudata.

Ethopœja Catilinæ.

*Lucius Catilina nobili genere natus, fuit magna vi
 & animi, & corporis, sed ingenio malo, prævoque.
 Huic ab adolescentia, bella intestina, cædes, rapinæ,
 discordia civilis grata fuere; ibique juventutem suam
 exercuit. Corpus patiens inedia, algoris, vigiliæ, su-
 pra quam cuique credibile est. Animus audax, subdo-
 lus, varius: cuiuslibet rei simulator, ac dissimula-
 tor, alieni adpetens, sui profusus: ardens in cupidi-*

ta-

(1) In bello Catilinario.

*tatibus: satis eloquentiae, sapientiae parum. Vastus
animus immoderata, incredibilia, nimis alta semper
cupiebat.*

Optimum Ethopœjæ exemplum habes etiam apud Livium Dec. 3. Lib. 1. ubi Hannibalis mores ita exprimit : *Missus Hannibal in Hispaniam, primo statim adventu omnem exercitum in se convertit. Hamilcarem viviem redditum sibi, veteres milites credere; eundem vigorem in vultu, vimque in oculis, habitum oris, lineamentaque intueri. Deinde brevi effecit, ut pater in se minimum momentum ad favorem conciliandum esset. Numquam ingenium idem ad res diversissimas, parendum, atque imperandum, habilius fuit. Itaque haud facile discerneres, utrum Imperatori, an exercitui carior esset; neque Hasdrubal alium quemquam præficere malle, ubi quid fortiter, ac strenue agendum esset; neque milies alio duce plus confidere, aut audere. Plurimum audacie ad pericula capessenda, plurimum consilii inter ipsa pericula erat; nullo labore aut corpus fatigari, aut animus vinci poterat; caloris, ac frigoris patientia par; cibi, potionisque desiderio naturali, non voluptate modus finitus; vigiliarum, somniique nec die, nec nocte discriminata tempora; id, quod gerendis rebus supereffet, quieti datum. Ea neque molli strato, neque silentio accersita. Mulii saepè militari sagulo opertum, humi jacentem inter custodias, stationesque militum conspexerunt. Vestitus nihil inter æquales excellens; arma, atque equi conspiciebantur. Equitum, peditumque idem longe primus erat; princeps prælium inibat; ultimus confecto prælio excedebat. Has tantas viri vir-*

tutes ingentia vitia æquabant : inhumana crudelitas, perfidia plus quam Punica, nihil veri, nihil sancti, nullus Deum metus, nullum jusjurandum, nulla religio.

Sic etiam Plautus senis avari, sordidique mores mirabiliter exprimit, (1) dum illum inducit hæc servo mandata dantem:

Senex avarus.

Cave quemque alienum in ædem intromiseris.

Si quispiam ignem quærat, extingui volo.

Ne caußæ quid sit, quod te quisque quæreret.

Tum aquam effugisse dicio : si quis petet
Cultrum, securim, (2) pistillum, mortarium,
Quæ utenda vasa semper vicini rogitant,
Fures venisse, atque abstulisse dicio.

Mulierum mores graphice pingit Terentius, dum
ait in Eun. 4. 7. 42.

..... Novi ingenium mulierum:
Nolunt, ubi velis; ubi nolis, cupiunt ultro.

Et alio loco in Heaut. 2. 2. 10.

..... Nostri mores mulierum:
Dum moliuntur, dum comuntur, annus est.

Etho-

(1) In *Aulularia.*

(2) Hisp. *La mano del Almirez.*

Ethopœja dividitur in Prosopographiam, & in Ethopejam proprie dictam, de qua jam egimus.

Quid est Prosopographia?

R. Est expressio vultus, ac corporis totius, seu Schema, quo alicujus vultum, os, lineamenta, incessum, cultum, habitumque omnem exprimimus. Ita Virgilius Lib. 3. Æn. Achæmenidem pingit.

Cum subito è silvis macie confecta suprema
Ignoti nova forma viri, miserandaque cultu
Procedit; supplexque manus ad litora tendit.
Respicimus: dira illuvies, immissaque barba,
Consertum tegmen spinis; at cetera Grajus,
Et quondam patriis ad Trojam missus in armis.

Et Lib. 6. hunc in modum Charontem describit.

Portitor has horrendus aquas, & flumina servat
Terribili squalore Charon; cui plurima mento
Canities inculta jacet; stant lumina flamma.
Sordidus ex humeris nodo dependet amictus.
Ipse oratem conto subigit, velisque ministrat;
Et ferruginea subvectat corpora cymba;
Jam senior, sed cruda Deo, viridisque senectus.

Sic etiam Cic. Orat. pro Sextio Pisonis os, habitumque describit: Alter, (Piso) o Dii boni, quam teter incedebat, quam truculentus, quam terribili aspectu! Unum aliquem te ex barbatis illis, exemplum imperii veteris, imaginem antiquitatis, co-

lumen Reip. diceret intueri. Vestitus aspero nostra hac
purpura plebeja, & pene fusca, capillo ita horrido,
ut Capua, in qua ipse tum, imaginis formandæ caussa,
duumviratum gerebat, Seplasiam sublaturus videretur.
Nam quid ego de supercilio dicam? quod tum homi-
nibus non supercilium, sed pignus Reip. videbatur.
Tanta erat gravitas in oculo, tanta frontis contracatio,
ut illo supercilio Resp., tamquam Atlante cœ'um,
niti videretur.

Feliciter admodum miscentur Prosopographia,
& Ethopœja proprie dicta; & ex tali mixtura Sche-
ma gratissimum efflorescit, ut liquet in exemplo
sequenti, ubi M. Calpurnium sic pingit (1) Tullius:
Consul ipse parvo animo, & pravo: tantum ca-
villator genere illo moroso, quod etiam sine dicacita-
te ridetur, facit magis quam facetiis ridiculus: à que-
nihil speres boni Reipublicæ, quia non vult; nihil me-
tuas mali, quia non audet.



CAPUT TERTIUM.

DE FIGURIS AD DOCENDUM IDONEIS.

§. I. De Antithesi.

Quid est Antithesis?

R. Antithesis, sive oppositio est Schema,
quo verba verbis, sententiæ sententiis

OP-

(1) Ad Atticum L. 1. Ep. 13.

opponuntur; cuius rei splendidum in primis, & illustre exemplum habes in 2. Catilinaria. Ex hac parte pudor pugnat, illinc petulantia; hinc pudicitia, illinc stuprum; hinc fides, illinc fraudatio; hinc pie-tas, illinc scelus; hinc constantia, illinc furor; hinc honestas, illinc turpitude; hinc continentia, illinc libido. Denique æquitas, temperantia, fortitudo, pru-dentia, virtutes omnes certant cum iniuitate, cum luxuria, cum ignavia, cum temeritate, cum vitiis omnibus; postremo copia, cum egestate; bona ratio cum perdita; mens sana cum amentia; bona denique spes cum omnium rerum desperatione confligit.

Et pro Cluentio: Quid? conferam Syllam ne cum Junio? an hunc tribunum plebis cum Quintio? an vero tempus cum tempore? Sylla maximis opibus, cognatis, adfinibus, necessariis, clientibus plurimis: hæc autem apud Junium parva, & infirma, & ipsius labore quæsta, atque collecta. Hic tribunus plebis modestus, pudens, non modo non seditious, sed etiam seditious adversarius; ille autem acerbus, criminosus, popularis homo, ac turbulentus. Tempus hoc tranquillum, ac pacatum; illud omnibus invidiæ tempestatibus concitatum.

Ita Ovidius (1):
 Frigida pugnabant calidis humentia siccis,
 Mollia cum duris, sine pondere habentia pondus.

Hoc etiam modo Horatius L. 2. Od. 12.
 Privatus illis census erat brevis,
 Commune magnum.

§. II.

(1) i. Metam.

§. II. De Sustentatione.

Quid est Sustentatio?

R. Est figura, qua Orator, ad sibi conciliandam attentionem, & ad excitandos, arrigendosque auditorum animos, illos tenet aliquandiu suspensos, incertosque quid dicturus sit; ut cum Tullius ait contra Verrem: *Etiamnum mibi exspectare videmini, judices, quid deinde factum sit... Exspectate facinus quam vultis improbum; vincam tamen exspectationem omnium.*

Et Phil. 7. Ego itaque pacis, ut ita dicam, alumnus, qui quantuscumque sum (nihil enim mihi adrogo) sine pace civili certe non fuisset: (periculose dico: quemadmodum accepturi, P.C., sitis, horreo; sed pro mea perpetua cupiditate vestre dignitatis retinenda, quæso, oroque vos, ut primo, et si erit vel acerbum auditu, vel incredibile à M. Cicerone esse dictum, accipiat sine offensione, quod dixero; neve id prius, quam quale sit explicavero, repudietis:) ego ille, dicam saepius, pacis semper laudator, semper auctor, pacem cum M. Antonio esse nolo.

§. III. De Communicatione.

Quid est Communicatio?

R. Est figura, qua Orator, caussæ suæ fidens, deliberat cum iis ipsis, apud quos, vel contra quos dicturus est, illos nimirum consuls, quid acturus sit. Egregium hujusmodi exemplum habes in Verrina ubi Cicero summam caussæ

suæ fiduciam ita demonstrat : Nunc vos *consule*, quid mihi faciendum putetis. Id enim consilii prosectori taciti dabitis, quod ego mihi necessario capiendum intelligo. Et pro Cæcina : Quæro, si te hodie dominum tuam redeuntem homines armati, non modo limine, rectoque ædium tuarum, sed primo aditu, vestibuloque prohiberent, quid acturus sis? Et Divini in Q. Cæciliū. Si tibi, Q. Cæcili, hoc Siculi dicerent : Te non novimus; nescimus qui sis; numquam te antea vidimus: sine nos per eum nostras fortunas defendere, cuius fides est nobis cognita: nonne id dicent, quod cuivis probare deberent? Nunc hoc dicunt, utrumque se nosse: alterum se cupere defensorem esse fortunarum suarum; alterum plane nolle.

§. IV. De Correctione.

Quid est *Correctio*?

R. *Correctio*, seu *Retractatio*, est Schema quo Orator sententiam, aut vocem à se prolatam retractat, ac veluti corrigit. Ita Cicero, pro Cœlio : O stultitia! Stultitiamne dicam, an impudentiam singularem? Et prima Catilinaria : Quamquam quid loquor? Te ut ulla res frangat? Tu ut umquam te corrigas? Tu ut ullam fugam meditere? Tu ut ullum exsiliū cogites? Utinam ibi istam mentem Di immortales donarent! Et Phil. 14. Numquam enim in civili bello supplicatio decreta est. Decretamus dico? ne victoris quidem litteris postulata est.

Sic etiam Terentius in *Comœdia*, quæ inscribi-

bitur (1) *Heautonimorumenos*, miserum senem Menedemum sic loquentem inducit i. i. 41.

Filium unicum adolescentulum
Habeo. Ah! quid dixi habere me? Immo habui,
Chreme:
Nunc habeam, nec ne, incertum est.



CAPUT QUARTUM.

DE FIGURIS VERBORUM.

27

Figuræ verborum aliae sunt tropi, aliae non sunt tropi. Figuræ, quæ sunt tropi, fiunt tantum in verbis translatis, hoc est à sensu sibi proprio in alienum sensum traductis, ut cum dicimus: *Lætas segetes. Prata rident. Geminos du fulmina belli Scipiadas &c.* Figuræ vero, quæ non sunt tropi, fiunt etiam in verbis propriis, ut cum ait Tullius: *O tempora! O mores!* Et alio loco: *Abiit, excessit, evasit, erupit.*

§. I. De Tropis.

Quid est *Tropus*?
R. *Tropus* est verbi, vel *Orationis* è propria significatione in alienam immutatio

I. cum

(1) *Vox composita, quæ Graece sonat, scilicet ipsum puniens.*

cum virtute, ac dignitate; ut cum dicitur, *Mulus* pro *Stupido*; vel *Laterem lavare*, pro *Erustra laborem suscipere*, instar laterem lavantis. Ista porro immutatio, sive conversio lofit cum virtute, ac dignitate, hoc est ad addendum orationi pondus, majoremque illi venustatem, & dignitatem conciliandam. Porro *Tropus* sic appellatur à voce Græca *τρέπω*, *verto*; ut ad verbum *Inversionem* sonet.

Hæc autem Inversio fit multiplici, variaque ratione, sed quatuor potissimum modis, unde existunt primarii quatuor, nobilissimique Tropi, nempe *Metaphora*, *Metonymia*, *Synecdoche*, & *Ironia*, de quibus sigillatum tractandum est.

§. II. De Metaphora.

Quid est *Metaphora*? R. *Metaphora*, seu *Translatio* est tropus, quo vox aliqua à propria significatione ad alienam transfertur ob similitudinem: Ut cum ait Tullius ad Cæfarem: *Parietes hujus curie tibi gratias agere gestiunt*. Vox illa, *Gestire*, quæ est hominis propria, transfertur ad parietem, cuius non est propria; sed cum quo tamen habet hoc loco quandam similitudinem, & adfinitatem.

Hunc porro usum, ac modum verba transferendi necessitas genuit, cum scilicet verba propria deessent; postea vero delectatio, jugunditasque celebravit. Quemadmodum enim vestis depellendi

frigoris causa primum reperta, postea etiam adhiberi coepit est ad ornatum corporis, &c dignitatem; sic verbi translatio solius inopiae causa primum instituta, deinde etiam fuit ad delectationem, & ad ornatum orationis frequentata.

*Vnde*nam potissimum ducuntur Metaphoræ?

R. Ex omnibus omnino rebus duci possunt, à divinis, à coelestibus, ab elementis, meteoris, lapidibus, metallis, plantis, bestiis, hominibus, eorumque operibus: adeo ut non minus late patet Metaphora, quam similitudo, quæ à re qualibet duci potest.

Metaphora dicitur, 1. à Divinis, ut apud Ciceronem: *Deus ille noster Plato.*

2. Sumitur ab Elementis, ut cum dicitur à Tullio: *Nullius tantum est flumen ingenii, nulla scribendi, aut dicendi tanta vis, tantaque copia, quæ non dicam exornare, sed enarrare, Cæsar, res tuas gestas possit.*

3. Metaphora sumitur è stirpibus, plantis, & arboribus. Ita Cicero: *Virtus est una altissimis fixa radicibus, quæ nulla unquam vi labefactari potest.*

4. Sumitur à rebus arte, manuque factis. Ita (1) Appion ille, contra quem Josephus scripsit, vocabatur *Cymbalum mundi*. Longinus vero Rhetor eximus appellabatur *Viva Bibliotheca* & *Museum ambulans*; quod etiam de Origene dic-

(1) Appion Grammaticus Alexandrinus vixit tempore Tiberij.

tum accepimus. Imperator autem Helvius Pertinax *Fortunæ Pila* fuit vulgo nuncupatus, quod nempe variis fortunæ casibus fuisset exercitus. Denique Augustus homines illos, qui solerti, promptoque erant ingenio ad res ex tempore conficiendas, lepide ajebat: *Argentum habere* (1) *in numerato*, Metaphora à pecuniis ducta.

5. Metaphora dicitur ab homine; ut cum ait apud Virgilium Palinurus: Méne salis placidi vultum, fluctusque quietos Ignorare jubes?

Reliquos Metaphorarum fontes, qui innumerabiles sunt, & cuilibet obvii, persequi sigillatim, hominis esset otio intemperanter abutentis. Quatuor tamen præcipua capita Quintilianus enumerat, ad quæ omnes Metaphoræ commode possunt revocari.

Primo fit Metaphora, cum à re quapiam animata ad rem aliam animatam verbum transferimus: ut cum ait Titus Livius: *Scipionem à catone solitum adlatrari*; quæ vox, *Adlatrare*, cum propria sit solius canis, tribuitur tamen homini non inconcinne.

Secundo fit Metaphora, cum inanima pro aliis inanimis ponuntur: ut *Habena* pro *Gubernaculo*; *Frenum* pro *Lege*; *Vinculum* pro *Communitate*; vel si dicas cum Tullio: *Hic orationis vela contrahamus*.

Tertio, cum inanima transferuntur ad animata: ut cum ipsa civitatis lumina extincta

di-

(1) Hisp. *De contado.*

dicuntur in morte præstantium virorum; & cum
ait Catullus:
O qui flosculus es juvenculorum.

Quarto denique præcipuum quamdam venusta-
tem habet, cum rebus inanimis, sensuque caren-
tibus sensum quemdam, animosque, ac veluti
vitam damus: ut cum ait Virgilius:

— Pontem indignatus (1) Araxes.

Sic etiam Cicero pro Ligario: *Quid enim Tu-
bero tuus ille distictus in acie Pharsalica gladius age-
bat? cuius latus mucro ille petebat? qui sensus erat
armorum tuorum?*

§. III. Quid vitandum in Metaphora.

Quemam Metaphoræ dicuntur vitiosæ?
R. Vitiosæ dicuntur Metaphoræ illæ, quæ
humiliores sunt, sordidæque, & ab re
quapiam abjecta, deformique desumptæ. Talis est
ista, quam damnant Tullius, & Quintilianus:
Stercus curiae Glauca; itemque ista: *Saxa mundi
verrucae,* id est *rupes.* Horatius quoque ob eamdem
caussam notavit versum illum cujuidam M. Furii
Bibaculi: (2)

Jupiter hibernas cana nive conspuit Alpes.

Quid

(1) *Araxes Armeniæ fluvius.* (2) *Sat. 5. lib. 2.*

Quid enim sordidius, ac turpius, quam Metaphoram à sputo mutuari? Hoc eodem humilitatis, &, ut ita dicam, ignobilitatis vitio laborare videtur celebris illa (1) Tertulliani Metaphora, qua diluvium appellat *Naturæ generale lixivium*.

2. Vitioſe dicuntur Metaphoræ, quæ duriores sunt, vel longius accersitæ, vel quæ rem nimis amplificant; ut si dicas: *Syrtim Patrimonii, Charybdim Bonorum*; quod profecto duriſculum est, & à Tullio jure damnatum. Quod si verearīs, ne durior paullo, & audacior videatur Metaphora, poteris illam mollire, ac mitigare illis, aut similibus vocabulis: *Ut ita dicam ... quasi ... pæne ... si ita loqui fas est, &c.* ut si dicas, *Mortuo M. Catione pupillum relictum esse Senatum*, poterit audacior videri hæc translatio: si vero dixeris cum Tullio, *Pupillum, ut ita dicam, relictum esse Senatum*, duriſcula Metaphora, hoc velut adposito condimento, mitescet. Nam, ut sapienter admodum monet idem Tullius: *Verecunda debet esse translatio*, ut deducta esse in alienum locum, non irruisse, atque ut precario, non vi venisse videatur.

3. Vitium est in Metaphora, si nimis poëtica fit: v. g. si Orator dicat cum Virgilio, *Volucres pennis remigare*; aut si cum Horatio dicat de Euro: *Per Siculas equitavit undas*.

Neque enim quæcumque Poëtis licent, ea omnia Oratoribus licere existimandum est. 4.

(1) Tertullianus scriptor Ecclesiasticus, acris, & vehementis ingenii, floruit initio tertii ſeculi.

4. Metaphorarum vitium est immoderata quædam illarum coacervatio. Etsi enim nullus est florētior tropus, & qui plus lumen adferat orationi, non tamen frequentari nimis debet: nam ut modicus illius usus maximopere delectat, ita immodicus non parum adfert satietatis, atque fastidii; & in ænigma transit, aut in allegoriā.

5. Denique vitiosa est Metaphora, quæ sibi non constat; res nimirum omnino dissimiles inter se conjungendo. Quippe, ut docet Fabius, *Id in primis est custodiendum, ut quo ex genere cæperis translationes, hoc desinas. Multi enim cum initium à tempestate sumpserint, incendio, aut ruina finiunt, quæ est inconsequentia rerum fædissima.* Quamquam, ut loquar ingenue, huic de perpetua, sibique consentanea translatione Rhetorum præcepto non adeo severa à summis viris obtemperari video. Scimus enim diversas omnino Metaphoras eleganter sæpe fuisse conjunctas à Virgilio, ab Horatio, à Catullo &c. Sic triplex est Metaphora in duobus hisce versibus Horatii: (1)

Nemo adeo ferus est, ut non mitescere possit,
Si modo culturæ patientem commonet aurem.

Prima est de feris, quæ proprie mansescunt, & cicurantur. Altera est de fructibus, qui acerbi sunt, & proprie mitescunt. Tertia est ab agris, quorum propria est cultura.

§. IV.

(1) Epist. i. lib. i.

sup. natus homines. Non enim copiæ modicæ
est de multis. §. IV. De Allegoria.

Quid est Allegoria?

R. Allegoria est Metaphorarum continua-
tio, seu figura, qua aliud verbis dici-
tur, aliud re ipsa intelligitur: unde non absurde
vocatur *Diversiloquium*; quod nimis aliud dica-
tur, aliud sentiatur.

Hujusmodi est insignis illa Ciceronis in Piso-
nem Allegoria: Neque tam fui timidus, ut qui in
maximis turbinibus, ac flutibus Reipublicæ navem
gubernasssem, salvamque in portu collocasssem, fren-
tis tuæ nubeculam, aut Collegæ tui contaminatum spi-
ritum perhorrescerem. Alios ego vidi ventos; alias
prospexi animo procellas; aliis impendentibus tem-
pestatibus non cessi; sed unum me pro omnium salu-
te obtuli.

Et illa pro Quintio. Ita fit, ut ego, qui tela
depellere, & vulneribus mederi debeam, tum id fa-
cere cogar, cum etiam telum adversarius nullum je-
cerit; illis autem id tempus impugnandi detur, cum
& vitandi illorum impetus potestas nobis adempta erit;
& si qua in re, id quod parati sunt facere, falsum
crimen, quasi venenatum aliquod telum, jecerint, me-
dicinæ faciendæ locus non erit.

Illustris est, & omnibus nota illa Horatii Ode
allegorica de Bello civili Lib. I. Od. 12.

O navis, referent in mare te novi
Fluctus. O quid agis? fortiter occupa.

Por-

Portum. Nonne vides, ut
 Nudum remigio latus,
 Et malus celeri saucius Africo,
 Antennæque gemant; ac sine funibus
 Vix durare Carinæ.
 Possint imperiosius
 Æquor? Non tibi sunt integra linta &c.

In hac eximia Allegoria navim pro Republicas,
 fluctus pro civili bello; portum pro pace, con-
 cordiaque; remigium pro Militibus; nautas pro
 Magistratibus; malum pro præcipuis Ducibus usur-
 pat Horatius; & ab initio ad finem egregie sibi
 constat, quod in Allegoria præcipuum est.

§. V. De Metonymia.

Quid est Metonymia?
 R. Metonymia, quæ etiam vocatur Hy-
 pallage, seu Transnominatio, est troporum
 omnium vastissimus, atque usitatissimus. Fit autem
 quatuor potissimum modis. 1. cum causa, vel
 quasi causa ponitur pro effectu, & cum rerum
 inventor, & auctor usurpatur pro rebus ipsis,
 quas invenit; ut Mars pro bello; Ceres pro fru-
 gibus; Vulcanus pro igne; Cicero, aut Virgilius
 pro scriptis illorum; Dux exercitus pro exercitu
 ipso. Sic dicimus, vario Marte pugnatum est, hoc
 est vario belli eventu; & Virgilius,

Onerantque canistris
 Dona laboratæ Cereris,

ideft

id est *panis*. Et Geōgicorum Lib. 2.

Bacchus amat colles; Aquilonem, & frigora taxi.

Sic etiam dicimus, ab Hannibale apud Cannas cæsa fuisse sexaginta Romanorum milia; hoc est ab Hannibal exercitu. Fit item hoc primo modo Metonymia, cum possessor usurpatur pro re possessa, ut cum ait Virgilius Æneid. 2.

Jam proximus ardet Ucalegon.
Hoc est domus Ucaleontis.

2. Fit Metonymia, cum sumuntur effecta pro causis, ut scelus pro scelerato ipso. Ita Comicus:

Ubi est scelus ille, qui me perdidit?

Ita Virgilius 2. Æneid.
*Accipe nunc Danaum insidias, & crimine ab uno
Disce omnes.*

Ubi *crimen* ponitur pro perfido Sinone criminis auctore, & hic est germanus illius loci sensus: ex uno Sinone disce Græcos omnes esse perfidos. Ita Cic. 1. in Verr. *Quas res luxuries in flagitiis, crudelitas in suppliciis, avaritia in rapinis, superbia in contumeliis efficere potuisset, eas omnes sese hoc uno Prætore per trien-*

triennium pertulisse. Fit etiam, cum id, quod proprium est effectui, tribuitur caussæ, & hoc Poëtis valde familiare est. Ita timor dicitur fugax; mors dicitur pallida; morbi dicuntur pallentes, quia fuga est effectus timoris, & pallor est effectus morborum, & mortis. Sic Horatius:

Pallida mors æquo pulsat pede pauperum tabernas,
Regumque turres.

Sic Virgilius:

Pallentes habitant morbi, tristisque senectus.

3. Fit Metonymia, cum res, quæ continet, usurpatur pro re contenta, ut Roma pro Romanis, Cœlum pro Coelestibus, terra pro terræ incolis. Huc pertinet illud Ciceronis pro lege Manilia: *Testis est Italia, quam ille ipse vicitor Sylla hujus virtute, & consilio confessus est fuisse liberatam. Testis est Sicilia, quam multis undique cinctam periculis, non terrore belli, sed celeritate consilii explicavit. Testis est Africa, que magnis oppressa hostium copiis, eorum ipsorum sanguine redundavit. Testis est Gallia, per quam legionibus nostris in Hispaniam iter Gallorum internecione patefactum est. Ubi Italiam pro Italos, Siciliam pro Siculis &c. usurpavit.*

4. Cum signum usurpatur pro re significata, ut toga pro pace, fasces pro magistratu. Ita Ciceron in Pisonem:

Cedant arma togæ , concedat laurea linguae.

Huc refer , cum hæc vox nomen poniatur pro re ipsa. Ita Livius Lib. I. Ad singula oppida circumferendo arma nomen omne Latinum domuit.

36 §. VI. De Synecdoche.

Quid est Synecdoche;

R. Synecdoche est tropus apud Oratores
aque , ac Poetas valde usitatus , & tritus.
Fit autem modis quatuor.

1. Cum pars ponitur pro toto , v. gr. mucro
pro ense? tectum pro domo ; puppis , vel carina
pro navi integra. Ita Virg. Æneid. 2.

Non anni domuere decem , non mille carinæ.

Est autem carina ima pars navis. Sic etiam
hominis anima sæpe usurpatur pro homine ipso.
Ita Tullius : (1) *Vos meæ carissimæ animæ sæ-
piissime ad me scribite.* Eodem refer vulgares illas
locutiones , quibus *Unus* accipitur pro *Pluribus*,
ut cum dicit Virg. *Hos̄tis habet murōs.*

2. Fit Synecdoche , cum totum usurpatur pro
parte : ut in hoc decantato Virgilii versu : (2)

Aut

(1) Epist. 14. lib. 14.

(2) Eclog. I.

Aut (1) Ararim Parthus bibet, aut Germania
 (2) Tigrim.

Et rursum Æneid. 12.

Fontemque, ignemque ferebant.

Ubi fons accipitur pro parte fontis. Huc pertinet etiam, cum *Plures usurpantur pro Uno*; ut cum ait Tullius: *Nos populo imposimus, & Ora-tores nisi sumus*; licet de se tantum loquatur.

3. Syneccdoche fit, cum materia, ex qua facta res est, accipitur pro re ipsa, v. gr. ferrum pro gladio, pinus pro navi, argentum pro pecunia, quæ fit ex argento.

4. Denique fit Syneccdoche, cum vel species sumitur pro genere, vel genus pro specie, ut *Eurus*, vel *Aquilo* pro quolibet vento, *Sabellicus* sus pro quolibet iure, *Myrtoum*, vel *Carpathium* mare pro mari quocumque. Sic Maro:

Dentesque (3) Sabellicus exacuit sus.

Contra vero genus usurpabitur pro specie, si dicatur cum Virgilio *Ales* pro *Aquila*:

Prædamque ex unguibus ales
 Projectit fluvio.

§. VII.

(1) *Arer.* Hisp. *La Saona*, *fluvius est Galliae.*

(2) *Tigris Asie fluvius insignis, sic dictus à velocitate.*

(3) *Sabelli*, seu *Sabini*, *populi Italie.*

§. VII. De Ironia.

31

Quid est Ironia?

R. Ironia, quæ Socrati adeo fuit in deliciis, est figura, qua aliud plane dicimus, quam verba ipsa significare videntur; quando v. g. quempiam simulata laudatione false, ac ingeniose perstringimus, nimirum aliud aperte dicendo, aliud vero innuendo: unde recte vocatur à Quintiliano, *Diversiloquium*, *dissimulatio*, & *illusio*, ut sonat Græca ipsa Ironiæ vox.

Intelligitur autem Ironia vel ex ipsa re, quæ dicitur, vel ex ipsa pronuntiatione certe quidem: ut si dicas: *O præclarum ovium custodem lupum!*

Eximia est Ciceronis Ironia in Miloniana: *Sed stulti sumus*, inquit, *qui Drusum*, *qui Africanum*, *Pompejum*, *nos metipos cum Publio Clodio conferre audieamus*. Tolerabilia fuerunt illa: *Clodii mortem equo animo ferre nemo potest*: *Iuget Senatus*; *mæret Equestris ordo*; *tota civitas confecta senio est*; *squalent municipia*; *adfliguntur Coloniae*; *agri denique ipsi tam beneficium*, *tam salutarem*, *tam mansuetum civem desiderant*.

Sic etiam Orat. in Pisonem triumphi contemptum, quem ille ostentabat, ita per Ironiam deridet: *Non est integrum Cn. Pompejo consilio jam uti tuo*; *erravit enim*: *non gustarat istam tuam Philosophiam*: *ter jam homo stultus triumphavit*. *Crassè*, *pudet me tui*. *Quid est*, *quod*, *confabo formidolosissimo bello*, *coronam illam lauream tibi tantopere decerni volueris à Senatu?* *P. Servili*, *Q. Metelle*, c.

*Curio, P. Africane, cur non hunc audistis tan
doctum hominem, tam eruditum, priusquam in istum
errorem induceremini? C. ipsi Pontinio necessario meo
jam non est integrum; religionibus enim susceptis im-
peditur. O stultos Camillos, Curios, Fabricios, Calati-
nos, Scipiones, Marcellos, Maximos! amentem Pau-
lum, rusticum Marium, nullius consilii Patres horum
amborum Consulum, qui triumpharint!*

Ita apud Virgilium Turnus Drancem illudit
Æn. L. 11.

..... Proinde omnia magno
Ne cessa turbare metu; atque extollere vires
Gentis bis victæ; contra premere arma Latini.
Nunc & Myrmidonum proceres Phrygia arma
tremiscunt;
Nunc & Tydides, & Larissæus Achilles:
Amnis & Adriacas retro fugit Aufidus undas.

De Regulis Ironiæ.

Quænam sunt Ironiæ Regulae?

R. Duæ. 1. enim, quæ ambigua voce continen-
tur Ironiæ, ex præcipuum quemdam leporem, ac
venustatem habent. Acuta quippe jocosaque vi-
deri solent, quæ dicuntur ex ambiguo.

2. Ironia fieri solet adhibendo voces illas, *Sci-
licet, nimicum, si Superis placet, nempe;* illas, in-
quam, adhibendo cum ænara quadam, & falsa
vocis inflexione. Ita Terentius: *Id populus curat
scilicet:* & apud Virgilium Dido, Æn. 4.

Scilicet is Superis labor est; ea cura quietos
Sollicitat.

§. VIII. De Sarcasmo.

Quid est Sarcasmus, seu Subfannatio?

R. Sarcasmus, qui ad Ironiam pertinet, est amarulenta quædam irrisio, & truculentum genus Ironiæ, quæ fit cum magna quædam acerbitate, & contumelia, qua quispiam hosti crudeliter insultat: ut apud Virgilium Trojano à se imperfecto per sarcasmum insultat viator Turnus:

En agros, & quam bello, Trojane, petisti,
Hesperiam metire jacens. Hæc præmia, qui me
Ferro ausi tentare, ferunt: sic moenia condunt.

Idemque ita Latinos exterritos, turbatosque ob
Teucrorum aciem accedentem objurgat L. II.

Immo, ait, ô cives, adrepto tempore Turnus,
Cogite concilium, & pacem laudate sedentes:
Ipsi armis in regna ruant.

Potestne Ironia inter Sententiarum figuræ numerari,
ut quibusdam placet?

R. Nequaquam. Liquet enim perspicuo Ironiam
semper esse Tropum; cum semper voces à propria
significatione traducat ad alienam.

Falsamne, & mendacem orationem efficit Ironia?

R. Nequaquam; quia neque fallendi est
animus Oratori, dum utitur Ironia; neque est
justa causa, cur fallatur auditor, si paullum mo-

do intelligat quod dicitur, quemadmodum falli non solet, dum homo callidus, & versipellis per Metaphoram *Vulpes* appellatur.

Suntne alii Tropi, præter istas, de quibus egimus?

R. Sunt aliqui alii, sed qui ad superiores hofce qualior omnino revocantur: ut Metalepsis ad Metonymiam; Antonomasia, & sylepsis ad Synecdocham.

CAPUT QUINTUM.

DE FIGURIS VERBORUM PROPRIE DICTIS,

seu quæ non sunt Tropi.

Quid sunt Figurae verborum propriæ dictæ? R. Ex sunt, quæ sic in verbis continentur, ut, mutatis illis, figura tollatur; v. agr. hæc sententia, *Amantes sunt amantes*, est figura verborum; quia perierit figura, si pro *Amentes* dicas *Stulti*, aut aliud simile. Sed est figura sententiæ, si quis Patriam inducat loquentem; aut si utaris similitudine; quia quæcumque demum hic usurpes verba, aut quocumque ea colloq. ordine, manet Schema.

Quot modis fiunt figurae verborum?

R. Fiunt tribus potissimum modis. 1. Per adjec-

tionem. 2. Per detractionem. 3. Per similitudinem.

illat mētābūtūrūp̄ t̄m̄ib̄ h̄ōp̄ t̄ḡill̄t̄ ob̄
z̄q̄ z̄l̄ēq̄t̄ s̄. I. Figuræ per Adjectionem. l̄c̄ n̄ōn̄

Quenam verborum Figuræ fiant per Adjectionem?
R. Octo præcipuae; nimirum Repetitio,
Conversio, Complexio, Conduplicatio,
Gradatio, Synonymia, Traductio, Polysyntheton.

Quid est repetitio?

R. Est Figura, in qua ab eodem vocabulo sæpius inchoatur oratio, ut i. Catilinaria: *Nihil ne te nocturnum praesidium palatin, nihil urbis vigiliae, nihil timor populi, nihil consensus bonorum omnium, nihil hic munitissimus habendi Senatus locus, nihil horum ora, viliusque moverunt?*

Quid in Repetitione cavendum est?

R. Valet mirum in modum in exaggerandis virtutibus, & vitiis, estque Schema plane venustum. Sed quia statim incurrit in oculos, propterea non est diutius continuandum; sed satius est, ut aliorum Schematum admixtione temperetur.

Quid est conversio?

R. Est figura Repetitioni prorsus contraria, in qua sæpius eodem vocabulo clauditur oratio, ut in Antohiam Cicero: *Doletis tres exercitus Populi R. interfecisse? interfecit Antonius. Desideratis clarissimos Cives? Eos quoque vobis eripuit Antonius. Auctoritas hujus ordinis adficta est? Adfixit Antonius.*

Quid est Complexio?

R. Est figura, quæ Repetitionem simul, & Conversionem complectitur, cum nimirum ab eodem verbo, vel ab iisdem verbis incipiat, atque clau-

datur oratio. Ita (1) Tullius : *Quis legem tulit?*
Rullus. Quis majorem partem populi suffragiis privavit?
Rullus. Quis comitiis præfuit? Rullus.

Verum figura hæc, quia maxime ferit oculos, uti præcedentes, idcirco parce admodum, & in loco est adhibenda.

Quid est conduplicatio?

R. Est ejusdem vocabuli, vel plurium iteratio; five initio orationis, five in fine, five alibi. Ut cum ait Maro Libro 5.

Nunc nunc insurgite remis,
Hectorei socii.

Et Libro 9. cum ait Nifus:

(2) Me, me, adsum qui feci, in me convertite ferrum,
O Rutuli: mea fraus omnis.

Quid est Gradatio?

R. Gradatio, five Κλιψη, est figura, qua per quosdam gradus vel adicenditur ad summum, vel descenditur ad infimum. Quale est illud Ciceronis in Catilinam: *Nihil agis, nihil moliris, nihil cogitas, quod ego non modo non audiam, sed etiam non videam, planeque sentiam.* Magnum est enim, quidquid agat Catilina, scire Ciceronem: manus, quidquid moliatur: longe maximum, quidquid etiam cogitet.

Sic etiam in Pisonem ait: *His ego rebus paſcor, his delector, his perfruer;* quod de vobis hic ordo opinatur non secus, ac de tētērīmis hostib⁹; quod vos Equites Romani, quod ceteri ordines, quod cuncta civitas odit; quod nemo bonus, nemo denique civis est, qui modo se civem esse memincerit, qui vos non oculis fugiat, auribus respuat, animo adspernetur, recordatione denique ipsa consulatus vestri perhorrescat.

Lepidum est illud ejusdem Ciceronis ad Atticum: *Si dormis, expurgiscere;* *si flas;* *ingredere;* *si ingrederis, curre;* *si curris, advola.* Ejusmodi est etiam ille Virgilii locus in Eclogis:

33

Torva leæna lupum sequitur: lupus ipse capellam Florentem cythisum sequitur lasciva capella.

Quid est Synonymia?

R. Est verborum idem ferme significantium coacervatio ad rei magnitudinem demonstrandam; ut in Miloniana: *An vero vos soli ignoratis? vos hospites in hac urbe versamini? vestrae peregrinantur aves? neque in hoc pervagato civitatis sermone vorantur?* Hoc Schema Poëtis est valde usitatum. Ita Plautus:

Quicumque ubique sunt, qui fuere, quique futuri sunt,
Stulti, stolidi, fatui, (1) fungi, (2) bleni, (3) buccones;
Solus ego omnes longè anteo stultitia, & morib⁹
indoctis.

(1) *Fungus*, necio, mentecato. (2) *Blenius*, loco.
(3) *Bucco*, Bocachon, jactancioso.

Quid est Traductio?

R. Traductio, seu Polyptoton, ut ajunt Græci, est variata casibus, aut generibus, aut modis, aut temporibus, ejusdem vocabuli repetitio; ut cum ait Tullius pro Archia: *Pleni sunt omnes libri, plenæ sapientum voces, plena exemplorum vetustas,* Vel cum ait Ovidius:

Spectatum ornatæ veniunt, spectentur ut ipsæ.

Quid est Polysynthon.

R. Polysynthon, seu, ut alii malunt, Poly-
syndeton, est Schema conjunctionibus abundans, ut,
& justitia, & liberalitate, & fortitudine ceteros omnes
Imperatores superavit. Itemque apud Virgilium: (1)

Ascaniumque, patremque meum, juxtaque Creusat?
Alterum in alterius mactatos sanguine cernam?

S. II. De Figuris per detractionem.

Quid sunt Figuræ, quæ fiunt per Detractionem?
R. Tres: Reticentia, Adjunctio, &
Disjunctio.

Quid est Reticentia?

R. Est figura, quæ fit, quando verbum ali-
quod subauditur: ut cum ait Tullius in Verri-
nis: *Huncine hominem? hancine impudentiam?*
hancine audaciam? Supple feremus. Et apud Vir-
gilium: (2) At

(1) Lib. 2.

(2) Aen. 12.

At vero Rutulis impar ea pugna videri
Jamdudum, & vario misceri pectora motu.

Ubi profecto vides intelligi cœpit, & cœperunt.
Itemque Libro 1. Sed vos qui tandem? subau-
ditur estis.

Quomodo fit adjunctio?

R. Fit Adjunctio, quando uni verbo plurima
nomina substantiva respondent. Ita Cic. *Vicit pu-
dorem libido, timorem audacia, rationem amentia.*
Sic etiam Virgilius Æneid. 3.

(1) Trojugena interpres Divum, qui numina Phœbi,
Qui tripodas, (2) Clarii lauros, qui sidera sentis,
Et volucrum linguas, & præpetis omnia pennæ.

Quomodo fit disjunctio?

R. Disjunctio, seu dissolutio fit, quando con-
junctiones, & particulæ tolluntur, ut incitator
feratur oratio. Ita Tullius: *Hæc studia litterarum
adolescentiam alunt, senectutem oblectant, secundas
res ornant, adversis perfugium, ac solatium præbent,
delectant domi, non impediunt foris, pernoctant no-
biscum, peregrinantur, rusticantur.*

§. III. De Figuris per similitudinem.

Quot sunt Figuræ per similitudinem?

R. Tres in primis numerantur, nempe Pa-

(1) Helenus Priami filius, Rex idem, & Phœbi sacerdos.

(2) Apollo dictus Clarius ab urbe Claro, Apollinis
oraculo nobiti.

Paronomasia , similiter cadens , & similiter desinens.

Quid est Paronomasia?

R. Paronomasia , seu adnominatio , est Figura , qua voces pæne similes , ac colludentes usurpan- tur in sensu dissimili . Ut cum ait Tullius ad At- ticum : *Consul ipse parvo animo , & pravo ; facie magis , quam facetiis ridiculus.* Et alibi : *Ex aratore fac- tus orator.*

Græcis quoque admodum usitata est Parono- masia , ut apud Herodotum Lib. I. Παθήματα , μαθήματα , Quæ nocent , docent . Ejusdemque ge- neric erat illud , quod Apollodorus pictor præcla- rus inscriperat operi suo :

Μωμήσεται τις μᾶλλον ἢ μιμήσεται . Id est : Faciens erit ridere , quam imitari .

Delectat in primis , & ferit hoc Schema , si par- ce , ac in loco adhibetur , & sententiarum gra- vitate sustentetur . Si vero frigidas adlusiones , ut non raro fit , venetur orator , ineptus nimirum erit , & putidus .

Quid est similiter cadens ?

R. Est vocabulorum per eosdem casus , & per eadem tempora expressorum consensus quidam , & quasi concentus : ut cum ait Cicero pro S. Roscio : *Quid tam commune , quam spiritus vivis , terra mer- tuis , mare fluctuantibus , litus ejectis ?* Ubi vides qua- tuor nomina in dativo plurali posita .

Quid

Quid est similiter definens?

R. Fit, cum orationis vel membra, vel articuli eodem modo terminantur; ut apud Quintilianum: *Eiusdem non est & facere fortiter, & vivere turpiter.* Ita Cicero Pompejum laudans: *Bellum extrema hieme apparavit, incunie vere suscepit, media astate consecit.* (1)

§. IV. Appendix de Transitione.

Quid est Transitione?

R. Transitione, quam alii Figuram esse volunt, alii cum Fabio negant, est orationis quidam nexus; quo fit, ut aptè copulata inter se illius membra concinnè cohærent, & unum quasi corpus efficiant.

Quae sunt Transitionis genera?

R. Duo. Transitione enim vel est perfecta, vel imperfecta. Transitione perfecta est, qua breviter monemus, quid dictum sit, & quid dicendum restet: cuiusmodi est ista pro lege Manilia: *Quoniam de genere belli dixi, nunc de magnitudine pauca dicam.*

Transitione imperfecta ea est, qua alterum tantum eorum exprimitur; ut in hoc Ciceronis pro Roscio: *Age nunc illa videamus, judices, que consecuta sunt.* Ucriusque indiscriminatum generis selecta, ex Tullio præsertim, adferemus exempla: quoniam videmus in inveniendis hujusmodi Transitionibus solere Tirones non mediocriter laborare.

Trans-

(1) Pro lege Manilia.

Transitionum Ciceronianarum exempla selecta.

1. Satis mihi multa verba fecisse videor, quare
hoc bellum esset genere ipso necessarium, magnitudine
periculoseum. Restat, ut de Imperatore ad id bellum de-
ligendo, ac tantis rebus præficiendo, dicendum esse vi-
deatur. 2. Satis multa de periculo. 3. Uni epistole
respondi: venio ad alteram... 4. Sed nimis multa
de nugis: ad majora veniamus... 5. Verum ubi
rerum testimonia adsunt, nihil opus est verbis. 6. Sed
haec vetera: illud recens, Cæsarem meo consilio inter-
fectum. 7. Sed ne forte ex multis rebus gestis M. An-
tonii, rem unam pulcherrimam transiliat oratio, ad (1)
Lupercalia veniamus. Non dissimulat, Patres Con-
scripti, apparet esse commotum, sudat, pallet. 8. Sed
adrogantium hominis, insolentiamque cognoscite. 9. At
etiam ausus es (Quid autem est, quod tu non audeas?)
10. Sed jam satis multa de causa: extra causam
etiam nimis fortasse multa. Quid restat, nisi ut orem,
obtulerique vos Judices, ut misericordiam tribuatis fer-
tissimo viro? 11. Quæstura illius demonstrata, reli-
qua attendite. 12. Atque ut inde oratio mea profici-
catur, unde haec omnis causa ducitur. 13. Atque ut
facilius intelligere possitis, Judices, quæ facta sunt, in-
digniora esse quam haec sunt, quæ diximus; ab initio
res

(1) Lupercalia Festa Solemnia in Panis honorem men-
se Februarii celebrari solita à Lupercis illius Sacerdo-
tibus, qui nudi per urbem cursitabant. Luperci sic vo-
cabantur, quod Pan Lupos arceret ab ovibus.

res quemadmodum gesta sit, vobis exponam. 14. Sed
 hæc robustioris improbitatis scelera omittamus: loqua-
 mur potius de iniquissimo genere levitatis. 15. Id quo
 facilius facere possitis, dabo operam, ut à principio
 res quemadmodum gesta sit, cognoscatis. 16. Sed fi-
 nis sit: neque enim præ lacrimis jam loqui possum; &
 hic se lacrimis defendi vetat. 17. Sed quoniau emer-
 sisse jam ē vadis, & scopulos prætervecta videtur ora-
 tio mea, perfacilis mihi reliquus cursus ostenditur.
 18. Accipite nunc aliud ejus facinus nobile, & mul-
 tis locis saepe commemoratum, & ejusmodi, ut in
 uno omnia maleficia inesse videantur. Invenietis id fa-
 cinus natum à cupiditate, auctum per stuprum, crudeli-
 tate perfectum, & conclusum. 19. Plura de illo
 Archipirata dixi, quam volui; & tamen ea, que
 certissima sunt, hujus criminis argumenta prætermisi.
 20. Age vero, ne semper forum, subsellia, rostra,
 curiamque meditemur. 21. Ad ejus Tribunatum, qui
 ad sese jamdudum vocat, & quodammodo absorbet
 orationem meam, contento studio, cursuque ve-
 niamus. 22. Atque hæc oblationis, illa necessitatis.
 23. Hæc mihi sere in mentem veniebant, quæ di-
 cenda putarem de natura Deorum. 24. Quibus rebus
 expositis, satis docuisse videor, homines natura quanto
 omnes anteirent animantes. 25. Longa est oratio, mul-
 tieque rationes, quibus doceri potest. 26. Sed quid
 ego longinqua commemoro? 27. Intelligo quam scopu-
 loso, difficilique loco verser. 28. Sed quid ego his
 argumentis utor, quasi res dubia, aut obscura si?
 29. Magna sunt hæc, vel potius maxima. Jam ve-
 ro quanto majus videbitur? 30. Multa hujusmodi
pro-

proferre possem : sed genus ipsum videtis. 31. Nolo
 in hac re multus videri. 32. Sed quid ego hæc aut
 tam levia , aut tam minima recurdor ? 33. Itaque
 fateamur necesse est , nihil difficultius esse. 34. Quid lo-
 quar , quanta ratio in bestiis appareat ? 35. Nam vero
 ista etiam notoria , quanto se opere custodiant bestiæ.
 36. Multa prætereva sunt ; & tamen multa di-
 cuntur. 37. Vereor ut hoc , quod dicam , perinde in-
 telligi auditu possit , atque ego ipse cogitans sentio.
 38. Sinite me illa minora , ac quotidiana prætermitt-
 ere. 39. Illud tamen , quamquam ad exitum festinet
 oratio , prætermittere nullo modo possum. 40. Verum
 hæc missa facio : illud quero. 41. (1) De exordio sa-
 tis dictum est : deinceps ad narrationem transeamus.
 42. Quod ad definitiones , hactenus : reliqua videamus.
 43. Nunc reliquorum Oratorum ætates persequamur.
 44. Tempus est ad ceteras partes orationis proficiisci.
 Deinceps igitur de dispositione dicemus. 45. De (2)
 statutis diebus dixi : nunc de Annalibus dicam. 46.
 Hæc de herbo : quod sequitur de pecore. 47. De mul-
 titudine quondam , quod satis est , admonui : de obscu-
 ritate pauca dicam. 48 (3) Nam quantum illud est , quod
 in occupationibus summis numquam intermittis studia doc-
 trinæ ? 49. Utinam vero mihi satis esset ad dicen-
 dum vel facultatis , vel temporis. 50. Hic hic , Audi-
 tores , animos ad insignis facti memoriam sempiternam

(1) Ex Cicerone ad Herennium , vel potius , ex Cor-
nificio.

(2) Ex Varrone.

(3) Ex aliis.

erigite. 51. Sed hæc utcumque ferenda : hoc vero quis ferat ? 52. Auditis gravissima : audire nunc graviora. 53. Sed hæc privatim : nunc quæ publice gesta sunt , videamus. 54. Verum hæc missa facio illud quam ... 55. Nihil jam dico de isto scelere. 56. Postularet hic lotus ut dicerem de ...

Variis hisce , quas adtuli , Transitionibus addito breviores hisce formulas , particulasque connectentes.

His adde ; Accedit his ; Huc accedit quod ; Huc pertinet ; Eodem pertinet ; Nam vero quid dicam ? Age vero explicemus nunc ; His simillimum est ; Postularet hic locus ut dicerem ; Restat ut dicam ; Nunc vero superest ; Ex quo debet intelligi ; Quid quod ausus est etiam ? Omitto domesticas tuas sorores ; Nam illud quid attinet commemorare ? Ita est quemadmodum dixi.



CAPUT SEXTUM.

DE PERIODO.

Quid est Periodus?

R. Periodus est sententia brevis , & absolute certis partibus , sive membris à se invicem pendentibus , & quodam veluti vinculo connexis numerose comprehenditur. Nomen traxit à voce Græca περίοδος , quæ significat ambitum , atque circuitum.

Quid sibi vult celebris illa Aristotelis definitio Lib. 3.

Rhetorice, c. 9. ubi ait: (1) Periodum esse orationem, quæ in se ipsa habet principium, & magnitudinem, quæ uno quasi adspectu perlustrari facile possit?

R. Hanc definitionem in nostram perbelle quadrare. Principium enim illud, de quo loquitur Aristoteles, nihil aliud est, nisi primum Periodi membrum; quod ita suspensum ferri debet, ut aliud quidpiam subsequi omnino debeat; unde etiam vocatur principium. Medium vero, ac finis sunt reliqua periodi membra, quæ brevi quadam, contractaque verborum ambitu debent illam circumscribere. Unde vere dicitur, illam uno conspectu facile cerni debere, unoque spiritu pronuntiari.

§. I. De partibus Periodi.

Quoniam sunt Periodi partes?

R. Periodus constat certis quibusdam partibus, quarum majores appellantur Membra, Græce Κῶλα: minores vero appellantur Incisa, Græce Κόμματα.

Quid est membrum Periodi?

R. Membrum, sive Colon est pars Periodi continens sensum aliquem, sed suspensum, ac imperfectum; v. gr. (2) Antequam de republica, Patres Conscripsi, dicam ea, quæ dicenda hoc tempore

ar-

(1) Λέγω δὲ περιόδου λέξιν ἔχουσαν ὀργὴν, καὶ τελευτὴν καθ' ἀυτὴν, καὶ μέγεθος ἐπισύνοπτην.

(2) Philip. i.

arbitror: ecce tibi Periodi membrum, néquē enim hic sensus orationis conquiescit. Habebis Periodum absolutam, si ad primum illud membrum accedat hoc alterum: Exponam vobis breviter consilium & profectionis, & reversionis meæ.

Quid est Incisum?

R. Incisum, sive Comma est pars membra: quemadmodum enim in Periodo membrum, sic in membro continetur incisum, v. gr. (1) *Nihil est, mibi crede, virtute formosius, nihil pulchrius nihil amabilius;* ex tribus hisce incisis membrum unum efficitur. Itaque dicere incisim, est crebris id genus incisis, & articulis suam orationem distingue.

Quandonam potissimum usurpanda sunt crebra illa Incisa?

R. Incisa mirum in modum valere, cum adversario vehementius, & acrius instat orator. Ita Cicero per incisa Pisofiem increpat, illumque cæsim, ac punctum, ut ita loquar, obligat, & ferit: *Non enim nos color iste servilis, non pilosæ genæ, non dentes putridi deceperunt; oculi, supercilii, frons, vultus derique totus, qui sermo quidam tacitus mentis est, hic in fraudem homines impulit; hic eos, quibus erat ignotus, decepit, fessellit, in fraudem induxit. Pauci tua ista lutulenta vitia noveramus; pauci tarditatem ingenii, stuporem, debilitatemque lingua.*

§. II.

(1) Cic. L. 9. ad Fam. ep. 14.

§. II. De variis Periodorum generibus.

Quot sunt genera Periodorum?

R. Tria. Alia est Periodus bimembris, sive dicolos; alia trimembris, sive tricolos; alia quadrimembris, sive tetracolos. Plura enim, vel pauciora membra aut vix, aut nullo modo patitur germana, sinceraque Periodus. Singula porro hæc membra si vel paria sint, vel non valde disparia, multo gratior, & venustior erit oratio.

Periodus bimembris.

Ergo & mihi meæ pristinæ vitæ consuetudinem, C. Cæsar, interclusam aperuisti, (1) & his omnibus ad bene de republica sperandum quasi signum aliquod sustulisti.

Trimembris exemplum eximum esse potest illa Ciceronis Periodus numeris, ut mihi videtur, omnibus absoluta in exordio Manilianæ:

Nam cum antea per ætatem hujus auctoritatem loci contingere non auderem: Statueremque nihil buc nisi perfectum ingenio, elaboratum industria adferri oportere: Omne meum tempus amicorum temporibus transmittendum putavi.

Periodi quadrimembris, quæ & quadrata dici solet, absolutissimum exemplum habes in orat. pro A. Cæcina: *Si quantum in agro, locisque defer-*

(1) Cic. pro Marcello.

tis audacia potest, * tantum in foro, atque judiciis
impudentia valeret, * non minus in causa cederet A.
Cæcina Sex. Æbutii impudentiae, * quam tum in vi
facienda cessit audacia.

§. III. De legibus, ac regulis Periodi.

*Q*uænam sunt Periodi leges?
R. Tres præcipuae. Prima est, ut illius
membra nexibus quibusdam inter se quam
aptissime cohærent: alioqui enim jam non esset
Periodus, sed oratio dissipata, dissolutaque, &
ut ajunt, *Arena sine calce*. 2. Regula hæc est, ut
sensus non sit nisi in omnium membrorum fine per-
fectus. 3. Ut pleniore verborum ambitu, & cir-
culo Periodus concludatur.

*Posset ne fieri Periodus, que contineret membra
vel minus quam duo, vel plura quam quatuor?*

R. Posse fieri Periodum unius membra: atque
hæc est illa, quæ vocatur ab Aristotle Periodus
* *simplex*, sive (1) *monocolos*. Posset etiam omnino
usque ad quinque, aut sex vel plura etiam mem-
bra produci. Verum perfecta, de qua hic tantum
sermo est, Periodus, nec ultra quatuor membra
procurrit, nec infra duo contrahitur. Atque hæc est
unanimis sententia Demetrii Phalerei, (2) Hermo-
genis, ac Terentiani quoque Mauri, cum ait:

Qua-

(1) ΑΦΕΛΗΣ, μονόκωλος.

(2) Hermogenes Tarensis anno ætatis 15. Rhetor no-
biliſsimus, verum omnium obliuicitur ante annum 24.
in extrema infirmitate confenerat.

Quattuor è membris plenum formare videbis
Rhetora circuitum , sive ambitus ille vocetur.

Atque in primis nobiscum ita sentit ipse Tullius,
cum ait in Oratore : *Constat ille ambitus , & ple-*
na comprehensio è quatuor fere partibus , quæ mem-
bra dicuntur , ut & aures impleat , & ne brevior
sit , quam satis sit , nec longior.

Quod si , ut aliquando contingit , ultra qua-
tuor procedatur , ac nihilo tamen minus orbe quo-
dam , circuituque conclusa feratur oratio , voca-
bitur *Ambitus* , sive *Oratio periodica*. Ita Cicero
pro (1) Archia Poëta. *Si quid est in me ingenii,*
judices , quod sentio quam sit exiguum ; aut si qua
exercitatio dicendi , in qua me non inficiar mediocri-
ter esse versatum ; aut si hujus rei ratio aliqua ab
optimarum artium studiis , & disciplina prosecta , à
qua ego confiteor nullum ætatis meæ tempus abhor-
ruisse : earum rerum omnium vel in primis hic A.
Licinius fructum à me repetere prope suo jure debet.

§. IV. De artificio Periodi amplificandæ.

Quænam est prima ratio amplificandæ Periodi ?
R. Tirones nullo negotio Periodos fun-
dant , si habeant ad manum , & in promptu
particulas , vel locutiones quasdam conficiendis

L

Pe-

(1) *Archias Poëta Antiochenus , Ciceronis olim præ-*
ceptor , ob ingenium , & eloquentiam civitate donatus à
Romanis.

Periodis mirum in modum idoneas ; cujusmodi sunt voces illæ omnes , quæ necessariam quandam habent cum aliis subsequentibus adfinitatem , v. gr. *Etsi* , *quamvis* , *quamquam* , *quemadmodum* , *sicut* , *cum* , *quoties* , *quantum* , *quo* , *qualis* , *non minus* : quibus respondent , *tamen* , *verum tamen* , *nihilominus* , *ita* , *tum* , *toties* , *tantum* , *eo* , *talis* , *quam*.

In quavis enim Periodo partes duæ sunt , Protagis nimirum , & Apodosis. Est autem Protagis prima Periodi pars , ex qua secunda pendet , & in qua oratio crescit quodammmodo , & adtolitur. Apodosis vero est altera Periodi pars , in qua oratio perfecta conquiescit. Illæ porro , de quibus loquimur , particulæ , suspensæque locutiones mirum in modum idoneæ sunt ad Protagism cum Apodosi connectendam , ut videre est in allatis exemplis , illo præsertim pro Cæcina supra §. II.

Quenam est secunda , & tertia ratio amplificandæ Periodi ?

R. Periodus pulcherrime dilatatur , i. cum brevis quædam sententia in suas quasi partes distribuitur. Ita Tullius paucula hæc verba (*Omnis iugent Clodium*) amplificat per enumerationem partitum , cum ait , ironice nimirum , Clodium defliri à Senatu , ab Equestri ordine , à (i) Municipiis,

(i) *Municipia* erant civitates , quæ muneribus , & honoribus populi Romani fungebantur.

piis, à (1) Coloniis, ab Agris denique ipsis.

2. Facile dilatatur Periodus per definitiones, quas vocant congregatas, per circumlocutionem, & per interpretationem, quæ fit, cum res eadem aliis atque aliis elegantioribus verbis exprimitur. Vide quæ supra in elementis diximus de Amplificatione.

§. V. De numero, & ceteris virtutibus Periodi. 37

Quid est numerus Periodicus?

R. Numerus Periodi, de quo hic agitur, non est numerus arithmeticus; sed est numerus ille in harmonia, & concentu positus, de quo Virg. in Ecloga. 4.

Numeros memini, si verba tenerem.

Et rursus in Ecloga 6.

Tum vero in numerum Faunosque, ferasque videres
Ludere

Numerus autem Oratorius est harmonia quædam non exquisita, neque canora, qualis est in poëmatibus, & canticis; sed ita dissimulata, latensque, ut tamen sentiatur, & aures mirifica quadam voluptate permulceat.

L 2

At-

(1) Coloniæ erant oppida, quæ populus ex urbe Roma deducebatur ad incolendum. Coloniæ siebant etiam privilegio sine soli mutatione.

Atque ut exemplo res illustretur, suavis admodum est, auribusque pergratus verborum numerus in hac Tullii sententia pro Marcello: *Nulla est tanta vis, tantaque copia, quæ non ferro, ac viribus debilitari, frangique possit.* Peribit funditus omnis venustas, si inverto numero dicas: *Nulla est vis tanta, & copia tanta, quæ non possit debilitari, frangique viribus, ac ferro.* Quid item suavius hac altera Ciceronis sententia in Philippica 2. ? *Te miror, Antoni, quorum facta imitere, eorum exitus non perhorrescere.* Quæ quidem verba tam apte mihi videntur constructa, ut præclari cuiusdam numeri absolutissimum exemplar esse possint. Abibit vero decor omnis, si sublato tam eleganti numero, dixeris: *miror, te, Antoni, non perhorrescere exitus eorum, quorum imiteris facta* Tanti nimirum est certa quadam moderatione numerorum explere sententias: ideoque, ut optime notat Quintilianus L. 9. c. 4. *Neque Demosthenes fulmina tanopere vibrasse diceretur, nisi numeris contorta ferrentur.*

§. VI. Regulæ sex, quibus reddi potest
numerosa Periodus.

QUæ de varia collocatione pedum, ac mensurarum, & optima ratione miscendi inter se Dactilos, Spondæos, Anapæstos, Jambos, Creticos, Molossos, Choræos, & Dichoræos tradunt Aristoteles, Tullius, Quintilianus, ceterique artis magistri, sunt egregia illa qui-

dem, & Oratori perfecto numquam satis commendanda. Verumtamen, ut aperte, & ingenuo loquar, animadvertisi jamdudum difficultoribus hisce, & salebrosis, ut ita dicam, præceptionibus valde defatigari tironum animos; & illorum industriam retardari solere potius, quam adjuvari.

Quapropter, ut animorum satietati, fastidioque occurritur, operæ pretium me facturum existimavi, si ex laboriosis illis præceptionibus quemdam quasi succum exprimerem; & faciliores aliquot, brevesque regulas ad omnium captum, & quotidianum usum accommodatas hoc loco proponearem.

Quænam est prima regula Periodi numerosæ redditæ?

R. Numerosa fiet Periodus, si syllabæ breves, ac longæ sic temperentur, alternenturque quodammodo, ut neque copia brevium incitior, ac celerior feratur oratio, neque longarum multitudine retardata languescat. Concinnam hanc brevium, & longarum syllabarum temperationem vides in illis Tullii verbis ad Cæsarem: (1) *Domisti gentes immanitate barbaras, multitudine innumerabiles, locis infinitas, omni copiarum genere abundantes &c.*

Aliquando tamen ex arte, & industria syllabæ breves, vel longæ sine illa, quam dixi, mixtura coacervantur, ad rei, de qua agitur, vel celeritatem, vel tarditatem exprimendam, & oculis quo-

(1) *Or. pro Marcello.*

quodammodo subjiciendam. Ita Virg. Æn. 5. remigantium nautarum impetum, naviumque velocitatem Dactylorum crebritate depingit:

Inde ubi clara dedit sonitum tuba, finibus omnes
Haud mora profluere suis; ferit æthera clamor
Nauticus

Itemque celeritatem equorum in hoc versu etiam pueris noto:

— It clamor, & agmine facto,
Quadrupedante putrem sonitu quatit ungula campum
(1).

Sic etiam L. 4. Æn. Æneæ, socrorumque Carthagine discessiōnem parantium festinationem celeritatemque describit:

Tum vero Æneas subitis exterritus umbris,
Corripit e somno corpus, sociosque fatigat:
Præcipites vigilate viri, & considite transtris:
Solvite vela citi. Deus æthere missus ab alto
Festinare fugam, tortosque incidere funes
Ecce iterum stimulat. Sequimur te, sancte Deorum,
Quisquis es, imperioque iterum paremus ovantes.
Adsis ô, placidusque juves, & sidera cœlo
Dextra feras. Dixit, vaginaque eripit ensim
Fulmineum, strictoque ferit retinacula ferro.
Idem omnes simul ardor habet; rapiuntque, rauntq.
Litora deferuere; latet sub clasibus æquor.
Adnixi torquent spumas, & coerulea verrunt. An-

(1) Æneid. 8.

Animadverte hic, ut diverso repente sono adficiantur aures versu hoc ultimo, quo nautarum conatum exprimit vates; utque ex illo superiorum carminum celeritas magis emicet.

Tarditatem pariter egregie imitatur hic versus Lib. I.

Luctantes ventos, tempestatesque sonoras.

Quænam est secunda regula numerosam efficiendi Periodum?

R. Voces unius, duarum, aut plurium syllabarum si commiscantur, nascetur inde oratio valde numerosa; v. g. (1) *Vivis, & vivis non ad deponeandam, sed ad confirmandam audaciam.* Contra vero cerebriore monosyllabarum iteratione quasi exsilit, atque subsultat oratio: v. gr. *Hac in re nos hic non ferrei.*

Quænam est tertia regula?

R. Cadet numerose Periodus, si magnificis, & bene sonantibus verbis terminetur; ut in hisce exemplis ex Cicerone desumptis (2): *Quos amissimus cives, eos non Martis vis perculit, sed ira victoriae.* Et L. I. de Orat. *Nam qui locus quietis, ac tranquillitatis plenissimus fore videbatur, in eo maxime moles molestiarum, & turbulentissime tempestates exsiterunt.*

Quænam est quarta regula?

R. Nulla res magis facit ad numerum oratorium, quam

(1) In Catil. I.

(2) Phil. 14.

quam verborum splendor, non solum in periodi clausula, sed etiam in toto illius quasi contextu. Ita Tullius in Pisonem: *Obrepisti ad honores errore hominum, commendatione fumosarum imaginum, quarum simile habes nihil præter colorem.* Et in eloquentissima illa peroratione pro Fontejo: *Nolite pati, judices, aras* (1) *Deorum immortalium, Vestaeque Matris quotidianis Virginis lamentationibus de vestro judicio commoveri.* Et in 4. Catil. *Id est initum consilium, ut interfectis omnibus, nemo ne ad deplorandum quidem populi R. nomen, & ad lamentandam tanti imperii calamitatem relinquatur.* Et L. 3. in Verrem. *Si haec non ad cives Romanos, non ad aliquos amicos nostræ civitatis, non ad eos, qui populi Romani nomen audissent; denique, si non ad homines, verum ad bestias, aut etiam, ut longius progrediar, si in aliqua desertissima solitudine ad saxa, & ad scopulos haec conqueri, & depolare vellem; tamen omnia muta, atque inanima tanta, & tam indigna rerum atrocitate commoverentur.*

Cedo quintam regulam.

R. Ut leniter, & quilibetque fluat Periodus, fugiendus est asperior litterarum, & vocabulorum concursus, quod est in oratione vitium vel maximum. Incurritur autem in illud vitium multis modis.

1. Cum durius, ac crebrius concurrunt inter se consonantes, quæ stridorem efficiunt, ut *Ars studiorum... Rex Xerxes.*

2. Cum

(1) Fonteji soror una ex Virginibus Vestalibus, que semper igne custodiabant.

2. Cum verbi prioris ultimæ syllabæ fiunt pri-
mæ sequentis , ut vel ipsi Ciceroni aliquando ex-
cudit , cum ait , *Res mibi invisa visæ sunt.* Itemque
cum dixit in carmine:
O fortunatam natam me Consule Romam !

3. Cum eadem littera , vel etiam , quod pejus
est , eadem syllaba crebrius iteratur : quale est
illud Enni Poëtæ.

Africa terribili tremit horrida terra tumultu.

Itemque illud adeo tritum:

O Tite tute(1) Tati tibi tanta tyranne tulisti !

4. Cum similiter cadentibus , ac desinentibus
frequenter utimur , ut *Amatrices , adjutrices , præsti-*
giatrices fuerunt.

Tria tamen sunt , quæ Tirones etiam atque etiam
cavere debent. Primum , ne , dum numerose lo-
qui volunt , inferciant , ut persæpe fit , inania quæ-
dam complementa , & ramenta numerorum , quasi
si rimas explere vellent. Alterum est , ne ,
dum oratorium numerum quærunt , incident in
metricum , & periodi finis sit finis alicujus ver-
sus , præsertim Heroici , vel Elegiaci : quod non
semel Ciceroni ipsi excidisse Hieronymus Lago-
marinus è Societ. Jesu inopusculo , quod sic

inf.

(1) *Tati* est vocativus à *Tatius* , ii.

inscribitur, *Risposta di Golmario Pepugies Marseillano*, allatis locis ipsis præclarè docet n. 19. p. 45.

Tertium est, ne, dum numero serviunt diligentius, & aurum voluptati morigerantur, omnis interea retardetur impetus, visque orationis; & animus ab iis, quæ potiora sunt, penitus avertatur. Quapropter hæc aliaque hujusmodi in numero vitia non ut ingens crimen expavescenda sunt; ac nefcio hac in re negligentia ne, an nimia sollicitudo sit pejor.

Quoniam est ultima numerosæ Periodi regula?

R. Caput illud est, non in periodo solum, sed etiam in omni oratione, ut Latina constructio quam maxime distet à vernacula; hoc est, ut verba per inversam, quam vocant, constructionem ita trajiciantur, ut quod re ipsa prius est, fiat artificiosa quadam verborum collocatione posterius.

Et quoniam trajecta illa constructio ita est propria Latinæ Linguæ, ut omnis illius vis, atque elegantia, ac quasi natura, & indoles in eo potissimum sita esse videatur, visum est aliquot illustria illius exempla hoc loco ad imitandum proponere.

Exempla selecta constructionis trajectæ.

1. *Quos amissimus cives, eos Martis vis perculit, non ira viüteriae.* Cic.

2. *Habet magnum dolorem, unde cum honore discesseris, eodem cum ignominia reverti.* Cic.

3. Frater tuus quanti me faciat , semperque fecerit ,
esse hominem qui ignoret arbitror neminem . Cic.

4. Mea lenitas , si cui solutior visa est , hoc exspectabat , ut id , quod latebat , erumperet . Cic.

5. Quæ res in civitate duæ plurimum possunt , bæ contra nos ambæ faciunt in hoc tempore , summa gratia , & eloquentia . Cic.

6. Fere quem quisque locum pugnando ceperat , eum , amissa anima , corpore tegebat . Sallust.

7. Id sibi negotii credidit solum dari , populo ut placerent quas fecisset fabulas . Terent.

8. Quas credis esse , non sunt veræ nuptiæ . Ter.

9. Quam rem vitio dent , queso , animum advertite . Terent.

**§. VII. Quomodo parari possit facultas
numerose dicendi.**

QUæ de Periodis , numerisque post Aristotelem , Ciceronem , & Fabium accurate præcepimus hactenus , non eo dicta sunt à nobis , quo tiro in dinumerandis pedibus , syllabisque dimetiendis consenserat : quod sane nec magni , nec felicis foret ingenii . Verum hæc apte , numeroseque dicendi facultas non est profecto tanti laboris , quanti prima fronte videtur esse . Nihil est enim tam flexibile , & quod tam facile sequatur quocumque ducas , quam oratio ; atque ut mollissimam ceram ad nostrum arbitrium formamus , ac fingimus , sic plane dictiōnis genus ad omnem rationem , & ad aurium

voluptatem, motumque animorum, facile mutatur, ac vertitur.

- *Qua ratione, viaque numeroſe ſcribendi facultas parabitur?*

R. Duplici potissimum: 1. si Tiro numeroſas aliquot, & volubiles Tullii ſententias non legere modo, ſed elata etiam voce pronuntiare adiuſcat: cuiusmodi ſunt illæ, quas ſupra adtulimus, vel illæ, quas adfert Quintilianus: *Omnes prope civitatis virtute, gloria, dignitate ſuperabat*: Itemque iſta: *Patris dictum sapiens temeritas filii comprobavit*; qui numerus ita placuit populo, inquit idem Tullius, ut hac audita periodi clauſula, clamorem ingentem fufulerit.

2. Parabitur numeroſe dicendi facultas, ſi numero illum, & quaſi concentum imitatione, ac ſtilo coneris exprimere; quod quidem exercitatione, atque uſu, qui eſt optimus dicendi ma- gister, non ita diſſiculter conſequeris. Ut, inquit Cicero Lib. 2. de Orat., *cum in ſole ambulem, etiamſi aliam ob cauſam ambulem, fieri natura ta- men (ſolet), ut colorer*; ſic, *cum iſtos libros ad Misenum (nam Romæ vix licet) studiosius legerim, ſentio orationem meam illorum canu quaſi colorari.*

-010-
-011-
-012-
-013-
-014-
-015-
-016-
-017-
-018-
-019-
-020-
-021-
-022-
-023-
-024-
-025-
-026-
-027-
-028-
-029-
-030-
-031-
-032-
-033-
-034-
-035-
-036-
-037-
-038-
-039-
-040-
-041-
-042-
-043-
-044-
-045-
-046-
-047-
-048-
-049-
-050-
-051-
-052-
-053-
-054-
-055-
-056-
-057-
-058-
-059-
-060-
-061-
-062-
-063-
-064-
-065-
-066-
-067-
-068-
-069-
-070-
-071-
-072-
-073-
-074-
-075-
-076-
-077-
-078-
-079-
-080-
-081-
-082-
-083-
-084-
-085-
-086-
-087-
-088-
-089-
-090-
-091-
-092-
-093-
-094-
-095-
-096-
-097-
-098-
-099-
-100-
-101-
-102-
-103-
-104-
-105-
-106-
-107-
-108-
-109-
-110-
-111-
-112-
-113-
-114-
-115-
-116-
-117-
-118-
-119-
-120-
-121-
-122-
-123-
-124-
-125-
-126-
-127-
-128-
-129-
-130-
-131-
-132-
-133-
-134-
-135-
-136-
-137-
-138-
-139-
-140-
-141-
-142-
-143-
-144-
-145-
-146-
-147-
-148-
-149-
-150-
-151-
-152-
-153-
-154-
-155-
-156-
-157-
-158-
-159-
-160-
-161-
-162-
-163-
-164-
-165-
-166-
-167-
-168-
-169-
-170-
-171-
-172-
-173-
-174-
-175-
-176-
-177-
-178-
-179-
-180-
-181-
-182-
-183-
-184-
-185-
-186-
-187-
-188-
-189-
-190-
-191-
-192-
-193-
-194-
-195-
-196-
-197-
-198-
-199-
-200-
-201-
-202-
-203-
-204-
-205-
-206-
-207-
-208-
-209-
-210-
-211-
-212-
-213-
-214-
-215-
-216-
-217-
-218-
-219-
-220-
-221-
-222-
-223-
-224-
-225-
-226-
-227-
-228-
-229-
-230-
-231-
-232-
-233-
-234-
-235-
-236-
-237-
-238-
-239-
-240-
-241-
-242-
-243-
-244-
-245-
-246-
-247-
-248-
-249-
-250-
-251-
-252-
-253-
-254-
-255-
-256-
-257-
-258-
-259-
-260-
-261-
-262-
-263-
-264-
-265-
-266-
-267-
-268-
-269-
-270-
-271-
-272-
-273-
-274-
-275-
-276-
-277-
-278-
-279-
-280-
-281-
-282-
-283-
-284-
-285-
-286-
-287-
-288-
-289-
-290-
-291-
-292-
-293-
-294-
-295-
-296-
-297-
-298-
-299-
-300-
-301-
-302-
-303-
-304-
-305-
-306-
-307-
-308-
-309-
-310-
-311-
-312-
-313-
-314-
-315-
-316-
-317-
-318-
-319-
-320-
-321-
-322-
-323-
-324-
-325-
-326-
-327-
-328-
-329-
-330-
-331-
-332-
-333-
-334-
-335-
-336-
-337-
-338-
-339-
-340-
-341-
-342-
-343-
-344-
-345-
-346-
-347-
-348-
-349-
-350-
-351-
-352-
-353-
-354-
-355-
-356-
-357-
-358-
-359-
-360-
-361-
-362-
-363-
-364-
-365-
-366-
-367-
-368-
-369-
-370-
-371-
-372-
-373-
-374-
-375-
-376-
-377-
-378-
-379-
-380-
-381-
-382-
-383-
-384-
-385-
-386-
-387-
-388-
-389-
-390-
-391-
-392-
-393-
-394-
-395-
-396-
-397-
-398-
-399-
-400-
-401-
-402-
-403-
-404-
-405-
-406-
-407-
-408-
-409-
-410-
-411-
-412-
-413-
-414-
-415-
-416-
-417-
-418-
-419-
-420-
-421-
-422-
-423-
-424-
-425-
-426-
-427-
-428-
-429-
-430-
-431-
-432-
-433-
-434-
-435-
-436-
-437-
-438-
-439-
-440-
-441-
-442-
-443-
-444-
-445-
-446-
-447-
-448-
-449-
-450-
-451-
-452-
-453-
-454-
-455-
-456-
-457-
-458-
-459-
-460-
-461-
-462-
-463-
-464-
-465-
-466-
-467-
-468-
-469-
-470-
-471-
-472-
-473-
-474-
-475-
-476-
-477-
-478-
-479-
-480-
-481-
-482-
-483-
-484-
-485-
-486-
-487-
-488-
-489-
-490-
-491-
-492-
-493-
-494-
-495-
-496-
-497-
-498-
-499-
-500-
-501-
-502-
-503-
-504-
-505-
-506-
-507-
-508-
-509-
-510-
-511-
-512-
-513-
-514-
-515-
-516-
-517-
-518-
-519-
-520-
-521-
-522-
-523-
-524-
-525-
-526-
-527-
-528-
-529-
-530-
-531-
-532-
-533-
-534-
-535-
-536-
-537-
-538-
-539-
-540-
-541-
-542-
-543-
-544-
-545-
-546-
-547-
-548-
-549-
-550-
-551-
-552-
-553-
-554-
-555-
-556-
-557-
-558-
-559-
-560-
-561-
-562-
-563-
-564-
-565-
-566-
-567-
-568-
-569-
-570-
-571-
-572-
-573-
-574-
-575-
-576-
-577-
-578-
-579-
-580-
-581-
-582-
-583-
-584-
-585-
-586-
-587-
-588-
-589-
-590-
-591-
-592-
-593-
-594-
-595-
-596-
-597-
-598-
-599-
-600-
-601-
-602-
-603-
-604-
-605-
-606-
-607-
-608-
-609-
-610-
-611-
-612-
-613-
-614-
-615-
-616-
-617-
-618-
-619-
-620-
-621-
-622-
-623-
-624-
-625-
-626-
-627-
-628-
-629-
-630-
-631-
-632-
-633-
-634-
-635-
-636-
-637-
-638-
-639-
-640-
-641-
-642-
-643-
-644-
-645-
-646-
-647-
-648-
-649-
-650-
-651-
-652-
-653-
-654-
-655-
-656-
-657-
-658-
-659-
-660-
-661-
-662-
-663-
-664-
-665-
-666-
-667-
-668-
-669-
-670-
-671-
-672-
-673-
-674-
-675-
-676-
-677-
-678-
-679-
-680-
-681-
-682-
-683-
-684-
-685-
-686-
-687-
-688-
-689-
-690-
-691-
-692-
-693-
-694-
-695-
-696-
-697-
-698-
-699-
-700-
-701-
-702-
-703-
-704-
-705-
-706-
-707-
-708-
-709-
-710-
-711-
-712-
-713-
-714-
-715-
-716-
-717-
-718-
-719-
-720-
-721-
-722-
-723-
-724-
-725-
-726-
-727-
-728-
-729-
-730-
-731-
-732-
-733-
-734-
-735-
-736-
-737-
-738-
-739-
-740-
-741-
-742-
-743-
-744-
-745-
-746-
-747-
-748-
-749-
-750-
-751-
-752-
-753-
-754-
-755-
-756-
-757-
-758-
-759-
-760-
-761-
-762-
-763-
-764-
-765-
-766-
-767-
-768-
-769-
-770-
-771-
-772-
-773-
-774-
-775-
-776-
-777-
-778-
-779-
-770-
-771-
-772-
-773-
-774-
-775-
-776-
-777-
-778-
-779-
-780-
-781-
-782-
-783-
-784-
-785-
-786-
-787-
-788-
-789-
-790-
-791-
-792-
-793-
-794-
-795-
-796-
-797-
-798-
-799-
-800-
-801-
-802-
-803-
-804-
-805-
-806-
-807-
-808-
-809-
-8010-
-8011-
-8012-
-8013-
-8014-
-8015-
-8016-
-8017-
-8018-
-8019-
-8020-
-8021-
-8022-
-8023-
-8024-
-8025-
-8026-
-8027-
-8028-
-8029-
-8030-
-8031-
-8032-
-8033-
-8034-
-8035-
-8036-
-8037-
-8038-
-8039-
-8040-
-8041-
-8042-
-8043-
-8044-
-8045-
-8046-
-8047-
-8048-
-8049-
-8050-
-8051-
-8052-
-8053-
-8054-
-8055-
-8056-
-8057-
-8058-
-8059-
-8060-
-8061-
-8062-
-8063-
-8064-
-8065-
-8066-
-8067-
-8068-
-8069-
-8070-
-8071-
-8072-
-8073-
-8074-
-8075-
-8076-
-8077-
-8078-
-8079-
-8080-
-8081-
-8082-
-8083-
-8084-
-8085-
-8086-
-8087-
-8088-
-8089-
-8090-
-8091-
-8092-
-8093-
-8094-
-8095-
-8096-
-8097-
-8098-
-8099-
-80100-
-80101-
-80102-
-80103-
-80104-
-80105-
-80106-
-80107-
-80108-
-80109-
-80110-
-80111-
-80112-
-80113-
-80114-
-80115-
-80116-
-80117-
-80118-
-80119-
-80120-
-80121-
-80122-
-80123-
-80124-
-80125-
-80126-
-80127-
-80128-
-80129-
-80130-
-80131-
-80132-
-80133-
-80134-
-80135-
-80136-
-80137-
-80138-
-80139-
-80140-
-80141-
-80142-
-80143-
-80144-
-80145-
-80146-
-80147-
-80148-
-80149-
-80150-
-80151-
-80152-
-80153-
-80154-
-80155-
-80156-
-80157-
-80158-
-80159-
-80160-
-80161-
-80162-
-80163-
-80164-
-80165-
-80166-
-80167-
-80168-
-80169-
-80170-
-80171-
-80172-
-80173-
-80174-
-80175-
-80176-
-80177-
-80178-
-80179-
-80180-
-80181-
-80182-
-80183-
-80184-
-80185-
-80186-
-80187-
-80188-
-80189-
-80190-
-80191-
-80192-
-80193-
-80194-
-80195-
-80196-
-80197-
-80198-
-80199-
-80200-
-80201-
-80202-
-80203-
-80204-
-80205-
-80206-
-80207-
-80208-
-80209-
-80210-
-80211-
-80212-
-80213-
-80214-
-80215-
-80216-
-80217-
-80218-
-80219-
-80220-
-80221-
-80222-
-80223-
-80224-
-80225-
-80226-
-80227-
-80228-
-80229-
-80230-
-80231-
-80232-
-80233-
-80234-
-80235-
-80236-
-80237-
-80238-
-80239-
-80240-
-80241-
-80242-
-80243-
-80244-
-80245-
-80246-
-80247-
-80248-
-80249-
-80250-
-80251-
-80252-
-80253-
-80254-
-80255-
-80256-
-80257-
-80258-
-80259-
-80260-
-80261-
-80262-
-80263-
-80264-
-80265-
-80266-
-80267-
-80268-
-80269-
-80270-
-80271-
-80272-
-80273-
-80274-
-80275-
-80276-
-80277-
-80278-
-80279-
-80280-
-80281-
-80282-
-80283-
-80284-
-80285-
-80286-
-80287-
-80288-
-80289-
-80290-
-80291-
-80292-
-80293-
-80294-
-80295-
-80296-
-80297-
-80298-
-80299-
-80300-
-80301-
-80302-
-80303-
-80304-
-80305-
-80306-
-80307-
-80308-
-80309-
-80310-
-80311-
-80312-
-80313-
-80314-
-80315-
-80316-
-80317-
-80318-
-80319-
-80320-
-80321-
-80322-
-80323-
-80324-
-80325-
-80326-
-80327-
-80328-
-80329-
-80330-
-80331-
-80332-
-80333-
-80334-
-80335-
-80336-
-80337-
-80338-
-80339-
-80340-
-80341-
-80342-
-80343-
-80344-
-80345-
-80346-
-80347-
-80348-
-80349-
-80350-
-80351-
-80352-
-80353-
-80354-
-80355-
-80356-
-80357-
-80358-
-80359-
-80360-
-80361-
-80362-
-80363-
-80364-
-80365-
-80366-
-80367-
-80368-
-80369-
-80370-
-80371-
-80372-
-80373-
-80374-
-80375-
-80376-
-80377-
-80378-
-80379-
-80380-
-80381-
-80382-
-80383-
-80384-
-80385-
-80386-
-80387-
-80388-
-80389-
-80390-
-80391-
-80392-
-80393-
-80394-
-80395-
-80396-
-80397-
-80398-
-80399-
-80400-
-80401-
-80402-
-80403-
-80404-
-80405-
-80406-
-80407-
-80408-
-80409-
-80410-
-80411-
-80412-
-80413-
-80414-
-80415-
-80416-
-80417-
-80418-
-80419-
-80420-
-80421-
-80422-
-80423-
-80424-
-80425-
-80426-
-80427-
-80428-
-80429-
-80430-
-80431-
-80432-
-80433-
-80434-
-80435-
-80436-
-80437-
-80438-
-80439-
-80440-
-80441-
-80442-
-80443-
-80444-
-80445-
-80446-
-80447-
-80448-
-80449-
-80450-
-80451-
-80452-
-80453-
-80454-
-80455-
-80456-
-80457-
-80458-
-80459-
-80460-
-80461-
-80462-
-80463-
-80464-
-80465-
-80466-
-80467-
-80468-
-80469-
-80470-
-80471-
-80472-
-80473-
-80474-
-80475-
-80476-
-80477-
-80478-
-80479-
-80480-
-80481-
-80482-
-80483-
-80484-
-80485-
-80486-
-80487-
-80488-
-80489-
-80490-
-80491-
-80492-
-80493-
-80494-
-80495-
-80496-
-80497-
-80498-
-80499-
-80500-
-80501-
-80502-
-80503-
-80504-
-80505-
-80506-
-80507-
-80508-
-80509-
-80510-
-80511-
-80512-
-80513-
-80514-
-80515-
-80516-
-80517-
-80518-
-80519-
-80520-
-80521-
-80522-
-80523-
-80524-
-80525-
-80526-
-80527-
-80528-
-80529-
-80530-
-80531-
-80532-
-80533-
-80534-
-80535-
-80536-
-80537-
-80538-
-80539-
-80540-
-80541-
-80542-
-80543-
-80544-
-80545-
-80546-
-80

CAPUT SEPTIMUM.

DE STILO ORATORIO.

OMNEM hanc de Stilo doctrinam haustimus in primis ex aureolo illo libello Demetrii (1), cui vulgo Phalerei cognomen tribuitur, & ex egregia Longini (2) commentatione de Stilo magnifico. Quod utrumque opusculum Tirones, si me audiant, nocturna, ut cum Horatio loquar, diurnaque manu versabunt. Verum quæ illi præcepta, quamvis egregia, confuse tamen, ac permixte tradunt, ea nos facilitiori, ac commodiori ordine digesta sic disposuimus; ut ad omnium captum, & communem intelligentiam sint accommodata.

Quid est Stilus?

R. Stilus, si primam vocis vim, & originem spectes, est acus, seu instrumentum, quo in certatis tabulis scribebatur antiquitus. Hinc factum est, ut Stilus pro ipsa scriptione, seu dictione, & sermonis conformatioне usurparetur.

Quo

(1) Demetrius Phalerenus facundia nobilis annos decem præfuit Athenis, & statuis 360. æretis fuit honoratus; postea vero ejectus fugit in Ægyptum ad Ptolemaeum Lagum.

(2) Longinus Zenobie Palmirenorum Reginæ magister, & consiliarius, ab Imperatore Aureliano necatus, quod audaces Zenobia ad ipsum Aurelianum litteras scripsisset.

Quot sunt Stilorum genera?

R. Stilus, seu orationis Character, triplex est.
1. Magnificus, sive sublimis : 2. Humilis, sive tenuis, qui etiam infimus dicitur : 3. Mediocris, sive æquabilis.

§. I. De Stilo sublimi.

Quid est Stilus sublimis?

R. Stilus sublimis ille est, qui constat verbis splendidis, magnificisque sententiis; quique sua nobilitate rapit quodammodo extra se audientium animos, & admirationem extorquet etiam ab invitis: quale est illud morientis Didonis (1):

Exoriare aliquis nostris ex ossibus ulti,
Qui face Dardanios, ferroque sequare colonos.

Id genus sunt etiam verba illa ejusdem Didonis in Aeneam (2):

Nec tibi Diva parens, generis nec Dardanus auctor,
Perfide: sed duris genuit te cautibus horrens
Caucalus, Hyrcanæque admirant ubera tigres.

Magnificæ locutionis exempla passim apud Tullium reperies; ut cum Cæsarem sic adloquentur in Orat. pro Ligario: *Nihil habet nec fortuna tua*

(1) *Aen. Lib. 4.* (2) *Ibid.*

majus, quam ut possis; nec natura tua melius, quam ut velis conservare quam plurimos. Et paullo ante: *Nihil obliuisci soles, nisi injurias.*

Magnificum etiam est illud Camilli ad milites apud Livium Dec. 1. Lib. 6. *Hos tem, an me, an vos ignoratis?*

Adde Horatianum illud Lib. 2. Od. 1.

Et cuncta terrarum subacta,

Præter atrocem animum Catonis.

Habes etiam in paucis hisce Virgilii verbis Lib. 3, Æneid., aliisque similibus non paucis, stili sublimis exemplum:

Et campos, ubi Troja fuit.

§. II. De Arte comparandi Stili sublimis.

Quonam pacto conciliari poterit? R. Duobus. potissimum modis. Si nobilissima quæque rei, de qua loqueris, adjuncta, seu circumstantias consideres, illamque inspicias, qua parte illustrior est, atque speciosior; cetera vero fileas, atque dissimules: ut olim Apelles, teste Plinio, imaginem amici sui Antigoni latere tantum altero ostendit, ut amissi oculi deformitas lateret. Sic etiam Homerus tempestatem admodum magnifice pingit illustrissima illius adjuncta mira quadam arte feligendo. Eadem arte Neptunum curru invectum, perambulan-

Iantem maria, soloque nutu fluctus iratos pacantem describit Virgilius Æneid. 1.

Sic ait: & dicto citius tumida æquora placat,
Collectasque fugat nubes soleisque reducit:
Atque rotis sumas levibus perlabitur undas. A

2. Metaphoræ, præsertim ex rebus illustribus desumptæ, mirum in modum faciunt ad stili granditatem, atque magnificentiam; ut cum Virg. (1) ait de Augusto Cæsare:
— Cæsar dum magnus ad altum
Fulminat Euphratem bello,

Et cum ait Cicero pro Marcello: Nullius est tantum flumen ingenii, nulla dicendi, aut scribendi tanta vis, tantaque copia, quæ non dicam exornare, sed enarrare; Cæsar, res tuas gestas possit. Aut, eam ait Horatius Lib. 2. Od. 13.

... Curas laqueata circum
Tecta volantes

3. Stili magnificentiam facile consequeris, si legas adsidue auctores eos, qui grandiloqui, ut ita dicam, fuere, cum ampla sententiarum gravitate, & majestate verborum; cujusmodi sunt Cicero in Ca-

(1) Geor. 4.

Catilinaria secunda , secunda Philippica, in Verrem, in Pisonem , pro Milone præcipue sub finem : Virgilius , præfertim Æneid. Lib. 2. & 6.

§. III. De Stilo simplici.

Quid est Stilus simplex?

R. Stilus simplex , qui etiam nuncupatur tenuis , & insimus , ille est , qui in rebus tenuioribus , & exilibus , cuiusmodi sunt epistolæ , dialogi , præceptiones , & sermo familiaris , solet usurpari.

Quenam sunt dotes Stili simplicis?

R. Præcipuae illius dotes sunt perspicuitas , nitor , atque munditia. Verecundus , ac parcus in illo debet esse troporum , ac Schematum usus : vehementiores vero figuræ , cuiusmodi sunt Apostrophe , Prosopopœja , aliæque id genus , omnino repudiat. Selectissima Stili simplicis exempla paßsim invenies in Phædri fabellis , & in Virgilii Bucolicis , ut cum ait Ecloga 1.

Urbem , quam dicunt Romam , Melibœe , putavi
Stultus ego huic nostræ similem , quo sœpe solemus
Pastores ovium teneros depellere fetus.

Sic canibus catulos similes , sic matribus hædos
Noram , sic paryis componere magna solebam.

§. IV. De Stilo mediocri.

Quid est Stilus mediocris?

R. Hic est , qui medium quemdam locum obtinet sublimem inter , & infimum. Hoc

dicendi genus neque majestatem verborum habet, aut gravitatem illam sententiarum, quæ in sublimi est; neque est subtili, ac preffa oratione limatum, quemadmodum genus infimum, ac simplex: sed, ut ait Tullius (1), *Est Stilus quidam interjectus, intermedium, & quasi temperatus, nec acumine inferioris, nec fulmine utens superioris, vicinus amborum; in neutro excellens, utriusque particeps.*

43 Vocatur autem ab eodem Tullio *Stilus floridus, atque politus*, quod nimurum in hunc præcipue mediocrem Stilum omnes verborum veneres, ac venustates, omnes sermonis deliciæ soleant illigari. Absolutum hujuscce Stili mediocris exemplum habes in Virg. Georg. : v. gr. cum ait Lib. I.

Sæpe etiam steriles incendere profuit agros,
Atque levem stipulam crepitantibus urere flammis;
Sive inde occultas vires, & pabula terræ
Pingua concipiunt; sive illis omne per ignem
Excoquitur vitium, atque exsudat inutilis humor;
Seu plures calor ille vias, & cæca relaxat
Spiramenta, novas veniat qua succus in herbas;
Seu durat magis, & venas adstringit hiantes,
Ne tenues pluviae, rapidive potentia solis
Acrior, aut Boreæ penetrabile frigus adurat.

§. V. De usu triplicis Stili, seu Characteris.

QUandonam utendum Stilo simplici, aut mediocri, aut sublimi?

R.

(1) *Orat. 6.*

R. Cum tria sint Oratoris Officia , docere , delectare , & movere ; Stilo simplici utetur ad docendum , mediocri ad delectandum , magnifico vero ad movendum , & ad affectus concitandos .

Præterea Stilus simplex , seu infimus convenit comoediis ; magnificus aptus est tragœdiis ; mediocris vero in historia est adhibendus : quamquam Cæsar simplicem potius , quam mediocrem Stilum usurpavit ; quod nempe Commentarios potius scripsérat , quam Historiam , ut notat Tullius in Libro de Claris Oratoribus .

Item Bucolicis , & Eclogis accommodatus est Stilus simplex ; Georgicis convenit Stilus mediocris ; Epico vero poëmati , cuiusmodi est Maronis Æneis , aptus est Stilus magnificus : quod triplex discriminè in Virgilio licet animadvertere . Quamquam hæc omnia genera non raro miscet in ipsa Æneide , & simplicem Stilum adhibet in libro quinto , ubi de ludis agit , & mediocrem in libro primo . Idem plane dicitur de Comoediis , quæ altius adsurgunt aliquando , ut monet Horat . in Arte Poët .

Interdum tamen & vocem comoedia tollit,
Iratusque Chremes tumido delitigat ore.

Quinam Stilus ceteris duobus est anteponendus?

R. Stilum illum esse ceteris anteponendum , non qui sublimis sit , aut cuiuslibet alterius generis ; sed qui ad rem , de qua agitur maxime sit aptus : ita ut , quemadmodum loquitur Tullius , *Magna graviter , mediocria temperate , humilia subtiliter effera*rat .

S. VI. De Stilo vitioso.

Quænam sunt præcipua vitia in Stilo vitanda?

R. Vitiosum esse Stilum: 1. Tumidum, & inflatum: 2. Puerilem, ac frigidum: 3. Fluctuantem, & dissolutum: 4. Denique siccum, & exsanguem.

Quid est Stilus tumidus, & inflatus?

R. Ille est, qui verbis, ac sententiis supra modum intumescit, &, ut ait Horat. de Arte Poët.

Projicit ampullas, & sesquipedalia verba.

Quid est Stilus frigidus?

R. Stilus frigidus, ac puerilis (sunt enim valde ad finia hæc duo vitia) ille est, qui puerilia quædam ornamenta, frigidos lepores, ineptas ad lusiones, affectatas, ac luxuriantes descriptiones, frivolaque hujusmodi crepundia putidius aucupatur; cujusmodi sunt istæ sententiæ, quæ merito repudiantur à magistris artis: *Centaurus se ipsum equitans ... Auro magis aurea*, &c.

Potest autem vitium illud esse vel in verbis, vel in sententiis. Erit in verbis, si sint indecora translata, qualia sunt ista, quæ damnat (1) Cornificius: *Montes belli fabricatus est: Campos sustulit pacis:* vel si juncta fuerint more dithyramborum, ut in illo Publii (2) Syri de ciconia:

Pie-

(1) *Auctor libri ad Herennium.*

(2) *Publius Syrus mimorum scriptor elegantissimus nixit ante Virgilium tempore Julii Cæsarjs.*

Pietatis cultrix , gracilipes , (1) crotalistria ,
Avis exul hiemis.

Erit vitium in sententiis , si nimis tumidae sint ,
& hyperbolicae , qualis est ista lippis , ac tonsoribus nota , quam referunt Plutarchus , & Cassius :
Minime mirandum est , si Diana Ephesiae templum conflagraverit , qua nocte natus est Alexander. Quippe
Dea in ipso Olympiae matris Alexandri partu , obstericandi laboribus , & curis distracta , ignem non vacuit restinguere .

Sic etiam nimis frigide ac pueriliter dictum fuit
a Plauto de sene avaro , in Aulularia :

Suam rem periisse , seque eradicarier :
Quin Divum , atque hominum clamat continuo fidem ,
De suo tigillo fumus si qua exit foras.

Quid est Stilus fluctuans , ac dissolutus ?

R. Ille est , qui sine articulis , sine numero , sine arte fluctuat huc illuc , neque sibi ullo pacto cohaeret ; quod sane vitium Tironibus est valde familiare . Hujusmodi autem adfert Cornificius : *Socii nostri cum belligerare nobiscum vellent , profecto ratiocinati essent etiam atque etiam , quod possent sacere , siquidem sua sponte facerent , & non haberent hic adjutores multos , & malos homines , & audaces . Solent enim diu cogitare omnes , qui magna negotia volunt gerere .*

Quid

(1) *Quasi Crotalum voce imitans. Crotalus autem est Hispan. Matraca.*

Quid est Stilus siccus, & exsanguis, sive aridus?

R. Ille est, qui nihil ferme habet neque ornamenti, neque succi. Hoc stili genus vulgo (1) Frontoni tribuitur.

§. VII. De Stilo Laconico, & Asiatico.

Quid est Stilus Laconicus?

R. Est Stilus argutus, perbrevis, & acutus, quo multa paucis dicuntur. Nomen porro traxit à Laconibus, qui etiam Spartani dicebantur, ac Lacedæmonii, quibus Stilus ille erat in deliciis, & quibus prolixa loquacitate nihil erat odiosius.

Profer selecta aliquot exempla Stili Laconici.

R. 1. Hosti aliquando per atroces, ac longiores litteras ferrum, flammamque minitanti, hac una syllaba Græca responderunt Spartani: *ει si*; hoc est, *Si potes, si per nos tibi licet.*

2. Philippo Regi Macedonum injustum nescio quid flagitanti responderunt hac unica littera: *οὐ, non.*

3. Ejusdem generis est responsum Cleomenis Spartanorum ducis ad Samios: *Eorum quæ dixistis, prima non memini; media non intelligo; ultima non probbo.*

His adde Laconicam illam epistolam Archidami ad Eleos bellum parantes: *Archidamus Eleis: Bonum est quiescere.* Item-

(1) Fronto Marci Aurelii magister, qui illi statuam à Senatu decerni curavit.

Itemque illam (1) Philostrati litteram ad amicum: *Mitto ad te ficus bibernas. Mirare in illis, vel quod jam sunt, vel quod adhuc sunt.*

Laconicam illam breviloquentiam mirifice expressit Cæsar, de quo ita Suetonius c. 37. *Pontico triumpho inter pompæ sercula trium verborum prætulit titulum: VENI, VIDI, VICI, non acta bellii significantem, sicut ceteris, sed celeriter confecti notam.*

Porro brevitas illa loquendi imperiosum quidam habet, ideoque aptissima est minantibus, mirificeque prodest ad animos perterrefaciendos. Nam ut in tenebris magis timentur omnia, quam in luce, sic illæ orationis quasi tenebræ terribilia rediuit ea, quæ proponuntur, inquit Muretus in variis lectionibus. Idque, ut opinor, secuti sunt Lacedæmonii, cum ad Philippum interposita nescio qua offensione, bellum minaciter intentantem ita scripserunt: *Lacedæmonii Philippo: Dionysius Corinthi.* Multo enim fortior, & ut Lucretii verbo utar, penetratior illa brevitas fuit, quam si ita dixissent: *Memento, Dionysium Tyrannum tui prorsus similem regno fuisse pulsum ob ambitionem, ac turbulentum ingenium, & nunc privatam vitam agere Corinthi. Videto, ne tibi quoque contingat idem, dum aliorum libertatem studes opprimere.*

Neque dissimile illud Demetrii ad Locrenses: *Faxo, cicadæ apud vos humi canant; cum significare vellet totam illorum regionem à se devastatum iri.*

Quid

(1) Philostratus Philosphus, qui Apollonii Thyanævitam Græce scripsit, sed elegantius quam verius.

Quid est Stilus Asiaticus?

R. Ille est, qui fusori quodam orationis ambitu circumscrimitur, multisque verbis pauca dicit. Asiatici nomen traxit ab Asia populis, qui diffusorem illum Stilum habebant in deliciis. Illius exemplum quotidie vides in verbosis illis hominibus, qui tam multis tam pauca dicunt. Hunc porro Stilum Asiaticum tu fugies, si sapis. Quid enim tam insulsum est, quam verborum vel optimorum sonitus inanis, nulla subiecta sententia?

De ratione Stili comparandi.

43
Stilus, qui aliud nihil est, quam certa quædam scribendi ratio cuiusque propria, ex duabus maxime rebus coalescit: 1. Ex sententia: 2. Ex sententiæ conformatione, seu, quod idem est, ex verbis, quibus ornatur, & quodammodo vestitur sententia.

De sententia id generatim, & universe dici potest, in ea spectandum esse primum, ut sit vera; deinde, ut sit perspicua; postremo, ut sit argumento idonea, & ad rem, de qua agitur, accommodata. In conformatione vero sententiæ, qua una maxime Stilus continetur, quatuor sunt observanda: 1. Verborum proprietas: 2. Eorumdem elegantia: 3. Nexus: 4. Collocatio.

Quomodo cognosci, & comparari poterit verborum proprietas, & elegantia?

R. Ad verborum proprietatem, & elegantiam penitus cognoscendam adjumenti multum adferent,

1. Aureus (1) Hadriani Cardinalis Liber, *De sermone Latino, & modis latine loquendi.* 2. Libellus à Scoto editus de verbis Ciceronianis. 3. Alius à Manutio scriptus, quem *Elegantias latinæ locutionis* appellat. 4. *Elegantes loquendi formulæ ex omnibus Cic. operibus selectæ* à Gaspare Sanctio Soc. Jes. 5. *Delectus Latinitatis Mureti, & Flos Latinitatis Pomey.* 6. Non omittendus Liber ab Henrico Stephano editus, *De latinitate falso suspecta*: nec *odus posthumum Vavassoris, De vi, & usu quorundam verborum.*

Præcipue vero, & supra cetera omnia adhibendus erit laudatissimus Nizolii Apparatus in Ciceronem, cum Francisci Sylvii Progymnasmatis ad illius calcem editis.

Sunt autem Sylvii Progymnasmata trecentæ observationes eximiae de incorrupta Latini sermonis integritate, quas ego Tironibus pernecessarias semper existimavi.

Quo pacto intelligi poterit, & edisci verborum nexus, & apta eorumdem collocatio?

R. Verborum nexus, & Ciceroniana collocatio continetur particulis quibusdam, seu commissuris, quæ vim habent hujusmodi, ut nihil sit abruptum in Stilo, nihil hians, & absconum, nihil dissolutum, & fluctuans, hoc est, quod sine nervis, articulisque fluctuet huc illuc: sed ut omnes sententiæ, singulæque earum partes certo inter se modo, numeroque cohærent.

Valde profuerit in eam rem legere aureum

Ho-

(1) Hadrianus Cardinalis floruit initio Sec. 16.

Horatii Tursellini libellum, *De Particulis Latine locutionis*. Habebit etiam utilitatem aliquam *Flos latinitatis* in tertia parte, quæ est *de Particulis*; sed Tursellino longe, multumque inferior.

Denique ad verborum collocationem Ciceronianam facilius noscendam, consulenda erunt *Sylvi Progymnasmata*, de quibus supra dictum. Vide etiam quæ paullo ante diximus de regulis, quibus reddi poterit numerosa periodus.

Quibus rebus comparari facile poterit Stilus optimus?

R. Duabus maxime rebus: 1. diligenti bonorum librorum lectione: 2. adsidua eorumdem imitatione. Diximus in Elementis de Imitatione: nunc vero supereft, ut de Lectione, & de Librorum delectu videamus.

De Scriptorum Latinorum delectu.

Quæcumque diximus hactenus, & posthac dicturi sumus, vel nullam, vel perexiguam habebunt utilitatem, nisi exquisitissimum quemdam delectum in Latinis Auctoriis legendis, & imitandis adhibeamus.

Sunt autem Scriptorum Latinorum ætas quatuor, nempe uti hominum apud Poëtas. Sed Poëtis, ut verbis (1) ipsorum utar,

Aurea prima fata est ætas ...

Subiitque argentea proles

Au-

(1) Ovid. i. *Metam.*

Auro deterior, fulvo pretiosior ære.
 Tertia post illam successit ahenea proles.
 — De duro est ultima ferro.

Latinæ vero linguæ ætates ordine contrario procedunt. Nam à ferrea, deinde ab ænea ad argenteam, & mox ad auream ventum est.

Quænam nuncupanda est ferrea Linguae Latinæ ætas?
 R. Ad ferream ætatem refer Leges duodecim tabularum, & Columnam rostratam C. Duilli, quæ hodieque visitur Romæ; itemque Saliæ hymnos Numæ Pompilii, vix tandem à sacerdotibus suis intellectos, cuiusmodi est v. gr. rancidulum illud fragmentum, quod à Varrone citatur: *Omnia dapatilia comissem Jani cusiones ... Duonus Ceruses Deivos Janos venet.* (1) Porro *dapatilia comisse* significat, si quæris, opipara comedisse; *Jani vero cusiones* sunt curiones, seu sacerdotes Jani; *Duonus Ceruses* est bonus creator: *Deivos adhibetur pro Divus*, ut nemo non videt, & *Venet pro venit*.

Eodem refer vetustissimum illum versum de Saliorum exultationibus:

Præsul ut amptruat, inde & volgu' redamptruat olli.

Hoc

(1) *Lautissimæ erant Saliorum canæ*, unde Horatius Lib. 1. Od. 31.

..... Nunc saliaribus

Ornare pulvinar Deorum

Tempus erat dapibus, fodales.

Hoc est, cum Saliorum antistes, & magister saltans, atque tripudians motum aliquem edidit, eundem omnino motum de compacto referat Saliorum chorus omnis :

Et vulgu' redamptruat olli.

Amptruare enim erat olim motum aliquem saltando edere. Porro ferream illam Latinæ Linguæ ætatem jure poteris illius quasi pueritiam appellare.

Quænam est ænea Linguae Latinæ ætas?

R. Ænea ætas incipit à Livio Andronico, qui omnium primus Latinos versus scripsit. Ad eandem ætatem pertinet

Ennius ingenio maximus, arte rudis :

Ut de illo scribit Naso ; itemque Cæcilius, *Marius Latinitatis auctor*, inquit Tullius. Totum porro tempus illud, quo floruere Andronicus, Ennius, Nævius, Cæcilius, Pacuvius &c. quasi crescentem Latinæ Linguæ ætatem poteris nuncupare.

Quænam est ætas argentea?

R. Ad ætatem argenteam pertinent Plautus in suis Comoediis, & Cato de re rustica. Terentium vero ad auream ætatem omnino referendum esse judicamus : quamquam nonnullis ob illius *Archaismos* secus visum fuerit ; sed immerito. Hanc vero argenteam ætatem quasi adolescentiam Latinæ Linguæ possimus appellare.

Quænam demum est aurea Latinæ Linguae ætas?

R. Auream ætatem appello tempus illud annorum ferme centum, quod vulgo Augusti ætas dicitur, estque magni Ciceronis ortum inter, & ejusdem Imperatoris Augusti mortem interjectum. Hac aurea ætate floruerunt inter Oratores, ac Rethores, Cicero, & Cornificius auctor, ut verisimilium est, quatuor librorum ad Herennium, qui vulgo adscribuntur Ciceroni. Inter Historicos Julius Cæsar, A. Hirtius, qui scripsit Commentarios de bello Alexandrino, de bello Africano, & de bello Hispaniensi, Sallustius, & Cornelius Nepos. Inter Poetas Virgilius, Horatius, Catullus, Tibullus, Propertius, Phædrus, Ovidius, Lucretius, & Publius Syrus, quorum postremi duo ceteros ætatis aureæ Poëtas aliquantum ætate antecessere. Inter rei rusticæ, aut Architectonicæ Scriptores Varro, & Vitruvius. Aureum vero illud tempus quasi virilem latinæ linguae ætatem vocare jure poterimus.

Eos igitur maxime legere, & imitari oportet, qui hac aurea ætate vixerunt, ante omnes Tullium, *cœlestem in dicendo virum*, ut eum Fabius appellat: *quique*, ut ait idem Fabius, *apud posteros id consecutus est*, ut Cicero jam non hominis nomen, sed eloquentiae habeatur. *Hunc igitur spectemus*, *hoc propositum sit nobis exemplum*: *ille se profecisse sciat*, *cui Cicero valde placebit*.

Quanta vero cura, ac religione sermonis proprietatem observaverit Cicero, satis magno argumento erit, quod dicam. Fuit cum existimaret,

inhibere remos idem esse ac retinere ; & ut auriga equos inhibet , ut cursum sistat ; sic etiam remos inhiberi , dum sustinentur. Postea vero ex nautis didicit , inhiberi remos , cum remiges alio navigantes modo navim ad puppim convertunt. Quod edocitus minime cessandum putavit , donec Atticus , & Varro monerentur , ut in primo de Oratore libro , quem jam transmiserat , locus ille emendatur. Quod ita esse indicant hæc Tullii verba ad Atticum (1) : *Inhibere illud tuum. quod valde mihi adiiferat , vehementer displicet : est enim verbum totum nauticum : quamquam id quidem sciebam ; sed arbitrabar sustineri remos , cum inhibere essent remiges jussi. Id non esse ejusmodi didici heri , cum ad villam nostram navis appelleretur : non enim sustinent , sed alio modo remigant. Id ab (2) ἐποχῇ remotissimum est. Quare facies , ut ita sit in libro , quemadmodum fuit. Dicēs idem Varroni , nisi forte mutavit.*

Quod si de vocula una ita laboravit Tullius , nihil mirum , si viro , ut omnium eloquentissimo , ita etiam proprietatis adeo amanti , omnium doctissimus Varro mitteret libros suos de Lingua Latina ; si item omnium fortissimus Julius Cæsar , nec vel eloquentia , vel doctrina illi minor futurus , si totum his se studiis tradidisset , eidem dicaret libros suos de Analogia. Qua de re sic Tullius in Bruto : *In maximis occupationibus ad me ipsum de ratione Latine loquendi accuratiissime scripsit Cæsar.*

Quiſ-

(1) Epist. 21. lib. 13.

(2) Retentione.

Quisnam Ciceroni proximus est incorrupta Latini sermonis integritate, & elegantia?

R. Primum post Ciceronem damus locum Cæsari, atque Terentio. Sane quam præclare de utroque senserit Tullius, liquet ex his, quæ de utroque scripsit. Ac de Terentio quidem sic loquitur ad Atticum: *Secutus sum, non dico Cæciliū (ma-*lus enim auctor Latinitatis est) sed Terentium, cuius fabellæ propter elegantiam putabantur à C. Lælio scribi.

De Cæsiare vero sic idem in Bruto: *Etiam commentarios quosdam scripsit rerum suarum valde quidem probandos: nudi enim sunt, recti, & venusti, omni ornatu orationis, tamquam ueste, detraicto: sed dum voluit, alios habere parata, unde sumerent, qui vellent scribere historiam; ineptis gratum fortasse fuit, qui volunt illa (1) calamistris inurere; sanos quidem homines à scribendo deterruit.*

Quinam latinitatis auctores post tres hos legendi sunt?

R. Cum Fabio, *Ut quisque erit Ciceroni simillimus.* Quales sunt Phædrus, Cornelius Nepos, Livius, &c alii, quos recensuimus, qui vel Ciceronis ævo vixere, vel non ita magno distant intervallo.

Degustari etiam poterunt, sed parce, & sero, recentiores nonnulli, qui Ciceronem diligenter sunt imitati; & quomodo sit imitandus, ipsi exemplo esse poterunt. Quales sunt Muretus, Manutius in epif-

(1) *Calamistrum* est ferrum illud teres, quo candente capilli intorquentur, in cincinnosque crispanuntur. *Inurere* vero *calamistris* metaphorice dicitur pro vanum atque immodicum ornatum adhibere.

epistolis illis , quas ante senium scripsit, nam ceteræ frigidam sapiunt ætatem , Sadoletus , Bembus, Maffeus pictus , atque politus , Bunellus , Tursellinus , Longolius , Perpinianus , Vavassor , Petavius.

Post obitum Augusti incorrupta illa , quam dixi , latini sermonis integritas sensim adulterari coepta est , & quasi ex auro in argentum iterum commutari , ut ex Senecæ , Fabiique , & aliorum querimoniis liquet. In decrescente illa ætate sunt inter Oratores , ac Rethores Fabius Quintilianus , Plinius Junior , &c. Inter Historicos Suetonius , Tacitus , Justinus , Vellejus Paterculus , Q. Curtius &c. Inter Poëtas Lucanus , Persius , Silius , Juvenalis , Statius , Martialis , Seneca. Inter Philosophos vero Seneca , Plinius Veronensis , &c. Inter Grammaticos denique Asconius , A. Gellius , &c.

Denique à temporibus Severi auspicari licet æneam ætatem , quæ tandem in ferream desit , postquam variarum gentium irruptione ipsi Romani facti sunt barbari , & in hac ætate decrepita sunt Symmachus , Capella , Sidonius Apollinaris , quos omnes tu vitabis summopere , si sapis.

**

FINIS LIBRI PRIMI.

ARTIS RHETORICÆ LIBER SECUNDUS.

DE INVENTIONE.

EGimus haec tenus de Figuris, ac Tropis, de Periodo, & de Stilo. Postulat nunc instituti nostri ratio, ut agamus de Inventione, sine qua, teste Tullio, frivola erit, & puerilis omnis locutio.

Quid est Inventio?

R. Est excoigitatio argumentorum, quæ valeant tum ad fidem faciendam, tum ad motus excitandos. Primum igitur agendum nobis erit de argumentis, deinde de motibus, seu affectibus excitandis.

De argumentis, & locis oratorii.

Quid est argumentum?

R. Est probabile inventum ad faciendam fidem; ut, si probare velis, expetendam esse Rhetoricam, invenies, quod sit ars bene dicendi.

*Vnde*nam sumuntur Argumenta , sive rationes ad aliquid probandum?

R. Sumuntur ex locis oratoriis , quos Tullius appellat Argumentorum sedes , in quibus latent , & ex quibus sunt deponenda. Quia propter , si vis Orator esse , in promptu tibi esse debent loci illi , & ut ita loquar , ad manum ; ut in illis uberrimam Argumentorum segetem facile possis invenire.

Quot sunt genera locorum?

R. Duo. Alii enim petuntur ab ipsa re , & idcirco vocantur *Intrinsici*, seu *insiti*: alii sunt extra ipsam rem , de qua questio est unde etiam vocantur *Extrinsici*, seu *remoti*. De utroque illo genere , ac de primo præsertim , quod magis quoddam momentum habet ad eloquentiam , accuratissime nobis est hoc loco tractandum.

CAPUT PRIMUM.

DE LOCIS INTRINSECIIS.

Quot sunt Loci oratorii intrinsici?

R. Sexdecimi : Definitio , Enumeratio partium , Notatio , Conjugata , Genus , Forma , Similitudo , Dissimilitudo , Comparatio , Repugnantia , Adjuncta , Antecedentia , Consequentia , Causæ , Effecta , Comparatio.

S. I. Definitio.

Quid est definitio? R. Est brevis, & circumscripta rei explicatio, inquit Tullius; vel, ut Philosophi malunt: Definitio est oratio, quæ rei naturam explicat.

Quomodo fit recta Definitio?

R. i. Accipito aliquid rei, quæ definitur, commune cum aliis: deinde addito aliquid illi unice proprium, ac peculiare, & tum demum habebis optimam definitionem: v. g. *Rhetorica est ars bene dicendi*: quod sit ars, hoc illi commune est cum aliis artibus: quod vero sit ars bene dicendi, hoc est illi omnino proprium. Quod si manca sit, & multila tua definitio, jure, ac merito poterit tibi contingere, quod olim Platoni contigit. Definierat aliquando Plato hominem, *Animal bipes, & implume*. Diogenes Cynicus, homo dicax, & Academicorum irrisor, gallum implumem, ac nudum in medium Platonis scholam projiciens, *En*, inquit, *hominem Platonis*.

Estne eadem definiendi ratio Logicis, & Oratoribus.

R. Longe diversa. Logici enim jejune, breviter, ac sicce rem definiunt per genus, & differentiam: v. gr. *Homo est animal rationale*: Orator vero liberius, & ornatus hominem ita definiet per locos Rhetoricos: *Homo est eximum opus à Deo efformatum rationis particeps, ad Dei imaginem conditum, atque ad immortalitatem natum*. Hoc autem Oratorium definiendi genus, si recte appellare velimus, *Descriptio* potius appellari debet, quam accurata *Definitio*.

Quot modis fieri solet Descriptio, seu oratoria Definitio?

R. Sex potissimum modis fieri solet. 1. Per partes, ex quibus res ipsa constat; ut si dicas: *Ars oratoria est ars, quæ constat inventione, dispositione, elocutione, & pronunciatione.*

2. Fit per effectus, ut cum dicitur: *Peccatum est pestis animæ, conscientiæ labes, ritæ pernicies, naturæ dedecus, orbis ruina, odium Dei &c.*

3. Definitio fit per negationem & affirmacionem; cum nempe primum dicimus quid non sit res, ut deinde melius intelligatur quid sit: & haec definiendi ratio Ciceroni perfamiliaris fuit. Ita Pisfonem probat non fuisse Consulem. *Tu in lictoribus, in toga, & praetexta esse consulatum putas? Quæ ornamenta etiam in Sex. Clodio, te Consule, esse voluisti. Hujus te Clodiani canis insignibus consulatum declarari putas? Animo consulem esse oportet, consilio, fide, gravitate, vigilancia, toto denique munere consulatus.* Et pro domo sua: *An tu Populum Rom. esse illum putas, qui constat ex ius, qui mercede conducuntur, qui compelluntur, ut vim afferant magistratibus? ut obsideant senatum? optent quotidie cædem, incendia, rapinas? ... O speciem dignitatemque populi Rom. quam nationes exteræ, quam gentes ultimæ pertimescant! Multi in dinem hominum ex servis conductis, ex facinorosis, ex egentibus congregatam. Illa fuit pulchritudo Populi Rom. illa forma, quam in campo vidisti, tum cum etiam tibi, contra Senatus, totiusque Italæ auctoritatem, & studium, dicendi potestas fuit.*

4. Definitio sit ab adjunctis. Ita Virgilius famam describit ab adjunctis: (1)

Fama malum, quo non aliud velocius ullum;
Mobilitate viget, viresque adquirit eundo:
Parva metu primo, mox se se tollit in auras,
Ingrediturque solo, & caput inter nubila condit.

Monstrum horrendum, ingens, cui quot sunt cor-
pore plumæ,
Tot vigilis oculi subter (mirabile dictu)
Tot linguae, totidem ora sonant, tot subigit aures,

Tam ficti, pravique tenax, quam nuntia veri.

Eadem ratione Cic. pro Sextio Pisonem, Gabiniuumque Coss. describit: Sed fuit profeclœ quædam illa Reip. fatalis, ut ille cæcus, atque amens Tribunus plebis nanciseretur, quid dicam Consules? hoccine ut ego appellem nomine eversores hujus imperii, proditores vestre dignitatis, hostes bonorum omnium? qui ad delendum Senatum, adfligendum equestrem ordinem, extinguenda omnia jura, atque instituta majorum se illis fastibus, ceterisque insignibus summi honoris, atque imperii ornatos esse arbitrabantur?

5. Definitio sit venuste per similitudinem, atque Metaphoras, quasi qui, ait Cic. in Top., adolescenciam florem ætatis; senectutem occasum vitæ, velit definire. Observa tamen, Metaphoricis id genus de-

fi-

(1) Æneid. 4.

finitionibus catte admòdum utendum esse , & cum
mica salis , ut ait Catullus .

§. II. Enumeratio partium .

Quid est enumeratio partium ?
R. Est oratio , qua totum in suas partes
distribuitur ; unde locus ille vocatur etiam
Distributio . ut si distribuas , ac dividas vitam hu-
manam in pueritiam , adolescentiam , virilem æta-
tem , & senectutem .

Quæ sunt regulæ , ac leges Enumerationis partium ?

R. Tres præcipuae . 1. Regula hæc est : adfirmatis omnibus partibus , adfirmatur totum . Ita Tullius probat Pompejum esse summum Imperatorem , omnes , & singulas optimi Imperatoris virtutes enu-
merando . (1) Ego enim sic existim , in summa Impera-
tore quatuor has res inesse oportere ; scientiam rei mi-
litaris , virtutem , auctoritatem , felicitatem . Pergit
deinde , & quatuor hæc in suo Pompejo summa
esse sic probat : Quis igitur hoc homine scientior um-
quam aut fuit , aut esse debuit , qui è ludo , atque
pueritiae disciplina bello maximo , atque accerrimis hosti-
bus , ad patris exercitum , atque in militiæ discipli-
nam profectus est ? Deinde de ejus justitia : Cujus le-
giones sic in Asiam pervenerunt , ut non modo manus
tanti exercitus , sed ne vestigium quidem cuiquam pa-
cato nocuisse dicatur . Et de temperantia sic loqui-
tur : Non avaritia ab insituto cursu ad prædam re-

(1) Pro Leg. Man.

vocavit, non libido ad voluptatem, non amicitas ad delectationem, non nobilitas urbis ad cognitionem, non denique labor ipse ad quietem &c.

Quænam est secunda regulæ?

R. 2. Regula hæc est, ut negatis omnibus, & singulis partibus, negetur totum. Sic probat Tullius Antonium non esse Consulem: Negat hoc D. Brutus Imperator, negat Gallia, negat cuncta Italia, negat Senatus, negatis vos. Qui igitur illum consulem, nisi latrones, putant? *Cedo ultimam regulam enumerationis partium.*

R. Ut negatis partibus recte negetur totum, nulla tibi erit pratermittenda pars, quoad ejus fieri poterit.

§. III. Notatio Nominis, & Conjugata.

AD unum, & idem caput duos hosce locos propter adfinitatem revocamus. Quamvis porro uterque ille locus propter levitatem non adeo valere videatur ad persuadendum, quia tamen non parum valet ad delectandum, & ad orationem lepore aliquo, ac salo conditam, idcirco ab Oratoribus interdum summis adhibetur.

Quid est Notatio?

R. Notatio, seu Etymologia, est locus, qui verborum originem, & significationem inquirit, ut *Senatus* nomen traxit a *Senibus*: *Consul* vocatur, qui *consulit patriæ*: ergo Piso nihil minus quam *consul* est: & Ovidius in Fastis *Victoriam* sic appellari dicit a *vincendo*, & *hostiam* ab *hoste*.

Victima, quæ dextra cecidit victrice, vocatur.
Hostibus à domitis hostia nomen habet.

Quandonam potissimum utendum est Notatione nominis?

R. Quando in nomine aliquo laudem, vel decus, aut locum aliquem non scurilem, ac mimicum, sed liberalem, & urbanum invenit Orator. Sic in nomine (1) *Verris* jocose lusit Cicero, quasi ita dictus fuisset, quod omnia *verrere*; hoc est omnia raperet homo furacissimus: *Quam tu*, inquit, *domum*, *quod sanum adiisti*, *quod non eversum*, *atque extersum reliqueris*? Sic etiam Chrysogonum in avaritiae suspicionem vocavit ab ipsius nomine, quod *aureum* significat, aut quasi *auro genitum*.

Ad notationem nominis pertinent Anagrammatæ, cujusmodi sunt ista: *Amor*, *Roma*, *Maro*: *Logica*, *Caligo*: *Ursula*, *Laurus*: *Prudentia*, tardus puni: *Maria Virgo*, *mira Virago*: *Divus Alexius*, diu exul à suis: *Quid est veritas*, est vir qui adeat: *Maria Magdalena*, grandia mala mea: *Sacramentum Eucharistiae*, chara Ceres mutata in Jesum &c.

Quamquam, ut ingenue dicam quod sentio, perpusilli ingenii est, frivolis hujusmodi nugis immorari, quæ scilicet laborantis magis sunt, quam elegantis ingenii partus. Et, si me audis, vana hæc

cre-

(1) *Verres homo libidinosus, & avarus*, cum in Sicilia trieanium pretor fuisset, repetundarum accusatus fuit à Siculis.

erepundia relinques Judæis, qui multi sunt in observandis exilibus litterulis, & apud quos nata opinor Anagrammata, & ab illis ad nos usque infelici contagiope derivata.

Quid sunt Conjugata?

R. Sunt ea, quæ ab uno orta vocabulo varie conjugantur, seu commutantur, ut *Sapiens*, *sapientia*, *sapienter*; *Imperium*, *imperator*, *imperare*. Ex hoc Conjugatorum loco Cæsarem ingeniose admodum ita laudat (1) Tullius: *Ceterus quidem omnes victores bellorum, civilium jam ante æquitate, & misericordia viceras: hodierna vero die te ipsum vicisti...* Nam cum ipseus *victoriae conditione jure omnes victi occidissimus, clementiae tuæ judicio conservati sumus*. Rebre igitur unus invictus es, à quo ipse etiam *victoriae conditio, usque devicta est*.

Ex hac verborum Conjugatione sic etiam argumentatur Propertius: *Aurea hunc vere sunt sœcula: Plurimus auro*

Venit honos: auro conciliatur amor.

Ad eundem locum pertinet illud in Pisonem; *Cum enim esset omnis caussa illa mea Consularis, & Senatoria, auxilio mibi opus erat & Consulis, & Senatus.*

Est illud (2) Terentianum elegans in primis in hoc eodem genere: *Homo sum; humani nihil à me alienum puto.*

§. IV.

(1) *Pro Marcello.* (2) *In Heantontimorutemo.*

do §. IV. Genus, & Species, seu Forma.

Quid est Genus? R. Genus apud Rhetores dicitur illud, quod est commune multis, & quod multa sub se complectitur, ut virtus sub se continet justitiam, temperantiam, fortitudinem, prudentiam.

Fatigatio, fides, argumentum à genere.

R. Præsto est. Temperantia est virtus: ergo est amararia. Qua potissimum ratione tractatur ille locus?

R. Tractatur in primis, cum à specie fit transitus ad genus, seu, ut vulgo loquuntur, cum hypothesis revocatur ad thesim. Hujuscem loci luculentum habes exemplum in Oratione pro Archia Poëta, ubi Cicero cum laudandum Archiam Magistrum suum suscepisset (quod est hypothesis) rem ad thesim revocavit, hoc est, poësim, & studia humanitatis generatim, & universo laudavit, ut latiorem orationi suæ campum aperiret. Adverte igitur quo antifidū ab hypothesis transit ad thesim.

Laud Archiæ Poëta à genere.

Sit igitur sanctum apud vos humanissimos homines hoc Poëta nomen, quod nulla umquam barbaria violavit. Saxa, & solitudines voci respondent: bestiae sepe immanes cantu flecentuel, ratque corsistunt: Inos instituti rebus optimis non Poëtarum vocē moveamur? (1) Homer.

(1) Homerus poëtarum Græcorum princeps, quem suum esse civem septem appida certatim adscrunt.

rum Colophonii Civem esse dicunt suum, Chii suum ven-
dicant, Salaminii repetunt, Smyrni vero suum esse
confirmant: itaque etiam delubrum ejus in oppido de-
dicaverunt. Permulti alij praeterea pugnant inter se, at-
que contendunt. Ergo illi alienum, quia Poeta fuit,
post mortem etiam expelunt quod nos hunc trivimus, qui
& voluntate, & legibus noster est, repudiabimus?

Quod vitium in genere tractando vitandum est?

R. Hoc loco solent intemperantius abuti Tiro-
nes, dum thesim longius trahunt, quod nempe
res sit communior, faciliorque, & multorum tri-
ta vestigiis; v. gr. si de Justitia, vel de Caritate
sermo fit, allise se in virtutis laudes universae, ac
generatim effundent, & miseram crambem, ut
ajunt, rædio affectis auribus, ac fastidium usque
ad fatigatem ingerent. Tunigitur si sapientia, hoc vul-
gare vitium fugies?

Nec circa vilem, patulumque moraberis orbem. (1)

Ubinam præcipue locum habet argumentum à genere?

R. Locum habet præcipuum in orationis exor-
dio, ubi præmitti solet aliquod universale prin-
cipium, à quo ad hypothesis, hoc est ad singu-
larem propositionem descenditur.

Quid est Species, seu Forma?

R. Ex his, quæ dicta sunt de genere, facile
intelliges speciem esse id, quod minus late pa-
tet; seu esse rem particularem, quæ sub univer-
sa-

46

(1) Hor. in Arte poetica.

sali continetur. Vocatur autem apud Rethores *Hypothesis*; v. gr. *Virtus est amanda*, est Genus sive Thesis: *Temperantia hic & nunc est in convivio seruanda*, en Species, sive Hypothesis.

S. V. Similitudo, & Dissimilitudo.

Quid est Similitudo?

R. Similitudo est rerum ceteroqui dispartium collatio, atque convenientia in aliqua re: v. gr. est similitudo inter avarum, & hydropeum, quia licet avarus, & hydropeum sint duæ res longe diversissimæ, in eo tamen convenient, quod neuter satiari possit. Item homo iratus dicitur esse similis Leoni rugienti; quia homo iratus, & Leo rugiens sunt duæ res valde inter se se dispare, quæ tamen in aliqua re convenient, nempe in furore. Sic etiam umbra, & gloria sunt res diversissimæ: in hoc tamen convenient, quod umbra corpus, gloria virtutem comitetur. Unde ait Cicero: *Gloria est umbra virtutis.*

Quomodo fit argumentum à similitudine?

R. Facies in hunc fere modum cum Tullio: *Quidam morbo, aut sensus stupore cibi suavitatem non sentiunt; sic libidinosi, avari, facinorosi vere laudis gustum non habent.* Sic etiam argumentari poteris à simili cum Ovidio: (1)

Scilicet ut fulvum spectatur in ignibus aurum,
Tempore sic duro est inspicienda fides.

Quid

(1) Trist. Lib. I. (1)

Quid est discriminis inter similitudinem & comparationem?

R. Similitudinem proprie pertinere ad id, quod *qualitatem* vocant; comparationem vero pertinere ad *quantitatem*. Fit enim comparatio vel à pari, vel a majori ad minus, vel à minori ad majus, ut dicetur postea: in similitudine vero nulla fit mentio neque paris, neque majoris, neque minoris.

Quomodo facile poterit inveniri argumentum à simili?

R. Quæres statim, quænam res sit similis cuiusdam naturæ cum ea, quam explicandam sumis. Ita si agatur de constantia, quæres quid vel maxime resistat, & occurret tibi rupes, adamas, diceſque cum Virgilio de Rege Latino: (1)

Ille, velut pelagi rupes immota, resistit.

Vel ut idem Virgilius de Didone Lib. 6.

Illa solo fixos oculos aversa tenebat;
Nec magis incepto vultus sermone movetur,
Quam si dura filex, aut stet Marpesia cautes.

Quid est dissimilitudo?

R. Est oratio, quæ ex re dissimili dissimile colligit; ut cum ait Tullius: *Si barbarorum est in diem vivere, nostra consilia sempiternum tempus spectare* de-

(1) Lib. 7.

debent. Et lib. 2. de Oratore : *Artes reliquæ ab eloquentia differunt, quod hæc non habeat definitam aliquam regionem, cuius terminis sepius teneatur: ceteræ vero artes suis se certis quibusdam finibus continent. Hunc locum à dissimili lepidissime tractat Catullus, cum ait :*

Soles occidere, & redire possunt:
Nobis, cum semel occidit brevis lux,
Nox est perpetua una dormienda.

Ad hunc eundem locum pertinet hæc Horatiana sententia:

Damina tamen celeres reparant cœlestia lunæ:
Nos ubi decidimus,
Quo pius Æneas, quo (1) Tullus dives, & Ancus,
Pulvis, & umbra sumus.

§. VI. Contraria, & repugnantia.

Quid sunt *Contraria*, seu *opposita*?

R. Sunt ea, quæ in eodem subjecto esse non possunt; vel si fuerint in eodem, necessario inter se pugnant.

Quot sunt *Contrariorum genera*?

R. Quatuor omnino numerantur, nimirum *Adversa*, *Relata*, *Privantia*, & *Contradicentia*.

Quid

(1) *Tullus*, cognomento *Hæfilius*, tertius *Romanorum Rex*. Illi succedit *Ancus Martins*.

Quid sunt adversa?

R. Sunt ea, quæ in eodem plurimum inter se differunt, ut *virtus*, & *vixim*; *bellum*, & *pax*; *sapientia*, & *stultitia*. Cicero Philip. 2. Attende paulisper, cogitationemque sobrii hominis punctum temporis suscipe . . . Nego quidquam esse medium: consilior, eos, nisi liberatores Populi Rom., conservatoresque Reip. sint, plus quam sicarios, plus quam homicidas, plus etiam quam parricidas esse: siquidem est atrocius Patriæ parentem, quam suum occidere. Tu homo sapiens, & considerate, quid dicens? Si parricidie, cur Ignoris causa à te sunt & in hoc ordine, & apud populum Rom. semper appellati? cur M. Brutus, te referente, legibus est solutus, si ab urbe plus quam decem dies absuisset? cur provincie Cassio, & Bruto date &c. Non igitur homicidae. Sequitur, ut liberatores tuo iudicio sint.

Quid sunt Relata?

R. Sunt ea, quæ se invicem ita respectant, ut alterum sine altero esse non possit, ut *Pater*, & *filius*; *dux*, & *miles*; *magister*, & *discipulus*; *dominus*, & *servus*; *qui dat*, & *qui accipit*.

Ex hoc loco Cæsarem ita laudat Cicero, in oratione pro Marcello: *Ex quo profecto intelligi debet, quanta in dato beneficio sit laus, cum in accepto tanta sit gloria*. Huc etiam pertinent hæc verba Veneris, arma pro filio suo Aenea poscentis à Vulcano:

Arma rogo genitrix nato.

(1) *Ante tantumq[ue] ratiōne*

Quid sunt Privantia?

R. Sunt habitus, & ejus privatio: ut *vita*, & *mors*; *lux*, & *tenebræ*; *scientia*, & *inscitia*; *pauperies*, & *diritiae*.

Quid sunt contradicentia?

R. Sunt ea, quorum alterum negat, alterum adfirmat idem de eodem: Ut, *Milo insidiatus est Clodio*: *Milo non est insidiatus Clodio*.

§. VII. Ajuncta.

Quid sunt Adjuncta?

R. Sunt ea, quæ cum re, de qua agitur, non necessario, sed probabiliter conjuncta sunt.

Quot sunt Adjunctorum genera?

R. Tria vulgo numerantur: 1. Adjuncta rei, ut *locus*, *tempus* &c. 2. Adjuncta animi, ut *virtus*, *virtutes*. 3. Adjuncta corporis, ut *pietudo*, *deformitas*, *robur*, *vestis*, *habitus*. Uno verbo omnia, quæ rem quoquo modo circumstant, sive præcedant, sive comitantur, sive consequantur, appellantur Adjuncta, seu res circumstantes. Unde liquet, quam longe, lateque pateat locus ille, & quam uberem dicendi segetem Oratori suppeditet.

Quomodo sumi potest argumentum ab Adjunctis?

R. Cum ex loco, tempore, facultate, aliisque id genus, quæ rem circumstant, persuadendi occasionem idoneam captat Orator. Sic (1) Hannibal

Ita-

(1) *Hannibal Amilcaris filius Carthaginensium Dux qui sapient Romanos vicit.*

Italiā ingressus, militib⁹ suis eloquenter admodum
facit animos ex loco, unde fugere non liceat.

Oratio Hannibalis milites suos ad pugnam adhortantis.

Liv. Lib. 21.

Dextra, lēvaque duo maria claudunt. Nullam, ne
ad effugium quidem, nāvem habemus. Circa Padus
annis major, ac violentior Rhodano: à tergo Alpes
urgent, vix integris vobis, ac viventibus transitæ.
Hic vobis vincendum, aut moriendum, Milites, est...
Nil usquam nobis relictum est, nisi quod armis vin-
dicaverimus. Illis timidis, & ignavis licet esse, qui
receptum habent, quos ager suus, quos sua terra per-
tuta, ac pacata itinera fugientes accipient. Vobis ne-
cessē est fortibus viris esse, & omnibus inter victoriam,
mortemque certa desperatione abruptis, aut vincere,
aut, si fortuna dubitat, in prælio potius, quam in
fuga mortem oppetere. Si hoc bene fixum omnibus, des-
tinatumque in animo est, iterum dicam, vicisti: nul-
lum incitamentum ad vincendum homini à Diis imor-
talibus acrius datum est.

Porro, memorię juvandę caussa, præcipua octo
Adjunctorum genera hoc vulgari versiculo fuere
comprehensa:

Quis, quid, ubi, per (1) quos, quoties, cur, quomo-
do, quando.

O quis

(1) Alii dicunt, quibus auxiliis, sed minus cum-
modo.

Quis significat personam , & quæ ad illam pertinent , cuiusmodi sunt genus , educatio , indoles , ætas , sexus , patria , cognatio , fama , virtus , ingenium &c.

Quid negotium designat , sive rem , de qua agitur . *Vbi* locum demonstrat . *Per quos* indicat adjutores , & socios , quorum opera facta res est . *Quo-*
ties docet , quam sape res facta fuerit . *cur* cau-
sam , & finem designat . *Quomodo* modum , ac se-
riem ostendit rei gestæ . Denique *Quando* denotat
tempus , quo gesta res est .

S. VIII. Antecedentia , & Consequentia .

Quid sunt antecedentia ?

R. Sunt ea , quibus positis , necesse est alia consequiri ; ut , Ortus est sol ; ergo dies est . Tu natus es homo ; ergo dubio procul morieris . Ille gravissimi sceleris reus est ; ergo gravissime plectetur à justo judice .

Quid sunt consequentia ?

R. Sunt ea , quæ rem necessario consequuntur . Sic autem argumentum duces à consequentibus : *Est copia fructuum* ; ergo & florum fuit . *Cicatricem* gerit ; ergo plagam accepit . Cicatrix enim , & fructus plagam , & flores consequuntur . Quia vero locus ab Antecedentibus , & Consequentibus non maximopere differt ab Adjunctis , ideo diutius in illo immorari non est operæ pretium .

§. IX. Causæ.

Quid est causæ?

R. Est id, unde aliquid est, vel id, cuius aliquid fit; ut vulnus est causa mortis, cruditas est causa morbi &c.

Quotuplex est causæ?

R. Quadruplex numeratur à Philosophis, efficiens, materialis, formalis, & finalis.

Quid est causa materialis?

R. Ea est, ex qua aliquid fit, aut componitur: ut marmor est materia, seu causa materialis statuæ: lapides sunt materia domus: corpus est hominis quasi materia.

Quid est causa formalis?

R. Est ratio rei, ac nota, per quam res est id, quod est, & à rebus aliis distinguitur; unde anima est forma hominis, quia per animam fit rationalis, & à ceteris animantibus distinguitur.

Quid est causa finalis?

R. Est id, cuius gratia aliquid fit; ut finis belli est victoria, & pax, cum propter victoriam, & pacem bellum suscipiatur. Beata in Cœlo vita est causa finalis hominis, quandoquidem homo agit omnia, vel agere debet certe quidem, ut beatam in Cœlo vitam tandem aliquando consequatur.

Quomodo argumentari debemus à causa efficienti?

R. Sic argumentaberis cum Tullio: Intemperantia effetum corpus tradit senectuti; ergo diligenter vitanda est. Ab hoc loco senectutem contra vitu-

peratores ita defendit idem Tullius: *Caret epulis, ajunt, exstrutisque mensis, & frequentibus poculis: caret ergo vinolentia, cruditate, & insomniis.* Ita Ovidius Ægypthi adulterium culpat à caussa efficiente, nempe ab otio:

Quæritur (1) Ægypthus quare sit factus adulter? In promptu caussa est: desidiosus erat.

Quomodo argumentamur à materia?

R. Ita ferme dices: *corpus hominis est mortale; ergo æquum est, ut illi dominetur animus immortalis.* Ita Ovidius Solis regiam commendat à materia, Metamorph. Lib. 2.

Regia solis erat sublimibus alta columnis,
Clara micante auro, flamasque imitante (2) Pyropo:
Cujus ebur nitidum fastigia summa tegebat:
Argenti bisores radiabant lumine valvæ.
Materiam superabat opus.

Quomodo sumitur argumentum à caussa formalis?

R. Sic dices: *animus hominis est immortalis; ergo mors non est timenda. Excellens est animi natura; ergo voluptatibus servire non debet.* Ita

(1) Ægypthus Thyestis filius, stuprata Clytemnestra, ejus maritum Agamemnonem interfecit, & ipse ab Oreste illius filio fuit occisus.

(2) Pyropus non est gemma, aut carbunculus, ut vulgo male creditur, sed genus æris ductilis, cui admixta est quarta pars auræ.

Cicero : Si considerare volumus , quæ sit in hominis natura excellentia , & dignitas , intelligemus quam sit turpe diffluere luxuria , & delicate , ac molliter vivere ; quamque honestum parcē , continenter , severē , sobrie .

Quomodo denique argumentandum est à causa finali ?
 R. Ita probabis cum Tullio , infidias Miloni struxisse Clodium , quod nempe multas ex illius interitu sibi polliceretur utilitates . Quonam igitur pacto probari potest , infidias Miloni fecisse Clodium ? Satis est quidem in illa tam audaci , tam nefaria belua docere , magnam ei causam , magnam spem in Milonis morte propositam , magnas utilitates fuisse . Itaque illud Cassianum , Cū bono fuerit , in his personis valeat : et si boni nullo emolumento impelluntur in fraudem , improbi sepe parvo . Atqui Milone intersecto Clodius hoc adsequebatur , non modo ut Praetor esset , non eo consule , quo sceleris nihil facere posset ; sed etiam ut his Consulibus praetor esset , quibus , si non adiutoribus , at conniventibus certe , sperasset , se posse rempublicam eludere in illis suis cogitatis furoribus &c.

Denique ex quatuor illis causis simul junctis commendare poteris celeberrimum templum Ierosolymitanum . Causa efficiens erit Salomon , sapientissimus idem , atque ditissimus , & alii peritissimi artifices , qui in illo elaborarunt . Causa materialis erunt pretiosi lapides , ligna cedrina , aureæ laminæ &c. Causa formalis erit ipsa structura , & pulchritudo templi . Finalis erit summi Dei cultus , in cuius honorem fuit extructum .

§. X. Effecta.

Quid sunt Effecta?

R. Effecta, seu effectus, sunt ea, quæ oriuntur ex causis. Hunc locum mirifice tractat Tullius libro de Senectute, ubi funestos voluptatis effectus ita describit.

Voluptatis incommoda ab effectis.

Accipite, optimi adolescentes, veterem orationem
 (1) Architæ Tarentini, magni in primis, & præclarri viri, quæ mihi tradita est, cum essem adolescentis
 (2) Tarenti cum Quinto Maximo. Nullam capitaliorum pestem quam voluptatem corporis, hominibus dicebat à natura datam: cuius voluptatis avidæ libidines temere, & effrenate ad potiundum incitarentur.

Hinc patriæ proditiones, hinc verum publicarum eversiones, hinc cum hostibus clandestina colloquia nasci dicebat: nullum denique scelus, nullum magnum facinus esse, ad quod suscipiendum non libido voluptatis impelleret. Stupra vero, & adulteria, & omne late flagitium nullis aliis illecebris excitari, nisi voluptate. Cumque homini sive natura, sive quis Deus, nihil mente prætabilius dedisset; huic divino muneri, ac dono nihil tam

(1) Architas Philosophus Pythagoricus vixit tempore Platonis.

(2) Tarentum urbs magnæ Gracie à Tarante Nepuni filio condita.

tam esse inimicum, quam voluptatem. Nec enim, libidine dominante, temperantiae locum esse omnino, nec in voluptatis regno virtutem posse consistere ... Quocirca nihil esse tam detestabile, tamque pestiferum quam voluptatem.

§. XI. Comparatio.

Quid est Comparatio? 50

R. Est (i) oratio, qua duo, vel plura in tertio aliquo conferuntur, quod illis commune est; ut, *Catoni licuit sequi bellum civile;* igitur & *Ciceroni licebit.* Communе est enim ambobus sequi bellum civile.

Quot sunt Comparisonum genera?

R. Tria. Primum est à majori ad minus. Secundum est à minori ad majus. Tertium est à pari.

Quomodo argumentamur à Comparisone majoris ad minus?

R. Cum contendimus, ut id, quod valet in majori, valeat etiam in minori; ut cum ait Ciceron in Antonium: *Quid faceres domi tuæ, cum alienæ tam sis insolens?* Sic etiam Terentius: *Quem fert, si parentem non fert suum?*

Ex hoc eodem loco probat Ovidius leniri posse Augustum, quod vel ipsi Dii leniantur:

Cur ego posse negem leniri Cæsaris iras,

Cum videam mites hostibus esse Deos?

Quo-

(i) *cic. in Topicis.*

Quomodo fit argumentum à Comparatione minoris ad maius?

R. Quando contendimus, ut, quod valet in minori, valeat etiam in majori ut Cicero pro Lege Manilia: *Majores nostri s̄epe, mercatoribus, ac navi- culatoribus injuriosius tractatis, bella gesserunt: vos tot Civium Romanorum milibus uno nuntio, atque uno tempore necatis, quo tandem animo esse debetis?* Huc pertinet etiam Horatianum istud Epist. 2.

Ut jugulent homines, surgunt de nocte latrones:

Ut te ipsum serves, non expurgisceris?

Quomodo fit argumentum à Comparatione parium?

R. Fit, cum contendimus, id, quod valet in una re, valere etiam debere in alia pari; ut: lex est, qui occiderit patrem, insutus in culeum dejiciatur in profluentem: ergo & qui matrem occiderit, eodem supplicio dignus est. Ita Cicerio licere sibi Syllam defendere, qui fuerat ante ab Hortensio defensus, probat Orat. pro L. Syll. *Si conjuratio patefacta per me est, tam patet Horten- sius, quam mibi. Quem quum videoas honore hoc, aucloritate, virtute, consilio præditum non dubitasse, quin innocentem Syllam defenderet: quero, cur, qui aditus ad caussam Hortensio patuerit, mihi interclusus esse debuerit?* Quero illud etiam, si me, qui defendo, reprehendendum putas esse; quid tandem existimes de his summis viris, & clarissimis civibus, quorum studio, & dignitate celebrari hoc judicium, & orna- ri, caussamque defendi bujus innocentis vides?

CAPUT SECUNDUM.

DE LOCIS EXTRINSECIS, SEU REMOTIS.

Quinam sunt Loci extrinseci?

R. Loci extrinseci, qui etiam vocantur *remoti*, & *adsumpti*, sunt ii, qui nullo modo pendent ab arte, ingenioque Oratoris, ut ex-cogitentur, quique extra rem ipsam positi sunt; quapropter ab Aristotele recte vocantur *Argumenta inartificialia*, seu *arte carentia*, non quod artis omnino sint expertia, cum potius illorum tractatio sumnum requirat artificium, sed quod non eruantur ex rebus ipsis, & ex causæ visceribus; quippe quæ foris eruntur, & auctoritate sola nituntur: itaque sunt inartificiosa, quod attinet ad Inventionem; non vero quod spectat ad usum atque tractationem.

Quot sunt Loci extrinseci?

R. Sex adsignantur à Quintiliano: Leges, seu Præjudicia, Fama, Tabulæ, Jusjurandum, Tortmenta, Testes.

Quomodo argumentandum est à Legibus, ac Præjudiciis?

R. 1. Dices, præjudicia, ac leges esse vincula reipublicæ, regnum fundamenta, justitiæ nervos, omnis æquitatis fontem, libertatis asylum, sapientiorum virorum oracula. 2. Commendabis eos,

à quibus latæ sunt leges. 3. Recensebis damna, quæ consequentur, si leges impune violentur. Ju-
vabit interdum adferre ipsa legis verba, concep-
tamque, ac solemnem formulam; v. gr. *Si quis
hominem dolo malo morti* (1) *duit, parricida est.*

Si lex tibi aduersetur, illam ita refutabis, &
infringes: Dices 1. vel antiquatam fuisse legem,
& amplius non valere. Ita Cicero pro Rabirio:
Tunc mibi etiam legis (2) *Porciæ mentionem facies?*
2. Vel legem legi oppones. 3. Vel dices standum
esse non legis litteræ, quæ nimirum occidit, sed
ipsius legislatoris menti. 4. Dices majoris cuiuspiam
utilitatis gratia licere interdum à legibus discede-
re. Sic olim cum Virgilius moriens, testamento
jusisset suum poëma comburi, supremæ huic illius
voluntati (quamquam id leges jubent) noluit ta-
men obtemperari Imperator Augustus, ut ipsemet
testatur hisce versiculis: (3)

Frangatur potius legum veneranda potestas,
Quam tot congestos noctesque, diesque labores
Hauserit una dies.

Quid est Fama seu rumor?
R. Fama, ut hic accipitur, est sermo vulgi, sine
ullo

(1) Vox obsoleta pro det.

(2) Lex Porciæ à M. Porcio lata contra eos, qui ci-
vem Romanum necabant, aut virgis cædebat.

(3) Hos tamen versiculos eruditæ plerumque Augusto
abjudicant, multisque post Virgilium mortuum annis
conscriptos, illique deinde adtributos adfirmant.

ullo auctore , ac capite dispersus ; seu , ut ait Quintilianus , est Sermo multitudinis , qui habet auctoritatem , nisi irrepserit malitia , vel nimia quedam , ut sit , credulitas .

Quomodo tractandus est locus à Fama.

R. Si tibi , caussaque tuae faveat fama , dices magnam esse vim , atque auctoritatem Famæ , cui optimus quisque tam impense studet . Dices populi vocem esse quoddam quasi oraculum , quod vix umquam fallere possit . Singuli enim decipere , ac decipi possunt ; nemo omnes , neminem omnes fefellerunt .

Contra vero , si tibi , caussaque tuae rumor aduersetur , erit amplificanda verbis Famæ levitas , atque inconstantia , quæ sœpe viris integerrimis maculas amet adspargere . Dices , ex opinione magis , quam ex veritate res æstimari solere .

Addere poteris de fama cum Virgilio Æneid . 4 .

Tam ficti pravique tenax , quam nuntia veri .

Ita Tullius pro Plancio judices obsecrat , ne disseminatis rumoribus fidem habeant : *Illud unum vos magnopere ore , atque obsecro , cum hujus , quem defendo , tum communis periculi causa , ne fictis auditionibus , ne disseminato , dispersoque sermoni fortunas innocentium subjiciendas putetis . . . Nihil est tam volucre , quam maledictum ; nihil facilius emittitur ; nihil citius excipitur ; nihil latius dissipatur .*

Quid sunt Tabulae ?

R. Nomine Tabularum intelliguntur omnia tes-

ti-

timonia scripto exarata , quibus pacta, conventa, contractus , codicilli , stipulationes , testamenta, & alia id genus continentur.

Quid est jusjurandum?

R. Est affirmatio , vel negatio rei alicujus , ritu religioso facta , & Deo Optimo Maximo in testem appellato. Sic olim Scipio apud Livium, lib. 23: *Si sciens fallo , tu me , Jupiter Opt. Max. , domum , familiam , remque meam pessimo (1) loco adficias.*

Quid sunt Tormenta , sive quæstio?

R. Sunt cruciatus , vi quorum veritas extorquetur à Reis. Valet autem plurimum locus ille ad faciendam fidem , si post quæstionem reus in facti confessione perseveret. Facit item maximopere ad probandam ejus, qui accusatur, innocentiam , si tormentis adduci non potuit , ut crimen fateretur.

Quomodo infirmari poterit locus ille?

R. Dices , periculosa esse , fallacemque confessionem , quæ tormentorum vi exprimitur ; quandoquidem compertum est , bene multos innocentes vi tormentorum , ac metu doloris ad falsa dicenda persæpe fuisse adactos. Ita Cicero pro Sylla: *Quæstiones* , inquit , *servorum* , ac *tormenta nobis accusator minitatur* , in quibus quamquam nihil periculi suspicamur , tamen illa tormenta gubernat dolor , moderatur natura cuiusque cum animi , tum corporis , regit quæsitor , slectit libido , corruptit spes , infirmat metus , ut in tantis rerum angustiis nihil veritati loci relinquatur.

Quid

(1) Leto , ita lapides antiqui.

82

Quid sunt Testes?

R. Sunt qui de re, quæ vocatur in controv-
siam, voce, vel scripto testimonium ferunt. Ac-
cedit huic testificationi majus pondus, atque au-
toritas: 1. Si testes sint oculati: 2. Si sint jura-
ti: 3. Si sint viri probi, atque integerrimi: 4. Si
sint viri illustres, ac primarii: 5. Si nulla nec spe,
nec cupiditate impulsi testimonium dicant.

Porro Testimonium potest esse vel humanum,
vel divinum. Humanum est illud, de quo supra
dictum est. Ad divinum referebantur Oracula,
seu voces Dei ipsius; Auspicia, seu Auguria,
quæ erant testimonia ex avium volatu, cantu,
pastuque duci solita; Vaticinationes, quæ erant
responia Vatum; Responsa denique Sacerdotum,
& Haruspicum, qui vel interpretabantur somnia
vel ex extorum inspectione futura conjiciebant;
unde vocabantur *conjectores*.

Quomodo infirmatur locus à Testibus?

R. Infirmitabatur locus ille, si dicas, Testes esse
homines vel infames, vel leves, ac futilis, vel
servos, domesticos, amicos, aut quomodo cum-
que suspectos. 2. Si ostendas, illos non secum
ipsis cohærere, sed pugnantia loqui. 3. Si graviores
Testes illis opponas. 4. Si conjecturis, & argu-
mentis illorum testimonii futilitatem demonstres.
5. Denique si dicas, Testes illos esse homines in-
fimè fortis, atque egentissimos, qui facile subor-
nari potuerint.

CAPUT TERTIUM.

DE SECUNDA INVENTIONIS PARTE, SEU DE
Motibus excitandis.

Oratoris munus, ac partes sunt primum, ut persuadeat, doceatque audientium animos; deinde ut eosdem moveat, inflammet, ac flectat. Diximus in prima hujusc libri parte de argumentis ad docendum, & ad fidem faciendam idoneis. Postulat nunc instituti nostri ratio, ut motuum, sive affectuum concitandorum fontes aperiamus; dicamusque qua ratione faces, ac stimuli sint auditorum animis subjiciendi, quod est in Oratore præcipuum. Siquidem homines affectu magis, quam ratione ducuntur, & quod adprobant bonum, non semper amplectuntur, exemplo Medæ illius Ovidianæ (1):

... Video meliora, proboque:
Deteriora sequor ...

Sed antequam affectus omnes sigillatim persequamur, pauca quadam, ut fit, de illorum natura, numeroque præmittamus.

Quid est Affectus?

R. Est animæ sentientis ex opinione boni, vel
ma-

(1) *Metam. Lib. 7.*

imali nata commotio. Vel, ut clarius dicam, est quidam animi impetus, quo impellimur vehementius ad aliquid vel adpetendum, vel averſandum.

Quot sunt Adfectus?

R. Sunt, qui cum Stoicis quatuor tantum statuunt adfectus; duos circa bonum, nempe *spem*, & *gaudium*: & duos circa malum, scilicet *tristiam* & *metum*. Quatuor hosce motus eleganter expressit Virgilius Æneid. 6. cum ait:

Hinc metuunt, cupiuntque, dolent, gaudentque.

Philosophi vero longe plures statuunt adfectus, de quibus ita dicemus, ut primo illorum definitiōnem adferamus, deinde, quomodo sint excitandi, quam accuratissime præcipiamus.

§. I. De Amore, & Odio.

Vid est Amor?

R. Est adfectus, quo alicui bene volumus, eique benefacimus, non nostra, sed illius cauſa. Ubi vides tres omnino esse germani amoris conditiones, ac dotes. 1. Est, ut ei, quem amamus, optemus bona, vel saltem quæ bona esse arbitramur. 2. Conditio est, ut quæ bona judicamus, non optemus illi dumtaxat, sed etiam pro virili parte procuremus. 3. Conditio est, ut ita simus animati non propter propriam utilitatem, sed illius cauſa, quem diligimus. Nam, ut ait (1) Cicerο

(1) *De Natura Deorum.*

(1)

cero, si ad fructum nostrum referemus, non ad illius
comoda, quem diligimus; non erit ista amicitia,
sed mercatura quædam utilitatum suarum.

Quid differt Amor ab Amicitia?

R. Differt, quod sit verus amor, et si qui amat
non redametur; in amicitia vero requiritur amor
mutuus. Unde Aristoteles rogatus quid esset ami-
cus, pulchre respondit: *Anima una in duobus habi-
tans corporibus.*

Quo pacto conciliandus est amor?

R. Amoris conciliandi caussæ, ac viæ præcipuæ
sunt: 1. Excellens quædam, & rara virtus. Ita
Ilioneus Trojanorum Orator præclaram Æneæ vir-
tutem collaudando, Didonem illi conciliare cona-
tur, Æneid. 1.

Rex erat Æneas nobis, quo justior alter
Nec pietate fuit, nec bello major, & armis.

2. Utilitas, & collata beneficia. Ita Cicero Mi-
lioni benevolos mirifice facit judices ab ejus in pa-
triam beneficentia: *Hiccine vir patriæ natus usquam
nisi in patria morietur? &c.* Sic etiam ventorum Rex
Æolus, commemoratis Junonis erga se beneficiis,
suum erga illam gratum, ac memorem animum
testatur; (1)

Tu mihi quodcumq. hoc regni, tu sceptræ Jovemque
Concilias, tu das epulis accumbere Divum,
Nimborumque facis, tempestatumque potentem.

3. Nul-

3. Nulla re magis comparatur amor , quam amore mutuo , ut monet pervulgata illa Senecæ vox : *Si vis amari , ama.*

4. Denique conciliatur amor oris , ac corporis dignitate ; si sit cum virtute conjuncta. Hinc apud Virgilium Lib. 5.

Tutatur favor Euryalum , lacrimæque decoræ,
Gratior & pulchro veniens in corpore virtus.

Quid est Odium ?

R. Est affectus animi averfantis id , quod malum esse putatur.

Quanam arte concitandum erit Odium ?

R. Ex iis , quæ de amore diximus , facile cuivis patebunt Odii fontes ; quod erit à contraria capitibus excitandum , nimurum ab insignibus vitiis , ab improbitate , superbiaque , ab illatis injuriis. Cujus rei mirificum habes exemplum apud Ciceronem in Philip. 3. , ubi , ut Romanorum animos in Antonium conciteret , ita ait : *Quid hic faciat , si potuerit , iratus , qui , cum successere nemini posset , omnibus bonis fuerit inimicus ? Quid hic victor non audebit , qui , nullam adeptus victoram , tanta scelerata post Cæsaris interitum fecerit ; refertam domum ejus exhauserit ; hortos compilarit ; ad se ex his omnia ornamenta transfulerit ; cædis , & incendiorum causam quæsierit ex funere ; duobus , aut tribus S. C. bene , & è rep. factis , reliquæ res ad lucrum , prædamque revocaverit ; vendiderit immunitates ; civitates liberaverit ; provincias universas ex imperii populi Rom. jure sustulerit ; exsules reduxerit ; falsas le-*

ges c. Cæsar's nomine, & falsa decreta in æs incidentia, & in Capitolio figenda curaverit; earumque rerum omnium domesticum mercatum instituerit; populo Rom. leges imposuerit; armis, & præsidiis populum, & Magistratus foro excluderit; senatum stiparit armatis; armatos in cella Concordiae, cum Senatum haberet, incluserit; ad legiones Brundusium cucurrerit; ex his optime sentientes Centuriones jugulaverit; cum exercitu Romam sit ad interitum nostrum, & ad disperditionem urbis venire conatus?

S. II. De Metu, Spe, & Audacia.

Quid est Metus, sive Timor?

R. Est perturbatio nata ex opinione mali impendentis.

Quænam sunt artes, & industrie concitandi metus?

R. Tres sunt potissimum. Prima est, si denuncietur malum aliquod magnum, ac grave, ut bellum, pestilentia, pauperies, infamia, infelix æternitas. 2. Si ostendatur mali vicinitas, imminentisque periculum: neque enim solent homines metuere vel ipsam mortem, si longe remotam arbitrentur; at illius horrore concutiuntur, ubi urget morbus, pestilentia, vel naufragium: (1)

Præsentemque viris intentant omnia mortem.

Hac arte mirabiliter, suo more, utitur Tullius
in

(1) Aenejd. i.

in 2. Catilin. ubi funesta Catilinæ consilia , & im-
pendentes urbi calamitates , ita describit : *Videor
mibi hanc urbem videre , lucem orbis terrarum , atque
arcem omnium gentium subito uno incendio coincidentem .
Cerno animo sepultam patriam , miseris , atque inse-
pultos acervos civium . Versatur mibi ante oculos ad-
spectus (1) Cetbegi in vestra cœde bacchantis . Quapropter
de summa salute vestra , Populique Rom. de vestris
conjugibus , ac liberis , de fanis , ac templis , de li-
bertate , ac salute Italie , deque universa republica
decernite diligenter , ut institutis , ac fortiter .*

Sic etiam Hanno apud Liv. Lib. 21. maximum Carthaginensibus metum injicit , plurimas imminere calamitates ostendens , nisi Hannibalem ab exercitu abducant : *Juvenem flagrantem cupidine regni ,
viamque unam ad id cernentem , si ex bellis bella se-
rendo , succinetus armis , legionibusque vivat , velut
materiam igni præbentes , ad exercitus misistis . Atuistis ergo hoc incendium , quo nunc ardetis . Saguntum
vestri circumsedent exercitus , unde arcentur fædere ;
mox Carthaginem circumsedebunt Romanæ legiones , du-
cibus iisdem Diis , per quos priore bello rupia fædera-
sunt ulti . Utrum bustem , an vos , an fortunam utriusque
populi ignoratis ? . . . Eægates insulas , Erycemque ante
oculos proponite ; quæ terra , marique per quatuor , &
viginti annos passi sitis . Nec puer hic dux erat , sed
pater ipse Hamilcar , Mars alter , ut isti volunt . Sed
Tarento tum in Italia non abstinueramus ex fædere ,*

(1) Cetbegus unus è principibus conjurationis Catilinariae.

sicut nunc Sagunto non abstinemus. Vicerunt ergo Diū, hominesque; & id, de quo verbis ambigebatur, uter populus fœdus rupisset, eventus belli, velut aequus iudex, unde jus stabat, ei victoriam dedit. Carthaginii nunc Hannibal vineas, turresque admovevit; Carthaginis mœnia quatit ariete. Sagunti ruinæ (falsus utinam vates sim!) nostris capitibus incident; suscepimusque cum Saguntinis bellum, habendum cum Romanis est.

Eadem arte Æneas Anchisem patrem humeris gestans, apud Virgilium Lib. 2. timorem suum sic exponit ab imminentis calamitatis magnitudine.

Succedoque oneri: dextræ se parvus Iulus
Implicituit, sequiturque patrem non passibus æquis:
Pone subit conjux: ferimur per opaca locorum:
Et me, quem dudum non ulla injecta movebant
Tela, neque adverso glomerati ex agmine Graji,
Nunc omnes terrent auræ, sonus excitat omnis
Suspensum, & pariter comitique, oneriisque timentem.

3. Concitandi metus industria, & ars hæc est, si proponatur malum, non publicum dumtaxat, & commune, sed privatum, & proprium. Solent enim nos privata multo magis tangere, & acriori doloris sensu ferire, quam publica: etsi homines vulgo videri malint publico potius dolore moveri, quam suo.

Hoc probe intellexerat olim nobilis ille Græcus histrio, nomine Polus, qui Athenis acturus fabulam Sophoclis, cum repræsentandus esset dolor

Electræ gestantis cineres Orestis , clanculum eruit è sepulcro cineres , ossaque filii , quem amaverat unice , urnamque detulit in scenam , & eum lugere videretur aliena mala , desiebat sua. Ita A. Gellius Lib. 7.

Quid est Spes?

R. Est gaudium ex opinione imminentis boni.

Quenam sunt incitamenta animum ad Spem erigentia?

R. Hæc duo numerantur : 1. Honestas , & magnitudo boni. 2. Præsidia certa ad illud comparandum , qualia sunt opes , vires , industria , prudenteria , amici , adversariorum imbecillitas , & favor divinus. Hinc Tullius Romanos ad certam victoriæ spem excitat sane luculenter 3. Catilin. *Instruite nunc , Quirites , contra has tam præclaras Catilinæ copias vestra præsidia , vestrosque exercitus ; & primum gladiatori illi confecto , & saucio Consules , Imperatoresque vestros opponite , deinde contra illam naufragorum ejectam , ac debilitatem manum florem totius Italie , & robur educite. Hinc etiam Æneas suorum animos mirum in modum erigit , & bene sperare jubet , Æneid. 1.*

O passi graviora , dabit Deus his quoque finem.
Vos & Scyllæam rabiem , penitusque sonantes
(1) Acceditis scopulos , vos & Cyclopea faxa
Experti ; revocate animos , moestumque timorem
Mittite ; forsitan & hæc olim meminisse juvabit.
Per varios casus , per tot discrimina rerum

Tene-

(1) Acceditis pro accessistis per syncopen.

Tendimus in Latium; sedes ubi fata quietas
Ostendunt; illic fas regna resurgere Troje.
Durate, & vosmet rebus servate secundis.

Ad Spem pertinet Audacia, seu confidentia,
quæ est affectus quidam animi adversus futurum
malum, quamvis arduum, ac difficile, quod ta-
men vinci possit, consurgentis.

Quomodo concitatur Audacia?

R. Iisdem ferme artibus, quibus Spes. Ita mag-
nanimus Hannibal, trajecto Rhodano, Italiam
recta petens, suos milites hortatur, apud Livium
Decade 3., ut obstructarum nivibus Alpium dif-
ficultates superent, Romanorumque vires contem-
nant: *Quid aliud Alpes esse creditis, quam montium
altitudines? Fingite aliores Pyrenæis: an terras ali-
quas Cœlum contingere, & inexpugnabiles humano ge-
neri esse creditis? & alio loco: cum eo nimirum hoste-
res est nobis, qui nec bonam, nec malam ferre for-
tunam potest; seu vicit, ferociter instat vicit: seu
victus est, instaurat cum vicitis certamen.*

Hac eadem ratione audax Turnus suorum Latini-
norū animos ad pugnam accendit, Aeneid. 10.

In manibus Mars ipse, viri; nunc conjugis esto
Quique suæ, tectiq. memor: nunc magna referto
Facta patrum, laudesq.: ultro occurramus ad uadim,
Dum trepidi, egredisque labant vestigia prima.
Audentes fortuna juvat.

Multum etiam addit fiduciæ persuasio de favore
divino. Hinc illa Tolumnii Auguris audacia, Aen. 12.

Tum

Tum vero augurium Rutuli clamore salutant;
 Expediuntque manus; primusque Tolumnius augur,
 Hoc erat, hoc votis, inquit, quod s̄aþe petivi:
 Accipio, agnoscoque Deos: me me duce ferrum
 Corripite, ô Rutuli...

§. III. De Misericordia.

Quid est Misericordia?

R. Est dolor animi, & ægritudo quædam
 ex malo alterius, præsertim immerito la-
 borantis. In hoc excitando commiserationis adfec-
 tu triumphare solet magni Oratoris industria: si-
 quidem, ut vulgo dicitur, *Lacrimæ auditorum sunt
 laus Oratoris vel maxima.*

*Quænam sunt artes ad misericordiam concitandam
 idoneæ?*

R. Variæ, ac multiplices sunt artes. Prima est,
 si qui malum patitur, eo plane indignus esse di-
 catur. Unde ad ciendam misericordiam valet hoc
 Virgilii: (1)

Nec te tua plurima, Panthu,
 Labentem pietas, nec Apoilinis insula texit.

2. Est, si de patria, vel de nobis privatim be-
 ne meritus fuisse ostendatur. Hoc artificio mire
 usus est senior Horatius apud Livium, ut filium,
 ob interfæctam sororem parricidii reum, ab im-
 minenti morte liberaret.

Orā-

(1) *Hæneid.* 2.

*Oratio P. Horatii ad populum pro Filio parricidii reo.
Livius Lib. I.*

Huncine, quem modo decoratum, ovantemque victoria incidentem vidistis, Quirites, eum sub furca viratum inter verbera, & cruciatus videre potestis? Quod vix Albanorum oculi tam deforme spectaculum ferre possent. I lictor, colliga manus, quæ paullo ante armatae Imperium populo Romano pepererunt. I, caput obube liberatoris hujus urbis: Arbori infelici suspende: Verbera, vel intra (1) Pomærium, modo inter illa pila, & spolia hostium: vel extra Pomærium, modo inter sepultra curiatiōrum. Quo enim ducere hunc juvenem potestis, ubi non sua decora eum à tanta fæditate supplicii vindicent?

3. Ars est, si calamitatis magnitudo, vel diuturnitas, ceteraque hujusmodi circumstantiae luculenter exponantur.

4. Ars hæc est, si tristia quædam recentis miseriæ signa, monumentaque ob oculos auditorum ponantur, ut cruentæ vestes, vel ipsum mortui cadaver, aut imago. Nam ut monet Horatius ad Pisones:

Segnius irritant animos demissa per aures,
Quam quæ sunt oculis subiecta fidelibus...

Sic M. Antonius, qui postea Triumvir fuit, prolata Julii Cæsaris veste pugionibus, ac gladiis
per-

(1) Hisp. la Ronda: el espacio que hai entre la muralla, y las casas.

perforata , sanguineque cruentata , Romanam plebem ita accedit , ut ad conjuratorum ædes inflammandas è vestigio provolaverit . Sic olim summus ille orator Antonius , cum defenderet Aquilium , in causa peroranda tunicam ejus diloricavit , ac discidit è pectore , & adversas ienies cicatrices judicibus ostendit .

Sic etiam Æneam flectere Dido conatur apud Ovidium in Heroide , hac lamentabili sui imagine ac pictura :

Adspicias utinam , quæ sit scribentis imago !

Scribimus , & gremio Troicus ensis adest .

Perque genas lacrimæ strictum labuntur in ensim ,

Qui jam pro lacrimis sanguine tinctus erit .

§. IV. De Ira , & Indignatione.

Quid est Ira ?

R. Dicere possem cum Horatio : *Ira brevis furor est . Sed malo cum Aristotele sic illam definire : Ira est sui , propter contemptum , ulciscendi cupiditas cum dolore conjuncta . Unde non maxime differt ab odio , quod est Ira quedam inventata .*

Quomodo excitatur , & incenditur Ira ?

R. Accenditur commemoratione illatæ injuriæ , si præsertim injuria sit cum contemptu conjuncta . Hinc nimirum apud Virgilium Æneidos 1. tanto-pere effervescit Junonis ira contra Trojanos , ob spretam à Paride Trojano formam suam , &

Hebem filiam Ganymedi Trojano postpositam :

— Manet alta mente reposum
Judicium Paridis, spretæque injuria formæ,
Et genus invisum, & rapti Ganymedis honores.

Et rursum in eodem Libro suam iram sic ex-
fuscat eadem Juno :

Ast ego, quæ Divum incedo Regina, Jovisque
Et soror, & conjux, una cum gente tot annos
Bella gero. Et quisquam numen Junonis adoret
Præterea? aut supplex aris imponat honorem?

Quo quis vero est gloriæ adpetentior, vel dig-
nitate illustrior, hoc ob sui contemptum vehe-
mentius solet irasci. Cujus rei memorabile in pri-
mis est exemplum C. Marcii Coriolani; cuius
præcipue opera, & virtute Corioli Volscorum op-
pidum captum fuerat; qui cum paullo post à Po-
pulo Romano, quod se plebi infensum, & Tri-
bunitiæ potestatis hostem accerrimum præbuisset,
expulsus fuisset ab urbe, in Volscos exsulatum
abiit, minitans patriæ, ut ait Livius Lib. 2., hosti-
lesque jam tum spiritus gerens; & paullo post
eorum Dux factus bellum intulit Romanis, & ur-
bem ipsam obsidione cinxit; à qua Veturiæ matris
precibus, lacrimisque vix tandem dimoveri potuit.

Quid est Indignatio?

R. Est dolor perceptus ob secundas res, bona-
que alterius, qui hac felicitate judicatur indignus;
ut apud Maronem Eclog. 1. Im-

Impius hæc tam culta novalia miles habebit?
Barbarus has segetes?

Ejusmodi est etiam illud Eclog. 8.

Mopso Nisa datur: quid non speremus amantes?
Jungentur jam (1) gryphes equis, & eoque sequenti
Cum canibus timidi venient ad pocula damæ.

Quomodo ab invidia differt indignatio?

R. Hoc differt, quod indignatio sit tantum in indignos, eo quod fruuntur bono, ut vel ex ipso nomine liquet. Unde indignatio præsertim suscipitur ab his, qui sunt viri probi, & honoris cupidi; quia boni ferunt indigne malos florere: & honoris studiosi indignantur, immerentes anteferri sibi. Invidia vero est erga bonos, & sua felicitate dignos.

Quomodo concitatur indignatio?

R. Excitatur dupli modo. 1. Si vitæ prioris frides, & vilitas cum præsentis temporis opibus, potentia, & adrogantia præsertim conferantur. 2. Si hominis, in quem indignantur, vitia cum viri, cui antefertur, virtutibus comparentur. Ex primo capite Tullius indignationem ita movet in Vatinium: *Atque illud tenebricofissimum tempus ineuntis etatis tuæ patior latere...* Deinde commemorat, ut ho-

(1) *Gryphes genus ferarum omnino fabulosum, cum alis, & capite aquilæ, & reliquo corpore leonino, vulgo Grifo.*

homo vilis, & obscurus paullatim ad honores accesserit; tandemque illa subjungit: *Te cognati respiciunt, tribules execrantur, vicini metuunt, ad fines erubescunt, strumæ denique ab ore improbo demigrarunt, & aliis jam se locis collocarunt.* Quasi nempe adeo sit impurus, ut vel ipsæ strumæ foedum hominem aversentur.

Similiter Horatius indignationem concitat adversus Menam Pompeji Magni libertum in hac Oda cedro linenda:

Licet superbus (1) ambules pecunia,
Fortuna non mutat genus.
Videsne, sacram (2) metiente te viam
Cum bis ter ulnarum toga,
Ut ora vertat huc & huc euntium
Liberrima indignatio?
Sectus flagellis hic (3) triumviralibus,
Præconis ad fastidium,
Arat Falerni mille fundi jugera,
Et (4) Appiam mannis terit:
Sedilibusque magnus in primis eques,
Othonem contempto, sedet.

Ex

(1) *Menas*, cum ab hero Pompejo defecisset ad *Augustum*, ab illo *Tribunus militum fuit creatus*. (2) *Via sacra* sic dicta, quod ad *Jovis templum*, & *Capitolium recta* duceret. (3) *Judicia de servis*, ac *furiibus exercebant ires judices*, qui *triumviri capitales dicebantur*. (4) *Via Appia Roma Brundusium usque perlungebat*, non men traxerat à Claudio *Appio Cecco*, qui eam miniverat.

Ex secundo capite vehementer indignatur Ajax
apud Ovidium, quod Ulysses secum ausit de Achil-
lis armis contendere:

... Agimus, proh Jupiter, inquit,
Ante rates caussam, & mecum confertur Ulysses?
Præmia magna peti fateor: sed demit honorem
Æmulus Ajaci. Non est tenuisse superbum,
(Sit licet hoc ingens) quidquid speravit Ulysses.

§. V. De Manuetudine.

Quid est mansuetudo? R. Mansuetudo, seu lenitas, ac clemen-
tia, est motus oppositus iræ: nequé aliter
definitur, quam iræ remissio, atque mitigatione.

Quænam est ars conciliandæ clementiæ?
R. Mitigabitur ira, & conciliabitur mansuetu-
do, primo ingenua quadam culpæ confessione, as-
dolore. Ita Cicero Cæsarem, iratissimum licet, ta-
men Ligario placavit: *Ad judicem sic agi solet; sed*
ego ad patrem loquor: erravi, temere feci, pænitet;
ad clementiam tuam consugio; delicti veniam peto; ut
ignoscas, ero: si nemo impetravit, adroganter; si
plurimi, tu idem ser opem, qui spem dedisti.

2. Facit ad placandam iram humilitas, & sup-
plicis animi demissio, præsertim apud hostem
magnanimum. Ut enim pulchre ait Ovid. L.3. Trist.

Corpora magnanimo satis est prostrasse leoni,
Pugna suum finem dum jacet hostis, habet.

Addere poteris cum Virgilio tritum illud Lib. 6.
Ros.

... Romane, memento
Parcere subjectis, & debellare superbos.

Ad deliniendam iram maxime sunt adhibendi, qui minus habent roboris, & quos de vi inferenda cogitare nulla est suspicio, cujusmodi sunt pueri, feminæ, senes, sacrorum antistites. Romana historia testatur, Sabinarum interventu, Romulum inter, & Tatium fœdus iustum fuisse. Item Volumnia, & Veturia Martium Coriolanum, patriæ funestum bellum inferentem, à noxio proposito dimoverunt.

4. Facit plurimum ad iram moliendam, si scias, & captes molles aditus, & commoda fandi tempora; quale est tempus convivii, ludi, fausti aliquis successus, victoriæ, festivitatis, ac lætitiae publicæ; quo tempore solent homines ad mansuetudinem esse propensiores.

5. Si prudenter ostendas, quantum præstet mansuetudo cupiditati vindictæ

6. Denique valet plurimum ad clementiam, si dicas, qui peccavit, non dedita opera, non do-lo malo peccasse, nec id egisse, ut eum contemeret, quem habet iratum; sed vel incautum, vel errore humano deceptum, vel necessitate adactum peccavisse. Vide qua dexteritate locum hunc tractet Tullius ad Cæsarem M. Marcelllo placandum: *Atque hoc C. Cæsar is judicium, P. C., quam late patet, attendite. Omnes enim, qui ad illa arma fato suimus, nescio quo, reipublicæ misero, funestoque compulsi, et si aliqua culpa tenemur erroris humani, sceleræ certe liberati sumus. Nam cum M. Murcellum, deprecantibus verbis, res publicæ conservavit, memet mibi,*

& item reipublicæ, nullo deprecante, reliquos amplissimos viros & sibi ipsis, & patriæ reddidit: quorum & frequentiam, & dignitatem hoc ipso in confessu videtis. Non illos hostes induxit in curiam, sed judicavit à plerisque ignorantie potius, & falso, atque intani metu, quam cupiditate, aut crudelitate civile bellum esse suscepimus.

§. VI. De Æmulatione.

Quid est Æmulation?

R. Est dolor ex aliena felicitate susceptus, non quod illi contigerit, sed quod nos illa careamus. Hinc liquet, Æmulationem esse in laude ponendam, & ad perdiscendum bonas artes plurimum valere. Sunt enim Æmulationi obnoxia, quæ maxime præclara, ut virtus, honores, opes, doctrina, gloria &c.

Quid interest Æmulationem inter, & Invidiam?

R. Æmulationem bonam esse, laudabilem, & honestam, quia nos excitat, ut ipsi quoque bona consequamur. Contra vero Invidia vitiosa est, turpisque, quia id agit ne alter bonis potiatur, ut ait Horatius:

Invidus alterius rebus macrescit opimis.

Quomodo excitari potest Æmulation?

R. Excitatur majorum exemplo, nominis gloria, & propositis illustrium virorum egregiis facinoribus.

Ita magnus ille Alexander, cum ad Achillis tumulum adstitisset, ejus gloriam, & felicitatem simulatus, O fortunate, inquit, adolescens, qui tue

virtutis Homerum præconem inveneris! Et ille historiorum princeps Thucydides, adhuc adolescentulus, cum forte suam historiam Herodotus legeret, ita gloriæ stimulis agebatur, ut lacrimas tenere non posset. Quo animadverso, Herodotus ejus patri dixit: *Nec tu sane beatus es, qui filium habeas sic avidum gloriæ, & laudis appetentem.*

Concluditur doctrina de Adfectibus generali præcepto.

Hactenus de Adfectibus dictum est; in quibus illud generatim est observandum, quod apud Ciceronem (1) monet Antonius: *Ut omnes motus, quos Orator adhibere volet judici, in ipso Oratore impressi, atque iniusti esse videantur. Neque enim facile est perficere, ut irascatur, cui tu velis, judex, si tu ipse id lente ferre videare: neque ut oderit eum, quem tu velis, nisi te ipsum flagrantem odio ante viderit; neque ad misericordiam adducetur, nisi ei tu signa doloris tui, verbis, sententiis, voce, vultu, collacrimatione denique ostenderis. Ut enim nulla materies tam facilis ad exar- descendum est, quæ, nisi admoto igne, ignem concipere possit; sic nulla est mens tam ad comprehendendam vim Oratoris parata, quæ possit incendi, nisi inflammatus ipse ad eam, & ardens accesseris.*

Optime igitur monet Horatius in Arte Poët.

... Si vis me flere, dolendum est
Primum ipsi tibi: tunc tua me infortunia lædent.

AR-

(1) Lib. 2. Orat.

A R T I S R H E T O R I C Æ

LIBER TERTIUS.



D E D I S P O S I T I O N E.

59

Quid est Dispositio?

R. Dispositio definitur à Cicerone, *Rerum inventarum in ordinem distributio*.

Quænam est Dispositionis utilitas?

R. Non minus necessaria est Dispositio ad fidem faciendam, & ad motus excitandos, quam instructio exercitus ad pugnam, ac victoriam; quam in humano corpore conformatio membrorum ad gratiam, & venustatem; quam in ædificio lapidum, cémentique apta compositio ad ædium opportunitatem, & elegantiam. Unde merito præcipit Horatius in Arte Poëtica.

Singula quæque locum teneant fortita decenter.

Sane ordo ubi adest, res audiuntur libentius,

Q

au-

audita intelliguntur facilius , & intellecta diutius inhærent. Si vero negligatur dispositio , fit nimis monstrum illud ex variis animantibus conflatum, quod artis initio scite pingit idem Horatius. Fit quod eodem loco reprehenditur:

Velut ægri somnia , vanæ
Fingentur species , ut nec pes , nec caput uni
Reddatur formæ ...

Quin nullum mihi videtur certius argumentum inscitiæ , hebetisque , ac pinguis ingenii , quam cum ita incondita est oratio , ita perturbata , nihil ut sit primum , nihil secundum. Contra vero nullum majus indicium artis , & industriae , quam ordo. Quamobrem cum hactenus actum sit de Elocutione , & de Inventione , in quibus opus est in primis lepore , atque ingenio ; deinceps videndum de Dispositione ; in qua una magis elucet Oratoris judicium , atque prudentia.

*Quisnam ordo servandus est in orationis dispositio-
ne , seu quænam sunt orationis partes ?*

R. Orationis partes vulgo quatuor adsignantur: Exordium , Narratio , Confirmatio , seu Contentio , & Peroratio.

Hæc artificiosa dispositio videtur omnino naturæ consentanea. Satis enim novimus , vel ipsa ducce natura , ubi quidpiam volumus impetrare , i. conciliando esse animos eorum , quibuscum agimus ; & hoc est Exordii munus : deinde exponendum esse illud , quod petimus , & hoc est Narratio-
nis.

nis. 3. adferendas esse rationes , quibus ostendatur, illud concedendum nobis esse , & hoc efficit Confirmatio ; denique preces addendas , aut alios motus adhibendos , quibus impelli vehementius auditorum animi possint , & hoc Peroratione consequimur.

Sunt qui non quatuor dumtaxat , sed sex omnino velint esse partes orationis , nempe Exordium, Divisionem , Narrationem , Confirmationem, Confutationem , & Perorationem ; quas etiam ajunt indicari peryagatissimo isthoc versiculo :

Exorsus , narro , seco , firmo , refuto , peroro.

Verum , si recte res æstimare velimus , Partitio cum Propositione revocatur ad Exordium : Confutatio vero redit ad Confirmationem. Unde liquet , quatuor tantum esse statuendas orationis partes , quarum duæ valent ad faciendam fidem , scilicet Narratio , & Confirmatio : reliquæ vero faciunt ad motus excitandos , videlicet Exordium , & Peroratio. Nunc vero de partibus orationis singulatum videamus.

CAPUT PRIMUM.

DE EXORDIO.

Quid est Exordium ?
R. Exordium definitur à Tullio : Pars ora-

tionis, auditorum animos idoneè comparans ad reti-
quam dictionem. Unde quod in humano corpore
caput est, quod in ædibus vestibulum, hoc est
Exordium in oratione. Atque adeo præcipua qua-
dam cura, diligentiaque præ ceteris orationis par-
tibus est elaborandum, naturæ ipsius instar, quæ
in fingendo, atque ornando capite potissimum de-
sudare consuevit. Unde etiam Exordium *difficilli-
ma pars orationis* vocatur à Tullio.

Undenam sumpta est Exordii vox?

R. Est Metaphora à textoribus sumpta, qui pro-
prie telam ordiri dicuntur, cum certa quadam lege
fila collocant, & ordine illa componunt.

§. I. De variis Exordiorum generibus.

Quotuplex est Exordium?

R. Duplex. Aliud est justum, ac legitimum, quod etiam temperatum appellatur: aliud est vehemens, & abruptum, sive ex abrupto.

Quid est Exordium justum, ac legitimum?

R. Illud est, quo auditorum animi artificiosa
quadam verborum conciliatione præparantur.

Quid est exordium ex abrupto?

R. Illud est, quo Orator, quasi quodam ab-
reptus impetu, auditores repentina, & inopinato
motu percellit. Tale est celebratissimum illud Ci-
ceronis Exordium in Catilinam: *Quousque tandem
abutere, Catilina, patientia nostra &c.*

Quomodo fit Exordium ex abrupto?

R. Fit primo per licentiam, seu per liberiorem quendam loquendi modum. Sicut apud Livium Lib. 23. Mutius Scævola deprehensus in Porsenæ castris, ita illum adloquitur ex abrupto : *Romanus sum civis : C. Mutilus vocant. Hostis hostem occidere volui ; nec ad mortem minus animi est, quam ad necem fuit. Et facere, & pati fortia Romanum est. Nec unus ego in te hos animos gessi. Longus post me ordo est idem petentium decus. Preinde in hoc disertamen, si juvat, accingere, ut in singulas horas capite dimices tuo: ferrum, hostemque in vestibulo habes Regiae. Hoc tibi juventus Romana bellum indicimus. Nullam aciem, nullum prælium timueris : unde tibi, & cum singulis res erit.*

2. Fit per indignationem, & increpationem, ut cum apud Livium Lib. 2. c. 21. Veturia filium (1) Coriolanum sic adloquitur : *Sine, priusquam complexum accipio, sciam, ad hostem ; an ad filium venerim ; captiva, mater ne in castris tuis sim. In hoc me longa vita, & infelix senecta traxit, ut exulem te, deinde hostem viderem? Potuisti populari hanc terram, quæ te genuit, atque aluit? Non tibi, quamvis infesto animo, & minaci perveneras, ingredienti fines ira cecidit? Non, cum in conspectu Roma fuit, succurrit: Intra ista mœnia domus, ac penates mei sunt, mater, conjux, liberique? Ergo, ego nisi peperisse, Roma non oppugnaretur? Nisi filium haberem, libera in libera patria mortua essem? Quan-*

(1) *Martius Coriolanus plebis odio in exsiliu accitus, patriæ bellum intulit.*

Quandonam usurpandum est Exordium ex abrupto

R. Usurpatur potissimum vel in summa aliqua gratulatione, & lætitia, vel in summa quapiam offensione, aut indignatione: quibus scilicet omnibus Orator extra se rapi videtur quodammodo.

60

§. II. De virtutibus, ac vitiis Exordii.

QUÆ sunt Exordii dotes, ac virtutes?

R. Quatuor vulgo recensentur: *Proprietas, cura, verecundia, brevitas.*

In quo posita est proprietas Exordii?

R. In eo posita est, 1. ut Exordium sit cum reliqua oratione conjunctum, tamquam caput cum corpore. 2. Ut sit ex re quasi natum, & ex ipsis causis visceribus ita depromptum, ut ex illius natura quodammodo videatur efflorescere. Contra vero vitiosum erit, si sit vulgare, ac commune, hoc est, si causis aliis, & fortasse etiam contrariis, possit accommodari: cujusmodi Exordia lepide comparantur ephippio, quod equis bene multis accommodaretur, vel gladio Delphico, qui ad hunc modum factus fuit, ut eodem & sacras mac-tarent victimas, & suppicio nocentes ad ficerent.

2. Vitiolum erit Exordium, si sit commutabile, hoc est, si leviter mutatum, ab adversario possit usurpari. Si sit procul accersitum, longiusque petitum, vel si nihil ad rem pertineat. Quæ Exordia similiter se habent ac

Humano capiti cervicem pictor equinam
Jungere si velit.

Qua-

Quale etiam fuit Exordium inepti illius caufidi-ci, qui de lite inter duos vicinos acturus, Exordium petivit ab Adamo, vixque ad diluvii tem-pora tandem pervenit.

In quo posita est Exordii cura?

R. In eo posita est, ut Exordium sit plenum dignitatis, sit accuratum, & acutum, sit aptum verbis, & instructum sententiis, & quod periti solent Architecti, *vestibula*, *aditusque ad cauſam faciat illustres*, inquit Tullius. Prima quippe Orato-ris commendatio proficiscitur ab Exordio: quod si negligentius tractatum fuerit, reliqua omnia fas-tidiet, & nauseabit auditor. Ut enim optime mo-net Fabius, pessimus sane videtur gubernator ille, qui è portu solvens, statim ad scopulos navem adpellit. Caveat tamen Orator, ne, quod sepe contingit, Exordii nimis picti, & nimis artificio-si splendore, ac concinnitate præstigiarum, ac fraudis suspicionem auditoribus præbeat.

In quo consistit Exordii verecundia?

R. In eo consistit, quod Orator dicere incipiens, præ se ferat ingenuum illum pudorem, quem in Oratore summo L. Crasso, tantopere laudabat Cicero: *Fuit enim*, inquit, *in L. Crasso pudor qui-dam*, qui non modo non obesset ejus orationi, sed etiam probitatis commendatione prodesset. Et ipse etiam L. Crassus de se sic confitetur Lib. i. de Oratore: *In principiis dicendi, tota mente, atque omnibus ar-tibus contremisco*. Sciebat enim summus ille dicen-di artifex, & doctor, offendit solere auditorum animos, si Orator velut exultans, sibiique præfi-dens, ad dicendum accedat.

In quo posita est brevitas Exordii?

R. In eo posita est, ut Exordium reliquæ orationis magnitudini sit accommodatum, & ut inani verborum circuitione non producatur longius, quam par sit. Neque enim profecto cubitali Pygmæi corpori caput giganteum, aut humili tugurio valvæ prægrandes, ingensque vestibulum adfigi debent. Quod si fiat, bellissime fane quadrabit inenormia id genus proœmia facetum illud Diogenis dictum ad (1) Myndios, qui suo oppidulo grandes, & magnificas fores adfixerant: *Viri Myndii, portas claudie, ne urbs exeat.*

Nolim tamen orationi nullum jungatur Exordium, ut olim in Areopago fieri solitum accepimus, ubi dicebant Oratores, *sine Exordio, sine affectibus, sine epilogo*, inquit Julius Pollux, & ut etiam à Xenophante factitatum legimus, qui sic exorditur: *Darius, & Parisatis duos habuere filios.*

Nolim etiam orationi, ceteroqui longulæ, brevissimum, ut nonnulli solent, adfigatur Exordium: neque enim ingentem Basilicam decent exiguae fores; aut giganteo corpori pygmæi caput, vel ingenti colosso globulus imponitur.

§. III. De variis Exordiorum fontibus.

VARII sunt fontes, unde derivari solet Exordium justum, ac legitimum. Nos hic præcipuos indicabimus.

i. Exor-

(1) *Myndus oppidulum Cariæ in Asia minori.*

1. Exordium recte ducitur ab adjunctis personæ, rei, loci, ac temporis : atque hic erat fons notus, ac familiaris Tullio, qui hinc ferme solebat exordiri. In oratione pro M. Cælio exorditur à temporis insolentia ; quippe die festo, contra quam fieri soleret, caussam dicere cogebatur. Exordium Milonianæ ducitur 1. à persona adversariorum, qui armati forum obsidebant : 2. à persona Pompeji judicis : 3. ab insolita judicii forma. Pro Rege (1) Dejotaro, dicit exordium ab angustiis loci, in quo habita fuit hæc oratio : *Motuor etiam ipsius loci insolentia* (inquit Tullius) *quod tantam caussam, quanta nulla unquam in disceptatione versata est, dico intra domesticos parietes, dico extra conventum, & eam frequentiam, in qua oratorum studia niti solent ; in tuis oculis, in tuo ore, vultuque adquiesco . . . Hanc enim, c. Cæsar, caussam si in foro dicerem, eodem audiente, & disceptante te, quantam mibi alacritatem populi Rom. concursus adferret ? Quis enim civis ei Regi (2) non faveret, cuius omnem ætatem in populi Rom. bellis consumptam esse meminisset ? Specularem curiam, intuerer forum, Cælum denique testarer ipsum . . . Quæ quoniam angustiora faciunt parietes, actioque caussæ maxime debilitatur loco, tuum est, Cæsar, qui pro multis sepe dixisti, quid nunc mibi animi sit, ad te ipsum refer-*

(1) *Hæc oratio privatim habita in ædibus Cæsaris.*

(2) *Dejotarus Gallograeciae Rex, in bello civili Pompeji partes secutus, victorem Cæsarem cum excepisset hospitio, fuit accusatus, quod ei struxisset insidias.*

ferre; quo facilius tum æquitas tua, tum audiendi diligentia minuat hanc perturbationem meam.

2. Dicitur Exordium à rotunda, simplicique rei expositione, sine fuso, & calamistris, & sine ullo in speciem artificio. Ita Cicero pro Ligario: *Novum crimen, c. Cæsar, & ante hunc diem inauditum, propinquus meus ad te Q. Tubero detulit: Q. Ligarium in Africa fuisse.*

3. Dicitur Exordium à contrario, cum prima fronte ea videmur dicere, quæ caussæ nostræ sint omnino contraria, & adversariis faveant, ut scilicet eos sensim in nostram sententiam nihil minus cogitantes pertrahamus: in quo sane est artis, & industriæ plurimum.

4. Dicitur Exordium ab insigni quopiam effato, & dicto, vel ab illustri exemplo. Ita Catilina suos conjuratos ad impium bellum adhortatur apud Sallustium hoc effato. *Compertum habeo, milites, verba virtutem non addere; neque ex ignavo strenuum, neque fortem ex timido exercitum imperatoris oratione fieri.* Ita etiam Cæsar, dum in Senatu pro Catilina loquitur, apud eundem Sallustium, ab insigni effato sic exorditur: *Omnes homines (P. c.) qui de rebus dubiis consultant, ab odio, amentia, ira, atque misericordia vacuos esse decet.*

5. Duci potest Exordium ab insigni aliqua quæstione. Ita Tullius suum de Inventione Rhetorica librum auspicatur: *Sæpe, & multum hoc mecum cogitavi, boni ne an mali plus adulterit hominibus, & civitatibus copia dicendi, ac summum eloquentiae studium.*

6. Præclare admodum trahitur Exordium à suspensione, quæ mirifice præparat auditorum animos magnæ alicujus rei exspectatione; & illos acuit vehementi cupiditate sciendi, quid demum sit illud, quod polliceatur Orator. Ita Cicero Verrina i. Quod erat optandum maxime, judices, & quod unum ad invidiam vestri ordinis, infamiamque judiciorum sedandam maxime pertinebat; id non humano consilio, sed prope divinitus datum, atque oblatum vobis summo reip. tempore videtur. Inveteravit enim jam opinio perniciosa Reip., vobisque periculosa, quæ non modo Romæ, sed & apud exterias nationes omnium sermone percrebuit, his judiciis, quæ nunc fiunt, PECUNIOSVM hominem, quamvis sit nocens, nullum posse damnari.

Denique Exordium ab ipsis caussæ visceribus, hoc est ab intimis caussæ principiis trahendum est, & in illo solerter jacienda sunt argumentorum, & affectuum omnia semina, quæ deinde retractata, fusius explicitur. Id vero non difficulter efficies, si ex Fabii Quintiliani præcepto diligenter intuearis, apud quos, pro quibus, contra quos, quo loco, quo tempore, quo rerum statu dicendum sit tibi; quid auditores, ac judices sentire credibile sit; quis sit orationis tuæ scopus; quid petas, quid consequi velis. Hac omnia ubi perspecta mature fuerint tibi, ipsa te magistra natura facile docebit, unde sit tibi capiendum orationis Exordium.

S. IV. De Officio, ac munere Exordii.

Quodnam est officium, ac munus Exordii?

R. Triplex; ut nempe reddat auditorem benevolum, attentum, & docilem.

Vnde reddet auditorem benevolum?

R. Ex quadruplici capite: 1. à persona Oratoris ipsius: 2. à persona adversariorum: 3. à persona auditorum, vel judicis: 4. ab illius, pro quo dicitur, persona.

Quomo reddet auditorem benevolum à persona Oratoris ipsius?

R. Si Orator modestiam, pudorem, probitatem & ingenuum quemdam candorem ore potius, & reipsa præ se ferat, quam verbis ostentet. Poterit tamen interdum sua merita, suum officium, suas virtutes, sed parce omnino, ac sine adrogantia commendare; quod mirifice facit Tullius in oratione pro Archia, suo quondam magistro:
Si quid est in me ingenit, judices, quod sentio quam sit exiguum; aut si qua exercitatio dicendi, in qua me non inferior mediocriter esse versatum; aut si hujuscce rei ratio aliqua ab optimarum artium studiis, ac disciplina profecta, & qua ego nullum confiteor ætatis meæ tempus abhorruisse, earum rerum omnium vel in primis hic A. Licinius fructum à me repetere prope suo iure debet. Nam quoad longissime potest mens mea respicere spatium præteriti temporis, & pueritiae memoriam recordari ultimam, inde usque repetens, hunc video mi-

mibi principem & ad suscipiendam , & ad ingredien-
dam rationem horum studiorum exstisisse. Quod si haec
vox hujus hortatu , præceptisque conformata , nonnullis
aliquando saluti fuit : à quo id accepimus , quo cete-
ris opitulari , & alios servare possemus , huic profec-
to ipsi , quantum est situm in nobis , & opem & sa-
tutem ferre debemus .

Quomodo colligetur benevolentia ab adversariorum
persona?

R. 1. Si dicamus , nos nimiam illorum elo-
quentiam , aut gratiam revereri , unde illa red-
datur suspecta judicibus : quod pulchre admodum
facit Cicero pro Quintio : *Quæ res in civitate duæ
plurimum possunt , eæ contra nos ambæ faciunt in hoc
tempore summa gratia , & eloquentia ; quarum alte-
ram , C. Aquili , vereor ; alteram metuo.*

2. Si illos in odium , & invidiam adducere vi-
tiorum , quibus laborant , commemoratione cone-
muri ; ut pro Dejotaro : *Crudelem (1) Castorem , ne
dicam sceleratum , & impium , qui nepos avum in
discrimen capitum adduxerit , adolescentiæque suæ ter-
rorem intulerit ei , cuius senectutem tueri , & tegere
debebat .*

Quod si adversarius sit vir bonus , notæque pro-
bitatis , ac fidei , Tullium imitaberis , qui cum pro
Murena diceret , Catonemque virum antiquæ vir-
tutis haberet adversarium , non quidem in ejus
vita , moribusque quidquam culpavit ; sed tamen ,
ut illi quomodocumque fidem detraheret , sectam
Stoi-

(1) *Castor Dejotari nepos ex filia.*

Stoicorum, cui se Cato totum addixerat, irridere coepit: idque tam false, tamque facete, ut iudicium risu dissolveretur, & Cato ipse dixerit:
Quam (1) ridiculum habemus Consulem!

Quomodo captabitur benevolentia à persona vel auditorum, vel iudicium?

R. 1. Si eis confidere videatur Orator, ut pro Roscio Amerino. 2. Si suam caussam cum eorum utilitate conjungat, ut passim in Philippicis. 3. Si corum iustitiam, fidem, auctoritatem, dotes ceteras modeste commendet, ut in Exordio Milionianæ, ubi Tullius Pompejum laudat à sapientia, iustitiaque, cum ait: *Sed me recreat, & reficit Cn. Pompeji sapientissimi, & iustissimi viri consilium, qui profecto nec iustitiae suæ putaret esse, quem reum sententiis iudicum tradidisset, cumdem tellis militum dedere; nec sapientiae, temeritatem concitatæ multitudinis auctoritate publica armare.*

Quomodo paratur benevolentia à persona clientis, sive illius, cuius caussa agitur?

63 R. Si illius innocentiam, virtutemque commendes: si illius calamitatem, amicorum inopiam, & solitudinem conqueraris; ut Cicero pro Roscio Amerino.

Semperne laborandum est in exordio, ut captetur auditorum benevolentia?

R. De captanda benevolentia non valde laborandum esse in caussis illis, quæ per se sunt honestæ sed tantum in iis, quæ sunt vel paradoxæ, vel du-

(1) Plutarchus in vita Catonis.

dubiæ , vel humiles. Quatuor enim cauſſarum genera distinguit Divus Augustinus in eximio ſuo libro de Rhetoricæ principiis ; Honestas , incredibiles , dubias , & humiles , quæ ab illo vocantur ἔνδοξαι , παράδοξαι , ἀμφίδοξαι , ἀδόξαι .

In humili quidem argumento ſe ſe maxima non numquam exercuerunt , & ostentarunt ingenia ; ut olim Polycrates , qui murium panegyricum celebravit , & Lucianus , qui muſcam laudavit. Inter juniores vero Majoragius ſcripsit encomium Iuti , Calcagninus , poſt Pſellum , pulicem prædicavit , Scaliger anferem , Pafferatius iſum nibil laudandum fuſcepit , Umbram Janus Donza præconio celebravit : & noſtra ætate vir Cl. Daniel Heinsius aſinum , pediculumque laudavit.

In hiſ vero , aliisque id genus humilibus cauſſis , itemque in illis , quæ minus gratæ ſunt audi toribus , opus eſt iſinuatione , teu exquifiore quadam arte , qua Orator subdole , & latenter in auditorum animos irrepat.

§. V. De paranda attentione.

Tundenam conciliatur attenſio ?

R. Conciliatur partim promiſſione , partim petitione : promiſſione quidem , ſi polliceamur , nos eſſe dicturos de rebus vel novis , vel magnis , vel utilibus , vel jucundis. Ita Horatius Od. 1. Lib. 3.

Carmina non prius
Audita , Muſarum Sacerdos ,
Virginibus , puerisque canto . Sic

Sic etiam in primis Cicero pro Rabirio : *Sic enim existimare debetis, Quirites, post hominum memoriam, rem nullam magis periculosam, magis ab omnibus vobis providendam, nec à Tribuno plebis suscep tam, neque à consule defensam, neque ad populum Rom. esse delatam.* Hoc etiam egregie præstítit Ma ro, quando de apibus dicturus, ita cecinit 4. Georg.

Protinus aërii mellis cœlestia dona
Exsequar. Hanc etiam, (1) Mecœnas, adspice partem.
Admiranda tibi levium spectacula rerum,
Magnanimosque Duces, totiusque ordine gentis
Mores, & studia, & populos, & prælia dicam.
In tenui labor; at tenuis non gloria . . .

Nolim tamen montes, ut ajunt, aureos in ipso dicendi initio semper polliceatur Orator : nec sic incipiet, ut (2) Mævius ille, quem ridet Horatius :

Fortunam Priami cantabo, & nobile bellum.

Multoque sane cautius mihi videtur facere, qui cum Homero simpliciter, & verecunde sic exorditur :

Dic mihi, Musa, virum, captæ post tempora Trojæ
Qui mores hominum multorum vidit, & urbes.

Quam

(1) *Mecœnas apud Augustum gratioſſimus, poētarum patronus munificus.*

(2) *Hic est ille Mævius, quem carpit Virg.
Qui Bavium non odit, amet tua carmina, Mævi.*

Quam si magnificentius sic incipias cum Lucano:
 Bella per Emathios plusquam civilia campos ...

Aut si tumidum illud turgidumque imiteris Clau-
 diani procœdium de raptu Proserpinæ:

Inferni raptoris equos , adflataque curru
 Sidera Tanario , caligantesque profundæ
 Junonis thalamos , audaci promere cantu
 Mens congesta iubet.

Quod si satis appareat , tem de qua agitur ;
 esse abjectam , & exilem , plus efficiet Orator , si
 rotunde statim , & ingenuè profiteatur , fese in
 re omnino tenui laborare , quam si grandia ne-
 quicquam pollicetur: sed causa tenuitatem æqui-
 tate , vel necessitate , vel aliunde compensare co-
 nabitur; ut Cic. Philippica 7. *Parcere de rebus* , sed
fertasse necessariis consulimur , P. C. de Appia via , &
de (1) moneta .

2. Conciliandæ attentionis ratio est petitio ; cum
 scilicet auditores rogamus , ut studiose , ac diligenter
 velint attendere , ut Cicero pro Sexto Roscio:
Quapropter vos oro , atque obsecro , judices , attente,
bonaque cum venia verba mea audiatiss.

Quamvis autem sub ipsum Exordium postulari
 soleat attentio , latius tamen erit interdum illam

R

(1) *Vel de templo Junonis Moneta reficiendo , vel de pecunia cudenda.*

in ipso orationis cursu postulare, cum scilicet auditoris animus, initio arrectus, & alacer, languescere incipit, & defatigata illius aures incipiunt peregrinari, ut solet. Hoc egregie præstítit Tullius pro Cluentio, dum sic ait: *Vos quæso, ut adhuc me attente audistis, item quæ reliqua sunt audiatis. Profecto nihil à me dicetur, quod non dignum hoc conventu, & silentio, dignum vestris studiis, atque auribus esse videatur.*

Quomodo comparabitur docilitas?

R. Tribus maxime rebus: 1. Si brevem te fore promittas, stesque promissis. Ut enim eleganter, & ingeniose monet Tullius, multo satius est, ut Orator desinat, quam si deficiat; & Auditor cum desiderio, quam si cum fastidio, ac satietate recedat. Atque in Oratores nimis longos belle omnino quadrant ultima hæc artis poëticæ verba:

Indoctum, doctumque fugat recitator acerbis:
Quem vero adripuit, tenet, occiditque legendo,
Non missura cutem, nisi plena crux (1) Hirudo.

2. Comparabitur docilitas, si breviter, dilucide, simpliciterque proponas, qua de redicturus sis.

3. Fiet docilis auditor, si tuam orationem in duo, vel tria ad summum capita perspicue par-

(1) Hirudo. Hisp. *Sanguijuela*, est pisciculus instar exigui serpentis, qui ad jugendum vitiosum sanguinem euri solet applicari, nec avelli, nisi sanguine appletus, potest.

tiaris; ut cum ait Tullius Philippica 7. *Cur pacem nolo?* quia turpis est, quia periculosa, quia esse non potest. Quæ tria dum explico, peto à vobis, P. C., ut eadem benignitate, qua saletis, verba mea audiatis. Sed quoniam permagni interest ad eloquentiam, quemadmodum proponat, & orationem suam partiatur Orator; & quia hic locus est in tota Rhetorica longe difficilimus, tironibus præsertim; de utroque illo capite accuratius nobis esse disputandum arbitramur.

§. VI. De Propositione.

Quænam sunt Propositionis virtutes, ac dotes? R. Quinque vulgo adsignantur propositionis dotes. 1. est, ut simplex sit, unaque, non vero multiplex. Ex illius enim unitate omnino pendet orationis unitas; semperque meminisse debet Orator eximii illius, numquamque fatis inculcandi Horatiani præcepti:

Denique sit quodvis simplex dumtaxat, & unum.

Quid est porro una, simplexque propositio?

R. Una, simplexque dicitur illa propositio, quæ constat una, simplicique sententia, v. gr. *Pax est conficienda: injuriæ sunt condonandæ &c.*

2. Propositionis dos est, ut sit ita clara, ut non modo nullo labore intelligatur, sed etiam ut non possit non intelligi; quemadmodum ista:

otium est fugiendum. 3. dos est , ut omnia totius orationis argumenta , partesque omnes in illam velut in scopum , metamque colliment. 4. dos est , uti tractari copiose , & ornari facile possit , & amplam dicendi fegetem suppeditet. Recte enim monet Horatius , ne jejunum dicendi sumas argumentum , & , quæ desperas trattata nitescere posse , relinquas. 5. dos est , ut propositio vel ipsa novitate percellat , vel insigni aliqua utilitate placeat : quæ duo vel maxime conciliare solent attentionem , atque benevolentiam.

Quomodo novitatem habebit propositio ?

R. Si argumentum ita proponatur , ut ex trito , vulgarique fiat inusitatum , & auditorum animos statim erigit , feriatque ; v. gr. trita est , vulgarisque hæc propositio : *Homo multorum sibi maiorum auctor est* , nihilque admodum dignum habet attentione. Fiet vero nova , & admirabilis , si dicas : *Nemo laeditur , nisi à seipso* ; vel *Nemo miser , nisi qui velit*. Item vulgaris est hæc propositio : *Mali aliquando sunt utiles virtuti* ; itemque ista : *Mors minus dura accidit miseris , quam felicibus*. Fiet autem illico utraque nova , mirificaque , si dicas : *Virtuem plus interdum improbis debere , quam probis* : & *Felicitatis genus esse infelicem mori*.

Quomodo utilitatem habebit propositio ?

R. Utilitatem habere solent propositiones illæ , quæ *contemplativæ* non sunt , sed *activæ* (si duobus illis Senecæ vocibus nobis uti fas est.) *Contemplativæ* porro dicuntur illæ , quæ in sola cognitione versantur , quemadmodum ista : *Sinitorum*

infinitus est numerus. Activæ contra dicuntur propositiones illæ, quarum finis est aliquid efficere: ut, Ferenda sunt amicorum vitia.

§. VII. De Divisione.

Cur adhiberi solet in oratione *Divisio*, sive *Partitio*?

R. Tribus potissimum de caussis. 1. Quia lumen adfert orationi. 2. Quia juvat memoriam Oratoris, & auditorum. 3. Quia levat audiendi fastidium; recreatur enim animus admonitione singularum partium orationis: quemadmodum viatorem reficiunt spatia certis lapidibus, & intervallis distincta.

Quænam sunt leges Divisionis?

R. Quatuor. 1. est, ut *Divisio* sit plena; hoc est, ut partes illius, sive membra omnino complecantur, & adæquent propositionem, quæ dividitur. 2. est, ut membra illa sint opposita, neque unum in altero contineatur. 3. est, ut *Divisio* habeat partes duas, trefve ad summum, vix plures. Si enim nimium concisa sit, & ut loquitur Fabius, nimium articulosa, offendet orationi tenbras, parietque obscuritatem illam, contra quam fuit inducta. 4. dos est, ut sit plana, simplex, & quasi obvia; non vero ad artis, & ingenii ostentationem longius accersita.

De Narratione, quæ est secunda orationis pars, fusius, & uberior dictum est in secundo capite Elementorum Rhetoricae.



CAPUT SECUNDUM.

DE CONFIRMATIONE.

65

Quid est Confirmation?

R. Est pars orationis, in qua firmamenta, seu robora caussæ adferuntur.

Quot sunt partes Confirmationis?

R. Duæ. 1. est Confirmatio proprie dicta, in qua ea, quæ pro nobis sunt, firmamus, ac stabilimus. 2. est Confutatio, in qua contrarias adversariorum rationes refellimus. Hinc liquet, Confirmationem esse præcipuam, ac potissimum Orationis partem, quæ quasi viscera, vitamque illius contineat, totamque persuadendi spem in ea maxime parte sitam esse. Unde *πίσις*, seu *fides* jure nuncupatur ab Aristotele.

§. I. De Confirmatione proprie dicta.

Quomodo tractanda est Confirmation proprie dicta?

R. Per Argumenta, & per Argumentationes.

Quid est Argumentum?

R. Est probabile inventum ad faciendam fidem.

Quid est Argumentatio?

R. Est argumenti fusior, & artificiosa dilatatio.

Quid differt inter Argumenta, & Argumentationes?

R. Hoc interest, quod Argumentatio sit modus,

sive ratio, qua argumentum tractatur; Argumentum vero sit ipsa argumentationis materia. Unde argumenta ex se jejuna sunt, & imbecilla, nisi accedat artificiosa illorum explicatio.

Unde petuntur argumenta ad confirmandum idonea?

R. Petuntur à locis tum intrinsicis, tum extrinsecis, de quibus accurate dictum est à nobis Lib. 2.

Quo ordine collocanda sunt argumenta in Confirmatione?

R. Firmiora partim in principio collocanda sunt, quia tunc vel maxime attendit auditor: partim in fine, quia quae postremo dicuntur, altius inhærent: imbecilliora vero collocanda sunt in medio, ubi magis latebit eorum infirmitas: quemadmodum imbecilliores milites, qui fugam auditam buccina circumspiciunt, in medium agmen cogi solent, ut qui per se parum possunt, turba valeant. At si causa duobus tantum argumentis nitatur, quorum alterum validius sit, alterum infirmius, tunc imbecillus subjicitur quidem validiori, sed mox ad validius recurretur.

Quot sunt argumentationum species, seu quot modis tractari possunt argumenta?

R. Quatuor sunt præcipuae species argumentationis: Syllogismus, seu ratiocinatio, Enthymema, Inductio, Exemplum. His adde Soritem, & Epicherema.

§. II. De Syllogismo.

Quid est Syllogismus?

R. Duplex distinguitur Syllogismus, seu ratiocinatio. Alius est Philologicus, alias Oratorius. Syllogismus Philosophicus est argumentatio constans tribus propositionibus distinctis, & explicatis, quæ sic inter se connectuntur, ut consequentia duabus primis, quarum altera *major*, altera *minor*, quia minus late patet, appellatur; necessario concedenda sit tertia, quæ *consequentia* dicitur: v. gr.

Omnis ars honesta est amplectenda:

Rhetorica est ars honesta:

Ergo Rhetorica est amplectenda.

Syllogismus Oratorius est ratiocinatio constans quinque partibus, certo inter se ordine connexis; unde etiam vocatur *Syllogismus perfectissimus*.

Quenam sunt partes Syllogismi Oratorii?

R. Quinque numerantur. 1. est *Propositio*. 2. *Propositionis probatio*. 3. *Adsumptio*. 4. *Adsumptionis probatio*. 5. *Conclusio*. Habet insigne quoddam Syllogismi Oratorii exemplum in Libro 1. de Inventione, ubi luculenter demonstrat Cicero, *Divina providentia mundum gubernari*. Sed quod exiliter, & jejune dixisset Philosophus in hunc ferme modum: *Illud Divina providentia administratur, quod optime administratur: sed mundus optime administratur: igitur mundus divina providentia administratur: id ipsum Tullius oratorio more ita pertractat:*

Melius accurantur, quæ consilio geruntur, quam quæ sine consilio administrantur. Et hæc est Proposition.

Domus ea, quæ ratione regitur, omnibus instruc-
tior est rebus, & apparatiōn, quam ea quæ temere,
& nullo consilio administratur. Exercitus is, cui præ-
positus est sapiens, & callidus Imperator, omnibus
partibus commodius regitur, quam is, qui stultitia,
& temeritate alicujus administratur. Eadem navigii
ratio est. Nam navis optime cursum conficit ea, quæ
scientissimo gubernatore utitur. Et hæc est Propo-
sitionis probatio.

Nihil autem omnium rerum melius quam mundus
administratur. Et hæc est adsumptio.

Nam & signorum ortus, & obitus definitum quem-
dam ordinem servant; & annuae commutationes non
modo quadam ex necessitate semper eodem modo fiunt,
verum ad utilitates quoque rerum omnium sunt accom-
modatae, & diurnæ, nocturnæque vicissitudines nulla
in re umquam mutatæ quidquam nocuerunt. Et hæc
est adsumptionis probatio.

Quæ signa sunt omnia, non mediocri quodam con-
silio naturam mundi administrari. Quæ est Comple-
xio, sive Conclusio.

Semperne constat quinque illis partibus Syllogismus
oratorius?

R. Nequaquam. Si enim perspicua fit vel Propo-
sition, vel Adsumptio, tunc omittitur illius Proba-
tio; & ita fit Syllogismus quadripartitus. Quod si
etiam perspicua videatur utraque, tunc probatio-
ne nihil opus erit, & ita tripartitus fiet Syllogismus.

Quid vero intererit inter Rhetorem, & Philosophum, si uterque tripartitum Syllogismum adhibeat?

R. Hoc intererit, primo quod Philosophus ea maxime querat argumenta, quæ possint scientiam, aut certam opinionem efficere: Rhetori vero sufficient, ut plurimum, probabilia. Alterum discrimen est in argumenti tractandi ratione positum. Philosophus enim tres propositiones ordine collat, quem ordinem *formam* appellant: Rhetoris vero industria in eo posita est, ut propositiones illas invertat, amplificet, verbis ornet, figuris illuminet, artem denique totam diligenter tegat. Hinc acute admodum ajebat (1) Zeno Philosophus: *Logicam, seu dialecticam similem esse pugno, seu manui complicatae; Rheticam vero palmæ, seu manui explicatae, atque exorrebitæ similem esse.*

Numquam ne logicus, & naturalis servatur ordo in Syllogismis oratoriis?

R. Servatur aliquando non solum ab Oratoribus, verum etiam, quod mirum fane videatur, ab ipsis Poëtis, ut in illo Persii exemplo Sat. 5.

An quisquam est alius liber, nisi ducere vitam
Cui licet, ut voluit? Licet, ut volo, vivere: non sum
Liberior Bruto?

S. III. De Enthymemate.

Quid est Enthymema?

R. Est pars Syllogismi, seu Syllogismus imperfectus.

(1) Zeno Stoicorum inventor, & princeps, floruit post Alexandri M. mortem.

Quot partes habet Enthymema?

R. Duas; quarum prima vocatur à Logicis *An-*
tecedens, alia *Consequens*: v. g. *Omnes artes sunt*
expetenda. Ergo eloquentia est expetenda.

Vocatur Enthymema recte curtum, quod sit
argumentatio quasi mutila, & una propositione
veluti truncata; quæ si addatur, fiet integer Syl-
logismus.

Quomodo fit Enthymema?

R. Fit omittendo vel propositionem, vel ad-
sumptionem, seu, ut Logici loquuntur, omitten-
do *majorem*, vel *minorem*; v. gr. *Clodius insidias*
struxit Miloni: ergo Clodius jure fuit occisus; vel
Quicumque alteri struit insidias, jure ab illo occidi-
tur: ergo Clodius jure fuit occisus à Milone.

Unde nomen suum traxit Enthymema?

R. Απὸ τοῦ ἐνθυμεῖσθαι, quod est mente con-
cipere, cogitare, quod scilicet tertia propositio,
quæ verbis non effertur, mente retineatur.

Quodnam est optimum Enthymematis genus?

R. Illud est, quod fit à contrariis, cuiusmodi
est apud Sallustium illud (1) Micipse ad (2) Ju-
gurtham: *Quem alienum fidum invenies, si tui hos-*
tis fueris? Erit etiam acutius, ac validius Enthy-
mema, si fiat per interrogationem.

*Cur Enthymemate magis gaudere vulgo dicitur Ora-
tor, quam Syllogismo?*

R. Tribus de causis. 1. Ut occultet artificium,
quod

(1) *Micipse patruus Jugurthæ, & Massinissæ filius.*

(2) *Jugurtha Numidarum Rex à Pompejo victus.*

quod scilicet agnatum, caussæ magis obest, quam prodest. Hinc etiam cum utitur Syllogismo, partes ejus fere transponit. 2. Ne videatur auditorum ingenii diffidere; quasi necesse sit omnes Syllogismi partes sigillatim exprimi. 3. Quia Enthymema validius percellit adversarios; illosque punctim, ut ajunt, cæsimque ferit. Unde *jaculum*, ac *telum* *Oratoris* vocari solet. Vide quo modo Tullius Enthymemate feriat Antonium: *Pacem vult Antonius? arma ponat*: quasi si diceret: *Non arma ponit Antonius; ergo non vult pacem.*

§. IV. De Inductione.

Quid est Inductio?

R. Est argumentatio, qua ex multis singularibus enumeratis aliquid concluditur.

Hæc non solum Oratoribus perfamiliaris est, sed etiam Poëtis, & in primis Ovidio, qui illa majorem in modum delectabatur. Unum hic eximium adferemus exemplum, quo infelix ille Poëta, dum exularet in Scythia, uxoris suæ dolorem consolatur, Tristium Lib. 4. probando per inductionem, asperas res gloriæ segetem, & materiam esse.

Materiamque tuis tristem virtutibus imple:

Ardua per præcps gloria vadit iter.

Hectora quis nosset, felix si Troja fuisset?

Publica virtutis per mala facta via est.

Ars tua (1) Tiphy, jacet, si non sit in æquore
fluëtus:

Si valeant homines, (2) ars tua, Phœbe, jacet.

Sic etiam apud Virgilium, Æneas probat per inductionem, viventi sibi iter ad inferos nequaquam interclusum esse debere:

Si potuit manes arcessere conjugis Orpheus
Threicia fretus cithara, fidibusque canoris;
Si fratrem Pollux alterna morte redemit,
Itque, redditque viam toties: quid Thesea magnum,
Quid memorem Alcidem? & mi genus ab Jove summo.

Quid observandum est in Inductione?

R. Duo diligenter cavenda sunt. 1. Ut quæ sumuntur, certissima sint. 2. Ut id, cuius confirmandi causa fit induc̄tio, iis, quæ sumuntur, simile sit.

§. V. De Exemplo.

Quid est Exemplum?

R. Est induc̄tio imperfecta, qua ab uno simili argumentamur ad aliud. Cujusmodi exemplum habes in Miloniana, ubi probat Tullius,

(1) Tiphys Argonautarum navis in expeditione Colchica gubernator.

(2) Apollo medicinæ inventor.

68

lius, non esse condemnandum Milonem, quod Clodium occiderit, cum nec Horatius ob foro rem necatam fuerit condemnatus. Sed vide quomodo exemplum illud illustret Cicero: *Negant insucri lucem esse fas ei, qui à se hominem esse occisum fateatur. In qua tandem urbe hoc homines stultissimi disputant? Nempe in ea, quæ primum judicium de capite vidi M. Horatii fortissimi viri, qui nondum libera civitate, tamen populi R. Comitiis liberatus est, cum sua manu fororem esse imperfectam fateretur. Similiter apud Virgilium Æneid. I. Juno furore percita concludit ab exemplo, licere sibi omnino in Æneam, & Trojanos, quod Palladi licuit in Ajacem, & Argivos:*

Pallasne exurere classem
Argivum, atque ipsos potuit submergere ponto,
Unius ob noxam, & furias Ajacis Oilei (1)?

Ast ego, quæ Divum incedo Regina, Jovisque
Et foror, & conjux, una cum gente tot annos
Bella gero.

§. VI. De Dilemmate.

Quid est Dilemma?

R. Est argumentum constans duabus parti bus contrariis, quæ utrinque adversarium
ca-

(1) Ob violatam Cassandram in Palladis templo
ab Ajace Oilei filio. Alter erat Ajax filius Telamonis:
interque fortis, & furens.

capiunt. Unde etiam Syllogismus cornutus appellatur, quod nempe illius cornua sint ita disposita, ut qui unum effugerit, in alterum incurrat. Sic belle omnino probabis Dilemmate, quemvis dolorem æquo animo esse tolerandum: *Nam omnis dolor aut est vehemens, aut levis: si levis, facile feretur, si vehemens, certe brevis futurus est.* Ita Cic. Philip. 5. probat hoc Dilemmate non esse mittendos legatos ad Antonium: *Legatos decernitis. Si ut deprecentur, contemnet; si ut impensis, non audiet.*

Unde nomen suum traxit Dilemma?

R. Ab adverbio Græco δίς, bis, & à voce (1) λημμα, sumptio, captio, quod nimis utrinque capiat adveriarium.

Qua ratione solvi potest Dilemma?

R. Dupli. 1. Si universum Dilemma torqueas in ipsum auctorem: cujusmodi exemplum adfert Aristoteles Lib. 2. Rheticorum: *Sacerdos quædam maximopere dissuadebat filio, ne ad populum verba faceret; nam si injusta suaseris, inquietabat, habebis Deos iratos: sin vero justa, iratos habebis homines.* Hoc Dilemma sic in matrem ipsam torsit ingeniosus adolescens: *Immo, inquit, expedit ad populum verba facere: nam si justa dixero, Di me amabunt: si injusta, homines.*

Eiusmodi fuit etiam celeberrimum illud Dilemma, unde se expedire numquam potuerunt
Arco-

(1) A verbo λημμάνω, capio.

(1) Areopagitæ , qui licet mortalium sapientissimi vulgo haberentur, ortam tamen ex illo Dilemmate litem prorsus iudicatam reliquerunt. Cum enim in Protagoræ Rhetoris disciplinam se quidam adolescens tradidisset, grandemque pecunia summam illi ex pactione fuisse pollicitus, ea lege , ut primam omnium, quam esset habiturus, litem obtineret; jam plene, ac perfecte præceptis intimæ artis eruditus , mercedem omnino negat. Litem intentat illi magister: *Et debes*, inquit, *omnino mercedem*, quo res cumque vertant. *Si enim vice* cero, debes, ut condemnatus: *si viceris*, debes ex pacto. *Immo*, inquit versipellis discipulus, quo res cumque vertant, nihil habebis. *Si enim causam vi*cero, ex judicium sententia nihil debo: *si vero cau*sa cedo, jam tibi ex pactis debo nihil.

2. Solvitur Dilemma, si alterutram illius partem infirmare possis, vel si ostendas, aliquid medium inter duas propositiones intercedere. Sic cum servus ab hero forte percussus, illum hoc repentinno Dilemmate petiisset: *Si sum improbus*, cur mea utebris opera? *si probus*, cur, aut quorsum tandem me percutis? Hoc Dilemma sic in servum acute retorsit herus. *Non te percutio*, quia probus es; sed ut ex improbo fias aliquando probus.

§. VII.

(1) Areopagitæ judices austeri, & incorrupti, qui Athenis in templo Martis judices erant causarum capitalium.

§. VII. De Crocodilo, & de argumento insolubili.

HUC referri potest Crocodilus, de quo pauca sunt hoc loco delibanda.

Quid est Crocodilus?

R. Est argumentationis species captiosa, & fallax, quæ incautos, quibusdam quasi vinculis irretitos, inducit in fraudem. Vocatur autem *Crocodilus*, ob hanc, quam Poëtæ finxere, caussam.

Crocodilus oranti mulierculæ, ut filium, dum forte juxta flumen ambularet, abreptum, sibi redderet, respondit, redditurum utique, si ad propositam quæstionem verum diceret. Hæc autem fuit quæstio: *Filium reddam tibi, necne?* Ad hæc mulier anxia, faudeinque suspicata, respondit; *Non reddes;* & ob eam caussam reddi debere, quod nempe verum dixisset. Mentiris, inquit vafer Crocodilus: *si enim reddidero, verum non eris locuta. Reddere ergo non possum, quia falsa dixeris.*

Huc etiam revocantur propositiones, quas vocant *mentientes*, sive *insolubiles*, quæ se omnino destruunt; cujusmodi est hæc Cretensis cujusdam Poëtæ: *Omnes ad unum Cretenses semper mentiuntur.* Ergo non mentitur certe quidam Poëta Cretensis, dum illos semper mentiri adseverat: unde non sunt omnes semper mendaces.

§. VIII. De Sorite, & Epicheremate.

Quid est Sorites?

R. Est argumentatio, qua ex multis pro-

positionibus gradatim, minutatim, & velut acer-
vatim congestis aliquid infertur. Unde *Syllogismus*
acervalis vocatur à Tullio. Hoc acervali, captio-
soque argumentandi genere utebatur olim Themis-
tocles, dum per risum, jocumque dictitabat, fi-
lium suum, licet nondum triennem, toti tamen
terrarum orbi imperare. Sic enim lepide ajebat:
Meus filius imperat matri, illa mibi, ego Atheniensibus,
Athenienses Græciæ, Græcia Europæ, Europa toti orbi.
Ergo filiolus meus imperat toti terrarum orbi.

In hoc disputandi genere frequentes erant (1) Stoici, & illorum princeps Zeno. Sed maxime omnium illo delectatus dicitur (2) Chrysippus, ut Socrates Inductione, & Ironia. Sed hoc genus argumenti saepe solet esse captiosum, & fallax. Dum enim sensim, & minutatim multa coacervantur, facile est injicere respondenti laqueos, & pericu-
losam illi telam texere. Retexere igitur oportebit,
& ideo singula considerare, sicque facilis uni-
veria frangentur.

Cedo denique etymon illius vocis *Sorites*.

R. Habes germanissimum etymon in hac voce
Græca σωρὸς, *cumulus*, *acervis*, unde σωρεῖται,
sorites, argumentum *acervale*.

Quid est Epicherema?

R. Est Enchymema contractum, cuius duæ pro-

po-

(1) Stoici Philosophi, qui summum bonum in virtute ponebant, sic dicti ἀπὸ τῆς σοφίας, id est, à portu, in quam convenire solebant.

(2) Chrysippus Stoicus Philosophus, Zenonis Auditor.

positiones in unam conferuntur; ut, *Sine causa dominum servus accuset?* In hac enim una propositione continentur haec duas; *Non debet servus temere, & sine causa dominum incusare;* ergo *servus, & medicus Regis Dejetari non debet illum temere apud Cesarem incusare.*

De his omnibus argumentationum generibus habes splendidam, atque uberem tractationem in Acroasisbus Cl. Viri Jacobi Facciolati.

CAPUT TERTIUM.

DE CONFUTATIONE.

Quid est confutatio?

R. Est pars orationis, in qua rationes contra nos pugnantes refellimus.

Quomodo fit Confutatio?

R. Fit primo negatione mera, cum scilicet rem allatam ab adverfario falsam omnino esse dicimus; aut illam absurdam, incredibilem, repugnantem esse demonstramus. Ita Cic. pro Quintio, rem negat aperte: *Negamus, te bona Quintii, Sexte Nævi, possedisse ex edicto Prætoris.* Sic etiam pro Roscio perspicue demonstrat, parricidii crimen, cuius insimulatur Roscius, ab illius vita, moribusque prorsus alienum esse: quem locum, quia longior est, omitto.

2. Fit Confutatio, cum factum non negamus, sed excusamus, & jure factum fuisse contendimus.

Sic Tullius pro Rabirio, (1) Saturnini mortem, quæ illi objiciebatur, adeo non expavescit ut sce-lus, ut potius illius auctorem exoptet fuisse Rabirium: *Arguis, occisum esse à C. Rabirio L. Saturninum,* & id *C. Rabirius multorum testimoniosis, Q. Hortensiu copiissime defendantे, antea falsum esse docuit.* Ego autem si mihi esset integrum, susciperem hoc crimen, agnoscere, confiterer. Utinam hanc mibi facultatem caussa concederet, ut possem hoc prædicare, *C. Rabirii manus L. Saturninum hostem populi R. interfectum.*

3. Fit Confutatio, cum adversarios pari, vel etiam majori re objecta, vicissim lacefssimus, ut periti duces solent, qui hostium vires distrahunt, & alio avertunt. Talis est apud Virgilium disputatio pastorum, in qua sic prior incipit Damocetas:

(2) Dic quibus in terris (& eris mihi magnus Apollo)
Tres pateat cœli spatum non amplius ulnas.

Mopsus impar respondendo, nova quæstione conatur irretire Damocetam (3):

Dic quibus in terris inscripti nomina Regum

Naf-

(1) *Saturninus Tribunus plebis seditiosus, qui cum res novas moliretur, à servo occisus fuit in ipso Capitolio.*

(2) *Vide Interpretes, quorum nonnulli hæc ad cæli cuiusdam seputerum referunt.*

(3) *Nummi Augusti, in quorum aversa parte erant flores, cum hac inscriptiōne: L. Aquilius Florus III. vir. Sunt qui de flore hyacinthi interpretantur cum vulge.*

Nascantur flores; & Phyllida solus habeto.

4. Confutatio fit per indignationem, atque contemptum; cum nempe generosa quadam fiducia, quæ nobis objiciuntur, spernere, ac deditnari videmur. Hujusmodi singulare omnino, nobileque in primis habes exemplum in 37. Livii Libro, ubi magnus ille Scipio Africanus, post tot res præclare gestas, invidorum, ut sit, calumnijs adpetitus, & in jus ad caussam dicendam vocatus, *Silento facto*, *Hoc*, inquit, *die*, (1) *Tribuni plebis*, *vosque Quirites*, *cum Hannibale, & Carthaginensibus*, *signis collatis in Africa*, *bene, ac feliciter pugnavi*. Itaque *cum hodie litibus, & juriis supersederi æquum sit*, *hodie ego hinc extemplo in Capitolium, ad Jovem Optimum Maximum, Junonemque, & Minervam, certerosque Deos*, *qui Capitolio, atque Arci præsident, statuandos ibo: iisque gratias agam, quod mihi, & hoc ipso die, & sæpe alias egregie Reipublicæ gerendæ mentem, facultatemque dederunt*. *Vestrum quoque, quibus commodum est, ite mecum, Quirites, & orate Deos, ut mei similes Principes habeatis*.

Aliquando etiam valde utile erit in confutatione jocos, sales, & facetias, etiam in rebus seruis adhibere, quæ si nec in mimicam scurrilitatem degenerent, nec in atrocius maledictum, nec in nimiam dicacitatem, mirum quantum caußæ profint, & animos auditorum exhilarent.

Pos-

(1) *Tribuni plebis erant Magistratus Papuli defensores, & custodes.*

Postremus denique refutandi modus fit per compensationem; cum scilicet neque factum negamus, neque jure factum contendimus; sed alio quodam præclaro facto abunde compensari ostendimus. Sic Horatius, qui sororem interficerat, judicio populi Rom. fuit absolutus, *magis admiratione viri*, quam jure *causæ*, inquit Livius.

73

CAPUT QUARTUM.

DE PERORATIONE.

Quid est Peroratio?

R. Peroratio, sive Epilogus, est ultima orationis pars, in qua id, quod tota oratione expetebat Orator, majori vehementia evincere & obtinere contendit. Ita Quintilianus.

Quot partibus constat Peroratio?

R. Duabus: Enumeratione, & Motu, seu Adfectuum commotione.

§. I. De Enumeratione.

Quomodo fit Enumeratione in Peroratione?

R. Fit, cum ea, quæ per totam orationem varie sparsa sunt, summatim colligimus, & sub uno veluti aspectu ponimus, per Anacephaleosin, seu recapitulationem, quæ est rerum fuse dictarum brevis, & artificiosa repetitio.

Cedo illustre aliquod exemplum Enumerationis per Anacephalæosin.

R. Exemplo esse poterit Epilogus iste in Maniliana, qui tamen partis tantum est, non vero totius Orationis: *Quare videte, num dubitandum vobis sit omni studio ad id bellum incumbere, in quo gloria nominis vestri, salus sociorum, vestigalia maxima, fortunæ plurimorum civium cum re publica defunduntur.* Et rursus in eadem Orat. *Quare cum bellum ita necessarium sit, ut negligi non possit; ita magnum ut accuratissime sit administrandum;* & cum ei Imperatorem præficere possitis, in quo sit eximia belli scientia, singularis virtus, clarissima auctoritas, egregia fortuna: dubitabilitis, Quirites, quia hoc tantum boni, quod à Diis immortalibus oblatum, & datum est in rem publicam conservandam, atque amplificandam conferatis?

Quid observandum est in Enumeratione, seu Anacephalæosi?

R. Duo maximopere sunt observanda. 1. Ut cursum, & raptim repeatas ea duntaxat, in quibus causa potissimum consistit, & quæ maxime velis auditorum animis inhærere. Si enim omnia minutatim repeatas, non erit peroratio, sed nova quedam oratio, inquit Fabius.

2. Quæ disperse, diffuseque dicta sunt, ita summatum enumerabis, ut ea cum novo aliquo pondere dicantur, figurisque illuminentur, & oriententur sententiis; ne scilicet videatur crambre repetita, inquit Satyricus, si nimis jejuna sit, nudaque repetitio. Vide quam sententiosa sit, quam

referta rebus, & verbis Anacephalæosis illa, qua Ajax apud Ovidium suam contra Ulyssem, & pro se orationem ita concludit :

Nec Clypeus vasti (1) cælatus imagine mundi
 Conveniet timidæ, natæque ad furtæ sinistræ.
 Debilitaturum quid te petis, improbe, munus?
 Quod tibi si populi donaverit error Achivi,
 Cur spolieris, erit, non cur metuaris abhoste:
 Et fuga, qua sola cunctos, timidissime, vincis,
 Tarda futura tibi est gestamina tanta trahenti.
 Adde quod iste tuus tam raro prælia passus,
 Integer est Clypeus; nostro, qui tela ferendo
 Mille patet plagis, novus est successor habendus.
 Denique quid verbis opus est? Spectemur agendo:
 Arma viri fortis medios mittantur in hostes:
 Inde jubete peti, & referentem ornate relatis.

§. II. De Adfectuum Commotione.

Altera Perorationis pars, munusque alterum est adfectuum concitatio: quod quidem ita proprium est illius, ut propterea Peroratio *Sedes adfectuum* à magistris artis appelletur; quod nempe in eo potissimum loco debeat Orator omnia orationis vela pandere, omnes eloquentiæ fontes aperire, & auditorum animis quasi faces, stimulosque subjicere.

Quo-

(1). *Orbem terrarum in Achilis Clypeo suis cælatum narrat Homerus.*

Quomodo concitari possunt adfectus in Peroratione?

R. Concitantur per amplificationem , quæ est gravior quædam , ac vehementior adfirmatio , ad permovendum valde idonea. Vide quæ supra fuse præcepimus de Amplificatione.

Quinam præcipue motus ciendi sunt in Peroratione?

R. Varii pro variis dicendi generibus. In Panegyrico ciendi sunt motus amoris , admirationis, æmulationis, lætitiae. In vituperatione excitandum est odium , invidia , contemptus. In deliberationibus spem , confidentiam , timorem commovebis. In judiciis vero omnia concurrunt , amor , odium, indignatio , misericordia.

In hac potissimum parte incredibilem quamdam admirationem habuit eloquentia Ciceronis, qui dum peroraret , non incendebat modo judices , & auditores , sed ardere ipse quodammodo videbatur , ac presertim quando concitanda erat erga reos commiseratio , ita ut non raro , quemadmodum ipse de se loquitur , *plangore , & lamentatione forum perorando compleverit*. Quapropter , si forte aliquando plures Oratores pro eodem homine dicerent , Ciceroni Peroratio relinqu solebat , ut ipse ita testatur Libro de Oratore : *Quid ego de miserationibus loquar? Quibus eo sum usus pluribus, quod, etiamsi plures dicebamus, perorationem tamen mihi omnes relinquebant, in qua ut viderer excellere, non ingenio, sed dolore adsequabar.*

Satis hoc indicat Peroratio Milonianæ , ubi sic ait:

ait: Sed finis sit, neque enim præ lacrimis jam loqui possum, & hic se lacrimis defendi vetat... Et in eadem Oratione. Me quidem judices, exanimant, & interimunt hæ voces Milonis, quas audio adsidue, & quibus intersum quotidie. Itemque pro Rabirio (1) Postumo: Sed jam, quoniam, ut spero, fidem quam potui, tibi præstisti, Postume, reddam etiam lacrimas quas debo... Jam indicat tot hominum fletus, quam sis carus tuis, & me dolor debilitat, & includit vocem.

Eadem concitandæ commiserationis arte perfidus ille Sinon Æneid. 2. suam ad Priamum, & Trojanos veteratoriam orationem ita concludit:

Quod te per superos, & conscia numina veri,
Per, si qua est, quæ restat adhuc, mortalibus usquam
Intemerata fides, oro: miserere laborum
Tantorum, miserere animi non digna ferentis.

Quænam sunt præcipuae virtutes Perorationis?

R. Duæ. 1. Ut sit vehemens ad permovendos animos. 2. Ut sit brevis; quia, ut observat Tullius, lacrimæ cito arescent, & animorum incendia celeriter vestiguntur.

AR-

(1) Postumus sine adspiratione contra etymologiam: ita Aldus, & lapides antiqui.

ARTIS RHETORICÆ LIBER QUARTUS.

~~CAPUT~~

DE DIVERSIS ORATIONUM GENERIBUS.

72

TAmetsi quæ de Inventione, Dispositione,
& Elocutione fusius disputata sunt à
nobis hactenus, ad quodlibet argumen-
ti genus facile possint accommodari; tamen quo-
res sit expeditior, & cuilibet magis in promptu,
de variis Orationum generibus particulatim tra-
denda nobis esse præcepta, judicavimus. Neque ve-
ro fatis esse censuimus, generatim, atque univer-
se indicare fontes, unde manat omnis oratio, ni-
si etiam singula itinera, singulasque vias indicare
figillatim aggredieremur.

Omnes itaque quæ haberi possunt orationes,
ad tria dicendi genera revocantur; nempe ad de-
monstrativum, deliberativum, & judiciale. Ad ge-
nus demonstrativum pertinent, 1. Oratio Panegy-
rica; 2. Oratio natalitia, seu Genethliacon; 3.
Epithalamium, seu Oratio nuptialis; 4. Oratio fu-

nc-

nebris; 5. Gratiarum actio; 6. Epinicum, & Oratio gratulatoria. Ad genus deliberativum revocantur suasio, disuasio, hortatio, commendatio. De duobus hisce orationum generibus enucleate videamus; nam Judiciale minus est nostra xitate usitatum.

CAPUT PRIMUM.

DE ORATIONIBUS, QUÆ PERTINENT AD genus Demonstrativum.

§. I. De Oratione Panegyrica.

Undenam nomen suum traxit Panegyricus? R. Panegyrice orationes proprie dicebantur illæ, quæ magno apparatu habebantur olim in panegyri, hoc est in publico, solemnique Græcorum undique convolantium cœtu, siue ad ludos faciendos, siue ad sacra, nundinasve in aliquo emporio celebrandas. Harum porro orationum initium quo splendidius esset, sumi solebat à laude Numinis illius, quod ludis præfle credebatur, ut Olympii Jovis in ludis Olympicis, Apollinis in certamine Pythico. Deinde sequebatur laus gentis, vel urbis, ubi ludi celebabantur. Denique Principes, vel Magistratus, qui certamini prærerant, pugiles, qui decertaverant, ac præsertim victores, qui præmia tulerant, plena manu laudabantur.

Hæc

Hæc erat ratio veterum illarum orationum, quæ habebantur in panegyri. Sed posterioribus temporibus non illæ solum vocatæ sunt Panegyricæ, quæ solemnibus in ludis dicerentur: sed illæ etiam, quæ in nobili quopiam confessu, qualis est Senatus, in Principum laudem habebantur.

§. II. De inventionibus, & fontibus Panegyrici.

Quænam series servari solet in Panegyrico?

R. Duplex; artificialis nempe, & naturalis. Servatur series artificialis, cum indiscriminatim confuso temporis ordine, omnia ad certa quædam capita ex arte revocantur; v. gr. si quis veteris, seu majoris Catonis laudes ad tria hæc referat capita, quod fuerit optimus Senator, optimus Orator, optimus Imperator. Simili ratione Tullius in Maniliana Pompeji laudes refert ad scientiam rei militaris, ad virtutem, ad auctoritatem, & ad felicitatem. Hic porro artificialis ordo longe plus habet artis & ingenii, quam ordo naturalis.

Quænam est series naturalis?

R. Series naturalis ea dicitur, in qua historiæ, ac temporis ordo servatur. Hæc autem series dividitur in tria tempora; illud, quod vitam antecessit; illud, quo quis vixit; & si naturæ concesserit, illud, quod mortem est consecutum.

Hunc persæpe adhibuerunt Isocrates, & Tullius. Hunc ferme usurpavit Plinius in nobili illo Trajanii Panegyrico. Nam illius laudationem orditur

adoptione, temporis ordinem fere servans, & ad tertium usque consulatum perducit. Utinam vero serius habita fuisset pulcherrima illa laudatio, ut reliquam etiam optimi Imperatoris vitam habememus! Cum enim in tertio, ut diximus, Trajani Consulatu sicut Plinius, nihil prorsus in illo legas de (1) Decebalo victo, unde Dacici nomen retulit Trajanus, quod quarto Consulatu contigit; nihil de tot aliis rebus præclare ab eo gestis. Quæ vero Plinius refert, etiamsi non magnum belli ducem ostendant Trajanum, quia nondum ejus ductu bellum fuerat gestum; tamen signa sunt, ex quibus magnum olim belli ducem fore, liquido conjici poterat. Verum quæ parte nos destituit Plinius, alii Panegyristæ, sed aliis in Imperatoribus, exemplo esse poterunt: ut è Latinis Mamerinus, aliique, qui cum eo pariter solent excudi. Nec plane adspersandus Ennodii Ticinensis Episcop. Panegyricus, dictus Theodorico Gothorum Regi.

E Græcis adeundus Julianus, orationibus duabus in laudem Constantii Imp.. Juvabunt quoque plurimum Latinorum Poëtarum Panegyrici; ut ille Tibulli ad Messallam Libro 4. item seu Ovidii, seu Lucani ad Calpurnium Pisonem. Quibus adde Panegyricos Claudiani, Sinodii, & aliorum.

Hic naturalis ordo perfacilis est, sed vulgaris, ac plerumque languidus, nisi verborum, senten-

(1) *Decebalus fortis, & industrius Dacorum Rex, qui diu fuit Romanorum terror.*

tentiarumque floribus adspergatur, & acutius excitetur sententiis: uti factum à Plinio in suo illo eximio Panegyrico, in quem, tanquam in eximum exemplar, intueri poterimus.

§. III. De tempore, quod ortum antecessit.

73

Quid laudare poterit Orator in illo primo tempore?

R. Tria, nempe genus, patriam, & auguria, si qua forte pueri natalem horam præcesserint.

Quomodo laudari quis poterit à genere?

R. Si genus sit illustre, laudabis à splendore natalium, majorumque rebus gestis, quæ sunt quædam virtutis quasi semina in nobilium animis insita. Dices, majorum virtutem in eum, quem laudas, cum sanguine pariter fuisse transmissam, juxta decantatum illud Horatii verbum: *Fortes creantur fortibus.* Dices, filios impresisis majorum vestigiis insistere solere. Hinc Maro magnifice laudat Camertem *Æn.* 12.

Cui genus à proavis ingens, clarumque paternæ Nomen erat virtutis, & ipse acerrius armis.

Quid factō est opus, si is, qui laudatur, obscurè genere natus sit?

R. Locum habere poterit illud Ulyssis, in certamine cum Ajace (1): Et

(1) *Metam.* 13.

Et genus, & proavos, & quæ non fecimus ipsis,
Vix ea nostra voco.

Denique, ne generis humilitas quidquam de laudibus deferat, erunt in promptu communia hæc exempla. 1. Augustum patre, avoque argentario natum esse, ut nonnulli voluere: proayum vero habuisse libertinum: ayum autem maternum fuisse pistorem Ariciæ, quod illi non semel exprobravit Antonius, teste Suetonio. 2. Agathoclem Siciliæ Regem patre figulo natum, teste Justino. 3. Ptolemæum primum Ægypti Regem, à quo successores omnes dicti sunt *Ptolemæi*, è gregario milite, nomine *Lago*, fuisse prognatum. 4. Magnum illum Arsacem, primum Parthorum Regem, unde item *Arsacidae* dicti sunt, obscuris omnino natalibus ortum fuisse. 5. Demosthenis patrem, gladiorum fabrum fuisse.

Erit etiam in promptu magnifica illa Tullii vox, cum contemptim *novus Arpinas* appellaretur, *Ego*, inquit, *meis majoribus virtute mea præluxi*. Denique poterit usurpari quoque ingeniosum illud dictum Iphicratis, qui ex tutoris filio, ob summam rei militaris peritiam, factus Atheniensium exercitus Imperator, invido cuidam generis ignobilitem exprobranti false respondit: *Meum genus à me incipit: tuum in te desinit. Meorum primus ego sum; tu tuorum ultimus.*

Quomodo ducitur laus à patria?

R. Si ea illustris fuerit, virisque insignibus nobilitata, hoc ipsum in laude poni solet. Hunc laudatio-

tionis fontem non ignoravit Virgilius , cum ait de Didone :

Multa (1) viri virtus animo , multusque recursat Gentis honos.

Quid factō est opus , si patria sit ignobilis , & obscura , vel etiam infamis ?

R. Usurpabis memorabile illud Anacharsis verbum , qui cum natus esset in Scythia , & à Græco nescio quo , Barbarus , & Seytha per contemptum appellaretur , perquam ingeniose respondit : *Mibi quidem patria probro est ; tu vero patriæ.*

Quomodo laudari quis poterit ab auguriis , & signis , quæ illius ortum antecesserunt ?

R. Si quid forte singulare contigerit , quo pueri futura claritas , & amplitudo quomodocumque portendi videatur , id solerter in laude ponendum erit. Hujusmodi est fax illa , quam Hecuba prægnans utero gestare se somniavit. Eiusmodi est etiam vitis illa , quam in somnio vidit Astyages , quæ palmitibus Asiam obumbraret ; unde Cyri magnitudinem præfigiri ab ariolis responsum est. Id genus est etiam illud examen apum , quod in nascentis , vel vagientis Ambrosii labris confeditur dicitur. His adde quod de mirabili S. Joannis Baptistæ ortu narrant Sacræ Paginæ. Nec omitenda est orbicularis illa flamma , quæ nacente Joanne Pico Mirandulano , qui postea eruditio-

T nis

(1) *Aeneas.*

nis quoddam portentum fuit, supra caput matris parientis visa est, & mox evanuit.

§. IV. De iis, quæ in vita ipsa laudari possunt.

Quænam in hominis vita laudem præcipuam merentur?

R. Tria hæc in primis, virtutes, scientiæ, & artes.

Quænam virtutes sunt vel maxime celebrandæ?

R. Primum, ut pàr est, locum obtinet religio, pietasque in Deum, in Parentes, & Patriam. Ex hoc capite suam ipsius commendationem exorditur. Æneas, i. Æn.

Sum pius Æneas, raptos qui ex hoste Penates Classe vaho mecum.

Secundum locum sibi jure vindicant clementia, moderatio, atque justitia. Ex primo capite Casarem mirifice commendat Tullius pro Marcello: *Animum vincere, iracundiam cohibere, victoriam temperare, adversarium nobilitate, ingenio, virtute præstantem, non modo extollere jacentem, sed etiam amplificare ejus pristinam dignitatem; hæc qui faciat, non ego cum summis viris comparo, sed simillimum Deo judico.*

3. Laudabitur liberalitas, atque beneficentia, qua nimirum una Reges, ac Principes propius ad Deum possunt accedere.

Usurpari poterit aurea illa Virgilii sententia,
Æneid.

Aeneid. 6., sepositum quemdam apud Elyrios esse locum iis omnibus, qui erga alios fuere benefici:

Quippe sui memores alios fecere merendo.

Denique celebrabitur fortitudo in adeundis periculis, & in laboribus sufferendis ; magnitudo animi excelsi, & invicti nihil extimescentis, constantia, fidesque in promissis, prudentia in consulis capiendis, celeritas in exequendis ; in adversis vero & quanimitas, & robur mentis imperterrita.

Quomodo laudari quis potest à scientia, & artibus?

R. Ex duplice capite. 1. Si liberalium artium disciplinis sit instructus is, qui laudatur. 2. Si saltem litteris, & artibus faveat, & patrocinetur.

§. V. De corporis, & fortunæ laudibus.

73

*Q*uem res laudantur in corpore ?
R. Laudatur in corpore pulchritudo, robor, ianitas, & his similia. Qui hæc habuerit, laudabitur, quod bene fit illis usus : Qui non habuerit, quod lapienter caruerit : Qui amiserit, quod tulerit moderate.

Cur caduca hæc, & plerumque etiam noxia corporis bona laudantur in homine?

R. Laudantur, 1. Quia licet in se veram laudem non habeant, quæ debetur uni virtuti ; tamen virtus in corum usu, atque moderatione vel maxime cernitur. 2. Quia formæ dignitas est optimæ

mentis indicium , & simulacrum quoddam , ac flos quodammodo virtutis. 3. Quia corporis decor est muta quædam commendatio , & , ut eleganter ajebat Carneades , *Regnum absque satellitio*.

Gratior , & pulchro veniens in corpore **virtus**
Adjuvat ...

Inquit Maro. Hinc est , quod olim populi bene multi , & in primis Æthiopes , Indique , in dandis Imperiis , proceritatem , ac pulchritudinem spectare solebant , ut narrat Aristoteles ; graviterque multatus fuit olim à Lacedæmoniis Archidamus Rex , quod exiguum duxisset uxorem. Querebantur enim *non Reges* , sed *regulos* ex hoc coniugio procreatū iri. 4. Quia pulchritudo est veritatis non solum indicium , sed etiam adjumentum. 5. Denique cum vel in ipsis sacrīs Litteris prædicetur David , ut *pulcher adspectu* , & *facie decora* ; quid sane mirum , si à Cornelio Nepote laudetur Alcibiades , ut *ætatis suæ formosissimus*? Et si ex hoc eodem capite commendetur à Plutarcho Scipio Africanus?

Quod si subturpiculus forte fuerit , vel deformis is , qui laudatur , tunc sane corporis vitium egregiis animi dotibus solerter compensabis. Confugies ad illud Ovidianum :

(1) Si mihi difficilis formam natura negavit ;
Ingenio formæ damna rependo meæ. Di-

(1) *Sappho ad Phaonem.*

Dices deformem fuisse Socratem , cæcum Homerum , coclitem , seu altero oculo captum Philippum Alexandri magni patrem , itemque Hannibalem.

Fluxam , & caducam formæ fragilitatem , quæ propediem deflorescit , verbis exaggerabis , unde Socrates ingeniose ajebat , illam esse *brevem tyrannidem*. Neque fragilem modo dices , sed etiam rem esse plerumque perniciosa , præcipitem , lubricam , & periculosæ aleæ plenam docebis. Postremo addere poteris cum Ovidio , primo Fastorum :

Fastus inest pulchris , sequiturque superbia formam:

Et cum vanissimo illo milite apud Plautum : Nima est miseria pulchrum esse hominem nimis.

Quænam sunt Fortunæ bona?

R. Honores , & divitiæ.

Quomodo commendari quis poterit ab honoribus?

R. Bifariam , si nempe illos promeritus fuerit , beneque illis fuerit usus.

Quomodo commendari quis potest à divitiis?

R. 1. Si posideat , non possideatur. 2. Si sint honestis laboribus partæ. 3. Si iis utatur , non ad perfruendas voluptates , sed vel ad usus vitæ honestos , vel adjuvandos amicos , vel ad egenorum inopiam sublevandam : non quemadmodum aut luxuriosi , perditique nepotes , aut avari :

Aut

Aut qui divitiis soli incubuere repertis,
Nec partem posuere suis : quæ maxima turba est.(1)

Quod si fortunæ bonis caruerit is , quem laudas , confugies ad tritos illos , communesque locos , blandientis fortunæ munera potius esse in malis , quam in bonis numeranda ; caduca semper hæc esse , non virtutis , & ingenii , sed incertæ fortis , & temporum munera : infelicitatis genus esse semper esse felicem . Amplificabis (2) Horatianum illud : *Aurum irrepertum , & sic melius situm , cum terra celat.*

§. VI. De tempore illo , quod mortem subsequitur.

Superest nunc tempus ultimum , cuius in primis habenda est ratio .

Quænam res in ultimo tempore laudari possunt ?

R. Duæ. 1. Quæ in ipsa morte ; 2. Quæ sub ipsum mortis tempus contigere .

Quid in ipsa morte considerare potissimum debet Orator ?

R. Duo ; genus nimirum , & caussam mortis . Genus , si quis pie , ac fortiter obierit , ut sapientem , ac probum decet . Caussa vero laudabitur , si nempe vel pro patria pugnans occubuerit ; *Dulce enim , ac decorum est pro patria mori* , inquit Horatius (3) ; vel si pro tuenda religione mortem occubuerit , ut Christi Martyres sanctissimi ; vel denique

(1) *Aen.* 6. (2) *Od.* 3. lib. 3. (3) *Od.* 2. lib. 3.

que si honestis animi , corporisve laboribus , & curis sibi ipse mortem acceleraverit.

Quenam post mortem consideranda sunt?

R. Tria hæc spectari solent. 1. Pompa funebris, & honores habitu mortuo ; ut quod Aristotelii statua fuerit erecta cum inscriptione hujusmodi : *Aristoteles Philosophorum optimus* ; vel quod uni Demetrio Phalereo statuae trecentæ , & sexaginta fuerint Athenis positæ ; vel quod Gorgiae Leontino , non aurata , ut ceteris , sed aurea statua fuerit erecta. 2. Spectatur bonorum mæror , & luctus. Quo refer illa Mopsi apud Maronem Ecl. 5.

Non ulli pastos illis egere diebus
Frigida , Daphni , boves ad flumina ; nulla neque
amnem

Libavit quadrupes , nec graminis attigit herbam.

Daphni , tuum Poenos etiam ingemuisse leones.

Interitum , montesque feri , silvæque loquuntur.

3. Denique spectantur filii superstites relicti , unde levare mortis mæror , damnumque aliquo pacto sarciri possit.

§. VII. Animadversiones quædam circa
personarum laudationem.

Quenam observanda sunt in personarum laudatione?

R. Tria hæc. 1. Ne ad ementitas , fictitiasque laudes recurramus , quæ scilicet non splendido-

dorem adserunt orationi , sed in veris etiam fidem omnino derogare solent ; ut olim contigit imprudentibus hisce Poetis , qui versibus celebrare veriti non sunt hyacinthinas (1) Stratonices co- mas , quam non deformem modo , sed calvam prorsus esse nemo nesciebat. Hoc etiam illustrare poteris exemplo Lysippi , qui Alexandrum sapienter effinxit hastam manu tenentem , Appellem reprehendens , quod eundem fulminantem depinxisset , & ita spoliasset veris , ac propriis insignibus , & ornaret falsis , quæ nullam apud posteros fidem essent habitura.

2. Cavendum est , ne , in meliorum copia , res conlectemur viles , & facta leviora. Ut enim scire ajebat (2) Phavorinus , turpius est exigue , frigideque laudari , quam graviter vituperari. In magnis tamen viris aliquando etiam res minusculas commendare operæ pretium est.

3. Denique erit hoc observandum diligenter , ut non communes , ac pervagatas , sed proprias cujusque , vel saltem cum paucis communes laudes præcipue conlectemur. Quapropter plane , ac perfecte perspecta tibi esse debent , quæ propria sunt illius , de quo agitur.

De personarum laudatione satis superque dictum à nobis hactenus. Unde intelligi facile potest , quomodo debeat institui Vituperatio , quippe ubi omnia prorsus debent inverti. §.

(1) Stratonice Seleuci Syriae Regis uxor.

(2) Phavorinus insignis Philosophus , Arelate in Gallia natus tempore Hadriani , cui fuit infensissimus.

§. VIII. De oratione natalitia, seu Genethliaca.

Quid est oratio Genethliaca?

R. Oratio Genethliaca, quæ etiam Genethliacum, vel Genethliacus appellatur, est oratio, qua alicujus dies natalis celebratur.

Quas partes, seu capita continet oratio Genethliaca?

R. Quatuor. 1. Continet laudes parentum, atque majorum, quæ jure quodam hereditario pertinere videntur ad prolem. 2. Spem, quam præbet puer vitæ aliquando cum laude peragendæ. 3. Lætitiam, & gratulationem de prole feliciter parentibus nata. 4. Vota, & preces ad Deum O. M. ut infanti fauste, feliciter, prospereque eveniant omnia, utque in patriæ decus, & ornamentum adolescat.

Undenam excitari potest spes illa, atque expectatio de futura prolis virtute, ac gloria?

R. Ex variis circumstantiis: 1. ex genere; 2. ex facie; 3. ex futura educatione; 4. ex signis, ex portentis, ex victoriis, prosperisque aliis eventis, si qua forte id genus pueri ortum vel antecesserint, vel comitata fuerint, aut subsecuta, qualia de Augusto narrantur, itemque de Pyrrho Rege, qui maternis uberibus appensus dixit: Βούλομαι, volo, quæ vox transit in omen futuræ audaciæ. Si quis parentum enixe efflagitantium precibus, ac votis concessus à Deo fuerit, habebis uberem bene augurandi campum, ut de Scipione memorat A. Gellius, & ut Ludovico Magno contigisse vidit ætas nostra.

Quæ-

Quoniam est dispositio Genethliaci?

R. Exordium erit lætitiae & gratulationis plenum, & ductum ab aliqua temporis, loci, vel personæ circumstantia. Ita Maro eximium illud (1) Salonini, seu alterius Genethliacum exorditur ab apostrophe, quæ gestientem quamdam lætitiam exprimit:

Sicelides Musæ, paullo majora canamus.

Confirmatio continebit parentum laudes, & varias causas, quæ lata omnia de infante sperare jubeant. Vide quam magnifice locum hunc tractet Virgilius, quantaque non vereatur augurari de puerō, ex patris virtute notissima:

Ille Deūm vitam accipiet, Divisque videbit
Permīstos heroas, & ipse videbitur illis:
Pacatumque reget patriis virtutibus orbem.

At simul heroum laudes & facta parentis
Jam legere, & quæ sit poteris cognoscere virtus:
Molli paullatim flavescat campus arista &c.

Peroratio denique vota, precesque pro filii, &
parentum incolumitate continebit.

Quid est Oratio Lustrica?

R. Ea est, quæ à veteribus nonnullis habebatur,
quan-

(1) *Saloninus sic vocatus, quod natus fuerit quo anno pater Asinius Pollio Salonam Dalmatiae civitatem expugnavit.*

quando infanti nomen imponebatur. Vocabatur autem *Lustrica oratio*, quod dies ille *Lustricus*, seu *lustralis* vulgo diceretur. Verum quoniam illud orationis genus penitus apud nos videtur obsoleuisse, in illo tractando operam, & oleum non perdemus.

§. IX. De oratione nuptiali, sive Epithalamio.

Quid est *Epithalamium*, seu *oratio nuptialis*? R. *Epithalamium*, ut vox ipsa satis indicat, est oratio, qua alicujus nuptiæ celebrantur. Sic autem appellatur à voce *Græca θάλαμος*, quæ *cubiculum nuptiale* significat.

Quoꝝ sunt partēs Epithalamii?

R. Quatuor. 1. Dicitur generatim, & universè de nuptiarum laudibus, & de bonis matrimonii, quo scilicet hominum societas primum cœpit, urbes conditæ sunt, genus humanum propagatur, vitæ levantur incommoda, & mutua caritas, atque benevolentia cognationibus, & adfinitatibus serpit, atque diffunditur.

2. Pars, quæ præcipuam quamdam curam, diligentiamque desiderat, continet laudes utriusque conjugis. Ducuntur autem laudes illæ à Parentibus, à Patria, ab honoribus, fortunisque, à corporis, animique dotibus, & à ceteris illis capitibus, unde laudari homines solent, de quibus fuse diximus supra.

Tertio loco laudatur nuptiarum apparatus, atque celebritas popularium, & adfinium prædicatur lætitia, & aliqua etiam laude solent aspergi, qui

qui ad nuptias convenere. 4. Denique præcipuis, & faustis omnibus clauditur oratio, & vota Deo, superisque pro felici liberorum ortu, mutuaque conjugum concordia nuncupantur.

§. X. De laudatione Funebri.

Quid est oratio Funebris?

R. Ea est, quæ habetur vel in ipso funere, vel in anniversario funeris die, cùjusmodi erant orationes illæ, quas ad Mausoli sepulcrum quotannis haberi jussit Artemisia; itemque quæ Athenis habebantur in laudem eorum, qui in bello pro patria cecidissent, qualis est oratio Periclis apud Thucydidem.

Quænam est origo hujusmodi Funebrium orationum?

R. Illarum inventor apud Græcos fuit Solon, unus è septem Sapientibus: apud Romanos vero Valerius Publicola; qui collegam suum Junium Brutum, in pugna contra Tarquinios cæsum, funebri oratione prosecutus est; tantoque id populi applausu fecit, ut exinde mos ille obtinuerit, publice laudandi Duces eos, qui in bello cecidissent, & à Romanis mos ille ad ceteras gentes, & ad ipsos etiam Christianos manaverit. Hujusmodi porro laudationibus mendosam factam esse historiam, auctor est Tullius, & post illum Livius, quod nempe supra modum res in illis augeri solerent, & bene multa adsentatorie magis quam vere dicerentur, ut fere fit.

Quot

Quot partibus constat oratio Funebris?

R. Orationem funebrem tribus omnino partibus constare debere: nimurum laude, consolatione, & parænesi, sive adhortatione. Laude mortui; consolatione Parentum, & adfinium; Parænesi vero, seu adhortatione ad superstites, ut in mortui vitam, atque virtutes, tamquam in exemplar, intueantur.

De artificio funebris orationis.

Quodnam esse debet & undenam ducendum est illius Exordium?

R. Magnam quamdam mæroris, luctusque significationem præ se ferre omnino debet. Duci autem poterit, 1. ab exclamacione. Tale est Exordium brevis illius, sed perelegantis orationis Tullianæ in morte Craffi Oratoris clarissimi: *O fallacem nostram spem, fragilemque fortunam, & inanes nostras contentiones, quæ in medio spatio sepe franguntur, & corrunt, & ante in ipso cursu obruuntur, quam porciūnū conspicere potuerunt?*

2. Duci potest Exordium à descriptione funebris apparatus, vel à mæsto audientium silentio, quæ res utraque sacrum quemdam horrorem audientibus incutiat.

3. Duci poterit Exordium à gravi aliquo apophthegmate de fragili, caducae rerum humanaarum sorte, quæ nobis, ut cum maxime, ante oculos obversatur.

4. Duci poterit ab adjunctis, quæ forte laudandi mortem circumstetere.

5. Denique abruptum exordium ad movendam commiserationem longe aptius esse videtur, quam temperatum, ac lene.

Quid factō opus est in Confirmatione?

R. Tribus illis, quæ supra memoratæ sunt, partibus constabit Confirmatione, laude nimirum, consolatione, atque Parænesi; laude mortui, consolatione propinquorum, ac amicorum, & Parænesi ad adstantes. Quod attinet ad mortui laudes, vide quæ diximus de Panegyrico, à quo nimirum hoc tantum differt oratio funebris, quod audientium voluptatem sequatur, & captet Panegyricus; funebris vero laudatio nihil nisi majori serviat; atque tristitiae, unde vitandum erit diligenter, quidquid lætitiam, gaudiumque posset animis ingenerare. Hoc artificium observare poteris in illo Horatii Carmine, ubi (1) Quintiliū amici, & adfinis sui mortem lamentatur:

Ergo Quintilium perpetuus sopor
Urget? cui pudor, & justitiae soror
Incorrupta fides, nudaque veritas,
Quando ullum invenient parem?

- Marentium dolorem utcunque consolabitur,
1. Vitæ ab amico laudabiliter actæ felix recordatio.
2. Honores viventi, mortuoque habiti, & omnia,
quæ

(1) Quintilius poëta non contemnendus, Cremonensis dictus à Patria, diversus ab illo Quintilio Varo, qui Legiones amisit in Germania.

quæ virtutem illius testantur, tum publica, tum privata monumenta. 3. Spes minime dubia de immortali ævo, quo ille inter felices animas in cœlo perfruitur, vel aliquando fructus est. 4. Filii, nepotesque superstites, ad quos paternæ virtutis hereditas transit.

Quod si forte pro patria pugnans occubuerit is, qui laudatur, tunc enim vero poteris vagari liberius in hoc uberrimo dicendi campo, quem tibi aperit Tullius, cum Martiam Legionem, quæ in (1) prælio Mutinensi fortiter pugnans cecidit, magnificentissime laudat Philippica 13. Illi impii, quos cœcidistis, etiam apud inferos paenas parricidii luent: vos vero, qui extrellum spirum in victoria effudistis, piorum estis sedem, & locum consecuti. Brevis autem vobis vita data est, at memoria bene redditæ vitæ sempiterna, quæ si non esset longior quam hæc vita, quis esset tam amens, qui maximis laboribus, & periculis ad summam laudem, gloriari que contenderet? Et post pauca: Sed quoniam, Patres Conscripti, gloriæ munus optimis, & fortissimis civibus monumenti honore persolvitur, consolemur eorum proximos, quibus optima hæc est quidem consolatio, parentibus quod tanta Reip. præsidia genuerunt; liberis, quod habebunt domestica exempla virtutissim conjugibus, quod viris carebunt, quos laudare, quam lugere præstabit; fratribus, quod in se ut corporum, sic virtutum similitudinem esse confident.

De-

(1) In bello contra M. Antonium, Hirtius, & Pansa Consules cœsi.

Denique adstantibus , earum , quas celebrasti ,
virtutum recordatione stimulus admovere cona-
beris.

Quodnam esse debet Perorationis artificium?

R. Hæ sunt Perorationis partes. 1. Æternam
apud Superos felicitatem adprecari mortuo. 2. Sem-
piternam eidem apud posteros exoptare , ac pol-
liceri memoriam. 3. Summum illius desiderium
in auditorum animis excitare , his , vel similibus
Horatii verbis , de eodem Quintilio:

Quis desiderio sit pudor , aut modus
Tam cari capit? Præcipe lugubres
Cantus , Melpomene &c.

§. XI. De oratione Eucharistica.

Quid est oratio Eucharistica , seu Eucharisticum?

R. Oratio Eucharistica dicitur ea , qua ob
accepitum insigne aliquod beneficium
gratias agimus alicui ; cuiusmodi est luculenta illa
oratio , qua Ausonius Orator , & Poëta Gallus
Imperatori Gratiano discipulo quondam suo
gratias egit pro Consulatu ab illo accepto. Traxit
autem suum illud Eucharistici nomen à voce Græca
εὐχαριστίην , gratias agere.

Quot sunt præcipue partes Eucharistici?

R. Tres. 1. Significamus lœtitiam obortam ex
accepto beneficio. 2. Accepti beneficij magnitu-
dinem amplificamus. 3. Gratum , & memorem
animum pollicemur.

Quodnam esse debet Exordium orationis Eucharistiae?

R. Exordium versari debet in aperto quodam, candidoque dicendi genere, & magnam grati animi foras quodammodo erumpere gestientis significationem continere. Duci autem poterit, 1. à beneficij magnitudine, cui, pro eo ac par est, verbis exornando, te imparem profitearis. Sic Tullius in oratione post redditum habita in Senatu;
Si, Patres Conscripti, pro vestris immortalibus in me, fratremque meum, liberosque nostros meritis, parum vobis cumulate gratias egero; queso, obtestorque, ne meae naturae potius, quam magnitudini beneficiorum id tribuendum putetis. Quæ enim tanta potest existere ubertas ingenii, quæ tanta dicendi copia, quod tam divinum; atque incredibile genus orationis, quo quisquam possit vestra in nos universa promerita, non dicam complecti orando, sed percensere numerando?

2. Duci poterit Exordium ab excusatione diuturni silentii post acceptum beneficium. Hoc pacto Tullius exorditur suum illud eximium Eucharisticum ad Cæsarem pro impetrato M. Marcelli reditu:
Diuturni silentii, P. C. quo eram his temporibus usus, non timore aliquo, sed partim dolore, partim verecundia, finem hodiernus dies adiulit; idemque initium quæ vellem, quæque sentirem, meo pristino more dicendi.

Quid factò est opus in Eucharistici confirmatione?

R. 1. Amplificanda est, & in bono lumine collocanda beneficij magnitudo. 2. Laudanda est persona, à qua profectum est beneficium.

77

Quomodo amplificanda est beneficij magnitudo?

R. Amplificabitur quadrifariam. 1. A persona, quæ gratificabitur, si Rex, si in amplissimo dignitatis gradu collocata. Hinc enim augetur beneficij magnitudo. 2. A persona, cui gratificatur, si beneficium sit egenti collatum, si immerenti, si ad plures pertineat. 3. A re, qua gratificatur, si honesta, si opportuna, si exoptata, si difficilis. 4. A ratione, & modo; si non ægre, sed libenti animo; si non rogatu alieno, sed sponte; si non redditum sit, sed datum beneficium; si non tarde, sed cito, & opinione citius. Ut enim est in veteri Proverbio, *Bis dat, qui cito dat: & interdum etiam beneficij loco ducitur, si cito negetur.*

Quidnam in Peroratione servandum est?

R. Accepti beneficij memoriam numquam interituram, & trabali, ut ita loquar, clavo figendam esse polliceberis. Sed nullum, quod sciām, illustrius exemplum adferri potest, quam Eucharisticum Ænæ ad Didonem, Æneid. I.

O sola infandos Trojæ miserata labores,
Quæ nos reliquias Danaum, terræque, marisque
Omnibus exhaustos jam casibus, omnium egenos
Urbe, domo socias. Grates persolvere dignas
Non opis, est nostræ Dido: nec quidquid ubique est
Gentis Dardaniæ, magnum quæ sparfa per orbem.
Dii tibi (si qua pios respectant numina, si quid
Usquam justitiæ est, & mens sibi conscientia recti)
Præmia digna ferant.

Vide etiam apud Livium Lib. 28. orationem Saguntinorum gratias agentium Senatui Rom. quod eorum caussa bellum adversus Hannibalem fulcepisset. Vide in Bello Jugurthino orationem Bocchi Regis ad Syllam. Habes quoque lectissimam illam epistolam, qua Tullius agit gratias Marcello ob supplicationem sibi ejus opera decretam.

§. XII. De Epinicio, & Gratulatione.

Quid est Epinicio?

R. Est gratulatio ob reportatam victoriam. Sic autem nuncupatur à voce Græca, *victoria*.

Quodnam esse debet illius artificium & dispositio?

R. Exordium, si unquam alias, erit splendidum, floridumque, & hilaritatis plenum, ac lætitiae. Videtur autem abruptum magis esse debere, quam temperatum.

In confirmatione amplificabitur, 1. Belli necessitas. 2. Belli difficultas, 3. Æquitas in suscipiendo, diligentia in apparando, virtus in gerendo, celeritas in conficiendo. 4. Enumerabuntur comoda, & utilitates victoriæ, quæ timore populos, direptione urbes, vastitate Provincias liberaverit. Laudabuntur fortissimi viri, qui in bello strenue pugnantes cecidere. Ita Virgilius Euryalum, Nysumque laudibus in coelum extollit Æneid. 9.

Fortunati ambo: si quid mea carmina possunt,
Nulla dies umquam memori vos eximet ævo;

Dum domus Æneæ Capitoli immobile saxum
Accolet, imperiumque pater Romanus habebit.
Sua etiam laus tribuetur præfectis, ducibusque
præcipuis, qui in victoriae partem aliquam venere.
Ita Ruxenus, (1) hisce inscriptionibus, Augusti fa-
culo dignis, consecravit nomen illorum, qui bel-
lum Batavicum una cum Ludovico Magno ad-
ministraverant.

LUDOVICO PRINCIPI CONDÆO TRIBUS
AD SENEFUM EXERCITIBUS FRACTIS.

HENRICO PRINCIPI TURRENIO, SERVATIS
REGNI FINIBUS, PULSIS ULTRA RHENUM
GERMANIS, EORUM EXERCITU
QUATER CÆSO.

FRANCISCO MARESC. CREQUIO, DELETIS
INCRUENTA VICTORIA GERMANORUM
COPIIS, &c.

Peroratio vota continebit pro victoris incolu-
mitate, gloria, felicitate, postquam Deo O. M.
victoriarum largitori, & bonorum omnium fonti,
grates fuerint, ut par est, rite persolutæ.

Quod si non pro victoria, sed pro adepto in-
signi quopiam honoris, ac dignitatis gradu, fiat

(1) *P. Carolus de la Rue S. J.*

alicui gratulatio; significabis 1. Quantam cœperis animo voluptatem ex illius nova dignitate. 2. Quanta sit etiam publica hilaritas, & lætitia. 3. Honoris, & gradus amplitudinem verbis extolles. 4. Non casu, non prehensione, & ambitu, non precibus, munieribusque sed meritis, rebusque gestis fuisse comparatum hunc honorem, quem multi ambierint, perpauci obtinuerint.

Pertinent etiam ad demonstrativum genus, Soteria, Propempticon, Apobaterion, & Epibaterion.

Quid est Soteria?

R. Soteria vocamus orationis genus quoddam, quo restitutam alicui sanitatem gratulamur, & pro illius incolumente, & salute grates agimus Superis.

Quid est Propempticon?

R. Est Oratio, qua discedentem aliquem faustis omnibus, votisque prosequimur; cuiusmodi luculentum habes exemplum in egregio Horatii Propemptico ad Virgilium Athenas proficiscentem:

Sic te Diva potens Cypri,
 Sic (1) fratres Helenæ lucida fidera,
 Ventorumque regat pater,
 Obstrictis aliis, præter (2) Iapyga,
 Navis quæ tibi creditum
 Debes Virgilium, finibus Atticis
 Reddas incolumen, precor,
 Et serves animæ dimidium meæ.

(1) *Castor*, & *Pollux*.

(2) *Japyx* ventus flans ab *Apulia*, quæ olim *Japygia* dicebatur.

Quid est Apobaterion?

R. Est oratio quam habemus discedentes ex patria, vel ex alio quodam loco, ubi cum singulari benevolentiae significatione sumus excepti. Hujus generis est Aeneæ discedentis oratio ad (1) Helenum, & Andromachem, Aeneid. 3.

Hos ego digrediens lacrimis ad fabar obortis:
Vivite felices, quibus est fortuna peracta
Jam sua: nos alia ex aliis in fata vocamur.
Vobis parta quies: nullum maris æquor arandum;
Arva neque Ausoniae semper cedentia retro
Quærenda. Effigiem Xanthi, Trojamque videtis,
Quam vestræ fecere manus: melioribus opto
Auspiciis, & quæ fuerit minus obvia Grajis.

Quid est Epibaterion?

R. Est oratio, quæ habetur ab illo, qui post longam peregrinationem domum incolumis rediit. Vide Scaligerum Lib. 3. Poëtices.

CA-

(1) Helenus Priami filius, vaticinio clarus, ex captivo factus Epiri Rex ab ipso Pyrrho.

CAPUT SECUNDUM.

78

DE ORATIONIBUS, *QUÆ PERTINENT AD*
genus deliberativum.

Quænam est materia generis deliberativi?

R. Illius materia sunt res omnes in manu, & arbitrio nostro positæ: Ut enim ait Tullius: *Tollitur omnis deliberatio, si intelligatur quidquam fieri non posse, aut imponatur necessitas. Neque enim quisquam deliberat, qua ratione perpetuo victurus sit, quoniam intelligit sibi moriendi necessitatem incumbere: neque quisquam deliberat, quomodo volare possit, scit enim sibi alas non adesse.*

Quisnam est finis generis deliberativi?

R. Honestas, & utilitas.

Quænam orationes spectant ad genus deliberativum?

R. Pertinent ad genus deliberativum, suasio, dissuasio, hortatio, dehortatio, conciliatio, concitatio, commendatio, petitio, & consolatio.

§. I. De Suasione, & Dissuasione.

Quid est Suasio?

R. Est oratio deliberativa, qua ostenditur, quid faciendum sit. Dissuasione vero contrarium suadetur.

Vnde nam ducuntur argumenta Suasioni, vel Dis-
suaioni propria?

R.

R. Ducuntur ab honesto , ab utili , à necessario , à facili , à jucundo , cum aliquid suadendum est , & è contrariis capitibus , cum est aliquid dissuadendum.

Quid est Honestum ?

R. Honestum id intelligimus , inquit Cicero , quod tale est , ut detracta omni utilitate , per se ipsum laudabile sit , & expetendum ; v. gr. si quempiam hortemur , ut M. Attilii Reguli exemplo malit ad mortem , vel ad vincula reverti , quam datam hostibus fidem fallere. Ita Tullius in Maniliana probat , suscipiendum esse bellum Mithridaicum , ut deleatur ignominia , quam Populo R. Mithridates inussit , cum una hora tot civium Romanorum millia jussit occidi.

Quid vocas utile ?

R. Utile est , quod propter commodum expetitur ; sive adjunctam habeat honestatem , ut gloria , honor , dignitas ; sive non habeat , ut divitiae , valetudo , tranquillitas , malorum depulsio &c. Ex his locis Catilina conjuratos hortatur , apud Sallustium , ad nefarium facinus , quod ille maximum , atque pulcherrimum vocat : *Nobis* , inquit , *est domi inopia , foris æs alienum , mala res , spes multo asperior*. Denique quid reliqui habemus , præter miseram animam ? Quin igitur expurgiscimini ? en illa , illa , quam saepe optatis , libertas ; præterea divitiae , decus , gloria in oculis sita sunt. Fortuna ea omnia viatoribus præmia posuit.

Quid vocas Necessarium ?

R. Necessarium dicitur id omne , sine quo fatus ,

Ius , aut dignitas stare non potest. Seu mavis cum Scalgero , necessarium dicitur , quod ita utile est , ut sine eo res NEC ESSE possit , unde & nomen derivatum est. Hujusce porro loci magna vis est. Multi enim sunt animis adeo segnibus , ut tum quoque , cum aliquid honestum , & utile esse norunt , tamen si res sit cum magno labore conjuncta , facile terreantur : apud tales ratio necessitatis est compendiosa via ad persuadendum. Ejusmodi est Ciceronis argumentum in 4. Philipp. *Agitur enim non qua conditione viēluri , sed viēluri ne simus , an cum suppicio , ignominiaque perituri.* Ab hoc potissimum loco , itemque ab honesto Æneam Hector ad fugiendum hortatur , Æn. 2.

Heu ! fuge nate Dea , teque his , ait , eripe flammis. Hostis habet muros , ruit alto à culmine Troja. Sat Patriæ , Priamoque datum : si Pergama dextra Defendi possent , etiam hac defensa fuissent.

Quid vocas Facile ?

R. Facile illud est , quod sine magno labore , sumptuive , aut molestia , brevi tempore fieri potest , quæ sane omnia maximo sunt ad persuadendum momento. Frustra enim suadetur illud , quod vix , aut ægre admodum fieri posse creditur. Ac prop- terea , si quis hac de re scrupulus hæreat auditoriis , is ante omnia ex illorum animis omnino erit eximendus. Ita Venerem in suam sententiam conatur adlicere astuta Juno , Æneid. 4.

Mecum erit iste labor: nunc qua ratione, quod instat,
 (1) Confieri possit, paucis, adverte, docebo.

Quid vocas Jucundum?

R. Jucundum dicitur, quod honestam habet voluptatem vel animi, vel corporis; sic nuncupatum, inquit Tullius, à juvando, quod nempe juvet vel utrumque, vel alterutrum. Hinc dicitur illud argumentum Tullii: *Hoc velim tibi persuadeas, si rationibus meis à te provisum esse intellexero, magnam te ex eo, & perpetuam voluptatem esse capturum.*

Quænam in suadendo, vel dissuadendo præcipue spectanda sunt?

R. Tria. 1. Quid sit, de quo deliberetur. 2. Qui sint, qui deliberent. 3. Quis sit, qui suadeat, vel dissuadeat.

Quid spectandum est in re, de qua deliberatur?

R. Quinque illa, de quibus egimus enucleare: An sit honesta, an utilis, an necessaria, an facilis, an jucunda.

Quid spectandum est in iis, qui deliberant?

R. Caput artis est nosse penitus animos eorum, qui deliberant, eorumque voluntates, ac naturas festine odorari, ut possis ambitiosis splendida, avaris utilia, voluptuosis jucunda proponere, & suo, quod ajunt, hamo quemque piscari.

Prudentis ergo Oratoris erit videre, an agat cum Regibus, aut viris principibus, apud quos, ut aiebat Parysatis illa, verbis byssinis opus est; an

(1) Confieri *pro confici*, vox parum usitata.

cum nobilibus , quos honesta , ac laudabilia tangunt ; an cum plebe , bellua multorum capitum , apud quam negotium tractare longe difficillimum est. Neque vero satis est dignitatem spectare : sed habenda est etiam ingenii , morum , & ætatis ratio , ut rem facilius possis ad exitus optatos perducere. Jure igitur merito de variis variarum ætatum , conditionum , & gentium moribus hic agi solet ab artis Magistris , & in primis ab Aristotele.

§. II. De variis variarum ætatum moribus.

Quinam sunt juvenum , virorum , ac senum mores ? R. Ætatis cuiusque mores graphice admundum ita pingit Horatius in Arte Poëtica :

Imberbis Juvenis tandem , custode remoto ,
Gaudet equis , canibusque , & aprici gramine campi :
Cereus in vitium flecti , monitoribus alper ,
Utilium tardus provisor , prodigus æris ;
Sublimis , cupidusque & amata relinquere pernix .
Conversis studiis , ætas , animusque virilis
Quærit opes , & amicitias , inservit honori :
Commisisse cavet , quod mox mutare laboret .
Multæ senem circumveniunt incommoda ; vel quod
Quærit , & inventis miser abstinet , ac timet uti ;
Vel quod res omnes timide , gelideque ministrat ;
Dilator (1) spe longus , iners , avidusque futuri ,
Dif-

(1) Tardus ad bene sperandum ob timiditatem δυσέλπιος ,
ait Aristot. vel, ut alii malunt, spem vitae longam habens.

Difficilis, querulus, laudator temporis acti,
Se puerο : censor, castigatorque minorum.

Juvenes igitur flagrant cupiditatibus, facile, & vehementer exscandescunt, unde adolescentia quidam quasi rationis æstus appellatur ; honestum utili præferunt, aperti sunt, candidi, & misericordes ; sua enim innocentia ceteros metiuntur. Prodigi sunt, & in sumptus effusis nondum enim egestatem sunt experti : ad risum, & dicacitatem sunt propensi.

At dispar omnino est senum ratio. Facile succensent illi quidem, sed non æque parent iræ ; quia ut scite Horatius, *Lenit albescens animos capillus, Litium, & rixæ cupidos protervæ.* Parum sperant, quia diu vixerunt ; pauca moliuntur, præteritis gaudent, facetos, ac ridiculos odere, solliciti sunt officiorum exactores, ad rem attenti, lenti, difficiles, suspiciosi ; sæpe enim aut se, aut alios delusos meminerunt. Præterea queruli sunt, morosique, ut ait Tullius, *in fragili corpore odiosa est omnis offensio.*

Denique verbosi sunt, & loquaces, quia dicere amant.

Sed facile hoc illorum ætati condonandum ob egregias virtutes, quibus hoc vitium abunde compensant.

Virilis ætas senectutem inter, & adolescentiam interjecta, ac in quodam quasi confinio posita, utriusque virtutum, vitiorumque particeps est, & utriusque indolem, velut ex vicinia, trahit. Juven-

ventus fortis est , sed intemperans ; senectus est temperans , sed timida ; virilis ætas fortis est , sobriaque. Juventus nimis credula est ; senectus nimis suspiciosa ; virilis ætas pro rerum natura vel confidit , vel diffidit. Juventus querit honestum potius quam utile : senectus utile magis quam honestum , virilis ætas & honestum simul , & utile.

Puerilis denique ætas effervescit facile ; mutatur in horas ; magnam habet indolem ad virtutem ; gloriæ , honorique mirum in modum velificatur. Audi Tullium Lib. 5. de Finibus : *Quanta sunt puerorum decertantium studia ! ut illi efferuntur lætitia, cum vicerint ! ut se accusari notent ! quam cupiunt laudari ! quos illi labores non perferunt, ut æqualem principes sint !*

§. III. De moribus Nobilium , Divitum , & Plebejorum.

Quinam sunt Nobilium mores ? R. Nobiles sunt honoris , ac gloriæ vel maxime studiosi , & , si Apulejana voce uti fas est , sunt in primis honoripetæ. Solent autem non solum ignobiles adspernari , sed etiam homines novos , qui primi ex sua gente sunt honores consecuti. Ita Metellus contemnebat C. Marium , illique Consulatum invidebat. Unde sic de eo Sallustius : *Inerrat contemptor animus , & superbia , commune nobilitatis malum.*

Quinam sunt Divitum mores ?

R. Divites , si præfertim divitias sunt nuperrime consecuti , contumeliosi ferme sunt , ac superbii Nem-

Nempe facile sibi perluadent, præstare se ceteris, quia dīvitias possident, quibus venalia sunt omnia. Præterea solent mollitia, luxuque diffluere.

Hanc, quam memorabimus, novorum dīvitum adrogantiam scite tangit Cicero, cum de T. Roscio ait: *Qui in sua re fuisset eagentissimus erat, ut sit, insolens in aliena: & Maro, cum ait de Numano:*

Vociferans, tumidusque novo præcordia regno.

Qui sunt denique Plebeiorum mores?

R. Germanos plebis mores suis coloribus scite pingunt Sallustius, & Horatius, aliisque dum ajunt, *plebem esse belluam multorum capitum ... pluma, & vento mobiliorē esse ... opinione duci magis quam veritate ... ire quo itur, non quo eundum est ... privatīs commodis servire potius quam publice vel honestati, vel cupiditati ... cupidam esse rerum novarum ... Denique pessimi argumentum turbam esse.*

De variis Reipublicæ formis.

Neque vero in deliberatione satis est atatis, & conditionis cujusque indolem, ac studia diligenter spectare. Spectandi præterea sunt Reipublicæ mores, qui scilicet, pro varia politiæ forma, solent maximopere variare. Aliter igitur agendum apud Gallos, Hispanosque, & Lusitanos, quibus Rex unus summo cum imperio præst: aliter apud Helvetios, Batavosque, ac Venetos, apud quos vel plebs, vel Optimates dominantur.

Quid

Quid est (1) Monarchia?

R. Est unius dominatus, communem utilitatem spectans.

Quid est (2) Aristocracia?

R. Est optimatum imperium, cuiusmodi est apud Venetos. Quod si optimates illi pauci sint, & propriae, non vero publicæ serviant utilitati, vocabitur (3) Oligarchia.

Quid est (4) Democratia?

R. Est imperium populi, cuiusmodi ferme est apud Helvetios. Quod si plebs infima dominetur (5) Ochlocratia. Addi potest Anarchia, quæ solet ex turbulentissimis temporibus exsurgere, cum sine Rege certisque magistratibus, fluctuat labefactum imperium.

De variis variarum gentium moribus.

Varios præterea gentium mores, ingeniumque accurate cognosces, & illorum germanam indolem perspectissimam habebis, ut possis ad illam sermonem accommodare, ut monet Horatius:

Intererit multum Davusne loquatur, an heros,
Colchus, an Assyrius, Thebis nutritus, an Argis.

(1) Μόνος, solus, & ἀρχὴς, princeps.

(2) Αριστοί, optimates, & κράτος, imperium.

(3) Ολίγος, paucus, & ἀρχὴ, principatus.

(4) Δῆμος, populus, & κράτος, potentia.

(5) Οχλος, turba, & κρατέω, dominor.

Quænam igitur est variarum Europæ Gentium industria?

R. Galli sunt humani, hospitales, candidi, urbani, lauti, audaces, bellicosi, mobiles præcipites, longæ spes impatiens, faciles ad obliuiscendas injurias aque, ac benefacta; acribus initis, injurioso fine, & ut ait Florus de veteribus Gallis, primo impetu plusquam viri, secundo non item; magni peregrinatores; unde jure dictum est, *Nulum bellum sine milite Gallo.*

Germani sunt simplices, aperti, fortes, animarum prodigi, veri amici, verique hostes, inquit Scaliger. Belgæ, Batavique medium ferme tenent Gallos inter, atque Germanos. Hispani sunt constantes, sedati, lenti in consiliis, laboris, ac disciplinæ tolerantes: vile ministerium, etiam si spes magna adfulgeat, aversantes. Itali sunt cunctatores, ingeniosi, sapientes, mentis excelsæ, ac reconditæ, & ad regendum omnino nati, ut ait Virgilius:

Tu regere imperio populos Romane memento:
Haec tibi erunt artes.

Poloni sunt feroce, bellicosi, & quos arte magis, quam vi possis superare. Moscovitiæ contra fraudulentem &c. Longum esset cetera persequi. Plura qui volet, adeat quæ ingeniosæ, & eleganter de præcipuis gentibus differunt Joannes Barclajus in icono animorum cap. 3, & sex proxime sequen-

tibus. Adeat item (1) Calvidii Læti Callipediam, ubi versibus elegantissimis diversarum Europæ gentium mores, & ingenium diligenter exprefsit.

Quid denique spectandum est in illo, qui suadet, vel dissuadet?

R. Tria maxime in illo spectanda sunt, prudentia, probitas, & benevolentia. Prudentia quidem, *Quia ius fidem habre solemus*, inquit Tullius Libro 1. de Officiis, *quos plus intelligere, ac videre, quam nos, arbitramur.* 2. Probitas: *qui quis versutior, & callidior, hoc invisiōr, & suspectior, detracta opinione probitatis, ait idem Tullius;* & si quem, licet peritum, ac prudentem ceteroqui, fallaciem tamen, & sui potius amantem credamus, quam nostri, ejus consilium penitus aversabimur.

3. Spectatur in suadente benevolentia: quia ut vel maxime prudens, & probus quis credatur, tamen si odisse nos, vel alteri parti melius velle existimetur, nequaquam nobis bene consulere velle judicabitur. Tria hæc complexus videtur Cicero, cum Lib. 2. ad Atticum ait: *Nunc mihi & consilio opus est tuis, & amore, & fide. Quare ad voluntate expedita erunt omnia, si te habebo.* Nam consilium ad prudentiam pertinet, fides ad virtutem, amor ad benevolentiam.

X. loci. §. IV.

(1) Verum nomen, Claudius Quilletus Medicus Gallus, vixit seculo proxime elapso.

§. IV. De Hortatione, & Dehortatione.

Quid differt Hortatio à Suafione?

R. Hoc differt, quod suadeamus ratione, consilio, hortemur vero motu, atque impulsu. Unde suasio propriè pertinet ad intellectum; Adhortatio vero pertinet ad affectum. Suasio docet, eoque plus habet argumentorum; Adhortatio vero inflamat, ac propterea plus habet caloris. Suasio facit, ut scias, quid factō sit opus; Hortatio facit, ut velis, & ausis, illiusque partes sunt, faces, ac stimulos veluti subjicere auditorum animis, illosque ad rem bene gerendam inflammare. Denique Suasio pertinet ad confirmationem; exhortatio vero conclusioni reservatur.

Quinam affectus sunt in hortatione concitandi?

R. Excitabis. 1. Spem, & fiduciam. 2. Amorem, & desiderium rei, quæ suadetur. 3. Æmulationem alienæ gloriae, quæ est potissimum ad feriendos animos telum. 4. Laudabis virtutem illorum, quos hortaris, illosque hortatu nequaquam indigere dices. Ut enim observat Tullius, in excitando, & in aciendo plurimum valet, si laudes eum, quem cohortaris. Ita socios recordatione virtutis inflamat Mnestheus apud Virg. Æneid. 5.

At media socios incedens nave per ipsos
Hortatur Mnestheus: Nunc nunc insurgite remis,
Hectorei socii, Trojæ quos forte suprema
Delegi comites; nunc illas promite vires,
Nunc animos, quibus in Getulis syrtibus ~~us~~,

Ionioque mari , (1) Maleæque sequacibus undis.
 Non jam prima peto Mnestheus, neque vincere certo:
 (Quamquam oh !) sed superent , quibus hoc,
 Neptune , dedisti.

Extremos pudeat rediisse. Hoc vincite , cives,
 Et prohibite nefas . . .

Illustre adhortationis exemplum habes apud Sallustium , ubi Catilina suos conjuratos ad ineundum prælrium ita hortatur: *Compertum ego habeo, milites, verba viris virtutem non addere; neque ex ignavo strenuum, neque fortem ex timido exercitu oratione imperatoris fieri. Quanta cujusque animo audacia natura, aut moribus inest, tanta in bello patere solet. Quem neque gloria, neque pericula excitant, nequicquam hortere. Timor animi auribus officit. Sed ego vos, quo pauca monerem, advocavi; simul uti caussam mei consilii aperiem. Scitis equidem, milites, sociordia, atque ignavia Lentuli quantum ipsi, nobisque clades adulterit; quoque modo, dum ex urbe præsidia operior, in Galliam profici nequiverim. Nunc vero, quo loco res nostræ sint, juxta mecum omnes intelligitis. Exercitus hostium duo, unus ab urbe, alter à Gallia obstant: diutius in his locis esse, si maxime animus ferat, frumenti, atque aliarum rerum egestas prohibet. Quocumque ire placet, ferro iter aperiendum est. Quapropter vos moneo, uti forti, atque parato animo sitis; & cum prælrium inhibitis, memineritis, vos, divitias, decus, gloriam,*

(1) Malea promontorium in mare procurrrens, quod periculosa reddit navigationem.

præterea libertatem, atque patriam in dextris vestris portare. Si vincimus, omnia nobis tuta erunt: commetus abunde, municipia, atque coloniae patebunt. Sin metu cesserimus, eadem illa adversa fient; neque locus, neque amicus quisquam teget, quem arma non texerint. Præterea, milites, non eadem nobis, & illis necessitudo impendet. Nos pro patria, pro libertate, pro terra certamus: illis supervacaneum est pro potentia paucorum pugnare. Quod audacius aggredimini, memores pristini virtutis. Licuit nobis cum summa turpitudine in exilio etatem agere. Potuisse nonnulli Romæ, amissis bonis, alienas opes exspectare. Quia illa fœda, atque intoleranda viris videbantur, hæc sequi decrevisti. Si hec relinquere vultis, audacia opus est. Nemo, nisi vicit, pace bellum mutavit. Nam in fuga salutem sperare, cum arma, quis corpus tegitur, ab hostibus averteris; ea vero dementia est. Semper in pælio ius maximum est periculum, qui maxime timent: audacia pro mero habetur &c.

Dehortationis vero luculentissimum exemplum habes apud Livium Lib. 23. in oratione Calvii civis Campani, qua filium suum Perollam ab Hannibalis cæde dehortatur.

Dehortatio.

80
 Per ego te, fili, quæcumque jura liberos jungunt parentibus, precor, quæsoque, ne ante oculos patris facere, & pati omnia infanda velis. Paucæ horæ sunt, intra quas jurantes per quidquid Deorum est, dextræ dextræ jungentes, fidem obstrinximus, ut sa-

eratis de mensis (1) essēmus. Dīgressi à colloquio , ex templo in eum armamur. Surgis ab hospitali mensa , ad quam tertius Campanorum adhibilis ab Hannibale es : eam ipsam mensam cruentare vis hospitis sanguine? Hannibalem modo pater filio meo potui placare; filium Hannibali non possum. Unus aggressurus es Hannibalem? Quid illa turba tot (2) libertorum , servorumque? Quid in unum intenti omnium oculi? Quid tot dextræ? Torpescere in amentia illa? Vultum ipsius Hannibaloris , quem armati exercitus tremunt , quem horret populus Rom., tu sustinebis? Et si auxilia defint , me ipsum ferire , corpus meum oponentem pro corpore Hannibaloris , sustinebis? Atqui per meum peccatum petendus ille tibi , transfigendusque est. Deterreri bio sine te potius , quam illic vinci. Valeant preces apud te meæ , sicut pro te hodie valuerunt.

§. V. De Concitatione , & Conciliatione.

Quid est concitatio?

R. Est virulentum quoddam orationis genus , quo multitudinis præsertim animi , veluti quodam seditionis flabello , concitantur. Exemplum unum adferam ex Sallustio , apud quem Catilina ita socios ad coniurationem stimulat : ceterum mihi in dies magis animus accenditur , cum considero , quæ conditio vitæ futura sit , nisi nosmetipsos vindicamus in libertatem. Nam postquam resp.

in

(1) Ita genuina lectio , pro ederemus. (2) Melius quam liberorum , ut vulgo legitur.

in paucorum potentium jus, atque ditionem concessit, semper illis Reges, tetrarchæ vestigales esse: populi, nationes, stipendia pendere: ceteri omnes, strenui, boni, nobiles, atque ignobiles, vulgus sumus, sine gratia, sine auctoritate, his obnoxii, quibus, si resp. valeret, formidini essemus. Itaque omnis gratia, potentia, bonus, divitiae apud illos sunt, aut ubi illi volunt: nobis reliquerunt pericula, repulsas, judicia, egestatem. Quæ quoisque tandem patiemini, fortissimi viri? Nonne emori per virtutem præstat, quam vitam miseram, atque inhonestam, ubi alienæ superbiæ ludibrio fueris, per dedecus amittere? Verum enimvero, prob Deum, atque hominum fidem, victoria in manu nobis est. Viget ætas, animus valet; contra illis, annis, atque divitiis omnia consenserunt. Tantummodo incepto opus est: cetera res expediet. Etenim quis mortalium, cui virile ingenium est, tolerare potest, illis divitias superare, quas profundant in extenuendo mari, & montibus coequandis; nobis rem familiarem etiam ad necessaria deesse? Illos binas, aut amplius domos continuare; nobis larem familiarem nusquam ullum esse? Cum tabulas, signa, toremata emunt; nova diruunt, alia edificant; postremo omnibus modis pecuniam trahunt, vexant; tamen summa libidine divitias suas vincere nequeunt. At nobis est domi inopia, foris æs alienum, mala res, spes multo asperior. Denique quid reliqui habemus præter miseram animam? Quin igitur expurgescimini? En illa, illa, quam sepe optastis, libertas; præterea divitiae, decus, gloria in oculis sua sunt. Fortuna ea omnia victoribus præmia posuit. Res, tempus, pericula, egestas, bel-

belli spolia magnifica magis, quam oratio mea, vos hortentur. Vel imperatore, vel milite me uitimi: neque corpus à vobis aberit. Hec ipsa, ut spero, vobiscum una consul agam: nisi forte me animus fallit, & vos servire magis, quam imperare parati estis.

Conciliatione opponitur conciliatio, qua, vel nobis amorem alicujus conciliamus, vel dissidentes partes in concordiam, gratiamque reducere conamur. Sic olim Germanicus Cæsar tumultuantes legiones prudenti oratione sedavit, & Julius Cæsar exercitum compescuit, Quirites appellando, pro militibus, qua una voce obortam seditionem repente compressit.

§. VI. De Commendatione.

Quot sunt præcipua commendationis capita?

R. Tria. 1. Caussas commendationis exponemus, idque modeste, & verecunde; ut quod bene quis de nobis, aut de nostris meritis sit: quod simus cum illo vel sanguine, vel adfinitate, vel amicitia conjuncti: quod perfectissima nobis sit illius humanitas, fides, eruditio, virtus &c. Addere poterimus, scire nos Horatianum illud Epist. Lib. 1.

Qualem commendes etiam atque etiam adspice,
ne mox

Incutiant aliena tibi peccata pudorem.

Sed viri integritatem, & præclaras animi dotes
no-

nobis exploratissimas esse. 2. Exponemus negotium, cuius caussa commendatur à nobis quispiam. 3. Orabimus, atque obtestabimur, vel dicemus, nos pluribus nolle contendere, ne de ejus, quem rogamus, humanitate diffidere videamur. 4. Denique tum nostro, tum ejus, quem commendamus, nomine, omne grati, ac memoris animi officium pollicebimus,

Eft & obliquæ Comendationis genus, quo simulamus nos commendare nolle, quem interim vel maxime commendamus; ut si dicas, non quidem commendare te alteri Sextium velle: sed orare solum, ut, propius hominem noscere ne gravetur. Sperare enim futurum, ut cum gratias agere solant; qui commendarunt, alter tibi gratias agat, per quem viri tanti notitiam sit consecutus.

§. VII. De Petitione.

Quid est Petitio? R. Petitio est oratio, qua aliquid postulamus vel pro nobis, vel pro alio. Posterior hæc vocatur intercessio. Utriusque artificium paucis complexus est Servius, ubi Junonis ad Æolum orationem enarrat.

Rhetorum, inquit, est in omni petitione hoc observare. 1. Ut facile præstari possit, quod petitur. 2. Ut sit justa petitio. 3. Ut habeat modum, & adhibeat in illa moderatio: hoc est, ut si majora dari non possint, minoribus certe contenti videamur. 4. Ut sequatur expedita remuneratio.

Qua-

Quatuor hæc observare licet in Junonis petitione.
1. Enim docet rem facili negotio fieri posse:

Æole (namque tibi Divum Pater , atque hominum
Rex, Et mulcere dedit fluctus, & tollere ventos:)

2. Justam esse petitionem ostendit , dum inimi-
cam gentem infestatur :

Gens inimica mihi Tyrrhenum navigat æquor.

3. Adhibet moderationem , dum alterutro con-
tentia est:

Incute vim ventis , submersasque obrue puppes;
Aut age diversas , & disjice corpora ponto.

4. Beneficii præmium pollicetur:

Sunt mihi bis septem præstanti corpore Nymphæ,
Quarum , quæ forma pulcherrima , Deiopejam
Connubio jungam stabili , propriamque dicabo.

Quamplurima etiam petitionum exempla suppeditabunt epistolæ Ciceronis , quas inter , sideris instar , elucet elegantiissima illa ad Lucejum , quæ est 12. Libri 5. ad familiares , qua Lucejum enixe rogar , ut quæ in Consulatu suo gesserat Tullius , ea litteris quam primum velit consignare. Eam autem sic orditur : *Coram me tecum . . .*

§. VIII. De consolatione.

Consolator vel minor est, vel æqualis, vel major. Minori cautius, & mollius erit agendum. Amorem suum in primis testabitur; & ne de suo plus altero sapere velle videatur, ea quæ dictu opus erunt, ex quopiam Philosopho, vel alio summæ prudentiæ viro se aliquando audisse profitebitur. Æqualis pro communis amicitiæ jure facere se dicet. Major aget liberius, adeo ut, si quis immoderatius dolorem ferat, audeat etiam increpitare, sed leniter, & amice.

Si marentis dolor sit adeo gravis, & adeo recens, ut medicinam videatur respuere, bipartita erit oratio. Priori parte adfirmabimus parum idoneos esse nos, qui solemur alium, cum vel ipsi quoque consolatione plurimum egeamus: simulque privati nostri doloris caussas adferemus. Addemus non nos modo, sed omnes etiam bonos dolere, quod ipsum tamen qualemcumque marenti solatum debet adferre: quia scilicet

Levius communia tangunt.

Altera vero parte adferemus, quæ leniendo dolori sunt idonea; qualia sunt trita hæc, & pervulgata. 1. Vitæ communis conditio, quæ multis malis sit obnoxia. 2. Ejus, quem consolamur, doctrina, virtus, animi magnitudo. 3. Inutilitas, & dam-

damnum , unde dolor augeatur , non corrigatur.
 4. Patientiæ vis, quæ mitiget oninia , juxta illud
 Venusini Poëtæ:

Durum ; sed levius fit patientia
 Quidquid corriger est nefas.

5. Quam sit honestum in altissimo divinæ volun-
 tatis consilio semper adquiescere. 6. Quam sit sa-
 piente dignum , quamque laudabile sit , ratione,
 consilioque mitigare dolorem illum , qui die ipsa,
 ac tempore tandem aliquando defervescat.

Ad genus judiciale , quod *bellum togatum* jure
 vocare possumus , pertinent duæ orationum spe-
 cies , accusatio nimirum , atque defensio ; quæ non
 alia præcepta desiderant , quam quæ sunt hactenus
 à nobis allata : cum præsertim veterum judicio-
 rum ratio fuerit prorsus immutata.



ARTIS
RHETORICÆ

LIBER QUINTUS.

DE PRONUNTIATIONE.

Superest Pronuntiatio, sive actio, postrema quidem oratoriæ facultatis pars, si ordinem in tractando consideres: sed tanti tamen momenti, ut primas, secundas, & tertias ei Demosthenes merito, & jure tribuerit.

Quid est Pronuntiatio?

R. Est vocis, gestuumque, pro rerum, verborumque varietate, apta conformatio. Quanta porro sit illius vis, & utilitas, docet Tullius, cum ait, infantes, & indisertos homines, actionis dignitate, eloquentiæ sœpe fructum, palmamque tulisse, disertos vero bene multos, actionis deformitate, infantes fuisse judicatos. Hinc Pronuntiatio recte vocatur ab eodem Tullio, *Quædam corporis eloquentia*; & alibi, (i) *Sermo corporis* ab eodem etiam appellatur.

Quot

(i) *Ad Brutum.*

Quot res sunt ad recte pronuntiandum necessarie?

R. Tres: memoria, vox, & gestus. Est enim memoria quasi fundamentum actionis, de cuius vi, gratiaque multum depereat necesse est, si memoriter non pronuntietur oratio, & si orator non posset à commentariis oculos, & vultum avertere.

Viris tamen principibus, & in publica re vehementer occupatis vitio verti nequit, si recitent commentario; ut olim Augustus, qui, ne memoriae subiret aleam, vel in ediscendo sibi tempus abiret, fere de scripto dicebat; ut auctores sunt Suetonius, & Dio. Itemque Patrum nostrorum memoria Carolus V. ad Belgii Proceres orationem è scripto recitavit, cum se in regno Bruxellis abdicaret, illudque Philippo filio tradidit. Datur quoque eadem venia ægrotis, senibusque; aliis vero nequaquam.

§. I. De Memoria.

Quid est Memoria?

R. Memoria, ut est eloquentiæ pars, definitur à Tullio, *Firma rerum, ac verborum recordatio*. Est autem duplex memoriae genus. Alia est artificialis, alia naturalis.

Quid est artificialis memoria?

R. Artificium memoriae à veteribus traditum, constat locis, & imaginibus. Loci se habent infar chartæ, imagines vero instar scripturæ. Hanc artem primus apud veteres Simonides prodidisse, apud recentiores Raymundus Lillus illustrasse tradi-

ditur. Et vero iis, qui memoria valent, minime necessaria est, qui non valent, prorsus inutilis. Tu illam modo exerceto, ediscendis ad verbum, ut ait L. Crassus apud Cic. Lib. I. de Orat., quam plurimis, & tuis scriptis, & alienis: quod facilius fortasse praestabis, si, ante quam cubitum eas, attente ea, quæ mane voles ediscere, semel, aut iterum legas. Nisi te hæc exercitatio juverit, nihil sane in arte, quo possis juvari, reperio.

§. II. De Voce.

AD Actionis usum, ac laudem, maximam sine dubio partem vox obtinet, inquit Tullius de Oratore, neque iam refert, qualia sint quæ dicas, quam quomodo dicantur.

Quanam igitur circa vocem sunt observanda?

R. Tres hasce potissimum leges diligenter observabis. Prima lex hæc est, ut dilucide, articulatim, & sincere pronuntietur, ita ut integra verba, syllabæque omnes proferantur. Nolim tamen syllabatim sic pronunties, quasi si litteras computando adnumerares, quod esset molestum, ac putidum.

Ad eamdem legem pertinet etiam, ne volubili quadam, præcipitique celeritate dicendi incitata feratur oratio; sed vox respiratione recreetur, & spiritus inter dicendum suspendatur identidem, & auditoribus spatium aliquod cogitandi relinquatur.

Secunda lex hæc esto, ut pro argumenti, motuum-

numque præsertim varietate, vox etiam opportune varietur, & utcumque se affectum videri volet Orator, & audientium animos moveri, ita etiam certum vocis sonum adhibeat. Iracundia postulat vocis genus acutum, incitatum, crebro incidens: miseratio, & mæror flexible, plenum, flebile, interruptum: voluptas effusum, lene, tenuerum, hilaratum: metus demissum, hæsitans, abjectum &c.

Præterea mutanda tibi vox erit pro variis orationis partibus. Aliam enim vocem flagitat Exordium, aliam Narratio, aliam Confirmatio, aliam Peroratio.

In Exordio, nisi forte indignatione constet, vox utendum submissa, ac verecunda. Nec debet Orator, simul ac dicturus prodit, perfricare frontem, & in verba statim erumpere. Ceteroqui futurum est, ut feroculum Oratorem jure omnes aversentur. Sed oportet, ut paullulum cogitatione quasi defixus moretur. Idque tum quod auditores hæc Oratoris cura delectet; tum ut interea ipse se colligat, & ad dicendum componat. Ita Ulysses apud Nasonem paullisper consistit, oculis in terram defixis, priusquam suam eloquentiam torrentis instar effundat (1).

... Oculos paullum tellure moratos

Systulit ad proceres, exspectatoque resolvit
Ora sono, neque abest facundis gratia dictis.

Ab

(1) *Metam.* Lib. 13.

Ab Exordio paullatim insurgit vox: ac in narrando quidem, voce utimur aperta, simplicique, qualis fere est in sermone familiari. In Confirmatione, & in argumentatione præsertim, voce utimur acriori. In Peroratione demum, quasi parta Victoria, vox solet esse excitator, uti ita ostendat Orator, se niti bonitate caussæ, magnamque fiduciam in auditorum probitate, prudentiaque collocare.

§. III. De monotonia, & cantu.

Gratæ huic varietati opponitur è diametro unus ille, insulsusque vocis tenor: quem Græci monotoniam vocant, & qui non modo dicentem enecat, sed etiam audientes exanimat, & unde omnis orationis decor, ac venustas deflorescit.

... Ut citharœdus
Ridetur, chorda qui semper oberrat eadem,
inquit Horatius.

Huic, quam tantopere commendamus, varietati opponitur etiam cantus, qui nihil aliud est, si queris, quam clamosa quadam, & uno ferme tenore subfultans nænia.

Qua ratione huic vizio poterit occurri?

R. Huic incommodo remedium adhibebitur, 1. Si pueri rebus humilibus, ac quotidianis æquabiliter, & rotunde pronuntiandis adsuescant, neque vero statim ad tragicam granditatem procurrant. 2. Si eorum, quæ pronuntiant, germanum sentim pe-

penitus animadvertant. 3. Si interdum vernacula, non illa inflata, tragicaque, sed simplicia, & quotidiana pronuntient.

4. Exerceantur aliquandiu in orationibus illis, quæ varios motus, ac vocis inflexiones efflagitent; ut videant, quid submissæ, ac leniter, quid festive, quid atrociter, quid sedate, quid concitius dicendum sit. 5. Denique ubi illa pronunciationis quasi tirocinia posuerint, poterunt citra periculum in rebus grandioribus, tragicisque versari.

Tertia circa vocem lex hæc est, ut ea, pro amplitudine loci, & auditorum multitudine, vel intendatur, vel remittatur; sed tamen nec ascendat ad supremum, nec ad extremum descendat. Nam vox si ima sit, vim non habet; si vero nimium acuta sit, contentaque delicatas, ac teretes urbanorum hominum aures offendet.

Scio equidem hoc esse plebeculæ rudioris ingenium, ut vocalissimum quemque, & valentissimum lateribus, ita optimum oratorem judicer, nullamque putet egregiam, nisi quæ (1) pontem indignetur, actionem, in qua scilicet & clamofæ fauces, & vox ululans, & rigidi vultus torvitas, & pedum supplosiones, & brachiorum remigatio, & totius corporis dissoluta quedam, intemperansque jactatio, & ilia denique inflata rumpantur.

Ciceroni vero longe alia mens erat. Ajebat enim venustissime, clamofos hujusmodi *latratores* verius quam oratores, similes esse claudorum, qui cum

Y

am-

(1) Pontem indignatus Araxes: Virg.

ambulare non posint, ad equum confugiunt. Ita illi, in illa (1) Stentorea voce tamquam in iumento, suam omnem apud imperitos fiduciam reponunt; nec magis hoc nomine possunt Oratores dici, quam bajulus possit dici citharoëdus.

§. IV. De Gestu.

VOCEM subsequi debet Gestus, & varios animi sensus cum illa simul aperire. Qua de re colligemus ex veteribus ea tantum, quæ sculi nostri moribus sunt accommodata. Multa siquidem ex antiquorum gesticulatione prorsus obsolevisse videmus.

Quid est Gestus?

R. Gestus, inquit Valla, est actio quædam, & quasi pronuntiatio corporis; seu mavis cum Quintiliano, *Gestus est totius corporis motus, & conformatio.*

Quid in gestu generatim, & univerte cavendum est.

R. I. Nihil in illo sit effeminatum, & molle; nihil nimis exquisitum, aut elegans; nihil quod affectatam quamdam diligentiam, artemque redoleat. Monet enim Fabius, actionem non esse deliciis, nimiaque cura molliendam: & comptis illis, delicatisque Oratoribus sè penumero solet evenire, quod olim Sybaritarum equitatui contigit. Cum enim gens effeminata, & chorearum ad insaniam avida, suos etiam equos ad numerum, symphoniamque saltare docuisse; cum deinde ex

(1) Stentor quinquaginta hominum clamorem magnitudine vocis adæquabat. Homero vocatur, Στεντός φωναν
vozem æream habens.

umbraculis in solem , ac pulverem contra Crotonias hostes fuit illis prodeundum , histriones illi equi , tubarum , & Martis ignari , motibus cōpositis , saltibusque numerosis repente lascivientes , & exercitum totum misere perdidērunt . Ita umbratiles illi Oratores ab imis unguiculis ad verticem usque venustuli , quando ex domestica exercitatione , in medium agmen , in pulverem , in clamorem , in castra , atque aciem forensem prodierunt , & se , & caussas suas in magnum quoddam discriminū conjiciunt .

2. Nihil in gestu sit durum , aut agreste , ne dum mollitem fugimus , in contrarium rusticatis vitium videamur incidere . Quamquam , si in alterutro peccandum esset , facilius excusaretur rusticā quadam simplicitas , quam putiduscula gestus , vocis , & habitus adfectatio .

Quid de totius corporis motu præcipiendum.

R. Præcipitur 1. Ut status corporis sit celsus , & erectus , & truncō magis toto , virilique quadam laterum inflexione se se Orator moderetur . 2. Ne in statuē morem obrigescat , quasi si veru deglutisset , ut facete ajebat Epictetus . 3. Ne crebris , & incompositis corporis commotionibus vehementius agitetur , more furentis Sibyllæ ,

... Cui pectus anhelum

Et rabie fera corda tument ...

Vitiosum quippe est hoc illuc cursitare : quod olim exprobratum fuit Domitio Afro , qui non ageare , sed satagere , non illepide dicebatur . Et cum aliis quidam non minus actuosus Orator multum concuriasset in dicendo , facete rogavit eum ad-

versarius Virginius , Quot demum passuum millia declamasset ? Cassius quoque Severus adversus circumcurrentes hujusmodi Oratores solebat poscere lineam , quæ immodicas illorum excursiones prohiberet.

Quid in capitis , & oris totius conformatione servandum est ?

R. 1. Vitiosa est frequentior capitinis jactatio , Mænadum instar , de quibus Catullus Carmine de Berecynthia , & Athi : *capita Mænades vi jacint bederigeræ*. Non tamen dedecet aliquando vel adnuendo confirmare , vel abnuendo negare : vel capitinis in latus inclinatione languorem , & aversione indignationem , aut alio simili motu dubitationem , & ejusmodi affectus designare. Sed neque capite erimus immobili , rigidoque , quod semibarbarum est.

2. Capite utemur non demisso , & obstipo , vel in cervicem reflexo ; sed recto potius , celoque : quamquam hic quoque modus servandus est , ne audaciæ , ac adrogantia videatur ; & capitinis demissio potest aliquando tristitiam , luctum , mærorem , pœnitentiam , & iræ divinæ placandæ studium per belle significare.

Sed in ore , vultuque , & oculis sunt omnia. Quapropter pro rerum natura vultum indues modo hilarem , modo mæstum , nunc blandum , nunc minacem. Ita Horatius :

Tristia mæstum

Vultum verba decent ; iratum plena minarum ;
Ludentem lasciva ; severum seria dictu.

Frons exorrecta, diffusaque hilaritatis indicium est: contra vero severitas indicatur fronte corrugata, caperataque, & superciliis vel contractis, vel etiam inæqualibus. Unde Tullius in Pisonem: *Altero ad frontem sublato, altero ad mentem depresso supercilie respondit... & pro Sextio: Tanta erat gravitas in oculo, tanta frontis contractio, ut illo supercilie, tamquam Atlante cœlum niti videretur.*

Orantem, & aliquid à Deo poscentem indicant oculi in cœlum sublati, ut res ipsa fatis loquitur. Unde Cassandra:

Ad Cœlum tendens ardentia lumina frustra.

Oculos avertere aversantis est vel fastidientis, vel negantis. Sic misera Didonis umbra, conspecto apud inferos Aenea,

Illa solo fixos oculos aversa tenebat.

Oculi clausi meditantem, & cogitantem animal produnt. Oculos in unum locum defixos habent, qui præ admiratione stupent. Unde Aen. 1.
Dum stupet, obtutuque hæret defixus in uno.

Præterea demissi oculi modestiam, pudoremque significant. Sic Andromache Aen. 3.

Dejecit vultum, & demissa voce locuta est.

Quid

Quid in Brachii moderatione servandum?

R. Brachia nec deorsum incomposita pendeant, nec immodicè projiciantur, nisi in affectu vehementiori. Brachium extensum, ac porrectum potentiam, auctoritatem, & robur arguit. Contra vero continere, ac cohibere brachium, est pudoris, ac verecundiae. Unde Tullius pro Cælio: *Nobis olim annus erat unus ad cohendum brachium toga constitutus, ut exercitatione, ludoque campœstri tunicati (1) uterentur.*

Quid circa manus, digitosque præcipitur?

R. Manus, sine quibus trunca esset actio, ac debilis, vix dici potest, quot motus habeant, inquit Fabius... Nam ceteræ partes loquentem adjuvant: hæ, prope est ut dicam, ipsæ loquuntur. An non bis poscimus? pollicemur? vocamus? dimittimus? minamur? abominamur? timemus? interrogamus? negamus? Gaudium, tristitiam, dubitationem, confessionem, pœnitentiam, modum, copiam, numerum, tempus ostendimus? Circa manus autem certæ quædam sunt, ac definitæ leges, quas sequi oportebit.

1. Manus in Exordio non solet extendi. Ast ubi paullum effervescere coepit oratio, manus pariter exeritur cum illa, pariterque cum illa deponitur:

2. Pectori manus admovetur, cum de seipso quis loquitur; at cum adloquitur alium, ad illum extenditur.

3. Manus sinistra numquam sola gestum facit, inquit Fabius: dextræ se frequenter accommodat: sive in digitos argumenta digerimus, caussamque, ut olim

(1) Alii legunt uteremur.

olim Hortensius consueverat, partimur in digitis; (quem morem hodieque nonnulli non infeliciter imitantur) sive adveras palmas, quasi repellendo, & repudiando objicimus.

4. Soloecismus gestu committitur, cum aliud voce, aliud gestu monstramus: ut Rhetor ille, qui coelum appellans, tellurem intuebatur, gestuque monstrabat.

5. Urgemus crebra manuum impressione. Supplicamus manibus elatis, junctisque. Confirmamus manibus pronis, gravi quodam, & decenti motu depresso.

6. Admirantium est manus tollere. Unde Tullius in Academicis Quæstionibus: *Hortensius autem vehementer admirans, quod quidem perpetuo Luculla loquente fecerat, ut etiam manus saepe tolleret.* Et ad Cæsarem, Epistolarum Libro septimo: *Sustulimus manus ego & Balbus.* Huc etiam pertinet illud Catulli, Carmine 53.

Admirans ait hæc, manusque tollens:
Dii magni, (1) salapusum disertum!

7. Manu extenta facimus nobis audientiam, indicimusque silentium.

8. Manus ori admota tacentis, & silentium suadentis habitus est, quo etiam gestu simulacrum Harpocratis effingebant Ægyptii veteres.

9. Solebat Tullius antequam diceret, barbam demulcere, quod hodieque nonnulli solent. Sunt etiam

(1) *Salapusius nomen compositum ex sale, & pusius,* sive *pusio, quasi dicas pusio plenus salis, & facetiarum, quod de Calvo dictum ob pusillam staturam.*

etiam qui aut frontem fricent , aut lacunar in-
tueantur , sed hæc vitiœsa sunt. Vitiosum est quo-
que manus vel supra caput ad tollere , vel infra
pectus demittere ; præterquam in summis adfectibus.

10. Pectus ferire , aut femur prope scenicum est.

11. Manus optime à sinistro incipit latere ,
dextroque deponitur.

12. Hoc esse cavendum , ait Cicero , ne ni-
miz̄ sint digitorum argutiæ , neve immoda sit
illorum gesticulatio , quo vitio laboravit summus
Orator Hortensius. *cum enim* , inquit Agellius , *ma-*
nus ejus , *inter agendum* , *essent argutæ admodum* ,
& gestuose , *maledictis* , *compellationibusque probro-*
fis jaclatus est : *multaque in eum quasi in histriionem*
in ipsis caassis , *atque judiciis dicta sunt*.

Has autem omnes , quas hactenus diximus ,
Oratoris virtutes , cura , & labore comparari pos-
se liquet mirabili Demosthenis exemplo , qui cum
(1) primam artis suæ litteram dicere nequiret ,
studio , & exercitatione perfecit , ut planissime di-
ceret , & balbutiem , inditis ori calculis , emen-
davit , exilitatem vocis , ad fluctus maris decla-
mando , illiusque fremitus voce vincendo , sustulit ;
angustias spiritus , locorum arduorum inter decla-
mandum adscensu , tandem aliquando superavit .

Atque hæc de Pronuntiatione monuisse sufficiat .
Reliqua , quæ eodem pertinent , exercitationi re-
linquimus : cui scilicet plus multo , quam præ-
ceptis esse tribuendum existimavimus .

INS-

(1) *Litteram R.*

INSTITUTIONUM
 POETICARUM,
 AUCTORE
 JOSEPHO JUVENCIO,
 E SOCIETATE JESU,
 LIBER PRIMUS.
 DE POESI SPECTATA UNIVERSE.

Cum in omni re, quæ in questionem venit, debeat attendi primum, quid sit, deinde quæ sint ejus affectiones; ideo Poëeos definitio proferenda; tum de materia illius, forma, ornatu, caussa efficiente, fine, ac divisione disputandum.

* * * * * CAPUT PRIMUM.

DEFINITIO POESEOS.

Quid est Poësis?
 R. i. Si vocis vim, ac potestatem queras,
 Poë-

Poësis nomen habet ἀπὸ τοῦ ποιεῖν, quod est facere, seu fingere; unde ποιητικὴ, ars faciendi, seu fingendi, & ποιητὴς, Poëta, id est Fictor, seu Effector: quod Fabula, quam texit, ab ejus mente tota esse videatur.

2. Si rei significationem spectes, Poësis modo dicitur Ars Poëtica: modo dicitur opus aliquod ex arte elaboratum. Juxta primam vocis acceptationem Poësis est *Ars rite conficiendi Poëmatis*: sive Collectio præceptorum in unum, & eundem finem certo tendentium, nimirum ad unum aliquod opus poëticum perficiendum. Juxta secundam vocis significationem intelligitur Uſus, & Praxis illorum præceptorum, atque hoc sensu agimus hic de Poësi.

Quomodo definitur hoc posteriori sensu accepta Poësise

R. Definitur Ars imitandi Actiones humanas, seu imitatio humanarum Actionum cum fictione?

Imitaturne re ipsa omnis Poësis humanas Actiones?

R. Imitatur utique. De præcipuis Poëmatis non potest ambigi, Epico, Tragico, Comico. Minor quoque Poëmata ad humanas Actiones suo modo referri primario, & per se, suis locis patet inferius.

Cur potius humanas Actiones imitatur Poësis, quam Mores?

R. Ratio hæc petitur ex Philosopho (1). Cum sit Poësis omnis Politicæ, & Civilis Disciplinæ pars: civilis autem disciplina habeat pro fine Ci-vium felicitatem; hunc certe finem Poësi præsti-

(1) Poët. c. 4.

tutum esse necesse est. Jam vero cum felicitas sit in Actione, juxa Philosophos, non in Moribus, qui ad ipsas Actiones, ut ad finem referuntur; plane sequitur, ut quemadmodum Civilis disciplina, sic & Poësis non tam ad mores referatur, quam ad Actiones, easque primario, & per se imitetur.

Num Poësi tam necessario addicta est Fictio, seu Fabula, ut sine illa non possit esse Poësis?

R. Plane dicendum est: ita censet Aristoteles, (1) ejusque Interpretes, qui vim eamdem, ac dignitatem in Poësi tribuunt Fictioni, quam Animæ concedunt in homine. Cum autem sublata anima nullus sit homo; sic nec sublata fictione potest esse ulla Poësis. Ita sentiunt probatissimi Auctores bene multi, Plato in Phædone, Plutarchus Libro de audiendis Poëtis &c. Non erit itaque Poëta dicendus is, qui sine Fictione, sicut qui sine Metro scripserit. Ratio patebit utriusque c. 3. ubi quid nomine Fictionis, seu Fabulæ veniat, exponetur.

CAPUT SECUNDUM.

DE MATERIA POESEOS.

Quae est Materia Poëseos?

R. Est id omne, de quo tractat Poësis.

Quo-

(1) Cap. 4.

Quotuplex est illa Materia?

R. *Duplex, una remota, altera proxima.*

Quænam est Materia remota?

Tam longe, lateque diffusam Poëticę, quam Oratoriæ Facultati Materiam adsignat Tullius, (1) cui Poëta cum Oratore in hoc idem est, nullis ut terminis uterque circumscribat, aut definit jus suum, adeoque possit uterque de rebus omnibus disputare.

Quænam est Materia proxima Poëseos?

R. Sunt Actiones humanæ, prout potuere, vel debuere geri.

Numquid debent esse vera, quæ in Poëseos materiam adsumuntur à Poëta?

R. Tenetur aliquando Poëta ea dicere, quæ vere contigerint, aliquando non tenetur. Quamvis enim Poëtice, Poësis, & Poëma artem faciendi, effectiōnē, effectūmque significant, non eo sensu tamen sunt accipiendæ illæ voces, ut suam sibi semper materiam procreare Poëta debeat; immo in Epopœja, Tragoedia, atque etiam in aliis minoribus poëmatiis, qualia sunt Genthliaca, Epicedia, Epinicia &c. subesse debet quasi fundus historiæ, cui magnifice aliquid inædificetur. Potest autem suam sibi condere materiam in Comœdia, aliisque poëmatiis bene multis, atque etiam debet materiæ, quæ vera sit, novam formam inducere, atque eatenus falsa referre. Curandum autem utrobique diligenter, ut quæ proferentur,

five

(1) *i. de Orat.*


sive vera, sive falsa, ea sint omnino verisimilia.

Quid vocas verisimile?

R. Est id, quod naturali quodam rerum exitu debet, aut certe potest contingere in iis circumstantiis, in quibus dicitur contingere.

Itane sunt verisimilia, quae Virgilius narrat in descensu Æneæ ad inferos, de mutatione navium in Nymphas marinas, aliaque hujusmodi?

R. Fuere utique verisimilia, quod ab Heroibus, Diisque & fieri posse, & re ipsa fieri aliquando putarentur.



CAPUT TERTIUM.

DE FORMA POESEOS.

Quae est forma Poëseos?

R. Est Fictio, seu Fabula. Cum enim Poëtica sit ars fingendi, ut vox ipsa sonat, debet certe Fictio sic naturam poëseos constituere, ut eam ab omni alia re secerat, atque distinguat. Ita censet paßim Aristoteles, qui Fabulam sic Poësi attribuit, ut sine illa Poëtam esse nolit.

Quid est fictio, seu Fabula?

R. Non una est, eademque vocis illius notio.

1. Significat sermonem quemdam mere fictitium, qualia sunt Æsopica colloquia bestiarum, & inania quædam Ethniconum commenta.
2. Usurpatur à Philosopho pro Actione ipsa, & materia Poë-

matis, vel etiam pro toto Poëmate. 3. Sumitur ab eodem Philosopho pro Structura quadam Poëmatis, sive ut loquitur, pro Constitutione rerum, & Compositone in Poëmate.

Quo sensu Fabula dicenda est Forma Poëseos?

R. Juxta postremam hanc vocis acceptioem. Nam eodem modo de Poëtica videtur dicendum, ac de aliis Artibus, quæ imitatione perficiuntur: in quibus certa quædam Dispositio, & compositio universe dici debet earum Forma. Sic in statua aurea, aurum est materia, & artificiosa auri dispositio est ultima Statuæ Forma in genere operis artificiosi. Et ut exemplum proferam, quo non semel usus est Aristoteles: Pingatur v. gr. Socrates: 1. Picturæ materies est Socrates, qui pingitur debet; is Materiam repræsentat poëseos. 2. Corporis descriptio cum apta membrorum omnium conformatio, ac dispositione est forma: & hæc Fabulæ comparatur. 3. Colorum varietas, & contemperatio est ornatus picturæ, & cum Fabulæ ornamentis rite potest conferri. Recte itaque pronuntiavit Aristoteles: (1)

Λέγω γὰρ τοῦτον τὸν μύθον σύνθεσιν τῶν πράγματων.

Definio Fabulam esse Compositionem rerum.

Qualis debet esse illa Fictio, seu Constitutio, & Structura Poëmatis?

R. 1. Exquisitam illam esse jubet universe Horatius; (2) atque etiam in majoribus Poëmatis mag-

(1) *Lib. 6. cap. 4.* (2) *Sat. 4. lib. 1.*

magnificam : nec vult Poëtam dici posse illum,
qui talem Formam Materiæ non induxerit:

Neque enim concludere versum
Dixeris esse satis : neque si quis scribat , uti nos,
Sermoni priora , putes hunc esse Poëtam.
Ingenium cui sit , cui mens divinior , atque os
Magna sonaturum , des nominis hujus honorem.

2. Hæc Structura , ut de illa aliquid magis
distincte , sigillatimque statuamus , complectitur va-
ria , quæ à Philologo appellantur , Fabulæ or-
namenta , Peripetas , Agnitiones , Episodia , Ma-
chinas , graphicam Morum expressionem , Sen-
tentias , accuratam Dictionem , numerum poëti-
cum , aliaque omnia , unde mirabile dicendi ge-
nus effloreſcat ; adeo ut nulla sit Fictio , quæ aut
omnibus his deſtituta ſit , aut aliquibus faltem
inſtructa non ſit ornamentiſ.

*Quæ poëmata aut hæc omnia , aut aliqua ſaltem
ſibi vendicant Fabulæ ornamenta?*

R. In ſublimioribus Poëmatiſ frequentius , par-
cius in humilioribus ſunt uſurpanda. Sic Epicum
poëma , Tragicumve eo omni ornatiū debet ſplen-
dere : aliquo nitore debent minora poëmata ; vel
quæ in genere heroico ſunt poſita , ut Adhorta-
tiones , Laudationes &c. vel quæ ſuapte natura
ſimpliciorem , minusque figuratum dicendi habitum
requirunt. Verum quæ Fictio cuique illorum , qui
cultus ornatusque conveniat , exponetur commo-
dius ſuis locis , cum de ſingulis agetur poëmatum
generibus.

*Licetne in Poësi adhibere Fictiōnem, quatenus von
illa aliquid mere fictitium sonat?*

R. Sane licet. 1. Nihil opus est in majoribus poëmatis esse usquequaque vera, quæ in peripetiis, Episodiis, Machinis, &c. proferuntur.

2. Placent maxime, quæ à veteribus sæpe, recentioribusque Poëtis in poëmate Epico, Tragico, Comico, Bucolico etiam, & Satyrico Fictiæ inducuntur personæ.

3. Non sine dignitate, ac venustate rebus inanimis spiritus, mutis vox tribuitur; ut cum Roma, Gallia, Africa loquentes inducuntur, vel cum Scientiæ, Artes in personas item conformantur.

4. Suus est etiam in sacris argumentis, neque angustior, quam in profanis, ejusmodi Fictiōni locus, ut evicit manifestissime in suo Opere vere aureo de Poëmate Frinzoniūs, (1) cuius ex animadversione id unum maxime curandum est, ut moderentur prudentia Fictiōnes, nequid vanum, insolens, aut à communi sensu alienum adferatur.

Ex dictis collige, 1. Poëtæ perinde esse, vera, ac falsa dicere, modo verisimilia dicat; nisi forte in aliquibus poëmatis, quæ supra attigimus, in quibus debet esse vera, quæ profertur, materies: quamvis falsi aliquid in eadem ornanda posit adspergi: quod tamen intra verisimilitudinis septa contineri debet.

Col-

Collige 2. quam male jubeantur è Parnaso ex-sulare Poëtæ , qui mera commenta in sua carmina non invexerunt , & eo nomine Fabulam non scripsisse dicuntur ; quasi vero ipse Virgilius in suo opere absolutissimo Georg. cœli Poëta non sit appellandus , cum vera dixerit , sed splendide , sed artificiose , sed poëtice , adeoque non sine Fictione.

Collige 3. Non esse illum proprie dicendum Poëtam , qui tenuiter , ac jejune , servata dum-taxat legitima syllabarum , pedumque dimensione rem tractavit : eumque versificatorem appellandum , quod sine fictione poëtica scripserit : quæ ut minimum requirit habitum loquendi aliquem figuratum , floremque eloquentiæ leviter delibatum , versuque exornatum.

Quæ sunt jam ornamenta Fictionis , seu fabulæ ?

R. Septem numerantur ab Aristotele , Peripetia , Anagnorisis , Episodium , Machina , Mores , Sententia , Dictio : de quibus omnibus sigillatum agendum est.



CAPUT QUARTUM.

DE PERIPETIA.

Quid est Peripetia ?

R. Peripetia à περιπέτη , incido , nihil aliud est , ut vox indicat , quam rerum in statum contrarium lapsus : quapropter definitur

ab Aristotele (1) *Eorum, quæ aguntur, mutatio in contrarium, sive mutatio hæc prospera sit, sive adverfa.*

Da exemplum utriusque Peripetiae?

R. Exemplum esto prosperæ rerum conversio-
nis. Josephus fratribus suis infelicem suam sortem
Iugentibus, quis tandem ipse fit, aperit, timo-
re inque excutit; unde efficiuntur illi vere for-
tunati.

Adversæ vero mutationis exemplum sit istud.
Nuntius Corintho missus Oedipum rogat Theba-
norum Regem, ut Corinthiorum quoque regnum
communi omnium consensu post mortem Polybi
Regis ipsi delatum velit capessere. Corinthum adire
abnuit Oedipus, ne forte, quod oraculum præ-
cinuerat, incesto flagitio matris polluendæ, quam
putabat esse Meropem Polybi demortui uxorem,
periculum subiret. Dat operam Nuntius, ut hoc
eum metu liberet; sed simul ea refert, unde cog-
noscit Oedipus impletum jam fuisse oraculum, &
matrem Jocastam eo flagitio pollutam, & patrem
Lajum à se fuisse interfectum; atque hinc tantum
concipit mœrorem, ut vagus, & exsul effossis
sibi oculis, reliquam vitam transfigere constituat,
in summam proinde prolapsus calamitatem.

*Quot sunt conditiones ad perfectam Peripetiae for-
mam requisite?*

R. Tres adsignantur. Prima est, ut sit magna
illa mutatio rerum ferme omnium, fortunarum-

— que,

que, sive ex felici statu ad infelicem, sive contra.

Altera, ut sit illa mutatio subita, & inopinata: ut si præter exspectationem ea rerum oriatur perturbatio, ut metus repente lœtitiae, vel terrori lœtitia succedat.

Tertia; ut sit verisimilis ejusmodi rerum conversio. Contra quam præceptionem peccant in primis Romantiorum Auctores, qui nulla habita verisimilitudinis ratione rerum, dumtaxat captant delicias: nec fidem facere curant, modo lectorum animos admirabilitate rei teneant, & delectent. Habet eximiam Peripetiae formam apud Virgilium (1), ubi Trojanis in Italiam appulsis cum fauste omnia, atque ex sententia cederent dimissis à Latino Rege cum bonis verbis, atque amplis muneribus Legatis, pactaque Æneæ Lavinia, Juno, irarum plena, omnia commutat, perturbatque, summaque in rerum tranquillitate summum drepente bellum excitat.

CAPUT QUINTUM.

DE ANAGNORISI.

Quid est Anagnorisis? R. Anagnorisis, latine Agnitio, dicitur ab Aristotele (2) ex ignorantia in cognitorem.

Z 2

(1) Æneid. Lib. 7. (2) cap. 11. Poet.

mutatio : Id est , personarum Agnitio , ex qua amicitia oritur , vel inimicitia inter eos , qui felices esse debent , vel infelices. Unde colliges per hoc Fabulæ ornamentum , 1. intelligi personarum inter se agnitionem. 2. Amicitiam , vel inimicitiam. 3. Felicitatem , vel infelicitatem ex illa agnitione nasci.

Da Exemplum Agnitionis.

R. Orestes Iphigeniæ frater ad aram mactandus præsente sorore , quam non agnoscebat , ait , simili fato perire se , ac sororem , quam Diana immolatam fuisse credebat. His illa auditis fratrem agnoscit : inito deinde inter se consilio auffiunt , & morti se Orestes , & foedo homines immolandi ministerio Iphigenia se subducit.

Quotuplex est Agnitio ?

R. Duplex : una dicitur simplex , duplex altera : ut si in allato modo exemplo Iphigenia tantum agnoscat Orestem , simplex erit , si Orestes quoque agnoscat Iphigeniam , duplex erit Agnitio.

Vtra præstat alteri ?

R. Sane duplex ; atque illa in primis magni facienda est , quæ admixtam habet peripetiam. Historia Josephi , de qua in superiori capite , duplœm continet Agnitionem , & mirabilem peripetiam.

Varias Agnitionum species , sive modos late prosequitur ex Philosopho Daniel Heinsius Lib. de Tragoedie constitutione. (1)

CA-

(1) cap. 6.

CAPUT SEXTUM.

DE EPISODIO.

Quid est Episodium?

R. 1. Si vocis etymon spectes, est inseratum quiddam in Carminis Fabulam: cum idem sonet atque adjectum aliquid ad cantum.

2. Si definitionem quæras, est *Actio adjectitia, apta, & necessaria quodammodo, connexione cum Actione primaria conjuncta.*

Explica quæsio singulas voces.

R. 1. Dicitur Actio; neque enim Descriptiones, Comparationes, & narrationes aliquot dici debent Episodia. Sic tempestatis descriptio in 1. Æneid. v. gr. non est Episodium: sed in 2. Troje excidium, & in 3. Æneæ peregrinatio ex omnium sententia sunt Episodia, quia habent suas Actiones.

2. Dicitur Actio adjectitia, qua voce secernitur ab Actione primaria, cuius ne pars quidem esse debet Episodium, sine quo potest esse Actio primaria. Sic potuit Æneas Italiam applicare, Turnumque vincere, omissa excidii Trojanæ narratione, item & præterita errorum suorum expositione: quæ duo sunt Episodia.

3. Dicitur ejusmodi Actio apte conjuncta cum Actione primaria: ut neque petita longius, neque affectata studiosius, neque contorta violentius esse debere Episodia significetur.

4. Præcipitur, ut necessitate aliqua cum prima-
ria Actione connectatur : ut indicetur, sic esse
cum Actiore illa committendum Episodium,
ut sine aliqua culpa præteriri non posse videa-
tur. Numquid debuit v. gr. Virgilius, qui
arma virumque canebat, Trojæ qui primus ab oris
Italianam fato profugus, Lavinaque venit litora, suo
operi Trojæ incendium non intexere ? num de-
buit hoc in aula Didonis silere, quod jam per
totum orbem fama vulgaverat ? Qui potuit ipsa
Dido de iis suum hospitem non interrogare, *quorum*
pars magna fuerat ? qui vero potuit Æneas Reginæ
de se quam optime meritæ, præsertim roganti,
narrationem hanc denegare ? debet itaque semper
subesse caussa aliqua Episodia attexandi, quam-
quam non ubique par esse debeat.

Numquid Philosophus damnat Episodia, cum ait (1)
nihil esse insulsius Actionibus Episodicis?

R. Appellat eo loci Episodia, quæ neque veri-
similiter, neque necessario cum Fabula conjuncta
sunt: quæ certe eo nomine sunt rejicienda, quan-
tumvis habeant aliunde admirabilitatis, quod parum
ad rem, aut nihil faciant.

CAPUT SEPTIMUM.

DE MACHINA.

Quid est Machina ?

R. 1. Si vim vocis quæras, machina di-

(1) Cap. 9. Poët.

citur in Poësi, quodcumque auxilium extraordinarie collatum. Nam cum Deos Tragoëdi tamquam è cœlo delapsos producebant, vel homines è theatro offerebant adhibita Machina; auxilium illud aut à Diis præstatum, aut alio quovis modo, sed extraordinario, ut supra humanas vires exhibitum, Machina solebat appellari.

2. Si rei definitionem postulas, Machina dici potest *Aetio*, vel *Actionis modus* quidam *viribus humanis superior*, qui nodo difficulti solvendo adhibeatur.

Explica singulas voces.

R. 1. Dicitur *Aetio*. Sic apud Homerum irato Achille, miles discessum parabat: retinendus tamen erat. En Minerva, Junonis impulsu in terras delapsa, suscepitum redeundi consilium discutit.

2. Dicitur vel *actionis modus*, cum videlicet Deus latet, & occulta quadam efficientia juvat hominis actionem. Sic Juno Turnum, & Venus Æneam paßim juvant apud Virgilium.

3. Dicitur *humanis viribus superior*. Equid enim Deus aliquis excitetur, si virtus humana sufficiat? Recte itaque monet Horatius: (1)

Nec Deus intersit, nisi dignus vindice nodus Inciderit.

Homerum certe reprehendit Aristoteles, quod Minervam è cœlo deduxerit, milites ut moraretur;

(1) In Art. Poët.

tur; quod opera, consilioque viri prudentis effici potuissest.

Quandonam igitur adlibenda est Machina?

R. Cum opus est sciri aliquid v.gr. aut eorum, quæ praterita sunt, aut futura, quod sine Deorum ope sciri omnino non possit: aut aliquid est agendum, quod suapte natura vires humanas excedat; tunc enim licet ad Superiorum auxilium confugere. De Machina recurret mentio in Carmine Epico, & Tragico.

CAPUT OCTAVUM.

DE MORIEBUS.

Quid intelligis per Mores ornandaæ Fabulae servientes?

R. Quod Græci *ἦθος*, Latini Mores dixerunt, qua voce non tam mores, quam eorum proprietas, & cujusque indoles, & ingenium designatur. Mores autem diversi esse solent in singulis pro habituum, affectuum, nationum, ætatum, & fortunæ diversitate, v. gr. ex habitibus dicitur aliquis justus, mitis, temperans; ex affectibus, amans, iratus; ex natione, Græcus, Romanus; ex ætate, puer, juvenis, vir, senex; ex fortuna, victor, vel victus. Ita morum vox nūs est Horatius:

Etatis cujusque notandi sunt tibi mores.

Itaque per mores Fabulæ intelligo ejusmodi mo-
rum graphicam expressionem.

Quales debent in Poësi Mores exhiberi?

R. Exhibendi sunt Boni, Convenientes, & Äqua-
bilis tenoris.

Quomodo Mores Bonos exprimet Poëta?

R. Si Mores illos effingat, qui virtutis amorem,
ac vitii odium ingenerent: eoque revocet pra-
vos Mores, si quos exhibere necesse sit. Ita fit
mentio in Äneide Sinonis, & Mezentii, quo
majori sint odio, execrationeque eorum mores
pessimi. Cum enim sit ille præstitutus omni poësi
finis, ut mores jucunde instituat; sane liquet à
suo fine plane aberrare Poëtam, qui malos mo-
res in suum opus de industria velit inducere, ac
celebrare. Non debent itaque mores pessimi in
viro principe accurate depingi, minime vero om-
nium in Heroe.

Quomodo describit poëta Mores Convenientes?

R. Quando virtutem cuique tribuit, quæ ipsi
convenit, & sic feminæ non tribuet fortitudi-
nem, quæ congruat Achilli, aut prudentiam, quæ
sit propria Nestoris.

Quomodo Mores erunt æquabilis tenoris?

R. Si sic effingantur, ut non discrepet aliquis
à seipso. Ajax certe discrepanter v. gr., si mores
primum Ajacis, ac post paullo Ulyssis referret. Ea
de re sic præcipit Horatius:

Si quid inexpertum scenæ committis, & audes
Personam formare novam; servetur ad imum,
Qualis ab incepto processerit, & sibi constet.

CAPUT NONUM.

DE SENTENTIA.

Quid est *Sententia*?
 R. Duplex hujus vocis notio est apud Philosophum, (1) cui 1. *Sententia* dicitur *Gnōmē*, estque pronuntiatum aliquod de re aliqua universo. 2. Dicitur *Dianēa*, & eo sensu est vis animi, quæ explicat tum naturam rei, tum eas, quæ ipsi congruunt, affectiones: cuius est prīmū demonstrare, quæ latent, dissolvere, quæ nexa sunt, motus animorum cīere, augere, quæ sunt exigua, & quæ grandia, minuere. Utroque modo ad Fabulæ ornamentum pertinet *Sententia*; nihil est tamen, quod de illa juxta secundam hanc vocis acceptiōnem hic agamus, cum tractentur hæc in Rheticis; sed satis fuerit juxta primam acceptiōnem in *Sententiam* inquirere.

Quomodo definitur eo sensu accepta sententia?

R. Est simplex pronuntiatum universo de vita recte informanda. Hinc patet triplicem esse Sententiarum dotem. 1. Esse unam. 2. Dici universel. 3. Esse moratam.

Quo-

(1) L. 2. Rhet. c. 4. & 19. Poët.

Quomodo erit una, simplexque Sententia?

R. Si non diffundatur in plura, quæ illam efficiant quodammodo multiplicem. Ita posset hæc Horatii Sententia, *pulvis & umbra sumus*: sic explicari, ac dilatari, ut illius causæ adferrentur quam plurimæ, adhiberentur similitudines, comparationesque: unde non tam una aliqua, quam plures exsisterent Sententiae.

Quomodo erit universe dicta?

R. Si libera sit, ac solita à loco, tempore, persona, aliisque adjunctis, quæ res adficiunt singulares. Talis est hæc Horatii, *dulce, & decorum est pro patria mori*.

Quomodo erit morata?

R. Si vitam recte informet. Talis est allata jam Sententia, qua pietas erga patriam sic prædicatur, ut vitæ propriæ dicatur anteponenda.

Quodnam est discrimin Sententiam inter, & acute dictum?

R. Sententia pugna caret, & conflictu; Acute dictum vero totum est in eo conflictu. Exempla subiectio de Sententia pura, de acute dicto pure, & de utroque mixto.

Sententia pura illa est, quæ dicti quidem amplitudinem habet, ac majestatem, sed contentione caret; sic dicitur apud Senecam: (1)

Cogi qui potest, nescit mori.

Acu-

(1) *Her. fur.* (2) (1)

Acute dictum pure est contentio sine sententia;
tale est apud eundem Senecam illud Hecubæ: (1)

Ille tot Regum parens
Caret sepulcro Priamus, & flamma indiget,
Ardente Troja,

Sententia mixta est, cui annexa est contentio;
tale est illud; *Avaro tam deest quid habet, quam quod non habet.* Seposita enim contentione, vigeat tamen Sententiae vis, & dignitas; idemque est, ac si diceretur, *Avarus nemo dives.*



CAPUT DECIMUM.

DE DICTIONE.

Quid est Dictio?

R. Dictio (2) universe describi potest dicendi ratio, quæ animi sensa declarat, quo demum cumque modo id fiat. Atque hac latius patenti notione Dictio omnis, sive Oratoria, sive Poëtica, aut alia quæcumque attingitur.

Quenam igitur Dictio poëtica?

R. Est illa dicendi ratio, quæ soli Poësi convenit; ac proinde quæ & communes omni Dictioni, & proprias, sibique uni addictas dotes vendicat.

Que

(1) *Tro.*

(2) *Aristot. c. 20. Poët.*

Quæ sunt illæ dotes Dictionis poëticae?

R. Tres vulgo adsignantur, ad quas ceteræ omnes facile revocantur. 1. Perspicuitas: 2. Majestas: 3. Numerus.

Quomodo Diction poëtica erit perspicua?

R. Cum dictio poëtica, ut quævis alia, ex verbis constet, ac sententiis; ideo & in verbis, & verborum contextu querenda est illa perspicuitas.

In quo posita est verborum perspicuitas?

R. In vocabulorum propriorum, & rei exprimendæ maxime accommodatorum usurpatione. Itaque fugienda sunt verba obsoleta, atque ex antiquitatis ruderibus effossa: adhibenda, quæ versantur in sermone, & consuetudine quotidiana, atque in primis, quæ clarissimorum auctorum usu non trita minus, quam splendida, adferenda, quæ ejus rei verba sunt, de qua loquemur.

Quomodo in sententiis, sive in verborum contextis perspicuitas elucebit?

R. Si neque abrupti, pendentesque sensiculi, neque oblongæ, exitumque non invenientes inducantur periodi; si neque, cum dicitur vel incisim, vel membratim, vel periodice laboret intricata Diction. Nam & Poëtis, ut Oratoribus, sua sunt incisa, sua membra, suæ verborum, sententiarumque comprehensiones, & clausulæ, tam aperte, quam concinne concludentes.

Iam vero qui cultus, qui splendor convenit poëticæ Dictioni?

R. A proprio dicendi genere, vulgarique rece-
den-

dendum esse Poëtæ, statuit Aristoteles (1): cui consentit omnino Horatius, qui ait, (2) non satis esse ad Poëtæ nomen pro dignitate sustinendum *puris verbis prescribere verbis*, & scribere sermoni propiora, si desit os magna sonaturum. Quamobrem postea posuit:

Idcirco quidam Comœdia, necne Poëma
Esset, quæsivere, quod acer spiritus, & vis
Nec verbis, nec rebus inest: nisi quod pede certo
Differt sermoni sermo merus.

An eadem semper, eaque sublimis dicendi ratio usurpatur à Poëtis?

R. Cum tria sint apud Poëtas, uti apud Ora-tores, genera dicendi, tenue, grande, medium, miscentur illa sæpe inter se, ac temperantur in pluribus poëmati; distinguuntur tamen aliquando, ac plane secerpuntur; atque adeo non sublimem ex æquo dicendi formam omnia requiriunt. Quæ tenue, quæ grande, quæ medium dicendi genus postulent, notabitur inferius, cum varias poëmatum attingemus species. Nunc satis fuerit statuere universe, haud vulgarem esse debere Poëticam Dictionem, sed sublimem, sed grandem, sed majestate plenam.

Unde comparatur hujus Dictionis majestas?

R. Præter ea quæ diximus, duo insuper ad eam Majestatem conferunt plurimum. 1. Si adposita, quæ vocant, nomina, sive Epitheta aliquid ex-

(1) cap. 21. (2) Satyra 4. lib. 1.

mii præferant. 2. Si quæ occurruunt tritæ, ac vulgares loquendi formæ, mutentur in alias exquisitiores, ac reconditiores.

Quomodo adposita nomina sive Epitheta aliquid eximiū præferent?

R. Si adhibeantur ea, non ut impleatur dumtaxat, sed etiam ut ornetur versus; si contra quærantur ea, quæ vim, ac dignitatem vocibus, quibus adtribuuntur, adjiciant.

Qui numerus Poëticae Dictioni convenit?

R. Numerum ab Oratorio longe diversum indicit Aristoteles, qui numerus μέτρον grace, latine *dimensio* appellatur.

Quid requiritur ad illum Numerum?

R. Duo requiruntur maxime. 1. Ut religiose servetur legitima pedum dimensio. 2. Ut numerus ille rebus ipsis, quæ celebrantur, sit in primis accommodatus.

Quomodo legitima servabitur pedum dimensio?

R. Servabitur 1. Si prosodiæ syllabarum, ac pedum ratio habeatur, quæ omnis disciplina traditur à Grammaticis.

2. Si versus solutus non sit, & sine cæsura, qualis est hic Ennianus:

Sparsis hastis longis campus splendet, & horret.

3. Si crebriora continenter in versu non sufflent monosyllaba, ut in hoc Ovidiano:

Si quis, qui, quid agam, forte requirat, erit.

Vel

Vel contra grandiorum vocabulorum continua-
tio non inducatur : ut enim minutiores voculae
humilitatem , sic grandiora vocabula tumorem in
versum inducunt.

Quomodo numerus rebus ipsis accommodabitur?

R. Si pedes ita coagententur , ut verba re-
bus ipsis quasi concinere videantur. Atque ideo
observandum est qui numeri ad laetitiam , &
celeritatem , qui ad moram , difficultatem , mo-
lem , & tristitiam , qui vero faciant ad lenitatem;
& exempla ponenda in versu omnium spectatissi-
mo , hexametro , locaque adducenda ex Poëtarum
principe Virgilio.

*Qui numeri valent maxime ad laetitiam , & cele-
ritatem?*

R. Valent ad id numeri fluentes , ac liberi ,
cum ipsa Carmina decurrunt expedita perpetuis,
aut frequentibus Dactylis ; raris , aut molliusculis
elisionibus :

Inde ubi clara dedit sonitum tuba, finibus omnes,
Haud mora , profluere suis ; ferit æthera clamor
Nauticus , adductis sputnant freta versa lacertis.

.... Trepidusque repente refugit.

Quadrupedante putrem sonitu quatit ungula cam-
pum.

*Qui pedes ad moram , difficultatem , molem , tri-
stiam , & majestatem faciunt ?*

R. Faciunt ad hoc crebri spondæi , elisiones , ver-
ba longiora :

Luctantes ventos, tempestatesque sonoras.
Monstrum horrendum, informe, ingens, cui lu-
men ademptum.

Amissum Anchisen flebant, cunctæque profundum
Pontum adspectabant flentes.
Illi inter se magna vi brachia tollunt
In numerum, versantque tenaci forcipe massam,

Item excurrit aliquando hypermetrum carmen,
& rerum granditatem ipsa syllabarum redundan-
tia demonstrat:

Et magnos membrorum artus, magna ossa, lacertosque
Exuit.

Jamque iter emensi, turres, ac tecta Latinorum
Ardua cernebant Juvenes.

Exit quoque versus in monosylabam cum ener-
gia in sequentibus exemplis: *Procumbit humi bos.*
Mole sua stat. Tota nituntur opum vi. Subsedit aqua
mons.

Qui pedes faciunt ad lenitatem carminis?

R. Lenissime fluit alternorum dactilorum, &
spondeorum contemplatione.

Flectit equos, curruque volans dat lora secundo,
Sidoniam picto chlamydem circumdata limbo.

Neque pedum tantum, sed litterarum etiam
ratio habenda est: cum aliæ suavitatem concilient,
asperitatem inducent aliæ, quædam granditati

serviant, & amplitudini. Primum elementum A nescio qua mollitie carmen exhilarat; quare à sapientissimo Poëta libentissime frequentatur.

Mollia luteola pingit vaccinia caltha.

Vel, mista rubent ubi lilia multa
Alba rosa.

Potuisset luteolis calthis scribere, & multis rosis.
E & I sonum habent exilem. V vastitatem sonat:
Vastos valvunt ad litora fluctus. Vorat æquore vortex,
Littera O omnium lenissima, maximeque sonora
est. R carmini adfert asperitatem, ideoque dicitur littera canina; hanc saepius usurpayit Virgilius
agens de Cane inferorum:

Cerberus hæc ingens latratu regna trifaci
Personat, adverto recubans immanis in antro.

Quam apte dicitur! ergo ægre rasbris terram ri-
mantur. Sed hæc sufficient, ex quibus capi possit
conjectura ceterorum: est enim eadem ratio pe-
dum in aliis carminum generibus, ubi metrum
rebus aptari debet, ut in versu heroico.

CAPUT UNDECIMUM.

DE CAUSSA EFFICIENTE POESEOS

Quae est cauſſa efficiens Poēſeos?
R. Mens Poëtæ certis imbuta præceptis, &
arte instructa omnem efficit loēſin.

Igitur Poëtica appellanda est Ars?

R. Sane appellanda est. Quia Poëtica est facultas animi, quæ certis quibusdam, & non errantibus preceptis ad finem suum tendit, opusque perficit: quæ est Artis notio.

Num furor aliquis Poëticus, quod ajunt, requiritur ad efficiendam Poësin?

R. Requiritur utique, si modo bene intelligatur, quid veniat furoris illius nomine.

Quid est ille Furor?

R. Est quidam impetus vehementior, quo cum impellitur animus, furere dicitur: oriturque ille impetus à variis animi perturbationibus, quæ undecim numerantur: Amor, Desiderium, Gaudium, Odium, Fuga, Dolor, Ira, Spes, Desperatio, Audacia, Timor. Neque existimandum est adflari divinitus, ut fabulantur poëtæ, hujusmodi Eurorem; verum cum vehementius solito his agitur, quos appellavi, motibus, qui poëtice scribit, & in rei cujuspiam maxima contentione fertur contemplationem, calorem concipit, vi cuius sic loquitur, ut à sensibus alienatus esse videatur.

Quarendonam opus est illo Furore?

R. Nihil opus est illo Furore, cum Poëta Fabulam instruit suis partibus; nihil cum aliquid sedate, ac considerate in primis canendum est: sed in aliquibus orationibus, narrationibus, descriptionibus, objurgationibus, querelis &c. commode aliquando accedit ille Furor.

Utra plus confert ad Poësin, Ars, an Natura?

R. Parum certe sine Arte Natura, parum Ars

sine Natura confert. Ars enim sine Natura tristis est, exsucca; Natura sine Arte vasta est, & inculta. Ita sentit Horatius, cum ait:

Natura fieret laudabile Carmen, an Arte,
Quæsum est. Ego nec studium sine divite vena,
Nec rude quid prosit video ingenium: alterius sic
Altera poscit opem res, & conjurat amice.
Qui studet optatam cursu contingere metam,
Multa tulit, fecitque puer, sudavit, & alsit &c.

Quare quod vulgo dici solet, nasci poëtas, sic intelligendum est, ut multæ dotes à natura requirantur ad poësin, quæ tamen arte debent perfici.

Qui fuere poëseos inventores?

R. De hoc certi nihil adferri potest. Orpheus certe, Linus, Musæus, aut Homerus Inventores Poëseos dicendi non sunt, sed Illustratores, antea quos constat floruisse Poëtas.

CAPUT DUODECIMUM.

DE FINE POESEOS.

Quid est finis Poëseos;

R. Est jucunda morum Institutio. Nam eo tendit Poëta, ut doceat delectando, juxta illud Horatii: (1)

Aut

Aut prodeesse volunt, aut delectare poëta,
Aut simul & jucunda, & idonea dicere vitæ.

Et paucis interjectis versibus:

Omne tulit punctum, qui miscuit utile dulci,
Lectorem delectando, pariterque monendo.

Explica quæso singulas responsionis voces.

R. 1. Cum Finis sit id, cuius gratia aliquid fit; sitque alius Arti, alius Artifici propositus; non agitur hic de fine Artificis, qui est multiplex, cum possit Poëta scribere vel ut famam aucepatur, vel ut aliquem demereatur, vel ut gratiam alteri reponat, vel ut opes comparet. Verum agitur de fine Artis, propter quem est illa instituta: ac proinde ad quem suapte natura collineat.

2. Dicitur ille Finis esse *morum institutio*: quia Civilis Facultas cum ad perfectum Civitatis statum, Civiumque felicitatem tota collimet, & Ars poëtica ad Civilem illam Facultatem, ut pars illius eximia, pertineat; plane sequitur poësin omnem ad ejusmodi felicitatem referri. Cum autem ejusmodi felicitas per optimam morum informationem comparetur, ad eum finem instituta est poësis, ut hoc modo mores informet; atque etiam cum id commode obtineatur actiones humanas celebrando, in quibus sita est felicitas, ut superius tradidimus; hinc factum est ut actiones celebrando, mores instituat.

3. Jucunda appellatur *morum informatio*, propter

ter naturam poëseos; cuius ornatius omnis miras habet delitias. Et sane debuit in hoc poësis, ut in multis aliis, à Philosophia, quæ ad mores pertinet, discrepare: ut austere, & jejune Philosophia, jucunde vero, ac plane magnifice mores Poësis instituat.

Nonne Fines sibi propositos peculiares, ac diversos habent singula poëseos genera? quomodo igitur poësis habere dicitur pro fine jucundam morum institutionem?

R. Habent utique suos diversos fines, ut dicetur inferius, sed huic primo Fini subjectos sic, ut singuli omnes ad eum demum referantur; v. gr. Epica Poësis ex fine suo ad id instituta est, ut Viros Principes admirabili dictione ad virtutes comparandas incitet; Tragica, ut quasdam animi perturbationes componat, ac perpurget; sed isthæc ad ineundam quoque morum institutionem referuntur. Neque etiam alio tendunt Comœdia sales, ac joci, quam ut derisa palam vitia, ludibrioque in scenis habita, evitentur diligentius: sicque suo modo ad hanc morum informationem alia Poëseos genera revocantur, ut patebit clarius ex dicendis inferius.

CAPUT DECIMUM TERTIUM.

DE DIVISIONE POESEOS.

Quomodo dividitur Poësis?

R. Cum Poësis omnis, ut initio diximus, aut fere omnis in imitatione posita sit, optima erit illa Poëseos divisio, quæ à diverso genere imitationis petetur.

Quo-

Quotuplex est imitandi genus?

R. Triplex vulgo adsignatur. Nam in poëmatis vel Poëta per se ipse narrat aliquid, & sermone alterius refert sine ulla personarum inter se colloquiis; vel non ipse narrat, sed alios tantum loquentes, & quasi negotiantes inducit; vel & ipse narrat aliquid, & alios inducit loquentes, agentesve. Atque ex tribus his Imitationis generibus totidem petuntur genera poëseos.

Qui vocas primum genus?

R. Narrativum, vel Enuntiativum hoc genere continetur: v. g. tres primi Libri Georgicorum, & prima pars quarti; ubi semper ipse narrat Virg.

Qui vocas secundum genus?

R. Dramaticum, sive Activum, quo genere comprehenduntur Tragicæ, & Comicæ Fabulæ; item Eclogæ, ubi inducuntur agentes inter se Pastores.

Qui vocas tertium?

R. Mixtum appellatur, in quo Poëta ipse narrat atque etiam personas inducit agentes. Ad hoc genus pertinent Ilias & Odyssaea Homeri, Æneis Virgilii, & alia id genus Poëmata. Ad hæc tria genera facile revocantur, ut patet, omnes elegiæ, odae, satyriæ, aliaque poëmata.

Nonne alia est divisio poëseos?


R. Alia est maxime vulgaris in poëmata multum alicunde inter se discrepantia. Celebrantur in primis Epopœja, Tragoedia, Comœdia, Satyra, Elegia, Ode, Epigrammata, &c. Unde Poëtæ Epicæ, Tragici, Comici, Satyrici, Elegiaci, Lyrici, Epigrammatarii appellati: de quibus singulis, aliisque momenti alicujus poëmatis deinceps agendum erit.

INS-

INSTITUTIONUM

POETICARUM.

LIBER SECUNDUS.



DE EPOPOEJA.

CUm principem inter Poëmata locum obtineat Epopœja, de illa nobis modo agendum est. Illius naturam, ac varias affectiones ut exponamus, definitio primum illius proferenda est, deinde examinanda Materia, quam statuemus esse Actionem, cuius dotes singulas prosequemur; tum Forma explicanda, & apta partium tradenda Dispositio, ubi de propositione, Inventione, Narratione, & Epilogo poëmatis Epici, quantum satis erit, disputabitur.



CAPUT PRIMUM.

DEFINITIO EPOPOEJÆ.

Quae est vis, & potestas hujus vocis, Epopœja?

R. Ut locutio omnis oratio est, antonomastice tamen Oratio appellatur ornatissima, qua utun-

utuntur Eloquentes ; sic *Epos*, quod generatim Verbum significat, addictum est speciatim Poësis; atque ab illa communi significatione contractum est ad Poëma, quod vocatur Heroicum. Item ποίειν Græce idem est ac latine *facere*, vel *fingere*. Hinc sit, ut Epopœja secundum vim vocis sit quasi fictio, seu scriptio poëmatis Epici, quod Heroicum dicitur.

Quomodo definitur Epopœja?

R. Definitur *Imitatio Actionis unius, totius, veræ, verisimilis, illustris, felicis, & à nobili persona profectæ, narratione dramatica, & versu hexametro, que Viros Principes ad primarias virtutes excitat, atque adhortatur.*

Explica, quæso, singulas voces.

R. 1. Dicitur *Imitatio*, quia poësis omnis, aut quæ saltem spectatissima est, ut Epica, in imitatione posita est.

2. Dicitur *Actionis Imitatio*, quia Actiones humanæ sunt materia poëseos, ut supra docuimus. (1)

3. Dicitur *Actionis unius, totius, veræ, verisimilis, illustris, felicis, & à nobili persona profectæ;* quibus verbis designatur materia Poëmatis epicis; ratione cuius partim convenit cum aliis poëmatiis, partim ab iisdem discrepat, puta à Comœdia, cuius materia est Actio vulgaris, & plerumque obscura.

4. Dicitur *Imitatio Actionis narratione dramatica insignis*, eo sensu, ut nec poëta semper ipse narraret,

(1) Lib. I. cap. 2.

ret, sed personas loquentes, agentesve s^epē etiam inducat; quod jucundius multo vitæ rite instituendæ hoc pacto præcepta tradat.

5. Dicitur hæc imitatio *versu hexametro exornata*: quod necessario illud requiratur ad Epicum Carmen, juxta illud Horatii:

*Res gestæ Regumque, Ducumque & tristia bella,
Quo scribi possent numero, monstravit Homerus.*

6. Dicitur imitatio *Actionis*, quæ *Viros Principes ad primarias virtutes incitet*: quibus verbis attingitur Epopœjæ finis. Ad id enim illa instituta est, ut omnium animos, sed principum præsertim ad præclaræ facta accendat, ad eaque quasi viam sternat, ponendo ob oculos illustrem quamdam actionem, de qua in capite proxime consequenti.

C A P U T S E C U N D U M.

DE MATERIA EPOPOEJÆ.

Quae est materia Epopœjæ? R. Est Actio personæ nobilis, una, tota, vera, verisimilis, illustris, ac felix.

Quare debet esse Actio personæ nobilis? R. Quia cum finis ille sit Epopœjæ propositus,

ut Viros Principes ad præclaræ facta accendat: debet certe proponi personæ actio, quam imitari

fit gloriosum. Certum est autem sibi laudi verte-
re Principes, non plebejas, aut obscuras perso-
nas, sed nobiles, atque illustres imitari. Sit
itaque illa Actio insignis alicujus v. gr. Herois,
qui Principum animos laudis studio incensos ad
sui admirationem, imitationemque rapiat.

- *Quem vocas Heroem?*
- R. Antiqui fabulantur, Heroas esse quoddam
genus Deos inter, & homines; natos illos vel ex
Dea aliqua, & mortali viro, ut Achillem, &
Æneam; vel ex Deo, & muliere mortali, ut Her-
culem. Jam vero Heros virum extraordinarium so-
nat, in quem tria hæc maxime dicuntur confluere.
1. Corporis habitudo firma, ac laborum patiens.
2. Animus præsens, erectus, & robustus quo-
dammodo, cui ab optima corporis temperatione
accedit magnitudo. 3. Divina quadam vis, &
efficientia: qua, qui adflatur, supra hominem &
sapere, & posse videatur.

§. I. Actio Feminæ an materia Epopœjæ.

ITane Actio Epopœjæ debet esse Herois, ut non
possit esse Feminæ, quæ dicatur Heroina?

R. Actionem Feminæ esse posse materiam
Epopœjæ adfirmant aliqui, negant alii. Utriusque
partis rationes subjicio.

Qui adfirmant, ajunt, 1. Non obesse Feminæ
animum, qui virili similis est, ejusdemque natu-
ræ; huic posse esse armorum usum; atque etiam
Feminas aliquando & corporis firmitate, & la-
bo-

borum patientia viris præcellere. 2. Feminæ actionem esse sæpe materiam Tragœdiæ ; quidni & Epopœjæ ? 3. Feminæ actione ad præclara facta accendi posse Viros Principes , quibus turpe sit ea non posse agere , quæ femina gesserit. 4. Feminas à præstantissimis Poëtis inducetas esse in Epopœjas , & maximis celebratas laudibus propter fortitudinem bellicam , puta Chlorindam à Tasso , à Virgilio Camillam. 5. Excitari à Deo posse Heroinam quandam , cui belli alicujus summa committatur ; quæ habeat omnes Herois dotes , nullos habeat sexus defectus.

Qui vero negant Actionem feminæ esse posse materiam Epopœjæ , respondent 1. Animorum quidem sexum esse nullum : at feminineum corpus esse imbellius , cuius contagione languet animus : neque rebus bellicis perfecte tractandis idoneas esse feminas , quibus Aristoteles curam rei domesticæ attribuit : arma vero , & ea , quæ non modo extra civitatem , sed etiam extra privatos parietes fieri necesse est , viris concedit.

Reponunt 2. Actionem feminæ convenire Tragœdiæ , non item Epopœjæ : quia finis hic est Tragœdiæ , ut excitentur , purgenturque quidam animi affectus ; qui finis tam facile obtinetur , sive viri , sive feminæ celebretur Actio ; at Epopœjæ cum sit ille finis , ut ad ardua quæque , & præclara facta accendat Viros Principes , huic rei imparem esse feminæ Actionem ; unde

Negant 3. Actionem feminæ talem esse posse , quam velint Viri Principes imitari. Esto possit illa

illa feminæ Actio incitare Viros Principes ad arduum aliquid suscipiendum : sed actione illi feminea movebuntur tamquam argumento , quod vocant à *minori ad majus* : quod turpe sit viro, maxime principi , illud non aggredi , quod femina fortiter gesserit : at enim non erit hæc Actio exemplaris loco , quod sibi proponant Viri Principes imitandum.

Observant 4. Nullam umquam feminæ Actionem à præstantissimis poëtis in materiam Epopœjæ fuisse adsumptam ; celebratas quidem à Tasso , & Virgilio feminas ; sed in Episodia quasi contreras illas fuisse ; atque etiam in pœnam temeritatis obscura morte fuisse mulctatas , ne fuso imbelli, indignoque sanguine virum aliquem fortem contaminarent. Sic Chlorinda de nocte , & ab imprudenti Tancredo perimitur apud Tassum ; ab ignobili viro occiditur Camilla apud Virgilium. Atque etiam fictitiæ illæ Heroinæ non stant ab Heroe Epopœjæ ; immo ipsi adversantur , ut Chlorinda , quæ Mahometanis , & Camilla , quæ Turno militabat : Adde quod unam Camillam uno in libro pugnantem adducit Virgilius , quæ Venatorem , & Sacerdotem interimat , Heroem nullum.

Notant 5. Actionem feminæ à Deo excitatæ , quæ nulos habeat sexus defectus , non esse aptam Epopœjæ : quod solvatur hoc pacto Actio primaria per machinam , quod vitiosum in primis esse contendunt. Verum ne quid modo dicam de solutione per machinam , de qua postea in Forma Epopœjæ ; belle reponant hujus secundæ sententiaz

patroni de Actione Heroinæ ordinariæ, at non extraordinariæ, & per miraculum à Deo excitatæ, procedere quæstionem. Atque hæ sunt utriusque partis rationes, quæ suum utrimque pondus, suamque, quamvis forte non ex æquo, videntur habere probabilitatem.

§. II. Actio Epopœjæ quomodo Una.

Quo sensu Actio Epopœjæ debet esse Una?

R. Eo sensu, ut sit illa Actio per se simplex, nec dividi possit in plures Actiones primarias. Sic Virgilius Trojæ ruinam, & multiplicia sui Herois facta contexuit in Æneide, quæ sunt quidem variæ per se Actiones; sed habet tamen unam, simplicemque Actionem, eamque primariam, quæ est in Italia Religionis, Regnique per victoriam de Turno constitutio: unde pendet Herois felicitas, ad quam ceteras omnes retulit, tamquam Actiones secundarias.

Quare una debet esse Actio Epopœjæ?

R. Hanc adfert rationem Aristoteles, quod omnes artes, quæ imitatione aliquid perficiunt, ad unum quid in primis absolvendum adlaborent, cuius gratia alia esse videantur: talis v. gr. Pictura, quæ unum aliquid in unaquaque tabella sic perpolit, ut cetera ad id referri omnia satis intelligantur.

Qui Poëtæ contra Epopœjæ peccant unitatem?

R. 1. Qui multas Actiones unius, ejusdemque Herois primarias uno pœnitente complectuntur. Re-

Reprehendit certe Aristoteles eos, qui ab Hercule, vel Thesleo res omnes præclare gestas uno eodemque opere definiri posse putaverunt. Vitio vertitur Statio, quod in Achilleide Herois sui vitam persequi velit integrum; canit enim initio poëmatis:

Magnanimum Æacidem, formidatamque Tonanti Progeniem, & patrio vetitam succedere Cœlo, Diva, refer. Quamquam acta viri multum inciita cantu
Mæonio, sed plura vacant. Nos ire per omem Sic amor est, Heroa velis, Scyroque latentem Dulichia proferre tuba, nec in Hectore tracto Sistere, sed tota juvenem deducere Troja.

2. Qui duas diversas Actiones primarias, quod uno eodemque tempore contigerint, una Epopœja velit celebrare: esto id concedatur Historiæ, at Epopœjæ non licet.

3. Qui plures Heroas inducunt; quibus eamdem ex æquo gloriam tribuant. Plures adsint, esto, uno in poëmate Heroes: modo unus ceteris videatur præcellere, cuius sit Actio primaria. Sic Pallas, & Tarchon Æneæ nihil officiunt gloriae: quamvis fortiter pugnet uterque, atque unus multum conferat ad victoriam de Turno reportandam.

§. III. Actio Epopœjæ quomodo Tota.

Quo sensu Actio Epopœjæ debet esse Tota?
R. Eo sensu vult esse Totam Aristoteles, ut sit in illa Initium, Medium, & Finis. *Quid*

Quid intelligis per initium, Medium, & Finem Actionis?

R. Per Initium intelligo causas, & consilia Actionis suscipiendæ; per medium, caussarum illarum effectus omnes accipio, & effectuum difficultates ad felicem exitum perducendorum: per Finem vero, illarum omnium difficultatum solutionem interpretor.

Rem pone in exemplo?

R. Exemplum esto in Aeneide. Aeneas incensa Troja in eam regionem, unde majores sui venerant, vocantibus fatis, collecta Trojanorum manu conferre se constituit: *Ecce initium.* Post multos terra, marique exantatos labores, Junone totam Trojanorum gentem dirissimis odiis ubique prosequente, in Italiam tandem appellit. Amice à Latino Rege accipitur, atque etiam in generum adsciscitur. Ægre admodum id ferens Turnus, Dauni Rutulorum Regis filius, qui jamdudum Laviniæ Latini filiæ nuptias ambiebat, grave bellum movet contra Aeneam, quocum sæpe pugnat, & atrociter: *en Medium.* Sed victor tandem Aeneas, Turno occiso, & Laviniam, & regnum obtinet: *en Finis.* Reliqua sunt in Episodiis.

Quid itaque Mapheus Veginus librum adjecit Aeneidi, in quo dolorem Rutulorum, Dauni fletum de morte filii, nuptias Laviniæ, & Aeneæ Apotheosis prosecutus est?

R. Vitiose nimirum, & inepte egit: cum id fatis intelligatur consecutum, & multa circa duo postrema insinuet Virgilius in suo opere absolutissimo.

Az ideo perfecta dicenda est, quod Tota sit Actio Epopœjæ?

R. Cum tota sit illa actio, cui nulla pars deest; perfecta ut sit, requiritur præterea, ut partes inter se apte cohærent, accedatque rerum omnium perfectio, & absolutio. Quare præcipit Philoſophus, ut poëta, qui Fabulam recte velit constitutere, non tantum eam non incipiat temere, aut finiat, sed etiam formis traditis infistat. Verum hæc, & quæ ab eodem traduntur de magnitudine Actionis, commodius, cum agetur de Forma Epopœjæ, tractabuntur,

§. IV. Actio Epopœjæ qui Vera, & Verisimilis.

Quo sensu debet esse Vera Actio Epopœjæ?

R. Ea sensu, ut Poëta teneatur proferre Actionem, quæ vere contigerit; quam tamen sic ornabit, ut in ornamentis studeat magis verisimilitudini, quam veritati.

Quare Actio Epopœjæ debet esse Vera?

R. Quia nemo ad præclare aliquid gerendum incitatitur proposito aliquo consimili facto, quod certe tamen cognoverit esse falsum: ac proinde fine suo excideret Epopœja, si falsa introduceretur Actio primaria. Idem plane de Tragoedia dicendum est, cuius Actio, ut illustris, sic vera debet esse, ut moveat.

Quo sensu debet esse Verisimilis Actio Epopœjæ?

R. Eo sensu, ut quod narratur, credi facile possit contigisse. Nihil præcipit studiosus Philoſophus,

phus, quam ut verisimilitudinis habeatur ratio.

Quare debet esse illa Actio verisimilis?

R. Quia non satis est aliquid esse verum, nisi & illud idem verisimile sit, ut ad imitationem excitet. Nam qui fieri potest, ut, si Actio proponatur, quæ quidem vera sit, sed vires tamen humanas longe superet, hominem illa ad simile quid fuscipiendum, aut gerendum impellat?

§. V. *Actio Epopœjæ quomodo Illustris, & felix.*

Quo sensu debet esse Illustris Actio Epopœjæ?

R. Debet esse illustris vel ratione sui, vel ratione personarum. Illustris est ratione sui actio Æneidos, ubi inter alia agitur de fundatione Imperii, & constitutione religionis, juxta illud:

Dum conderet urbem,
Inferretque Deos Latio; genus unde Latinum,
Albanique Patres, atque altæ moenia Romæ.

Illustris est ratione personarum Actio Odysseæ, quæ Viris non admodum illustribus potest convenire; illa enim sic habet. Ulysses classe amissa, occisis sociis, multiplicè iniquissimi maris tempestates expertus, multos annos domo abfuit; rem illius domesticam interea proci decoquebant, ejus uxor nuptias ambiebant, Telemachum filium insidiis petebant; reversus ille procos ex insidiis occupat, atque interficit. Quid hic illustre præter personas?

Quare illa actio debet esse illustris?

R. Quia cum Epopoeja viros Principes ad præclaræ factæ debeat incitare, proponi debet illustris Actio, quam illi imitentur.

Quo sensu debet esse Felix illa actio?

R. Eo sensu, ut felici semper terminetur exitu. Nam præterquam quod sape Actio tota non erit, quæ infelici claudetur exitu; si præterea Heros misere pereat, aut grandi aliqua calamitate sub finem excipiatnr; concitabit illa indignationem, ac dolorem; verum ad imitationem sui minime commovebit: & sic Epopœjæ finis non comparabitur. Debet itaque Actio primaria felicem forçiri exitum: quamvis nihil opus sit Heroas inducere usquequaque, & in omnibus adjectitiis actionibus fortunatos.

CAPUT TERTIUM.

DE FORMA EPOPOEJÆ.

Quae est forma Epopœjæ? R. Cum Forma poësos universæ sit fictio, seu constitutio, & compositio rerum, quæ tractantur in poësi; sic Epopœjæ Forma erit eorum rerum compositio, quæ soli conveniat Epopœjæ; posita illa in quodam cultu, ornatuque Actionis, qualem in superiori capite descripsimus; adeo ut illa Forma nihil aliud sit, quam Actio suo modo composita, culta, ornata.

Quid requiritur ad illam formam , sive Actionis compositionem ?

R. Requiritur , ut Forma illa , Fabula , Compositio (eodem enim recidunt hæc vocabula) sit una , magna , splendida , in suas partes rite distributa , & certo quodam ordine disposita : quibus verbis attinguntur , 1. Fabulæ epicæ dotes : 2. Partes , 3. Dispositio : de quibus omnibus breviter disputandum est .

§ I. Fabulæ Epicæ Dotes.

Quae sunt dotes Epicæ Fabulæ ?

R. Tres in primis memorantur , Unitas , Magnitudo , Majestas .

Quomodo erit una illa Fabula , quæ res adeo disparæ , diversasque complectitur ?

R. Erit illa Una , si tanta sit illarum rerum omnium inter se connexio , ut in unum aliquid videantur coalescere ; si cum loco movetur aliquid , aut refecatur , non bene sibi constet Fabula. Laudat Homerum Philosophus (1) , quod sive natura duce , sive arte in Odysseam non conclusit ea Ulyssis facta , quæ alia ex aliis non satis penderent. Ea certe laude florere dicenda est Æneis ; cui si v. gr. Trojani excidii , vel Æneæ per septem annos peregrinationis narrationem detrahas , à Didone tam adposite expetitam , ut quis , ac quantus vir tenderet in Italiam , plane liqueret ;

vel

(1) cap. 8.

vel si ludorum celebritatē , qui ad posteros transmitti deberent , subducas ; vel si descensum ad inferos , ubi tam multa de Romano , quod fundatus erat , Imperio didicit Æneas , silentio prætermittas ; aliquid certe in ea Fabula desiderari sentias.

Quomodo Magna erit Fabula Epica?

R. Philosophus (1) Epopœjam comparat cum animali , quod quamvis elegans , si pusillum est , bellum vocari potest , non pulchrum : sin præter modum excreverit , monstrum fiet ; debet videlicet naturali florere magnitudine. Ita se habet Poëma , quod nec brevius , nec longius esse oportet : sed ita temperatum , ut oculos magnitudine impletat , non fugiat.

Quæ cum universè dicta sint , proprie magis , ac definite aliquid de justa Epopœja magnitudine statuendum est : monendumque in primis aliam esse actionis , aliam Fabulæ magnitudinem : de prima non ago hoc loco , quæ in eo sita est , ut habeat Actio Initium , Medium , & Finem , ut subra docuimus (2) : sed de altera institutam esse quæstionem , ac proinde videndum , quæ sit illa magnitudo Fabulæ. Duplicem igitur illam facit Philosophus : unam Actionis , quam vocat , non nude , aut suo carentis ornatu , sed composite alteram quantitatis.

Quenam est magnitudo Actionis composite?

R. Ia eo posita est , ut uno circiter anno gesta fuerit , quæ est Actio primaria ; sic Iliadi

an-

(1) Cap. 7. . (2) Cap. 2. §. 3.

annum dedit Homerus ex animadversione Mambruni (1), Odysseæ tantum quinquaginta dies idem adtribuit: Æneidi quatuor menses supra unum annum concessit Virgilius. Sed Episodia, aliaque adjectitia ornamenta nullis definiuntur temporis limitibus: cum Ilias novem annis, Odyssea unde viginti res gestas comprehendat, & Æneis quidquid interfluxit ab heroicis Æneæ temporibus ad ætatem Augusti Imperatoris.

Quenam est magnitudo quantitatis?

R. Posita est hæc in numero versuum, qui ad dena fere millia excurrit in Æneide, duodena excedit in Odyssea: octo, vel novem Tragoedias vulgo idicitur æquare versuum numero Epopœja. Sed de hoc argumento redibit sermo inferius, cum de magnitudine dramatis disputabitur.

Unde arcessetur majestas Epicæ Fabulæ?

R. Ex triplici potissimum capite. 1. Ex mirabili peripetiarum, agnitionum, episodiorum, machinarumque contextu. 2. Ex narrationes dramatica, cum personas loquentes, agentesve adducet Poëta. 3. Ex dictione illustri, ac splendida, de qua diximus superius. (2)

§. II. Fabulæ Epicæ Partes.

Quae sunt partes Fabule Epicæ?

R. Duæ adsignantur: Nexus nimirum & Solutio.

(1) *Dissert. perip. quest. 7. n. 7.* (2) *I. L. c. 10. §. 3.*

Quid est Nexus Fabulæ?

R. Est ea pars, quæ ab initio Fabulæ ad eam usque partem excurrit, qua transit Poëta ab infelicitate ad felicitatem in Epopœja, vel contra à felicitate ad infelicitatem in Tragoëdia.

Quid est solutio?

R. Est altera pars Fabulæ, quæ ab illo transitu usque ad finem pertinet, v. gr. quidquid in Homeri Iliade certamen antecedit, quo decertavit cum Hectore Achilles, in Nexus ponitur: ipsum vero certamen est in Solutione; item in Æneide quæcumque Æneæ, & Turni monomachia præmittuntur, sunt in Nexus: ipsa monomachia in Solutione est.

Quid potissimum observandum est circa Nexus Fabulæ?

R. Ne varia sic texantur episodia, quæ in Nexus cadunt potissimum, ut animum auditoris delectando, longius aberrent ab Actione primaria, aut à fine poëmatis sint prorsus aliena.

Quid observandum est circa Solutionem Fabulæ?

R. Primum, ut si qua sint in Solutione episodia, ne longius petantur illa, sed sponte quasi oblata, & è re nata esse videantur; alterum, ut ea sint brevia in primis: quandoquidem in Solutione ad finem anhelat auditoris animus, quem proinde longioribus episodiis morari minime convenit.

Licetne adhibere Machinam in Solutione Fabulæ?

R. Alii negant, adfirmant alii. Qui negant, suam i. ex eo capite tacentur sententiam, quod so-

solutio facta per machinam Epopœjæ fini maxime officiat. Nam qui poterit ad Actionis imitationem Vir Princeps impelli , cui se sentiat plane impatem: cum intelligat auxilio se plusquam humano ad simile aliquid suscipiendum indigere ? 2. auctoritatem obtendunt Aristotelis , qui vult fieri Solutionem non per machinam , sed ex verisimili, id est, ratione naturali, qua res exire solet.

Qui vero adfirmant , ajunt nihil obstare , quoniam minus per machinam solvatur Epopœjæ Fabula. 1. Ad imitationem Actionis posse impelli Viros Principes , in qua externo quidem numinis aliquius auxilio adjuvatur Heros , dum otiosus ille Heros non remaneat , sed præstet per se plurimum , unde feliciter cedat præclare factum. 2. Sic clausisse Epopoejas præstantissimos Poëtas; esse v. gr. machinam in Odyssæ clausula , quæ Minervæ ope solvitur ; esse in Æneide , ubi Turni cædes Jovis ductu , & auspicio , atque etiam Furiæ ministerio conficitur. 3. Aristotelis præceptionem maxime locum habere in Tragoedia , in Epopœja non item: ratio est , quia in Epopœja cum lateat magis machina , quam in Tragoedia , ubi machina Dei è cœlo delapsi in theatrum producebantur , magis certe animos feriebat subiecta oculis ea machina in Tragoedia , quam suscepta auribus in Epopœja ac proinde minus erat ferenda in Tragoedia , quam in Epopœja. Vide Frizonium , qui tam fuse , quam docte eo de argumendo agit in poëtica in dissertatione de narratione. (1) §

§. III. Fabulæ Epicæ Dispositio.

Quænam est Fabulæ Epicæ Dispositio?

R. Duplex est illa Dispositio, una rerum partium altera.

Quænam est Dispositio rerum?

R. Intelligitur illa Dispositio è celeberrima inter magni nominis in re poëtica auctores orta dum contentione: quorum alii volunt rerum, prout contigere, servari ordinem naturalem; alii contendunt eundem debere perturbari: unde quæstio exstitit, an Poëta, ut Historicus, hunc servare debeat narrandi ordinem, ut quodcumque primum contigerit, narret primum, & in ultimum locum conjiciat, quæ postremo facta sunt: vel contra, an debeat relicto naturali ordine pro arbitratu suo à mediis, aut etiam postremis aufpicari.

Quid statuis ea de re sentiendum?

R. Eodem puto utramque recidere sentiam, ac proinde non tam de re hic, quam de voce disputari; nimirum quo nomine appellanda sit ejusmodi narratio, ambigitur; cum in id omnes consentiant, optime fuisse institutum narrandi ordinem ab Homero, Virgilioque usurpatum, rerumque permixtionem perbellè cadere: verum alii contendunt, non ideo perturbari ordinem dicendi naturalem, alii perturbari volunt. Quæ ut concilientur inter se, dicendum videtur, non perturbate narrari, si spectetur sejuncta ab episodiis Actio primaria: perturbate vero narrari, si

om-

omnia simul accipiuntur, neque à primaria Actione secernantur Episodia.

Fam vero quis ordo Partium servandus est in Fabula Epica?

R. Posteaquam Poëta Actionem, qualem descripsimus, animo informavit, personarum mores, & officia excogitavit, episodia, peripetias, agnitiones, & machinas commentus est, & suum cuique locum destinavit, ad opus tandem aggreditur. 1. Proponendo, quid canendum suscipiat. 2. Invocando numen aliquod, cujus adflatu arduum opus perficiat. 3. Rem totam narratione prosequendo. Denique epilogum aliquando, sive perorationem adtexendo. Unde 4. Epopœjæ partes existunt, Propositio, Invocatio, Narratio, & aliquando Peroratio, de quibus omnibus modo nobis agendum est.

16 CAPUT QUARTUM.

DE PROPOSITIONE EPOPOEJÆ

Quid est *Propositio Epopœjæ*?

R. Est prima pars Poëmatis Epici, in qua Poëta breviter proponit, & summatim, quid in reliquo poëmate sit dicturus.

Quæ sunt dotes illius Propositionis?

R. Quod Rethores in Orationis Exordio præcipiunt, ut adposite, ut breviter, ut verecunde

con-

contexatur ; idem omnino de propositione Epopœjæ, quæ est ejus Exordium, dicendum est.

Quomodo adpositæ præmittetur Propositio?

R. Si non vague, sed proprie, congruenterque argumento prætexatur, id est, si rei caput designetur primis versibus ; talis est *Propositio Aeneid.*

*Arma, virumque cano, Trojæ qui primus ab oris
Italiam fato profugus, Lavinaque venit
Litora.*

Quomodo brevis erit Propositio?

R. Si non excurrat latius in iis, quæ parum ad rem faciunt : ea enim tantum adhibenda sunt, quæ valeant ad docilitatem, & attentionem comparandam cum aliqua, si opus est, benevolentia. In legem brevitatis peccat Jovianus Pontanus in principio *Uraniae*:

*Qui cœlo radient ignes, quæ sidera mundo
Labantur tacito, stellis quibus emicet ingens
Signifer &c.*

Ubi vides, crebram ejusdem rei expressionem, ignes, sidera, stellas, cœlo, mundo tacito &c. quæ omnia eodem recidunt. Quanto aptius est initium *Georgicæ Virgilii.*

*Quid faciat lata segetes, quo sidere terram
Vertere, Mæcenas, ulmisque adjungere vites
Conveniat ; quæ cura boum, qui cultus habendo
Sit pecori, atque apibus quanta experientia parcis,
Hinc canere incipiam.*

Hic

Hic nihil redundat, sed libri Georgian singuli singulis fere numeris, aut incisis designantur.

Verum alia est prorsus ratio Panegyricorum, ubi exordimur aliquando à descriptione; vel, proposita quæstione, latius excurrimus: ut videre est apud Claudianum in panegyricis.

Quomodo verecunde, & modestè fiet Propositio?

R. Si absit omnis ingenii, doctrinæque jactatio, omnis granditas, ac tumor, & exquisitiō ornatus. Cyclicum Poëtam, seu circumforaneum, qui Carmen in Corona ad gloriam aucupandam recitabat, acriter reprehendit Horatius, quod sic exorsus fuisset:

Fortunam Priami cantabo, & nobile bellum,

adjungit mox:

*Quid dignum tanto feret hic promissor hiatu?
Parturient montes, nascetur ridiculus mus.*

Deinde prædicat Homerum, qui modestius Odysseam incipit, & paullatim adiurgit magnificenter.

*Quanto rectius hic, qui nihil molitur inepte?
Dic mihi, musa, virum captæ post tempora Trojæ,
Qui mores hominum multorum vidi, & urbes,
Antiphatem, Scyllamque, & cum Cyclope Charibdim.*

*Initium Pharsaliæ adfectatius videtur, & cū
mīdius. :*

Bel-

Bella per Æmathios plusquam civilia campos,
 Jusque datum sceleri canimus, populumque potentem
 In sua victrixi conversum viscera dextra;
 Cognatasque acies, & rupto foedere regni,
 Certatum totis concussi viribus orbis
 In commune nefas, infestisque obvia signis
 Signa, pares aquilas, & pila minantia pilis.

Quæ carmina, ut nihil dicam de voce *plusquam*
 initio poëmatis usurpata, tam vasta sunt, sonan-
 tia, tumida, ut fateatur Scaliger se videri sibi
 audire Lucanum, non tam canentem, quam latran-
 tem. Nihilo fuit verecundior Statius in principio
 Achilleidos:

Magnanimum Æacidem, formidatamque Tonanti
 Progeniem, & patrio vetitam succedere cœlo,
 Diva, refert.

Ubi versu primo sexies litteram *a* repetitam
 habes, tres continuas voces tetrasyllabas, quæ ne-
 gotium faceant pronuntianti.



CAPUT QUINTUM.

DE INVOCATIONE EPOPOEÆ.

Quid est invocatio in Poëmate Epico?
 R. Est ea pars Poëmatis Epici, in qua
 numen aliquod invocatur, cuius adflatu Carmen,
 quod

quod per se arduum est , & humano ingenio magis habetur , tandem perficiatur. Quæ invocatio attentionem , & admirationem commovet ; atque etiam summam operi conciliat auctoritatem, ut quasi divinitus , quæ canuntur , postmodum efferantur.

Est semper adhibenda Invocatio?

R. Cum grave aliquod scribitur poëma , illa adhibetur ; in minoribus vero poëmatis , maxime in panegyricis frequenter omittitur.

Sejungiturne Invocatio à Propositione?

R. Sejungitur aliquando , aliquando cum illa involvitur. Latini Epici ut plurimum sejungunt ; sic apud Virgilium post hanc propositionem , *Arma Virumque cano &c.* sequitur Invocatio. *Musa mibi caussas memora &c.* Græci vulgo Invocationi Propositionem implicant ; sic Homerus orditum Iliadem : *Iram canē Dea Pelidæ Achillis &c.* Sic Odysseam , *Virum mibi dic musa &c.* Atque etiam apud Latinos Lucretius , Statius , Vida , & Virgilius ipse in eclogis Invocationem cum Propositione permiscent. Id autem fit opportune , cum opera principibus inscribuntur viris , quos honorifice statim appellamus.

Repetitur invocatio in decursu Poëmatis?

R. Repetitur , cum res gravior dicenda occurrit : ac cum comparatur attentio , cum significatur tanti rem esse , ut opus sit divino quodam adflatu ad eam pro dignitate exponendam.

Qui sunt invocandi in poëmate?

R. Ethnico Poëta profana , & commentitia numina liceat invocare ; at Christiano Divinus Spiritus , Christus Servator , Virgo Deipara , Angelus

Tutelaris, aut is, cuius res gestæ canuntur, Vir Sanctus implorandus est. Item, si res præclare gestas Ducis alicujus, aut Principis scribimus, aut si illi opus dicamus, commode ille potest invocari, uti exemplo suo docuit Virgilius in 1. Georg. his luculentis carminibus:

Tuque adeo, quem mox quæ sint habitura Deorum
Concilia, incertum est, Urbesne invisere Cæsar,
Terrarumque velis curam &c.

Sic Lucanus Neronem in Pharsalia, Valerius Flaccus initio Argonauticæ, & Statius initio Thebaidos Domitianum invocant. Atque hic observandum est, licere Poëtæ Christiano in Sacro poëmaticate Musas usurpare pro poëtica facultate, pro sacro impetu, atque entusiasmo, Jovem pro cœlo, Neptunum pro mari, pro bello Martem; adeoque hæc, aliaque his similia hoc sensu accepta posse poëmatis de Christianis mysteriis scriptis inferi.

CAPUT SEXTUM.

DE NARRATIONE EPOPOEJÆ.

Quid est Narratio Epopæjæ?

R. Est pars, seu potius, corpus poëmaticæ, cui Propositio, & invocatio quasi faciem præferunt, parantque attentionem, & do-

cilitatem. Cum autem non tam Verum, quam Verisimile poëta sit propositum; sic non tam rei gestæ, quam velut gestæ expositio, dici debet hæc Narratio.

Quid est spectandum maxime in illa Narratione?

R. Cum tam late pateat, ut totum poëma exhaustiat, cadunt in illam, quæ hactenus omnia de Epopoeja, atque etiam de poësi universæ sumpta diximus. Quare addenda sunt aliqua dumtaxat circa proprias, quæ vulgo adsignantur, illius dotes.

Quæ sunt illæ dotes?

R. Tot Epicæ, quot Oratoriæ Narrationi dotes tribuuntur: Brevitas, Perspicuitas, Probabilitas, & Suavitas.

Quo sensu narratio Epica debet esse brevis?

R. Eo sensu, ut crebriores, prolixioresque digressiones ne adhibeantur, maxime si ad rem parum faciunt. Arguitur Catullus, quod dimidium Poëmatis de nuptiis Pelei, & Tethidos in descriptione vestis, Ariadnæque fabula consumperit. Fabulæ epicæ, qualem descripsimus, servetur magnitudo, quæ longior non erit, si nihil adducatur inane, quod recidi possit. Nam ut acute Martialis:

Non sunt longæ, quibus nihil est quod demere possis;
Sed tu, Coschoni, disticha longa facis.

Quomodo debet esse perspicua Narratio?

R. Si adulatur quidem ad fabulas, & historias, si usurpentur hellenismi, seu formæ longen-

quendi à Græcis desumptæ : sed ita tamen , ut à quovis non imperito facile intelligantur : si vocabula obsoleta , & ex altissimis antiquitatis rudibus effossa , ac proinde obscura vitentur. Sane ut quisque disertissimus est , ita loquitur appetissime ; sed sat multa eo de argumento tradidimus supra in Dictione poëtica.

Quomodo debet esse Probabilis illa Narratio ?

R. Eo sensu , ut sit verisimilis : nihil debet magis curare Poëta , ut jam sœpe docuimus. Itaque , quod recte monet Horatius :

Ficta voluptatis causa sint proxima veris,
Nec quodcumque volet , poscat sibi fabula credi.

In locis , temporibusque notandis , maxime vero in effingendis personis , hujus verisimilitudinis habenda est ratio.

Ætatis cujusque notandi sunt tibi mores ,
Mobilibusque decor naturis dandus , & annis,

inquit idem Horatius , qui varios hominum mores luculenter ibidem describit. Ubi tamen velim advertas , non tam arctis circumdari terminis probabile , ut locus non sit Admirabili , quod in poëmate spectatur in primis.

Quomodo suavis erit Narratio Epica ?

R. Si elegantia , & jucunditate verborum sonantium , leniumque floreat , quod de oratione monet Tullius : si neque asperos habeat concursus , neque

disjunctos , atque hiantes : si sit circumscripta non longo anfractu, sed ad spiritum vocis apto: si eodem semper tenore non decurrant carmina. Item suavis erit, si intexantur hypotyposes , suspensiones , metaphoræ , exclamations , & admirationes : si interpolantur motus animorum , mores , & colloquia personarum , obliquæ orationes , exitus inopinati , do lores , lætitiae , metus , cupiditates , iracundiæ pro rerum varietate. Sed nihil ad suavitatem accommodatius est, quam idonea , rebusque ipsis consentanea modulatio numerorum , de qua egimus in Dictione poëtica.

CAPUT SEPTIMUM.

DE EPILOGO EPOPOEJÆ.

Adponitur ne *Epilogus* , & quasi peroratio *Epo- pœja* ?

R. Adponitur , non semper quidem , sed aliquando tamen & *Epopœja* , & aliis Poëmatist atque etiam interdum in ipso decursu operis post aliquod nobile factum. Ita Virgilius in 9. Æneid. narrata Nisi , & Euryali celeberrimi paris amicorum cæde , rem hoc Epilogo , sive epiphonemate concludit :

Fortunati ambo , si quid mea carmina possint,
Nulla dies umquam memori vos eximet ævo,
Dum domus Æneæ Capitoli immobile saxum
Accolet , imperiumque pater Romanus habebit.

In fine saepius suorum operum Epilogum usurpant Poëtæ variis modis. Nam aliquando indicant ea, quæ cecinerunt, & temporis, loci, ætatis, occupationum suarum aliquam mentionem adduxunt: ita Virgilius in fine Georgic.

Hæc super arborum cultu, pecorumque canebam,
Et super arboribus, Cæsar dum magnus ad altum
Fulminat Euphratem bello, victorque volentes
Per populos dat jura, viamque adfectat Olimpo.
Illo Virgilium me tempore dulcis alebat
Parthenope, studiis florentem ignobilis otii,
Carmina qui lusi pastorum, audaxque juventa,
Tityre, te patulæ cecini sub tegmine fagi.

Aliquando gratulantur, & immortalitatis spe sibi
blandiuntur. Sic Ovidius in fine Metamorph. canit:

Jamque opus exegi, quod nec Jovis ira, nec ignes,
Nec poterit ferrum, nec edax abolere vetustas;
Cum volet illa dies, quæ nil nisi corporis hujus,
Jus habet, incerti spatum mihi finiat ævi;
Parte tamen meliore mei super alta perennis
Astra ferat, nomenque erit indebile nostrum.

In eundem sensum Librum tertium carminum
claudit Horatius:

Exegi monumentum ære perennius,
Regalique situ Pyramidum altius:
Quod nec imber edax, aut Aquilo impotens

Posit diruere , aut innumerabilis
 Annorum series , & fuga temporum.
 Non omnis moriar &c.

Modestius suam Thebaida adfatur Statius in
 fine :

Durabisne procul , dominoque legere superstes ,
 O mihi bisfenos multum vigilata per annos
 Thebai ? jam certe præsens tibi fama benignum
 Stravit iter , coepitque novam monstrare futuris.
 Jam te magnanimus dignatur noscere Cæsar .
 Itala jam studio discit , memoratque juventus .
 Vive precor ; nec tu divinam Æneida tenta ,
 Sed longe sequere , & vestigia semper adora .
 Mox tibi si quis adhuc prætendit nubila livor ,
 Occidet , & meriti post me referentur honores .

Epilogum Epopœja minime necessarium esse
 demonstrant Ilias , Odyssea , & Æneis , quæ ipsa
 narrationis abolutione concluduntur .



INSTITUTIONUM POETICARUM.

LIBER TERTIUS.



DE DRAMATE.

EPICAM Poësin excipit proxime Dramatica; de qua sic disputabimus, ut in Poëma Dramaticum universe primum, deinde in singulas ejus species inquiramus, ac pro instituto dicendi ordine, definitionem, materiam, formam, partes, finem, aliasque, quæ ipsum tum generatim, tum singulatim adficiunt, proprietates breviter exponamus.



CAPUT PRIMUM.

DEFINITIO POEMATIS DRAMATICI.

Quid est Poëma Dramaticum?

R. i. Si vocis etymon spectes, à voce græca δρᾶν, latina agere, dicitur Poëma Dramaticum, quod totum sit in actione: unde Actores vocantur ii, qui in eo Poëmate colloquuntur.

2. Si rei definitionem quæras, est *Imitatio Actionis*, unius, totius, justæ magnitudinis, veræ, vel falsæ, verisimilis, insignis, vel vulgaris, felicis, vel infelicitatis; quæ metro, & harmonia, non narrando, sed agendo, vel quosdam animi affectus excitat, & purgat, vel vitæ privatæ exemplum proponit.

Explica, quæso, singulas voces.

R. 1. Dicitur *Imitatio Actionis*, quia cum poësis in imitatione actionum humanarum sit posita, ut initio docuimus, species quoque illius singulæ ejusmodi actiones imitantur.

2. Dicitur *Actionis unius, totius, justæ magnitudinis, veræ, vel falsæ, verisimilis, insignis, vel vulgaris, felicis, vel infelicitatis*: quibus verbis partim Dramatica Poësis cum Epica convenit, cuius Actio est una, tota, magna, vera, verisimilis, illustris, ac felix: partim ab eadem discrepat: cum Actio Dramatica possit esse falsa, & vulgaris, si scribatur Comœdia; infelix, si Tragœdia.

3. Dicitur Poëma Dramaticum *imitari metro, & harmonia*, quia inducuntur personæ colloquentes inter se, non soluta, sed vinclata oratione, cui cantus in certis quibusdam locis adjicitur.

4. Dicitur *non narrando, sed agendo imitari*: quia nihil ipse Poëta exponit, aut commemorat, ut in Epopœja: sed productis in scenam personis sermonem tribuit, easque inter se agentes, negotiantesque exhibet.

Dicitur *vel excitare, ac purgare affectus, vel privatæ vitæ exemplum proponere*: quibus verbis, tum

tum officium , tum finis poëmatis illius attingitur . Excitat enim , ac purgat affectus Tragoedia ; vitæ privatæ proponit exemplum Comœdia ; mores utraque , ut omnis poësis , recte instituit .

CAPUT SECUNDUM.

DE MATERIA POEMATIS DRAMATICI.

Quenam est materia Poëmatis Dramatici ?

R. Est actio una , tota , magna , vera , vel falsa , verisimilis , insignis , vel vulgaris , felix , vel infelix .

Quo sensu , debet esse Una , & tota illa Actio ?

R. Eo sensu , ut nec in plures actiones primarias dividatur , nec suo initio , medio , ac fine careat , ut supra docuimus .

Quo sensu debet esse magna ?

R. Eo sensu , ut eo usque crescere possit ac debeat , donec tandem pro rerum natura , quæ aguntur , necessario , vel commode mutatio inferatur in Fabula implexa ; & in simplici juxta naturalem rerum exitum finis imponatur , qui supremus est Actionis terminus . Qualis sit ille , patet ex dicendis inferius .

Quomodo erit Vera , vel falsa ?

R. Si vere contigerit , aut non contigerit . Quando autem , & quatenus veritas , vel falsitas Actioni Dramaticæ conveniat , dicetur postea , cum agetur de Tragoedia , & Comœdia . (1)

Quo

Quo sensu debet esse Verisimilis?

R. Eo sensu, ut nihil adferatur, quod sit præter naturalem rerum ordinem, spectatis circumstantiis, in quibus dicitur illa actio contigisse.

Quomodo Actio illa insignis erit, vel vulgaris?

R. Talis erit vel ratione sui, vel ratione agentium personarum. Quid conveniat Tragoediam, quid Comœdiæ, explicabitur inferius (1)

Quomodo erit Felix, vel Infelix illa Actio?

R. Ratione exitus felicis, vel infelicitatis solet hic appellari felix, vel infelix Actio; adeoque felix est, quæ, licet multas contineat turbas, fortunato tamen exitu concluditur: & contra infelix illa est, quæ, quamvis prospere admodum in decursu succedit, luctuoso tamen fine terminatur. Quatenus autem actioni Tragicæ, vel Comicæ congruat felicitas, aut infelicitas, suis locis exponetur.

CAPUT TERTIUM.

DE FORMA POEMATIS DRAMATICI.

Quae est Forma Poematis Dramatici?

R. Est Fabula, sive Compositio Actionis in qua, ut in Epica, considerandæ sunt Dotes, Partes, & Dispositio.

(1) c. 9.

Quæ sunt Dotes Fabulæ Dramaticæ?

R. Prima est Unitas, altera Simplicitas, tertia Magnitudo.

§. I. Unitas, & Simplicitas Fabulæ Dramaticæ.

IN quo posita est Unitas Fabulæ Dramaticæ?

R. In tanta partium omnium, rerumque diversarum inter se connexione, ut in unum aliquid videantur coalescere.

Quomodo simplex esse debet Fabula Dramatica?

R. Geminam tribuit huic voci notionem Philosophus, (1) qui Fabulam simplicem modo duplici, modo opponit implexæ. Fabula simplex, quæ duplici opponitur, est ea, in qua oritur unus status eorum, de quibus est Fabula, qui è felicibus infelices, aut contra ex infelibus felices existunt. Duplex vero ea est, in qua alii felices, infelices alii evadunt, uti fit in Odyssaea, ubi felix Ulysses, Proci infelices, & in Æneide felix Æneas, Turnus infelix efficitur. Atque hoc sensu simplicem Fabulam esse vult Aristoteles (2) in Dramate; aut saltem longe anteponit duplicitis quod multo magis valeat ad affectuum commotionem. Commoventur enim illi vehementius, cum grandi omnes, nullo excepto, excipiuntur calamitate in Tragœdia; in Comœdia vero placet magis, qui lætus est omnibus Actoribus, ac fortunatus exitus.

Fa-

(1) c. 9. Poët.

(2) c. 1.

Fabula simplex, quatenus opponitur implexæ, ea est, quæ est una continua sic, ut sine peripetia, id est, sine manifesta in contrarium mutatione, aut agnitione ad finem deducatur. Fabula vero implexa ea est, quæ cum peripetia, sive mutatione, aut agnitione, aut utraque simul ad finem usque procedit.

Da exemplum utriusque Fabulæ, simplicis, & implexæ.

R. Habes simplicem Fabulam in Ajace Sophoclis, & Hercule furente Senecæ, & alibi passim multis in locis. Ibi enim nihil accidit præter exspectationem; v. gr. Ajax plenus animi, & contemptus impatiens furit; posteaquam vero ad se rediit, præ pudore sibi mortem consciscit: eodem fere modo Hercules se gerit, nisi quod superfit.

Fabulæ implexæ eximum habes exemplum apud Senecam in Oedipo: ubi cum Oedipum missus Corintho senex adiisset, ut significaret, Regem ipsum à Corinthiis pronuntiatum esse, atque hac ratione gratissimum illi nuntium adferre se existimaret, contrarium effecit. Paulatim enim intellexit ille, se & parricidam, & incestis Jocastæ matris implicatum nuptiis; atque hinc subito, & præter omnium exspectationem factus est infelissimus. Ubi vides mirabilem peripetiam simul, & agnitionem. Atque hæc Fabula, quæ implexa dicitur, longe præstat simplici, juxta mentem Philosophi, qui præcepit Fabulam Dramaticam esse simplicem, quatenus videlicet illa dupli, non vero quatenus implexæ opponitur.

§. II. Magnitudo Fabulæ Dramaticæ.

Quænam est justa Magnitudo Fabulæ Dramaticæ?

R. Quod oculis evenire solet, cum corpus videmus, idem plane accidit memoriarum, cum Dramaticam Fabulam excipimus. (1) Ut enim, quæ vastiora sunt, oculorum conspectum, sic memoriæ captum, quæ sunt longiora, facile excedunt: utriusque vero facultatis vim, quæ sunt minutiora, fugiunt. Atque hinc factum est, ut quemadmodum in omni corpore, sic qualibet in Fabula Dramatica justa quædam debeat esse magnitudo, quam uno quasi intuitu complecti possit auditor, ne distracto in plura, aut obruto rerum multitudine animo, remittant, ac frigeant, qui concitabuntur affectus. Quæ lex pro Tragicis posita, valet etiam pro Comicis, ubi per affectuum commotionem privatæ vitæ rite instituenda ratio quæritur.

Quænam est igitur illa Magnitudo?

R. Præter adsignatam superius magnitudinem Actionis, quæ materiæ locum tenet, duplarem insuper facit illam Philosophus: unam Actionis compositæ, quæ Forma est, seu Fabula; alteram, quam vocat quantitatis.

Quænam est magnitudo Actionis compositæ?

R. In eo posita est, quæ dicitur Actio primaaria, ut uno Solis ambitu contineatur, (2) id est, ut unum diem naturalem, vel nullo modo, vel

pa-

(1) Arist. cap. 5. (2) Aristot. cap. 2.

parum certe excedat, atque etiam ut breviori temporis spatio, puta duabus, vel tribus horis possit definiri; immo eo perfectior, & convenientior erit illa Actio, quo magis accedet ad tempus, quo solet in scena exhiberi. Sed latius multo possunt excurrere, quæ adhibentur Episodia: quamvis & rariora, & breviora esse oportebit, quam quæ adjiciuntur in Epopœja, ne rerum multitudine, ac varietate animus distrahatur, atque obruatur sic in dramate, ut ad primariam actionem non satis attendat, minusque concipiatur, qui debent hinc oriri potissimum, affectus. Atque eo sensu accipienda sunt Philosophi verba, cum Tragoëdiam inter, & Epopœjam id quoque adsignat discriminis; ut certo quodam tempore Tragoëdia, nullo definiatur Epopœja.

Quænam est magnitudo Quantitatis?

R. Quantitas illa posita est in numero versuum: ad ducentos, trecentosve supra mille, atque etiam apud recentiores ad duo millia recensentur; hæc autem lex optima fuerit, ut inter ternas, & senas horas exhibeatur Drama, adeo ut nec brevius sit, nec longius: non brevius quidem, ne forte locus non detur concitandis, ut par est, affectibus; non etiam longius, ne possit usurpari illud Plautinum: *Lumbi sedendo, & oculi spectando dolent.* Jam vero quæ sint partes Fabulæ dramaticæ, aut que illarum dispositio, patebit ex dicendis capite proxime consequenti, & ex capite II.

CAPUT QUARTUM.

DE PARTIEbus POEMATIS DRAMATICI.

Quae sunt Partes Poëmatis Dramatici?

R. Cum Poëma dramaticum ex materia constet, quæ est Actio, quam descripsimus, & forma quæ est eadem Actio composita, exultaque, de qua modo egimus; hinc factum est, ut modo materiæ, modo formæ, modo utriusque simul habita ratione, in suas partes varie soleant Auctores illud poëma distribuere. Sex omnino Dramatis in suas partes reperio divisiones.

Adfer, quæso, & explica illas omnes divisiones.

R. Prima divisio est in *Diverbium*, & *choricum*, quæ omnium maxime generalis est; nam quidquid est in Dramate, ad hæc duo genera revocatur, ut geratur, aut canatur. Diverbium itaque est ea pars Dramatis, in qua colloquuntur, aguntve inter se, qui dicuntur Auctores: Choricum vero dicitur illa pars, in qua iidem Auctores, vel alii concinunt aliquid cum Dramate connexum, de quo postea.

Altera divisio in *Nexum*, & *Solutionem* tam late patet, quam prima, quamvis alio modo Drama partiatur. Nexus in Dramate, ut habet Aristoteles, (1) est totum id, quod à principio ad ultimam usq;

(1) Cap. 16. Poët.

usque pertinet partem, ex qua fit mutatio fortunæ: hac autem mutatione felicitati infelicitas in Tragoedia, & felicitas infelicitati succedit in Comoedia. Solutio vero à mutationis principio ad finem usque protenditur. Sic in Oedipo Senecæ quidquid antecedit illum locum, ubi se tandem & patris imperfectorem, & matris maritum agnoscit Oedipus, unde summa oritur infelicitas, est in Nexus: reliqua sunt in Solutione. Sed de Nexus, & Solutione, quantum satis est, dictum superius (1) in Fabula Epica.

Tertia divisio fit (2) in *Prologum, Episodium, Exodum, & Choricum*. Prologus præcedit primum cantum; diciturque ea pars continere quasi semina omnium, quæ dicenda sunt in reliquo dramate; adeo ut Actorum nemo producatur in Scenam, qui non sit cognitus in Prologo, vel de vultu, vel de nomine, vel alio quovis modo. Quod tamen de illis debet intelligi, quorum res hic agitur præcipue; potest enim è domesticis, amicisve de novo aliquis induci.

Episodium hoc loco, juxta Aristotelem, continet tres Actus intermedios, adeoque tam primariam Actionem, quam secundarias, sive adjecticias comprehendit. Ubi notari velim, & Actionem illam primariam, & secundarias etiam esse Actoris primarii: quamvis hæ quoque actiones adjectivæ possint esse illorum, qui sunt post primarium Actorem nobiliores, qui vocantur ideo Actores Episodici. Exodus est quintus Actus, ubi

Ca-

(1) Lib. 2. cap. 3. §. 2. (2) Arist. cap. I. 10.

Catastrophe, de qua mox , sicuti & de Choro, capite proxime consequenti.

Quarta divisio fit in *Protasin*, *Epitasin*, *Catastasin*, & *Catastrophen*.

Protasis, quæ significat præstitutionem , & præordinationem, est Dramatis initium , in quo proponitur summa rei sine exitus declaratione , ut animus auditoris suspensus teneatur ; nam si præciretur Fabulæ exitus , non sic placerent , quæ postea dicerentur.

Epitasin, quæ rei constitutionem significat , vel ut alii interpretantur , exaggerationem, est ea pars quæ protasin proxime consequitur , & in qua turbæ excitantur, totaque rei negotiatio magis ac magis involvitur , diciturque Latinis nodus erroris.

Catastasis est ea pars , in qua continuatur rerum perturbatio ; ostenditur tamen quomodo possint illæ postea explicari , unde à multis *Catastasis* confunditur cum *Epitasi*.

Catastrophe , quæ subversionem sonat , est ea pars , in qua totum negotium dissolvitur ; cum Actor primarius à felicitate transit ad infelicitatem , vel contra. Ad extremum drama , si ita fieri posset illa est rejicienda , quo magis auditoris animus suspendatur , ac delectetur.

Quinta divisio fit in quinque *Actus* , qui sic appellantur ab actione , cuius sunt partes ; quare tot sunt illi *Actus* , quot habet *Actio* diversas partes , & præcipuas : quinque recensentur. Primus argumentum exponit , at non rei exitum ; secundus rem proprie deducit in actum ; tertius

turbas ciet ; quartus viam ostendit , qua res implicata dissolvantur ; quintus impedita artificiose expedit. Quare nec plures , nec pauciores esse jubet Horatius:

*Neve minor , neu sit quinto productior actu
Fabula , quæ posci vult , & spectata reponi.*

Estne semper eadem Actuum magnitudo ?

R. Augetur illa , vel minuitur pro ratione rerum ; quæ tractantur , quæ possunt esse magis , minusve graves , populoque jucundæ. Jam vero Actus in varias Scenas distribuuntur.

Quid vocas Scenam in Actu ?

R. Sena dicitur pars Actus , in qua una , vel plures personæ colloquuntur : designatur autem personarum vel adventu , vel interventu , vel abitu.

Quot sunt Scenæ in uno Actu ?

R. Plures sunt pro ratione rerum , quæ possunt esse graviores , vel jucundiores : pauciores olim adhibebantur , iam ad tredecim , & amplius numerantur.

Quot sunt Actores in Dramate ?

R. Plures esse quam quatuordecim , vetant Artis Magistri : qui , si prodeant simul in Scenam , tres tantum , aut quatuor ad summum loqui permittuntur. Ita præcipit Horatius:

Nec quarta loqui persona laboret.

Sexta divisio (1) fit in *Fabulam*, *Mores*, *Sententiam*, *Dictionem*, *Melodiam*, & *Apparatum*. *Fabula*, quam diximus esse constitutionem rerum, & actionum compositam, instar animæ obtinet in dramate, & continet actiones, mores, affectus, peripetias, agnitiones, ac reliqua, quæ vocantur, *Fabulæ ornamenta*: quare non tam pars Dramatis, quam ipsum Drama debet appellari.

Quomodo itaque Mores, Sententia, & Dictio cum Fabula dicuntur Drama ex aequo partiri?

R. Quia inter *Fabulæ* partes sic eminent, ut Drama partiri cum ipsa dicantur ab Aristotele.

Quid hic intelligis per mores, sententiam, & Dictionem?

R. Morum nomine docuimus intelligi indolem, & ingenium cuiusque; diximusque requiri bonos, convenientes, & æquabilis tenoris. *Sententia* significat sensus, qui genuini Morum partus esse solent, ac proinde debent esse illis in primis accommodati. *Dictio* est dicendi ratio, quæ Dramati conveniat, de qua in *Tragoedia*, & *Comoedia*.

Quo sensu Melodia, & Apparatus dicuntur esse partes Dramatis?

R. Quia quamvis extra Drama esse censeantur, ad ejus tamen splendorem cum conferant plurimum (sicut ad commotionem affectuum) duæ quoque Dramatis partes vocantur à Philosopho (2) Quare de aliis cum egerimus superius, de his quoque modo agendum est.

Dd

CA.

(1) *Arist.* cap. 4. (2) *cap. 4.*

CAPUT QUINTUM.

DE CHORO IN DRAMATE.

Quid est *Chorus* in *Dramate*?

R. Est pars *Fabulae*, quæ sequitur, vel etiam præcedit *Actum* concentu. Dicitur 1. pars *Fabulae* eo sensu, quo dictum est jam in fine proxime superioris capitulis. 2. Sequi *Actum*, aut etiam præcedere, quod *Actui* soleat postponi, raro præponi. 3. Cum concentu, quod, qui *chorum* agunt, concinere soleant, atque etiam aliquando loquantur.

Quid canitur à Choro?

R. Non canitur quidlibet, sed aliquid cum *Fabula* conjunctum, & ad fine argumento, quod tractatur. Nam vel ferebant judicium de iis, quæ agerentur in *Fabula*, vel favebant bonis, & lugentibus, vel monebant iram esse frenandam, insanosque motus coercendos, vel lugebant cum misericordia, vel Superos deprecabantur. *Chori officia* expreſſit Horatius his versibus:

Actoris partes *Chorus*, officiumque virile
Defendat: non quid medios intercinat *Actus*,
Quod non proposito conducat, & hæreat apte.
Ille bonis faveatque, & consilietur amicis,
Et regat iratos, & amet peccare timentes.
Ille dapes laudet meniae brevis, ille salubrem-

Justitiam, legesque, & apertis otia portis.
 Ille tegat commissa, Deosque prectetur, & oret,
 Ut redeat miseris, abeat fortuna superbis.

* * * * * CAPUT SEXTUM. *

DE SCENICO APPARATU.

Quid est Apparatus Dramatis?

R. In Fabulæ partibus reponitur à Philosopho Apparatus ille, qui recte dici potest ornatus ille omnis, quo & Scenæ, & Personæ instruuntur ad exhibendam ex arte Fabulam.

Qualis debet esse Scenæ ornatus?

R. Per Scenam hic intelligitur locus, ubi exhibentur Dramata, de quo difficile est aliquid præcipere ob multiplicem Dramatum varietatem. Agebantur ludi scenici in theatro, quod in modum hemicycli erat: in eo tria spectabantur maxime, Scena, Orchestra, Proscenium. Scena est frons theatri ab uno cornu ad alterum cum coopertura. Orchestra locus est, in quo spectatores Drama intuebantur. Proscenium item locus ante Scenam porrectus, in quem Actores dicturi prodibant. Scena itaque altior erat pulpito, pulpitum proscenio, proscenium orchestra.

Qualis debet esse Personarum ornatus?

R. A diverso vestium genere diversas quoque sortiebantur appellations Dramata, sive Fabula:

palliatæ vocabantur Græcorum Fabulæ, quod pallio Crœci Actores uterentur; Latinorum togatæ, quod togas illi adhiberent; dicebantur item apud eosdem Latinos prætextæ Fabulæ, quæ Regum, Principum, & Virorum illustrium actiones imitabantur, quod personarum istiusmodi esset prætexta: togatæ tantum vocabantur, quæ actiones privatorum hominum exhibebant, quia toga erat vestis popularis, juxta illud Horatii, *vel qui prætextas, vel qui docuere togatas*. De vestium forma, ornatuque in Dramate nihil certi jam potest adferri, quod varientur vestes pro diversitate regionum, ac personarum, quæ in Scenam inducuntur.

Postquam ea protulimus, quæ ad Drama spectant universe, nunc de Tragoëdia, & Comœdia, quæ sunt ejus partes, videamus.

CAPUT SEPTIMUM.

DEFINITIO TRAGOEDIAE.

Quid est Tragoëdia?

R. I. Secundum vim vocis Tragoëdia est cantus ob hircum: deducitur enim à vocabulis τράγος hircus & ὄδη cantus; quod Tragoëdia prius heret cantando in honorem Bacchi, cui hircus vinearum hostis mactabatur, sive quod hircus præmium esset certantibus, juxta illud Horatii.

Carmine qui tragicō vilem certavit ob hircum,

Deducitur etiam Tragœdiæ vox , juxta alios,
à nomine τραγῳδία , Fæx : quia ora fæcibus perlinebant
Actores ante ultum personarum ab Æschylō re-
pertum , juxta hæc Horatii carminæ :

Ignotum Tragicæ genus invenisse camœnæ
Dicitur , & plaustris vexisse Poëmata Thespis,
Quæ canerent , agerent yœ peruncti fæcibus ora.

2 Definitur (1) Tragœdia : *Imitatio Actionis*,
unius , *totius* , *veræ* , *verisimilis* , & *insignis* , *qua*
metro , & *harmonia* , *non narrando* , *sed agendo*,
misericordiam ciet , *ac terrorem* , *ut adfectuum expia-
tunem* , *seu purgationem inducat*.

Explica , *quæso* , *singulas definitionis partes*.

R. 1. Dicitur *Imitatio Actionis* , quia poësis,
maxime Dramatica , actiones humanas imitatur,
ut diximus superius.

2. Dicitur *Actionis unius* , *totius* , *veræ* , *veri-
similis* , *insignis* : quibus verbis notatur materia Tra-
gœdiæ , *qua* partim convenit cum Epopœja , &
Comœdia , partim ab iisdem discrepat. Nam ma-
teria Epopœjæ est *Actio* , *qua* habet quidem
omnes illas dotes, *sed debet insuper felici exitu*
terminari: *quod in Tragœdiam non cadit* , *qua*
sæpius infelicem , *raro admodum felicem habet*
exitum , Comœdiæ vero *Actio vulgaris est* , &
obscura.

3.

(1) Arist. cap. 3.

3. Dicitur *metro*, & *harmonia perfici Tragoedia*: quod sermonem non qualemcumque, sed metro adstrictum, ut alia poëseos genera, requirat; item & harmoniam, seu cantum, qui ad affectuum commotionem faciat in primis.

4. Dicitur *non narrando, sed agendo exhiberi Tragoedia*, quia, cum sit poëma dramaticum, tota debet esse in Actione: quo pacto ab Epopoeja discrepat, quæ partim in rerum narratione, partim in actione sita est, Poëta modo narrante per se, modo alios narrantes, agentesve inducente.

5. Dicitur *excitare misericordiam, & terrorem, ut affectuum expiationem, purgationemque inducat; quibus verbis Tragoediæ finis attingitur, de quo postea pluribus.*



CAPUT OCTAVUM.

DE MATERIA TRAGOEDIE.

Quae est Materia Tragoedie?

R. Est Actio una, tota, vera, verisimilis, insignis, & infelix. (1)

Quo sensu Actio Tragoedie debet esse una?

R. Eo sensu 1. ut sit quædam Actio primaria, quæ in plures alias dividi non possit. 2. ut omnia, quæ sunt illius Actionis primariæ, in uno,

eo-

(1) Arist. cap. 5.

eodemque loco facta esse videantur, in eodem cubiculo v. gr., in eadem domo, in eadem urbe, in iisdem castris, unde Tragœdiæ adponi solet: Scena est Romæ, vel Corinthi, vel Athenis, vel alibi, ubi res gesta est. Sed quomodo Actio debeat esse una, & tota, diximus alias. (1)

Quomodo debet esse Vera, & Verisimilis Actio Tragœdiae?

R. Eo sensu, ut vere contigerit Actio primaria: alioqui non multum moveret Tragœdia, si falsa esse crederentur, quæ referrentur in scena: crederentur autem esse falsa, si talia essent, quia sunt Actionis insignis, quæ non solet ignorari. Non ita dicendum de Episodiis, quæ cum sint actiones adjectitiæ, per se saxe non adeo spectabiles, nihil opus est esse vera.

Possunt ne esse falsa Actionis primariæ, quæ dicuntur Adjuncta?

R. Duplex genus est hujusmodi Adjunctorum. Primum est eorum, quæ sunt per se spectatissima, atque illa tam vera esse debent, quam ipsa Actio, cuius Adjuncta sunt; non licet v. gr. fingere à patre filium, vel à filio matrem fuisse interfec-tam, nisi fide historiæ id constet; pro falso enim habetur, quod istiusmodi est, nisi consignetur Historiæ monumentis, quæ non debuit illud omittere. Alterum genus est eorum, quæ sunt minus spectabilia, adeoque non solent, aut certe non debent

ne-

(1) Lib. 2. cap. 2. §. 2. ¶ 5.

necessario in Historia notari, quæ si verosimilia sint, facile vera esse credentur. Peccabit itaque contra hanc præceptionem, qui Cæsarem naturali morte, non violenta extinctum induxerit; non peccabit, qui eundem singulos interfectores adloquenter exhibuerit; quod primum, non item alterum Historia notare debuerit. Qua ratione debeat esse Verisimilis Actio Tragœdiæ, satis indicatum est superius cap. 3. in materia Dramatis universe spectata.

Quo sensu Insignis erit illa Actio?

R. Insignis erit non ratione tantum personarum, quæ inducuntur; sed etiam, & quidem præcipue, ratione sui. Nimirum id requirit propositus Tragœdiæ finis, cum melius multo cieantur affectus, purgenturque, quando illustriores inducuntur personæ, quæ à summa felicitate ad infelicitatem maximam deveniunt, ut inferius (1) docebitur. Insignem certe, notamque vult esse Horatius hanc Actionem:

Rectius Iliacum Carmen deducis in Actus,
Quam si proferres ignota, indictaque primus.

Quamquam & suus sit in Tragœdia, ut in Epopœja, locus personis ignobilioribus, seu iis, quæ Actores Episodici appellantur.

Quo sensu debet esse Actio Tragœdiæ infelix?

R. Eo sensu 1. ut sit Actio illa plena luctus, & terroris. 2. Ut infelici plerumque terminetur exi-

(1) Cap. 10.

exitu , quia misericordiam , & terrorem debet concitare , ut animi adfectus ex fine suo purget.

Quomodo delectabit , quæ plena luctus erit , Tragœdia ?

R. Non quidem res ipsæ tragicæ voluptatem adferent , ut notavit Aristoles (1) , sed excellens illarum delectabit imitatio . Nam eorum , quæ vel fugimus , vel detestamur , imagines , ut ferarum formas , & cadaverum affabre factas non sine lætitia intuemur , quod insitum sit à natura hominibus imitari , ut idem observavit Philosophus . Adde , quod tantæ calamitatis expertes nos esse , ac doceri , quæ cavere oporteat , non mediocriter gaudeamus .

Numquid licet aliquando felici exitu claudere Tragœdiam ?

R. Quamvis satius sit exitum Tragoediæ esse terribilem , & inexspectata felicis fortunæ in luctuosam mutatione stupendum ; volunt aliqui tamen , licere ab ea lege deflectere in gratiam auditorum , qui domum redire malint læti , quam tristes ; adeoque indignius non habitum v. g. primum Actorem expedire se posse è magna , quam incurrerat , calamitate , atque id unum requiri contendunt , ut luctuosa sit tota Tragoediæ facies , ad illius finem obtinendum .

CAPUT NONUM.

DE FORMA TRAGOEDIAE.

Quemam est Forma Tragœdia?

R. Est Fabula, sive compositio Actionis Tragicæ.

Qualis debet esse illa Fabula, sive compositio?

R. Debet esse una, simplex, justæ cuiusdam magnitudinis, in suas partes rite distributa, & variis Fabulæ ornamenti conspicua: quæ dotes explicatæ sunt superius, cum egimus universe de Forma Dramatis.

Quid speciatim præcipitur circa Fabulam Tragicam?

R. Ut Fabula illa sit implexa, id est, ut adnexam habeat peripetiam, vel agnitionem, vel utramque simul; atque etiam vult talem esse Philosophus, (1) ut ex peripetia, & agnitione oriatur maxima affectuum perturbatio; unde tres Fabulæ illius partes designavit, peripetiam, agnitionem, & perturbationem.

Qualia debent esse ornamenta Fabulæ Tragicæ?

R. 1. Peripetiae, & Agnitiones, ut diximus, sunt adhibendæ, concitandis affectibus cum primis idoneæ. 2. Inferenda Episodia pauciora, & breviora, ut supra monuimus. 3. Machinæ usur-

pan-

(1) Arist. cap. II.

pandæ , modo non in solutione Fabulæ , sed in nexu , ut docuimus. 4. Circa Mores præcipitur tantum ut boni sint , convenientes , & æquabilis tenoris , sed etiam graviores , severioresque pro rerum , quæ inducuntur , natura. Unde matronæ gravi confertur Tragoëdia apud Horatium :

Effutire leves indigna Tragoëdia versus.

Ut festis matrona moveri jussa diebus,

Intererit satyris paullum pudibunda protervis.

De eadem sic habet Ovidius : (1)

Omne genus scripti gravitate Tragoëdia vincit.

5. Adspergendæ Sententiæ , quæ graves personas deceant : qua cautione , superius tradidimus.

6. Dic̄tio tam gravis esse debet , quam res ipsæ , quæ tractantur ; versus jambicus trimeter usurpandus , quem vocat post Aristotelem Horatius *alternis aptum sermonibus* : quod ille numerus familiaris fit , & in omnem facile sermonem incurrat. Demittit tamen se decenter Tragoëdia , uti se ad tollit Comoëdia ut idem observavit Horatius :

Interdum tamen & vocem Comoëdia tollit,

Iratusque Chremes tumido delitigat ore;

Et Tragicus plerumque dolet sermone pedestri.

CA-

(1) 2. Trist.

CAPUT DECIMUM.

DE FINE TRAGOEDIAE.

Quis est Finis Tragœdiae?

R. Finis Tragœdiae est concitare quosdam animi affectus ad reliquos omnes purgandos. Hanc affectuum expiationem, purgationemque, quam vocat, Tragœdiae, ut finem, indicit Aristoteles, cui consentiunt alii, qui ea de re scripsere, Auctores. Atque hic finis tam accurate, quam dilucide, breviterque discutiendus est: cum exquisitus ab eo tum argumentorum, tum personarum, qui solet hic præcipi, delectus, atque adeo optima pendeat Fabulæ Tragicæ constitutio. Quare disquirendum, 1. Qui affectus in Tragœdia: 2. A quibus: 3. Quomodo debeant concitari.

§. I. Qui affectus concitentur in
Tragœdia.

Qui affectus concitantur in Tragœdia?

R. Misericordia, & Terror, quorum opera purgantur omnes alii Adfectus: unde Scena appellata est quedam quasi palestra humana, affectuum, ubi preparantur illi, & perficiuntur.

Quomodo purgant alios Adfectus Misericordia, & Terror?

R.

R. Misericordia tangimur , cum videmus aliquem grandi aliqua calamitate pressum , præfer-
tim immerentem ; timemusque , ne quid simile
nobis contingat , quod alteri nobis quodammodo
æquali accidit ; & sic misericordia parit timorem,
cautumque præstat , quem adficit , ne gerat aliquid ,
unde tanta sibi miseria proveniat. Item ad ob-
jectam gravis infortunii speciem terror incusius ,
ejusmodi vitandi mali desiderium injicit : quo de-
siderio efficitur , ut affectibus moderemur , qui
sunt veræ omnium , germanæque causæ nostrarum
calamitatum.

§. II. A quibus concitentur affectus
in Tragœdia.

Quinam debent concitare Misericordiam , & Ter-
rorem in Tragœdia ?

R. Multo melius Actores , qui neque improbi , neque admodum probi sunt , sed inter
illos medii , & qui cum amicis rem habebunt ,
aut consanguineis , illos affectus commovebunt.

Quare minus commovebunt , qui sunt improbi ?

R. Quia ut improborum felicitas indignationem
parit ; sic non parit infelicitas misericordiam , aut
terrorem ; non misericordiam , quia dignum exis-
tit quisque improbum calamitate , qua premi-
tur ; non terrorem , quia nemo sibi eventurum
putat , quod improbi culpa factum esse videt : ter-
reatur etsi , qui scelestum adfligi scelestus adspicit :
sed vulgo non sunt , aut censentur improbi , qui ad-
sunt spectatores , adeoque non est estimandum , im-
probi calamitate illos esse perterrendos . *Non*

Non poterunt igitur improbi in scenam produci?

R. Poterunt utique, ut jam præmonuimus, sed ea adhibita cautione, ut si minus misericordiam, terrorem saltem vel probis spectatoribus incutiant: quod sane fiet, si non tam ex culpa, quam ex errore humano lapsi videantur.

*Quare minus apti sunt movendæ commiserationi, in-
certiendoque terrori, qui sunt maxime probi?*

18 R. Quia qui probus est in primis, cum sit infelix, non parit misericordiam, cum solam pariat indignationem, eamque maximam, si abominando facinore tollatur è vivis; non terrorem, quia, ut tradit Aristoteles, nemo sibi propter probitatem idem eventurum esse putat, cuius præmium est felicitas.

Non licebit ergo probos in Scenam producere?

R. Constat Christianos Martyres datos esse aliquando feliciter in theatrum, uti & viros alios probos, qui semel aut amore ducti impotentius, aut ira abrepti vehementius, cæco quodam impetu mortem aliis intulerunt. Quare lex illa, quæ improbos, probosve arcet à theatro, pro optima Tragoediæ forma posita est: nec quidquam aliud voluit Philosophus, cum sic præcepit, quam, quid sit ea in re præstantissimum, indicare.

*Quem facis Actorem medium probum inter, &
improbum?*

R. I. Is est, juxta eundem Philosophum, qui nec virtute, nec vitio admodum excellit, quem Oedipum fuisse accipimus: cujus neque magnæ virtutes, neque summa vicia commemorantur, quæ abriperet in contrarium affectus auditoris solent.

2. Qui peccat imprudens, ac proinde nec viri boni nomen meretur, quia illius officium est transgressus, nec contra improbi, quia inconsulto peccat. Sic idem Oedipus, cum parricidium sumum esse crimen non ignoraret, Lajum tamen miser per ignorantiam peremit. Debet etiam summa ille dignitate præcellere, ut hac ratione major calamitas terrorum simul, & commiserationem augeat.

Quare amicos inter, & consanguineos res geri debet in Tragœdia?

R. Quia 1. si inimicus inimicum occidat, nulla excitabitur commiseratio; nisi quatenus factum ipsum communis humanitatis recordatione commovet; atque etiam facile ferent homines in alio, quod essent ipsi quoque facturi. 2. Si nec amicus, nec inimicus alteri mortem inferat, sed ignotus ignoto; cum hoc agat sine affectu, nec ipse movebit affectus. 3. Si nec affinitate aut sanguine conjunctus occidat, non adeo commovebit. Quare præstat, ut inter amicos, & cognatos res geratur; ut si frater fratrem, parens filium, filius parentem aut occidat, aut invadat. Ab amicis enim ista cūfient, movebunt commiserationem: à consanguineis, atrocias etiam videbuntur, ut cum Clytemnestram Orestes, Eriphylem tollit Alcmæon.

§. III. Quomodo concitentur Adfectus in Tragœdia.

Quomodo concitantur Adfectus in Tragœdia?

R. In hoc variant Tragoedi, (1) apud quos

quos vel committit Actor facinus, vel non committit; iterum vel committit ignarus rei, vel conscient; item sic committit, ut factum vel post, vel ante agnoscat. Item ante agnoscit, ut animum mutet, priusquam id conficiat, aut poenitentiam agat.

Atque ex his variis modis concitandorum affectuum ortæ sunt variæ species Tragœdiarum: quatuor celebrantur in primis. 1. est, quando agnoscitur, qui occiditur, ut cum Medea liberos occidit. 2. quando agnoscitur post mortem, qui occisus est, ut cum Oedipus Lajum sua manu peremptum audit. 3. quando agnoscitur eo tantum momento, quo perire debet, & periculo eripitur; ut cum Iphigenia agnatum Orestem morti subducit. 4. quando agnoscitur, qui peritus est, & ad mortem queritur; nihil tamen conficitur: ut cum Æmon apud Sophoclem stricto ense parentem insequitur, neque tamen quidquam agit.

Licetne oculis objicere atrociora spectacula, quibus sanguis effunditur, & horror animis incutitur?

R. Non licet: neque enim debent induci in theatrum aut incredibilia quædam, ut sunt metamorphoses, aut foeda adspectu, aut visu atrocia, juxta illud Horatii:

Nec pueros coram populo Medea trucidet,
Aut humana palam coquat exta nefarius Atreus.
Aut in avem Progne mutetur, Cadmus in anguem.
Quodcumque ostendis mihi sic, incredulus odi.

Qui

*Qui referri poterunt, quæ oculis non licebit sub-
jicere?*

R. 1. Prænuntiabunt gerenda vel ab eo, qui facinus patraturus est, vel ab aliquo alio.
2. Postquam gesta fuerint, narrabuntur, quod Nun-
tiorum munus esse solet: sic præceperat Horatius;

..... Non tamen intus
Digna geri, promes in Scenam, multaque tolles
Ex oculis, quæ mox narret facundia præsens.

*An non licebit aliquid ob oculos ponere, quod spe-
ciem aliquam habeat crudelitatis?*

R. Licebit vincula, ipsumque demortui Princi-
pis cadaver deferre in medium, ad commoven-
dum auditorem; item verbera, aliaque sevitiæ
instrumenta licebit coram exhibere; at non per-
cutere, aut perimere, nisi post Scenam id fieri
simuletur.

CAPUT UNDECIMUM.

PRÆCEPTORUM USVS IN SCRIBENDA

Tragœdia.

Traditas hactenus de Tragœdia præceptiones, quæ so-
te, ad usum ut revoces, & scribendæ Tragœ-
diae unum aliquod Paradigma proponas.

R. Si velis ex arte Tragœdiam scribere, nudam

primum, ac sine ullo ornamento delineabis Actionem, quæ est materia Tragoëdiæ; deinde ad Fabulam, quam voles inducere, attendes, videbisque, sit ne simplex, an implexa; si implexa, an peripetiam simul, & agnitionem, & qualem utramque admittat & cum superioribus an bene cohæreat; an terror ex rebus oriatur, ac commiseratio, aut quomodo possint aliunde commoveri: cum personas conquires, earum ipse habitus, adfectusque animo indues. Episodia postmodum excogitabis. Postquam sic fuerit constituta Fabula, quid in Nexus, quid in Solutione inducere necesse sit, examinabis; nam in Nexus, non in Solutione debent esse episodia, neque etiam prolixa illa, aut otiosa, sed brevia, & cum Actione primaria rite connexa. Si simplex fuerit Fabula, curabis, artificiose ut definat, sin implexa, agnitionem ut habeat, & peripetiam elegantem, & quæ tragicos adfectus, seu perturbationes ipsa per se excitare possit.

Profer, quæso, exemplum tum simplicis, tum implexæ Fabulæ.

R. Fabulæ simplicis exemplum sit Troadum Tragoëdia apud Senecam, quæ sic habet. Græci, expugnata Troja, Calchancem consulunt, quo pacto salvi domum pervenire, ac faventes sibi Deos redituri habere possint. Calchas Polyxenam, & Astyanacta, necandos esse pronuntiat, atque id conficitur. Reliqua sunt episodia, apte illi Fabulæ intexta; sic episodium est Agamemnonis cum Pyrrho colloquium, quod ex Calchantis de maectanda Polyxena consilio nascitur; item episodium est tota illa

illa scena, in qua ab Ulysse queritur Astyanax, ac tandem invenitur: quod pariter è consilio de præcipitando Astyanacte oritur.

Fabulæ implexæ exemplum esto Oedipi Tragœdia apud eundem Senecam. Oedipus disquirens, qui sit Laji interfector, se & illius filium, & interfectorē, atque etiam Jocastā matris suæ maritum esse agnoscit; quare effossis sibi præ pudore, & ira oculis, abit in exilium, & Jocasta se gladio confudit. Hæc est Actio primaria; ad quam non spectat necessario Oedipi in Prologo de pestilentia sermo, quamvis cum eadem apte cohæreat. Item ejusdem Oedipi cum Creonte, & Tiresia colloquium, tum prolixa illa inferorum descriptio, umbrarumque evocatio sunt Episodia, nisi forte cum nominatim de Laji cæde agitur; Oedipi autem, & Senis, & Phorbantis ex parte colloquium ad mutationem paullatim deducunt; ad Nexum tamen referri possunt: reliqua sunt in solutione, ubi eit peripetia, & agnitio mirabilis.

CAPUT DUODECIMUM.

DE COMOEDIA.

Quid est Comœdia.

R. Comœdia secundum vim vocis est paganus cantus: κωμῳ enim græce significat pagum latine, & ωδὴ cantum; sic appellata, quod in pagis habuerit originem; vel, ut alii volunt, à Como hilaritatis, ac temulentiae Deo dicta est Comœdia, quasi κωμῳδεῖν sit, canere Como digna.

Quomodo definitur Comœdia?

R. Definitur *Imitatio Dramatica Actionis unius, totius, civilis, aut privatae, & vulgaris, stilo populari exhibita, & leto semper exitu terminata, ad proponendum vitæ privatae exemplum.* Atque hæc definitio *Comœdiæ* materiam, formam, & finem attingit; de quibus breviter admodum agendum est, cum sat tis ea sint exposita in Materia, Forma, & Fine poëmatis dramatici, universe spectati, & alibi passim pluribus in locis.

Quid habes circa materiam Comœdiæ?

R. Est *actio*, cuius jam recensitæ sunt in definitione, & superius explicatæ in materia dramatis variæ affectiones. Veritatem, vel falsitatem admittit illa, quæ privati hominis est *actio*, obscura per se, & ignota, neque imitatur res illustres, & terribiles, aut admirabiles, sed civiles, & privatas; ut avaritiam senum, fraudes servorum, & similes: quæ alios sollicitudine, lœtitia alios impleant: quare debet esse insuper jocularis, ut delectet, & ea virtus exagitare, quæ risum potius, quam misericordiam moveant.

Quid præcipis circa Formam Comœdiæ?

R. Præter ea, quæ dicta sunt in Forma poëmatis dramatici, curandum est, ut intexantur, 1. quædam peripeitiæ, non quæ magnos, ac vehementes, sed remissiores, lenioresque cieant animorum motus. 2. Agitationes, non ex, unde oriantur maxima perturbationes, sed quæ levioribus de causis ortæ, non admodum moveant, ut in Plautinis *Comœdiis*: quæ sit è crepundiis, nonnumquam cif-

cistulis, aut annulis Agnitio. 3. Episodia brevia, & apta. 4. Mores solutiōres, & jocis, salibusque conditi, in quibus magno opus est delectu: videndumque, ne sint frigidi, multo minus obscoenī: quod jure in Plauto reprehendit Horatius:

At nostri proavi Plautinos & numeros, &
Laudavere sales, nimirum patienter utrumque,
Ne dicam stulte, mirati; si modo ego, & vos
Scimus inurbanum lerido seponere dicto.

5. Sententiæ rariores, ac vix aliæ, quam pertinentes ad vitam quotidianam, & in frequentiori usu positæ, ut sunt trita ac vulgaria proverbia.

6. Dictio apta rebus, adeoque non grandis, ut in Tragoedia, sed contra humilis, suavis, & mediocri ornatu contenta: quamvis possit aliquando altius ad surgere, cum graviores affectus sunt exprimendi, ut ait Horatius:

Interdum tamen & vocem Comœdia tollit,
Iratusque Chremes tumido delitigat ore.

Adeoque metrum optimum erit, quod proxime accedit ad solutam orationem.

Quid statuis circa Finem Comœdiæ?

R. Vult Philosophus, Comoediæ esse, ex inimicis amicos efficere; quod universe dictum esse oportet, ut cum pater filio reconciliatur, aut cum fraude aliqua, vel casu ex ipsa Actionis natura exorto à se invicem disjuncti duo homines mutuo

in gratiam redeunt. Sed istud est officium Comœdix potius, quam Finis, qui in eo positus est, ut vitæ privatæ exemplum proponatur, ut inde mores quisque suos corrigat.

Ex dictis colliges, à Tragoëdia potissimum differre Comœdiā, 1. Materia; Tragoëdia res grandiores, Comœdia tractat humiliores. 2. Per sonis; in Tragoëdia nobiles sunt, in Comœdia humiles, & obscuræ. 3. Dictione; grandior est in Tragoëdia, vulgaris in Comœdia. 4. Exitu; funestus esse follet in Tragoëdia, in Comœdia felix est, atque hilaris.

Quid si personæ illustres inducantur in Scenam, quæ Fabulam Comicam peragant?


R. Non erit hæc Tragoëdia, aut Comœdia, sed tertium Dramatis genus ortum ex utraque, quod appellabitur Tragicomœdia, cuius finis est semper latus; personæ partim illustres, partim vulgares; res modo ludicræ, modo tristes. Amphitruonem vocat Tragicomœdiā Plautus, ubi sic loquitur in Prologo Mercurius:

Faciam, ut commixta sit Tragicomœdia.
Nam me perpetuo facere, ut sit Comœdia,
Reges quo veniant, & Dii, non par arbitror.
Quid igitur? quoniam hic servus quoque partes ha-
bet,
Faciam proinde, ut dixi, Tragicomœdiā.

INSTITUTIONUM

POETICARUM

LIBER QUARTUS.



DE RELIQUIS POEMATIS.

POst Epicam, & Dramaticam poësin celebantur multa minora poëmata; quorum alia sic à se invicem differunt, ut singula singulas, easque maxime diversas constituant species, ut Elegia, Epigramma, Satyra, Ode &c. alia vero cum sint ut plurimum in genere heroico, majorem habent inter se conjunctionem, ac velut adfinitatem, quamquam ad Oden quoque referri possint, cum commode canantur ad lyram; sunt hæc, Epithalamia, Genethliaca, Epicedia, Epiniccia, Soterica, Propemptica, Parænetica &c. de quibus omnibus breviter modo pro dicendi instituto disputabimus.

CAPUT PRIMUM.

DE ELEGIA.

Quid est Elegia?

R. Proprie est funebris cantus, à flebili lugentium sono sic dicta, qui crebro, έλεγοντιν, he! he! ingeminant.

Quæ

Quæ est materia Elegiæ?

R. Est proprie res funebris, & tristis; unde Ovidius in mortem Tibulli canit:

Flebilis indignos Elegeia solve capillos:

Ah! nimis ex vero nunc tibi nomen erit.

Et 5. Tristium:

Flebilis ut nosler status est, ita flebile carmen.

Factum est tamen deinde, ut non tantum res funebres, ac tristes, sed res quoque latæ, amores, vota, preces, gratulationes, & convitia elegiaco carmine scriberentur, ut videre est apud ipsum Ovidium. De materia, priusque Elegiæ Auctoriibus sic statuit Horatius:

Versibus impariter junctis querimonia primum,
Post etiam inclusa est voti sententia compos.

Quis tamen exiguos Elegos emiserit Auctor,
Grammatici certant, & adhuc sub judice lis est.

Quæ est Forma Elegiæ?

R. Forma Elegiæ est ipsius constitutio, & compositione, seu quædam eorum, quæ canuntur elegiace, dispositio; de qua sic præcipi potest, ut poëma illud tersum sit, lene, perspicuum; dictio mollis, & æquabilis, morata, tenera, affectibus plena, & delicata quadam suavitate condita. Quamquam pro ratione rerum, quæ celebrantur, magnifice etiam procedat Elegia;

ut

ut quæ apud Propertium scripta est in Actiacam victoriam, & alibi passim apud Auctores probatissimos.

CAPUT SECUNDUM.

DE EPIGRAMMATE.

Quid est Epigramma?

R. Si vocis etymon attendas, est inscriptio quævis : ἐπιγράφειν enim græce est inscribere latine. Si definitionem quæras, dicitur breve poëma cum simplici cuiuspiam rei, vel personæ, vel facti indicatione, aut aliquid ex propositis deducens.

Quotuplicis generis est Epigramma?

R. Duplicis, ut indicat definitio: aliud enim simplex est, quod simplici rei, personæ, aut facti indicatione continetur, ut sunt inscriptiones denariorum, & statuarum; ut ista clipei :

Æneas hæc de Danais victoribus arma.

Alterum compositum dicitur, quod in ratione ducenda, colligendaque, & quasi in argumentatione positum est.

Quæ est materia Epigrammatis?

R. Sunt res universæ, personæ facta, quæ exornari, reprehendi, fieri, probarive possunt.

Quæ est ejus Forma?

R. Est ipsa ratio tractandi Epigrammatis, quod solet scribi carmine vel hexametro, vel elegiaco, vel phaleucio, vel jambico.

Quis

Quis est Finis?

R. Est communis omni poësi, delectare docendo, seu laudet, seu vituperet Poëta, qui ab hoc fine non debet recedere.

Quot sunt Epigrammatis dotes?

R. Tres numerantur præcipuae, Brevitas, Perspicuitas, & Acumen.

CAPUT TERTIUM.

DE SATYRA.

Vid est Satyra?

R. Satyra videtur nomen ducere à Satyris Diis petulcis, lascivis, & dicacibus, qui inter Actus Tragœdiarum, ac postea Comœdiarum inducti in theatrum, non tantum sermone parum verecundo, libero aculeatu, vultu, ac corpore risum movebant; verum etiam cives improbos nominatim carpebant; unde Satyra ab aliquibus ad poëma dramaticum revocatur. Videtur etiam dicta Satyra, quasi Satura, quod varium complectatur argumentorum genus. Quare definitur Satyra Poëma jocosum, liberum, & aculeatum ad reprehendendos corrigendosque mores corruptos.

Quæ est materia Satyrae?

R. Dici potest turpitudo, risu digna, vel odio; exigit enim Satyrici Poëtæ Inertes, Parasitos, Deformes, Loquaces, Ingratos, Ambitiosos, Prodigos, Avaros &c. Materiam Satyrae his duobus versibus definivit Juvenalis:

Quid-

Quidquid agunt homines , votum , timor , ira,
voluptas,
Gaudia , discursus , nostri est farrago libelli.

Quæ est Forma Satyræ?

R. Est ipsius constitutio , & compositio , in qua illinendæ sunt quibusdam suavitatibus objurgationes , ut æquiore animo excipientur ; adeoque versatum , sagax , callidum , disertum , acutum ingenium requiritur. Amat Satyra crebras sententias , acutas , & acres , puritatem , & elegantiam in verbis , remissos , molioresque numeros , dictiōnem submissam , quotidiana locutioni similem : unde Horatius , qui in Odis usque adeo numero studuit , ut idcirco numerosus vocetur ab Ovidio ; idem tamen in Satyris numerum illum neglexit , non quia aliter non posset , sed quia hunc neglectum Satyris putaret convenire. Nullæ certæ partes in hoc poëmate adsignantur ; aliquando insinuatio , saepius abruptum , & incitatum principium adhibetur.

Quis est Finis Satyræ?

R. Est objurgando , & irridendo absterrere homines à vitiis , & ad virtutem incitare. Videntur tamen , ut joci , ac sales satyrici careant obscenitate : ne , dum animos vult purgare Poëta , ad morum turpitudinem invitet.

CAPUT QUARTUM.

DE POEMATE LYRICO.

Quid est Poëma Lyricum ?
 R. Dictum est Poëma Lyricum à Lyra , quæ inter organa musica celebris est , adhibeturque ad hujusmodi carmen concinendum. Quare vocatur etiam illud poëma Ode , & Melos , id est cantus , unde Poëtæ Lyrici , & Melici.

Quæ est materia poëmatis Lyrici ?

R. Longe , lateque patet hæc materia : contineat enim laudes Deorum , & hominum , vota , preces , exhortationes ad virtutem capeſſendam , ad vitia fugienda , deplorationes calamitatum , defideria , conqueſtiones , fontium , montium , villarum , aliorumque locorum amoeniorum laudes , & descriptiones ; deliberationes item , & invitationes , aliaque innumera , quæ brevi poëmate concludi possunt , comprehendit. Nam , ut docet Horatius :

Musa dedit fidibus Divos , puerosque Deorum ,
 Et pugilem victorem , & equum certamine primum ,
 Et juvenum curas , & libera vina referre.

Quæ est forma poëmatis Lyrici ?

R. Est ipsa compositio , seu ratio scribendi illius poëmatis : ubi notandum est , quod est Epoepçjæ gravitas , Tragoadiæ vehementior affectus , Comœdiæ jocus , Elegiæ mollities , Satyræ acerbitas , Epigrammati acumen , idem esse poëmati Lyrico sua-

suavitatem. Quare debent adhiberi verba florida, polita; non sine maiestate induci sententiae; vitari litterarum collisiones duriores, aliaque observari, quæ diximus facere ad suavitatem Narrationis Epicæ, & ad dotes dictionis poëticæ.

Quot sunt Versuum genera in Odis?

R. Sunt sane quamplurima: quæ suas ducunt appellations vel ab Auctoribus, ut Alcaici ab Alceo, Sapphici à Sappho, Asclepiadei ab Asclepiade &c. vel à metris, quibus constant, ut Trochaici à Trochæo, Dactylici à Dactylo, Anapæstici ab Anapæsto &c. sed illorum metrorum leges à Grammaticis petendæ sunt.

Quid est Strophe, Antistrophe, & Epodus?

R. Ode dividebatur in Strophen, Antistrophen, & Epodum. Strophe erat pars illa Odæ, quam Chorus in lustranda ara in Deorum laudem modulabatur, progrediendo ab oriente in occidentem. Antistrophe vocabatur, cum Chorus revertebatur canendo ab occidente in orientem. Epodus siebat, cum in medio consistebat Chorus, & quod supererat carminis, persolvebat. Verum jam nomine Epodi intelligitur illud genus carminis, in quo singulis versibus singulæ clausulæ subjiciuntur, & veluti accinuntur, idque fere alio genere carminis, & plerumque breviori: cujusmodi sunt pleraque apud Horatium in Libro Epoðæ, jambico dimetro post heroicum, aut trimetrum jambicum statim succedente.

Quid est Ode distrophos, trifustrophos, & tetrastrrophos?

R. Ode dicitur distrophos, quæ plures habet stro-

strophas , seu clausulas , quarum singulæ continent duo carmina , quæ clausulæ strophæ dicuntur , quod post duos versus ad duos alios reverti oporteat , ut in hac Oda Horatii ; v. gr.

Sic te Diva potens Cypri,
Sic fratres Helenæ , lucida sidera.

Post hæc duo carmina eodem modo duo alia succedunt:

Ventorumque regat pater,
Obstrictis aliis , præter Iapyga;

& sic deinceps ad finem Odæ. Ita dicitur illa Ode tristrophos , quæ continet plures strophas , sive conversiones , quarum singulæ habent tria carmina ; & tetrastrophi , cujus singulæ strophæ quatuor includunt versus.

Quid est Ode monocolos , dicolos , & tricolos ?

R. Ode dicitur monocolos , seu uniformis , quæ unius , ejusdemque generis habet carmina : talis est prima Ode Horatii :

Mecoenas atavis edite Regibus ,
O & præsidium , & dulce decus meum &c.

cujus omnia carmina sunt Asclepiadica. Dicitur Dicolo , quæ habet strophas , quarum carmina sunt duplicitis generis : tricolos , cujus strophæ continent carmina triplicis generis.

CAPUT QUINTUM.

DE HYMNO, PARODIA, ET CARMINE INTERCALARI.

Quid est *Hymnus*?

R. Est Ode ad Dei laudes , virorumque illustrium celebrandas instituta; ὑμετέρον enim græce, est *celebrare* latine.

Quid est parodia?

R. Est imitatio versuum , ubi sententia tamen ad contrarium sensum detorquetur. Istud genus carminis frequentavit in primis Joannes Baptista Masculus , profanos sensus ad religiosa fere argumenta convertens. Sarbievius item Odas Horatii aliquot improbas ad pietatem traduxit per parodiam.

Quid est Carmen Intercalare?

R. Intercalare cārmen , quod & Regium dicitur, est illud , in quo post aliquot versuum intervallum , idem semper recurrit , ut apud Virgilium in Eclogis ille versus s̄epius usurpatu:

Incipe Mænalias mecum , mea tibia , versus.

& ille deinde:

Ducite ab urbe domum , mea carmina , ducite
Daphnim.

CAPUT SEXTUM.

DE ECLOGIS, SILVIS, ET DIRIS.

Quid est Ecloga?

R. Ecloga, quæ & Bucolicum Carmen à Bubulco, & Pastorium à Pastore dicitur, est imitatio rusticarum actionum stilo mediocri, & suavi, vel per meram enuntiationem, vel per dramaticam personarum effictionem. Eclogæ vocantur à delectu, & concinnitate sermonis; ἐκλέγειν enim græce est feligere latine. Cum autem Bucolicum Carmen initio inconditum esset, ut plurimum puriora quædam, elegantioraque feligebantur: unde huic generi carminum indita est appellatio.

Quæ sunt leges hujus Poëmatis?

R. Tractantur in eo vota, gratulationes, altercationes, pollicitationes, conquestiones, gaudia: sed videndum, ut omnia agrum redoleant. Dicendi character debet esse humilis, frequentes adhibendæ comparationes ex agris deductæ, jucundæ item descriptiones inferendæ. Hexametrum carmen adhibendum, modo ne adsit granditas, neve longiore ambitu circumducatur. Ducem habes in hoc genere poëeos, ut in heroico, Virgilium, qui quanto sublimior videtur in Æneide, tanto se submisius de industria deprimit in Bucolicis.

Quid vocas Silvas?

R. Sunt Carmina subito calore effusa, neque anxia cura castigata. Silvæ dicuntur, quod oblatam quasi temere materiem ex tempore, & stilo ve-

veloci percurrat, & tractet Poëta, dum calor menti insidet. Statius certe initio suarum silvarum libellos, qui subito calore, & quadam festinandi voluptate sibi fluxerunt, silvas vocat, additque illa poëmata solum habere gratiam celeritatis.

Quid intelligis per Diras?

R. Diræ sunt quoddam Carminis genus, quo quidquid furoris, imprecationum, querelarum, conviciorum in mentem venit, effundit Poëta. Sic Dido Æneam apud Virgilium, Medea Jasonem apud Senecam diris prosequuntur.

Expeditis, de quibus libri hujus initio, variis carminum generibus, illud unum supereft, ut de Poëmatibus, quæ ad heroicam poësin commode revocantur, quamvis ad lyram quoque venustè cani possint, breviter differamus: sunt hæc Epithalamia, Genethliaca, Epicedia, &c.

CAPUT SEPTIMUM.

DE EPITHALAMIO, GENETHLIACO, EPICEDIO.

Vid est Epithalamium?

R. Est Poëma pro nuptiali pompa conscriptum, sic dictum à vocibus Græcis ἐπὶ ad, & θάλαμος nuptiale cubiculum.

Quomodo conficiendum est illud Poëma?

R. Laudes conjugum celebrandæ, faustum augurium capiendum, fructus illarum nuptiarum prædicandus, vota concipienda pro connubii felicitate, & futura prole. Consule poëtas, qui scripsere

Epithalamia, *Catullum*, *Statium*, *Claudianum &c.*

Quid est Genethliatum?

R. Est Carmen, quod nascentibus accinitur, γενέθλιον enim græcè est *nativitas* latine: unde *Genethliacon* natale carmen.

Quomodo scribendum est hujusmodi Carmen?

R. Parentum virtutes celebrantur, spes de puerro excitantur, variae loci, ac temporis notantur circumstantiae.

Quid est Epicedium?

R. Est Carmen funebre, quæ Nenia Romanis, Græcis Epicedium dicitur ab ἐπὶ & κηδός, cura quæ mortuis præcipue debet impendi.

Quæ sunt leges Epicedii?

R. Narrantur demortui laudes, pompa funebris describitur, conditur Epitaphium, Poëta denique adprecatur æternitatem.

CAPUT OCTAVUM.

DE EPINICIO, EUCHARISTICO, PROPEMPTICO.

Quid est *Epinicion*?

R. Est Carmen pro reportata victoria confi-
criptum, sic dictum ab ἐπὶ & νίκῃ, *victoria*. A variis circumstantiis loci, temporis, hos-
tium multitudinis &c. celebranda est *victoria*; ob-
servanda tradita posteris imperatoriæ prudentiæ, &
fortitudinis monumenta; exponendum, qui fructus
ex *victoria* consequantur, vota, precesque pro pa-
tria, *Victorisque incolumitate* fundenda. Habet
pas-

passim apud Auctores exempla, quæ in hoc genere Carminis imiteris.

Quid est Eucharisticum?

R. Est poëma, quo gratias alicui agimus ob præstatum beneficium, sic dictum ab ἐυχαριστεῖν, *gratias agere*: debet eo in carmine prædicari acceptum beneficium, dantis humanitas, & beneficentia extolli, accipientis necessitas non debet omitti, item miscenda vota in gratiam dantis.

Hujus Carminis passim exempla suppetunt apud Auctores,

Quid est Propempticum Carmen?

R. Propempticum à προπέμπτω, *deduco*, est Carmen in gratiam aliquo abeuntium scriptum, in quo vota concipiuntur eorum caussa, vel ad avertendum malum aliquod, vel ad bonum aliquod, ac præcipue fortunatum iter adprecandum. Talis est Ode Horatii (1) in gratiam Virgili Athenas navigaturi, quæ sic habet:

Sic te Divi potens Cypri,

Sic fratres Helenæ, lucida sidera,
Ventorumque regat pater,

Obstrictis aliis, præter Iapyga;
Navis, quæ tibi creditum

Debes Virgilium, finibus Atticis
Reddas incolumen, precor,

Et serves animæ dimidium meæ.

Ff 2

Egre-

(1) Lib. 1. Od. 3.

Egregia habet Vallius (1) hujus generis poëmata,
quibus Amicos, atque unum in primis sub Amyn-
ta persona in Indiam proficiscentem prosequitur,
quæ tu consule.

(1) *Heroi. Lib. 3.*



CAPUT NONUM.

23 DE CARMINE SOTERICO , PROTREPTICO ,
& Parænetico.

Quid est Sotericum Carmen ? R. Est carmen pro salute recepta , & vi-
tato gravi aliquo periculo ; dicitur Soteri-
cum , quod σωτηρία græce salutem sonet latine . In eo debet expendi periculi magnitudo , in eo
sivebendo fortitudo , in vitando solertia , vel felici-
tas , bona ex vitato exorta celebrari . Habes ab-
solutissima hujus Carminis exempla apud Frizo-
nium in quatuor Odis , quæ ad Franciam , ad
Christianissimum Regem , Augustissimam Reginam
Matrem , post recuperatam Regis sanitatem scripsit ,
quarum prima sic incipit :

Pæane ovantes junge lyræ modos ,
Et Martiales , Francia , laureas :
Defuncta fatali periclo ,
Magnifici reæ surge voti &c.

Quid

Quid est Carmen Protrepticum?

R. Idem est atque Adhortatorium Carmen, à verbo *προτρέπω* *adhortor*, cum scilicet alios ad aliquid suscipiendum impellimus. Nihil est usitatis ejusmodi Carmine apud Poetas. Formam habet illius exquisitam Frizomus in Sacra Expeditione ad Principes Christianos:

Surgite magnanimi Proceres, quos æthere ab alto
Increpuere sacrum spirantia clavisca Martem &c.

Quæ Carmina, si qua alia, vim habent ad promovendos animos; ducitur enim adhortatio ab Ottomanici hostis ferocitate, & successu funeste felici, ab amplitudine regionum ab eo devastarum, ab Solymææ urbis sanctitate, ab eo tam fœda servitute oppressæ, à futuræ victoriæ certis conjecturis &c.

Quid est Carmen Paræneticum?

R. Est Monitorium Carmen, à *παραγγέλω*, *admoneo*, sic dictum, in quo præcepta sapientiæ continentur. Sic Poëta pro suo officio alios monet, v. gr. ne se periculis temere objiciant, ne majora viribus suscipiant, ne quid aliud aggrediantur, cuius ipsos postea pœnitere possit. Habes ejusmodi Carmina paßim apud Poetas tum veteres, tum recentiores, ac proinde nihil est opus, festinanti præfertim, exempla proferre.

INSTITUTIONUM POETICARUM LIBER QUINTUS,

*EXEMPLA VARIA, ET OBSERVATIONES AD ARTEM
Poëticam Spectantes, Complectens.*

CAPUT PRIMUM.

POETARUM LATINORVM PRÆSTANTIORVM

Nomina, Ætas, Stilus.

CUM Poësis lectione suminorum poëtarum, & imitatione potissimum comparetur, juvat cognoscere, quinam poëtæ frequentius, & accuratius legendi, quinam obiter, & strictim volvendi, aut etiam omnino prætereundi sint. Id ex Indice, quem subjicio, patebit.

Marcus Accius Plautus, natione Umber, patria Sarsinas, obiit anno Urbis conditæ quingentesimo septuagesimo, qui fuit mundi termillesimus octingentesimus septuagesimus. Non temere legendus est propter nequitias, & impuros amores, atque adeo propter sales invenustos, quibus scatent ejus Comœdiæ.

P. Tentius, auctor est Latinitatis terfissimæ: non legatur tamen, nisi repurgatus. Ortus est Cartha-

thagine, in Africa, anno U. C. 560. In pingendis hominum moribus, & arte coagimentandæ fabulæ ceteros vincit Comicos.

Titus Lucretius Carus insignis est ob Latinum sermonem, & sententiarum gravitatem: versus habet paullo horridiores, interdum obscenos, & impios. Scripsit Physica. Romæ natus est, anno ejusdem Urbis 658.

Cajus Valerius Catullus, Veronensis, novem post Lucretium annis ortus, scripsit Odas, Elegias, Epigrammata &c. Sermo bene Latinus est, versus aliquando duriores, saepe obsceni.

P. Virgilium annus U. C. 684. edidit, futurum olim principem Latinæ poëseos; patria tanti viri, Andes vicus prope Mantuam.

Q. Horatius Flaccus quinque post Virgilium annis editus Venusii, in Apulia; omnia ingeniöse, splendide, luculenter scripsit, non pauca tamen habet lutulenta, & inquinandis moribus, nisi delectus habeatur, opportuna.

Albius Tibullus, & Sextus Aurelius Propertius, nati sunt circa annum U. C. 710. hic in Umbria, ille Romæ, uterque poëta melior, quam castior, atque idcirco ablegandus à puerorum Scholis, nisi qui forte locus bene repurgatus excerpatur.

P. Ovidius Naso patriam habuit Sulmonem, urbem Pelignorum in Italia anno U. C. 711. amoenus vates, copiosus, ingeniosus, & illaborata facilitate gratus, utinam æque castus, & modestus; quamobrem periculose legitur non solum in iis libris, ubi nequitiam aperte profitetur, sed in Met-

tamorphosibus, Epistolis &c. Tristia, & Libri de Ponto minus habent periculi.

Manilius, incertum quo anno natus, recte in extrema Augusti tempora rejicitur, cui suum opus videtur dedicare. Scripsit Astronomica, versatus satis concinne, ac faciliter in argumento per se horrido, & intentato.

Phædrus, origine Thrax, libertus Augusti, flouruit sub Tiberio. Lucet in eo nativus quidam latini sermonis lepos, aureo Augusti saeculo dignissimus. Vide quæ de illo, & aliis nonnullis Poëtis scripsit P. Franc. Vavassor. Soc. Jesu, in suo de Iudicra dictione Libro. Multa quoque de Poëtis differit eruditus Possevinus noster in suæ Bibliothecæ parte 2. Lib. 7. Addi solent ad Phædri calcem Avieni fabulæ. Is Theodosio Seniore imperante vixit, hoc est, annis post Phædrum circiter 340. Ejus latinitas immane quantum à Phædri nitore discrepat.

Seneca, Patria Cordubensis, Lucii Annæi Senecæ Philosophi, ut multis placet, filius, vixit Neronis aeo. Artem tragicam ignorat. Ampullata sunt ejus carmina, plerumque tamen plena spiritus, & ardoris: latinitas non ignobilis: in sententiis, & orationibus, quas actoribus suis, & heroibus adfingit, modum vix tenet; multo prætantior futurus, si temperare ingenio suo, quam indulgere maluisset.

Marcus Annæus Lucanus, Senecæ Philosophi fratri filius, patria item Cordubensis, Historiam civilis belli Cæsarem inter & Pompejum versu scrip-

scripsit elato, & s^epe turgido, nonnumquam acri & ingenioso. Cur illi poëtæ nomen abrogent eruditi, & oratoribus, vel historicis annumerandum censeant, intelligitur ex iis, quæ de poësi diximus. Non enim poëmatis sui materiam quasi facit, & rerum variarum inventione, ac mutatione illustrat, sed acceptam ab Historia ornate prosequitur. Multos fallit ambitiosus ille sententiarum tumor, & argutiarum fucus, ad pomparam potius & faustum, quam ad veritatem comparatus.

Petronius Arbiter, civis Romanus prædives, Neronis familiaris, ejus flagitia descripsit, versibus impurissimis & argumento convenientibus, uterque dignus oblivione, & execratione.

A. Persius Flaccus, Volaterranus, eodem Neronis tempore Satyras scripsit, sed multo conditas sale: tuto legi, pauca si demas, possunt.

Silius Italicus, ab Italica, Bæticæ Hispaniæ urbe, sic appellatus, ultimo Neronis anno consulatum gessit, iterumque sub Domitiano Poëma compo- suit de secundo Bello Punico. Virgilium, cuius cultor insignis erat, imitari studuit ac sequi; mul- tum abest, quin assequatur.

P. Papinius Statius, Neapolii, ut verius creditur, oriundus, sub Nerone, & Domitiano scripsit Silvas, Thebaidem, & Achilleidem; stylo s^epe confragoso, & obscuro. Ejus Silvæ sunt amœniores, & cultiores.

C. Valerius Flaccus, Setinus, edidit libros octo Argonauticæ, quos Vespasiano dedicavit. Statio purior, & melior est.

Marcus Valerius Martialis, Bilbilitanus, Romæ annis quinque, & triginta vixit, usque ad Trajani tempora, cum in Hispaniam suam rediit: mores, & ingenium perpolire potest ejus lectio, si obsecrœna deleas epigrammata.

Decimus Junius Juvenalis, Aquinas, poëta doctus, & eloquens, majestatem, & aculeos, interdum declamatorios, habet: minus Horatio politus, ac pressus, Persio uberior est. Cave illum, nisi expurgatum legas.

Claudianus fuisse Alexandrinus fertur, sub Theodosio magno, ejusque liberis claruit, à quibus ei statua in Romano Foro posita. Poëticos spiritus ingentes, & meliore sæculo dignos habet, ac si tumoris nonnihil detrahas, vix ulli poëtarum latinorum, præsertim in iis, quæ postremo loco scripsit, secundus est.

Aurelius Prudentius, sub eodem Theodosio, in rebus Christianam fere pietatem, & religionem spectantibus operam posuit, barbaro saepe, licet ingenioso, & erudito carmine.

Quintilianus judicium de Poëtis Latinis habes Libro ejus Institutionum X.

CAPUT SECUNDUM.

DE STILO POETICO.

STILUS vocatur propria quædam dicendi, seu scribendi forma. Sunt enim, qui breviter, & strictim loquuntur, & scribunt; sunt qui

fundunt latius orationem solutam perinde , ac vincitam : alii magnifice , & splendide , alii nitide , ac parce amant scribere. In quo suam quisque indolem fere sequitur. Hinc stili tanta varietas , præsertim in poëtis , qui genio plusculum indulgere solent. Oritur etiam illa è variis carminum generibus. Alius enim stilos convenit Epopoëjæ , & versui Heroico : alius Tragico , & Comico , aliis Lyrico : saus est Epigrammati , suis Elegiæ , suis Di-thyrambo &c. Quis autem singulorum istorum sit proprius , aliunde cognosci melius nequit , quam poëtis ipsis legendis. Caput est legere optimos in unoquoque genere : exempli caufsa Virgilium in Heroico poëmate , quem recentiores quidam egregie sunt imitati , ut Sannazarus , Bembus , Heinlius , & alii , quorum carmina extant collecta in libello , cuius titulus est , *Deliciæ Heroicæ Poëseos* : item Jacobus Vallius , Carolus Ruæus : & in Elegiaco Ovidius , Sidronius Hoschius ; & in Comico Terentius ; in Tragico Seneca , Petavius , Malapertius &c. In Lyrico Horatius , Sarbievius , Joninus &c. In Epigrammate Martialis , in Silvis Statius &c. Confuse Quintilianum Libro præsertim 12. c. 10. ubi de stilo , ejusque diversis formis agit : & P. Nicolaum Caufsinum in suis divinæ , & humanæ eloquentiæ Parallelis Lib. 11. Sed præcepta haud multum juvant. Optimum stylum consequeris , si multum , & attente legeris , & diligenter scriperis.

CAPUT TERTIUM.

DE VARIIS VERSUVM GENERIBUS.

Præter usitatos versus, Hexametrum, Pentametrum, & Jambicum, qui nihil, aut parum difficultatis habent, alii quidam sunt reconditiores, partim à Comicis, partim à Lyricis variis usurpati: de utrisque pauca observabimus.

§. I. De Versibus Comicis.

CUm poësis ad delectationem maxime comparata sit, uti versibus debet, quæ est oratio omnium suavissima. Tragici utuntur Jambicis perfectis, iis nempe, qui in pedibus paribus Jambos habent, nempe in 2. 4. & 6. in imparibus vero Spondeos, vel Anapæstos, Dactylos, aut Jambos, quia omnes isti pedes plus habent gravitatis, & dignitatis. Comici utuntur Jambicis imperfectis, idque satis habent, si in fine sit pes Jambus; in aliis locis adhibent promiscue Jambos, Spondæos, Dactylos, Tribrachos, Anapæstos, qui locum habent in Jambicis perfectis. Præterea utuntur Amphimacro, seu Cretico, qui constat duabus extremis syllabis longis, & media brevi, ut *Pamphilum*, *ambiunt*. Interdum Proceleusmatico, sive duobus Pyrrichiis, hoc est quatuor brevibus, quia quatuor breves respondent duabus longis, è quibus constat Spondæus, cui locus est in Jambico versu. Exemplum Proceleusmatici habes in Andria Act. 1. Sc. 1. sub finem:

Mala mens-malus ani-mus, quem-quidem ego-si
sen-fero.

in hac enim scena sunt omnes Senarii , sive Trimetri.
Itaque in secundo pede est Procelesmaticus.

Item in eadem Andria Act. 3. Sc.3. in primo pede:

Tibi gene-rum fir-mum , & fi-liæ inve-nies-virum.

Utuntur etiam Comici versibus Jambicis dime-tris , id est , qui quatuor tantum pedes habeant, nam antiqui vocabant duos pedes, unam mensuram, interdum Tetrametris , id est , qui habeant quatuor mensuras , sive qui constet octo pedibus ; unde octo-narii , & quadrati appellantur.

Interdum totis quatuor , aut sex , aut octo pe-dibus non constat illorum versus , sed deest ali-quando una syllaba in principio , aut in fine ; & ii versus vocantur Catalecti , sive desinentes , pen-duli , & semimutili : ut *Musæ-Jovem-cane-bant* , est dimeter catalectus , deest enim ultima syllaba : item *Non-ebur-neque au-reum* , deest enim prima syllaba. Observandum hic tantum est , eum pedem , qui proximus est syllabæ relicta , & pendent , Jam-bum esse oportere.

Aliquando deest unus pes , iique versus vocan-tur Brachycatalecti sive mutili , ut

Musæ - Jovis - natæ.

est dimeter Brachycatalectus , deest quippe pes quar-tus. Hoc idem in Tetrametris contingit : v. g. in illo:

Vos

Vos - precor - vulgus - silen-tum vosque fe-rales
Deos:

deest prima syllaba. Quod si metiaris aliter, ac ve-
lis deesse syllabam in fine potius, quam in principio,
facies Trochaicum versum, qui nempe Trochaeum
pedem pro Jambo, iisdem locis atque Jambicus, po-
nit :

Vos pre-cor vul-gus si-lentum - vosque - fera-les
Deos :

Sic in Adelphis Act. 3. Sc. 2.

Cete-ros rue-rem, agerem, - raperem, - tunde-
rem & - prosterne-rem.

Dividi etiam aliter potest prior versus, si po-
natur amphimacer in principio :

Vos precor - vulgus - silen-tum &c.

Et tunc deerit ultimus pes, eritque Tetrameter
Brachycatalectus. Quemadmodum illi versus An-
driæ, Act. 4. Sc. 1. qui Muretum, Scaligerum, Eraf-
mum, & ceteram eruditorum familiam adeo tor-
ferunt, dici commode possunt Trimetri Brachyca-
talecti. Sic eos metire :

Hoccine - credibi-le est aut - memora-bile.
Tanta ve-cordia in-nata cu-iquam ut, - fiet.

Faceant enim ii, qui ut suum quemdam, quem
sibi fingunt ipsi, numerum inveniant, tollunt, mu-
tant, vellicant miseros versus, irato Terentio, &
veteribus libris reclamantibus.

In quibusdam sive Dimetris, sive Tetrametris
abun-

abundat syllaba una, vel pes unus, vocanturque Hypercatalecti, sive Hypermetri; qui nempe habent aliquid supra communem mensuram. Ita longior est iste una syllaba:

Musæ - foro-res sunt - Miner-væ.

Ad inveniendum quoque numerum Comicorum versuum, juvabit observare, quæ sequuntur.

1. Sæpiusime literam S elidi, ita ut legendum sit magi, pro magis; sati, pro satis &c. Sexcenta sunt exempla, immo interdum extrito S, vocalis præcedens eliditur. Sic in Andria: —

Bonum in-genium - narras - adole-scentis, op-timum.

ita ut *scenit' op*, Spondæus fit *scen' op*; nisi malis Amphimacrum ponere. In eadem Andria:

Semper enim dicta est ejus hæc, atque habita est foror.

Quo in versu voces, est ej' hæc, sunt tres longæ.
Item;

Sed quid opus est verbis?

Sed quid op' est verbis?

2. Voces quasdam dissyllabas in unam syllabam concrecere, v. gr. *suit*, *fiet*, *puer*, *rei*, *eho*, *meus*, *tuus*, *suus*, *suo*, *deus* &c. Sic metire versum Andriæ, Scena 1. Act. 1.

Liberi-us vi-vendi, - fuit po-testas, nam an-tea.

Non-

Nonnulli volunt esse Amphimacrum in voce, *liberius*, in quo duæ mediæ syllabæ coeant in unam, quasi si esset Librius: alii Dactylum, si expungatur S, *Libriu*. Sic illum ejusdem Comœdiæ, qui est in Act. 4. Sc. 1.

Ut ma-lis gau-deat a-lienis, atque ex-incom-modis.

in *gaudeat*, duæ ultimæ syllabæ in unam coalescunt, quasi *gaudet* legeretur; in *alienis* duæ mediæ concrescunt in unam longam. Sic verba quiescit, *melius*, *potius*, pro dissyllabis ponuntur; *grandiuscula* pro trisyllabo: ita Virgilius vocem *stellio* dissyllabam posuit, Horatius *pituita* trisyllabam. Contra vero voces quædam monosyllabæ in duas syllabas porriguntur: ut *jam* quasi esset *i-am*.

3. Sæpe vocales non elidi, cum in sequenti voce occurruunt aliis; neque litteram M.

4. Voces *illum*, *illam*, *ecum*, *eccam* &c. aliquando primam habere brevem, quia olim unica littera L, & C, scribebantur, *ilum* *ecum*.

5. M, & R in media dictione interdum elidi. Sic in Andria Act. 1. Sc. 3.

Enim vero, Dave, nihil loci est segnitiae &c.

Primus pes anapæstus est. Littera vero M in fine interdum eliditur ante consonantem. Andria Act. 3. Sc. 2.

Certe eni-m scio non-satis me-pernasti &c.

ubi primus pes dactylus, *Ceri' eni-*

6. Vocales quasdam coripi, quæ non eliduntur, v. g. in Andria Act. 4. Sc. 4.
Reli-quit me ho-mo atqu' abit.
ubi *me* breve, quia non eliditur more Græco. Et Sc. 6.

Quæ se in-honeste opta-vit &c.

voce illæ , *quæ* se in . . . Dactylum efficiunt.
Nonnuli , ut hiatum hunc effugiant addi volunt,
Plautino more , litteram D Reliquit med-homo.

7. Nota , *echo* , *hem* , & alias quasdam id genus
interjectiones , extra metrum aliquando censendas,
neque, cum metiri voles versum, adnumerandas aliis
vocibus.

§. II. De versibus Lyricis.

Lyricorum Vatum poëmata vocantur Odæ , quæ vox Græca significat cantilenam , quia Odæ ad Lyram, sive citharam vulgo canebantur. Odæ istæ Proprium quoddam carminis genus habent , immo constant aliquando è tribus plane diversis. Ab inventoribus vulgo nomen sortiuntur. Sic Ode Alcaica dicitur , cuius auctor Alcæus , Poëta Græcus ; Sapphica , quam invenit Sappho &c. Singula Odarum , & versuum , è quibus componuntur , genera breviter percurro.

Primum genus Odarum est earum , in quibus sunt omnes versus Choriambici Asclepiadei Tetrametri : qualis est apud Horatium Od. I. L. I. *Mecenas atavis &c.* Vocantur Choriambici , quia in illis præcipuum locum obtinet pes Choriambus

qui componitur ex Chorzo^b, sive Trochæo, & Jambo, id est, longa, & brevi, & brevi, & longa. Asclepiadei vocantur ab auctore: inventus enim fertur iste versus à quodam Asclepiade. Tetrametri denique, quia pedes 4. habent, quorum 1. est Spondæus, 2. & 3. Choriambus, 4. Pyrrichius, constans è 2. brevibus:

Mecœ-nas atavis-edite Re-gibus.

Potest etiam aliter idem versus dividi, si nempe interponatur cæsura in medio:

Mecœ-nas ata-vis - edite-Regibus.

Porro cum Ode unius generis versibus ita constat, vocatur Monocolos, quæ vox Græca significat, esse partes omnes unius formæ, ac speciei. Quando duplicis generis sunt versus in Ode, vocatur illa Dicolos: quando triplicis, tricolos: quadruplicis, Tetracolos &c.

Rursum, quando versus iidem, & ejusdem generis recurrent, si alternis id fiat, id est, si post alterum quemque versum, vocatur Ode Distrophos, quæ vox Græca id significat; si post tertium quemque versum Tristrophos; si post quartum, Tetrastrrophos: quia ille ordo verium, qui identidem revertitur, Græcis est *Strophe*.

Denique si pes nullus, nulla syllaba desit, aut abundet, versus vocatur Acatalecticus: si desit, una syllaba, vocatur Catalecticus: si pes totus desit, Brachycatalecticus: si abundet unus pes, Hypercatalecticus, vel Hypermeter.

II. Genus Odarum est earum, in quibus primi quaque tres versus sunt Hendecasyllabi (hoc est

undecim syllabarum.) Sapphici (à Sappho inventi) Achatalecti , sive quibus nihil deest ; Pentametri, sive quinque pedibus constantes , quorum 1. est Trochæus , 2. Spondæus , 3. Dactylus , 4. & 5. Trochæi. Quartus autem quisque versus est Adonius (ab Adone inventus) Dimeter , hoc est , 2. constans , pedibus, nempe Dactylo , & Spondæo. Talis est Ode 2. Lib. 1. apud eundem Horatium: Jam sa-tis ter-ris nivis - atque - diræ:

Similes sunt duo sequentes; quartus:

Terruit - urbem.

Tota Ode est Dicolas Tetrastrophos.

III. Genus , Ode Dicolas Distrophos , in qua primus quisque versus est Choriambicus Glyconius (ab Glycone inventore) Acatalectus , Trimeter , id est pedes ternos habens : quorum primus est Spondæus , 2. Choriambus , 3. Pyrrichius. Secundus vero quisque versus est Asclepiadeus , de quo dictum est in primo genere Odarum. Talis est Ode 3. Lib. 1.

Sic te - Diva potens - Cypri,

Sic fra-tres Hele-næ - lucida - sidera.

IV. Ode Dicolas Distrophos ; in qua primus quisque versus est Dactylicus , Archilochius , Heptameter. Dactylicus dicitur , quia in eo maxime regnat pes Dactylus. Archilochius , quia inventus , & usurpatus ab Archilocho Poëta Græco Lyrico: Heptameter , quia 7. conflat pedibus , quorum 4.

primi sunt Dactyli, mixtis tamen ad arbitrium, ut in versu Heroico sit, Spondæis, tres postremi semper sunt Trochæi. Secundus vero quisque versus Jambicus, Hexameter, Catalectus, constans sex pedibus, dempta una syllaba. Primus est Spondæus, vel Jambus, 2. Jambus, 3. Spondæus, 4. 5. & 6. Jambi. Talis est Ode 4. Lib. 1.

Solvitur - acris hi-emis gra-ta vice- veris- & Fa-voni,
Trahunt-que sic-cas ma-chinæ - cari-nas.

Secundus versus aliter explicari potest, nempe interposita in medio versu cæsura; & sic tres pedes ultimi erunt Trochæi:
Trahunt-que sic-cas - machi-næ ca-rinas.

V. Ode Tricolos Tetrastrophos, in qua primi quique duo versus sunt Asclepiadei, qualis est in primo genere explicatus. Tertius autem quisque, Pherecratius, ab auctore Pherecrate sic dictus: Heroicus, quia videtur esse pars versus Heroici, seu Hexametri: Trimeter, quia tres pedes habet, Spondæum, Dactylum, Spondæum. Quartus quisque est Glyconius, de quo dictum in 3. genere. Talis est Ode 12. Lib. 1.

O na-vis refe-rent - in mare - te novi.

Fluctus: - ò quid a-gis? - fortiter - occupa

Portum: - nonne vi-des, ut

Nudum - remigi-o latus.

VI. Ode Dicolos Tetrastrophos. Primi quique tres versus sunt Asclepiadei, quartus Glyconius. Talis est Ode 5. Libri 1.

Scriberis Vario &c.

VII. Diclos Distrophos. Primus versus est Hexameter; secundus est Dactylicus, Alcmanius, Tetrameter. Dicitur Dactylicus, quia frequentiores in eo sunt Dactyli; Alcmanius, quia inventus ab Alcmane, Græco Poëta; Tetrameter, quia 4. habet pedes, nempe similes 4. ultimis versibus Heroicis Hexametri. Talis est Ode 6. Lib. I.

Lauda-bunt ali-i cla-ram Rhodon - aut Mity-lenem,
Aut Ephe-sum, bima-risve Co-rinthi &c.

VIII. Ode Diclos Distrophos. Primus quisque versus est Aristophanius, Dimeter, constans è duobus pedibus, nempe Choriambō, & Bacchio. Pes autem Bacchius ita dicitur, quia in hymnis Bacchi saepe adhibebatur: constat ex una brevi, & duabus longis. Talis est versus Odæ 7. Lib. I.

Lydia dic - per omnes.

Aristophanius appellatur, ab auctore illius Aristophane, poëta Comico, apud Græcos celeberrimo. Secundus quisque versus est Alcaicus, (ab Alceo inventus) Tetrameter, quia 4. pedes habet. Primus est Epitritus, 2. & 3. Choriambus, 4. Bacchius.

Te Deos o-ro, Sibarim - cur properes - amando.

Porro pes Epitritus ita vocatur, quia supra 3. syllabas, unam habet. Quadruplex est: 1. ex Jambo,

&c

& Spondæo compositus, ut *voluptates*. 2. ex Trochæo, & Spondæo, ut *concitatas*. 3. è Spondæo, & Jambo, ut *communicant*. 4. è Spondæo, & Trochæo, ut *expetare*. Potest hujus Odæ primus versus aliter dividi, nempe:
Lydia - dic per - omnes.

IX. Ode Alcaica Tricolos Tetrastrrophos. Dicitur Alcaica, quia inventa fuit ab Alcaeo, Lyrico poëta clarissimo. Primi quique duo versus sunt Jambici Senarii Brachycatalecti, qui appellari quoque possunt Dactylici Pentametri Catalecti. Constant illi ex Jambo, vel Spondæo, deinde Jambo, postea Spondæo, tum Anapæsto, denique Jambo. Si aliter metiari, ac esse Dactylicos velis, constabunt ex Jambo, vel Spondæo, tum Jambo, cæsura, & duobus Dactylis. Talis est Ode 8. Lib. r.
Vides - ut al-ta stet - nive can-didum.
Vides - ut al-ta - stet nive - candidum.

Tertius quisque versus est Jambicus dimeter, sive 4. pedibus constans: (nam in versibus Jambicis, una mensura duos pedes complectitur) hypercatalectus, sive abundans una syllaba, post 4. pedes.
Silvæ - labo-rantes - gelu-que.

Quartus quisque versus est Dactylicus Alcaicus, constans pedibus quatuor, duobus Dactylis, & duobus Trochæis.
Flumina - constite-rint a-cuto.

X. Ode Monocolos, in qua sunt omnes versus Choriambici, Alcaici, Pentametri; qui constant ē Spondæo, tribus Choriambis, & Pyrrichio. Talis est Ode 10. Lib. 1.

Tu ne- quæsieris- scire nefas - quem mihi, quem-tibi.
Potest etiam dividī versus iste aliter, cæsuris interpositis:

Tu ne- quæsieris- scire ne-fas- quem mihi- quem tibi.

XI. Ode Diclos Distrophos, in qua primus quisque versus est Jambicus, dimeter, Catalectus: constat enim 4. pedibus; sed una syllaba deest, nempe prima. Talis est Ode 15. Lib. 2.

Non - ebur - nequ' au-reum.

Si velis pendulam , & abundantem syllabam in finem versus rejicere, facies ex Jambico Trochaeum , & sic metieris:
Non e-bur nequ - aure-um.

Secundus versus est Jambicus Trimeter Catalectus, constans 6. pedibus, dempta una syllaba:
Mea - reni-det in - domo - lacu-nar.

XII. Ode Diclos Distrophos, in qua primus quisque versus est Heroicus Hexameter; secundus quisque est Dactylicus Dimeter Hypercatalectus, constans 2. Dactylis, & syllaba. Talis est Ode 6. Lib. 4.

Dif-

Diffu-gere ni-ves , rede-unt jam - gramina - campis
Arbori-busque co-mæ.

XIII. Ode Dicolas Distrophos , in qua primus
versus est Jambicus Trimeter , five sex pedibus
constans ; secundus Jambicus Dimeter , duabus
constans mensuris , five pedibus 4. Ejus generis est
Ode 1. Epodon:

Ibis - Libur-nis in-ter al-ta na-vium,

Ami-ce , pro-pugna-cula.

Aliud quoddam genus est huic simile, in quo, pro
versu primo Jambico , ponitur Heroicus Hexameter:

Mollis i-nertia - cur tan-tam dif-fuderit - imis:

Obli-vio-nem sen-sibus.

XIV. Ode Dicolas Distrophos , in qua primus
quisque versus est Heroicus Hexameter ; secundus
vero Archilochius Hexameter Hypercatalecticus,
constans 4. Jambis , 2. Dactylis , & una syllaba.
Talis est Ode 10. Ep.

Horrida - tempef-tas Cox-lum con-traxit, &c- imbres:
Nives-que de-ducunt-Jovem:-Nunc mare-nunc filu-x.

Quidam hanc Oden faciunt Tricolon Tristrophon,
& secundum versum in duos secant ; quorum pri-
mus est Jambicus Dimeter:

Nives-que de-ducunt - Jovem.

Alter est Dactylicus, Archilochius, de quo dictum
in duodecimo genere:
Nunc mare - nunc filu-æ.

Huic adfine est generi aliud, in quo Dactylicus Archilochius præponitur Jambico Dimetro: & in primo loco, pro Heroico Hexametro, ponitur Jambicus Trimeter:

Petti, - nihil - me si-cut ant-ea, juvat,
Scribere - versicu-los,
Amo-re per-culsum - gravi.

In quo genere, quidam duos illos versus in unum conflant hoc modo.
Scribere - versicu-los amo-re per-culsum - gravi:

XV. Ode Dicolas Distrophos, cuius primus quisque versus est Heroicus; secundus vero Jambicus. Talis est Ode 11. Lib. Epod.

Altera - jam teri-tur bel-lis ci-vilibus - ætas:
Suis - et ip-sa Ro-ma vi-ribus - ruit.
Ultimum genus est earum, in quibus sunt omnes
versus Jambici Trimeteri. Talis est Ode 17. Lib.
Epod. *Jam jam efficaci &c.*

§. III. De aliis quibusdam usitatorum versuum generibus. Ex Lib. 4. *Prosodiae Bononiensis*
P. Joannis Baptiste Ricciolii.

A Napæticum Archilochium carmen est constans
quatuor pedibus, quorum quilibet potest esse
ana-

anapæstus, aut spondæus: primus vero, & tertius etiam dactylus. Sit exemplum ex Seneca in Herc. fur. ch. 1.

Turbine magno spes sollicitæ
Urbibus errant, trépidique metus.
Hie superbos aditus Regum.
Duralque fores expers somni
Colit, ac nullo fine beatus
Componit opes, gazis inhians,
Et congesto pauper in auro est.

Qui idem Seneca admisit secundo loco, sed raro, tribrachum, & dactylum; & in illo **Medeæ** versu 312. in fine dactylum sic:

Non erat usus. Nondum Plejadas.
Idem in choro ejusdem Medeæ separatum Adonium
subjicit.

De Glyconio dictum est supra. Constat spondæo, & dactylis duobus. At Seneca choro 4. Oedipi triges ponit choreum primo loco, quod & saepe fecit Catullus, rarius vero Horatius, ut in illo *Ignis Iliacas domos*. Immo Seneca aliquando 2. loco posuit spondæum.

Anacreonticum constat tribus jambis, & syllaba: recipit tamen primo loco spondæum, ac anapæstum, & raro tribrachum. Utitur hoc Theocritus Idyll. 27. Anacreon vero saepissime, ex quo illud latinitate donatum accipe:

O ter, quaterque felix,
Cicada, quæ supremis
In arborum viretis,
Roris parum ut bibisti,
Cantare dulce gaudes.

Jambicum Archilochium dimetrum acatalectum
constat quatuor jambis: recipit tamen primo, &
tertio loco spondæum; raro autem anapæstum, aut
tribrachum. Habes exempla passim in Horatio Lib.
Epod. ubi jambis trimetris subjicit dimetros sic:

Beatus ille, qui procul negotiis
Ut prisca gens mortalium,
Paterna rura bobus exercet suis
Solutus omni scenore &c.

Utitur hoc Ecclesia in Hymnis. Tale est illud Sab-
bati ante Domin. Passionis ad Vesperas:

Vexilla Regis prodeunt,
Fulget Crucis mysterium,
Quo vita mortem pertulit.

Jambicum Hiponaclium constat quinque pedibus
dissyllabis & una in fine syllaba: quorum secun-
dus, quartus, & quintus sunt jambi: primus vero,
& tertius vel jambi, vel spondæi. Tale est illud
elegantissimum:

Ternos vetusti congios falerni,
Uno die conviviis peractis,
Hausit potentum Romuli nepotum
Regnator audax, arbiterque Regum.
Exinde plebs Quiritium vocavit,
Non Claudium Tiberium Neronem,
Sed Caldium Biberium Meronem.

Jambicum Senarium, seu archilochium acatalecticum, si purum est, constat solis jambis; si mixtum, requirit locis paribus, idest, secundo, quarto, & sexto, jambum, imparibus vero, præter jambum, excipit anapæstum, tribrachum, spondæum, & dactylum; immo secundo, & quarto non recusat tribrachum. *Tragicum* vero, ut sit gravius, non debet, nisi rarissime, constare ex puris jambis. *Comicum* autem modo in fine retineatur fere semper jambus, reliquis quinque locis recipit jambum, spondæum, anapæstum, tribrachum, dactylum. Exempla sint jambici puri ex *Cattullo*:

Phæ'us ille, quem videtis, hospites,
Ait fuisse navium celerrimus.

Tragici vero jambici ex *Senecæ Herc. fur. act. 2.*

O magne Olympi rector, & mundi arbiter;
Jam statue tandem gravibus ærumnis modum.

Comici denique jambici exemplum sit ex *Terentio in Andria*:

Qui utramvis recte norit, ambas noverit.
Accusant, quos hic noster auctores habet.
Perduxere illuc secum, ut una esset mecum.
Nihil ista opus est arte ad hanc rem, quam paro.

Et in *Eunuchi prologo*:

Si quisquam est, qui placere se studeat bonis
Quam plurimis, & minime multos lædere,
In his Poëta hic nomen profiteri vult suum.

Phaleucium hendecasyllabum est, & constat spon-
dæo, dactylo, & tribus choreis. Martialis Lib. I.

Hic est, quem legis, ille, quem requiris,
 Toto notus in orbe Martialis,
 Cui, lector studiose, quod dedisti
 Viventi decus, atque ientienti,
 Rari post cineres habent Poëtæ.

Admittit tamen aliquando prima in sede jambum,
 ut apud Catullum pâne tricies; apud Martialem
 fortasse non nisi semel in illo Libri 3. epigr. 21.

Veterno, resignaque pigriores.

Apud eumdem Catullum primo loco videbis cho-
 reum, & quidem duodecies: & ibidem dactylum
 bis, anapæstum semel. Apud Senecam vero in Oe-
 dipi 2. Choro anapæstum secundo loco.

De *Sapphico* item dictum est paragrapho superio-
 re. Hic addam nonnulla. Solis sapphicis Catullus,
 Seneca, Statius usi sunt, Adonio non interjecto.
 Secunda sede, pro spondæo, Sappho inventrix, &
 Catullus non semel, & Seneca choreum adhibue-
 re. Sit exemplum ex Catullo:

Otium, Catulle, tibi molestum est.
 Seu Sacas, sagittiferosque Parthos.

Quid? quod Sappho quarto loco spondæum, raro
 tamen, posuit, ut docet Gretserus, & secundo loco
 dactylum? Quod fecit Seneca in choro actus 3. Me-
 dex, & in choro actus 3. Troadis sic:

Su-

Sumere innumeratas solitum figuratas,
An feras variis Lapidis Caryitos.

Immo idem Seneca, teste, Martino Delrio, primo loco admisit spondæum, dactylum, & anapæstum; & secundo jambum.

Scazon, seu Choliambicum carmen est jambicum senarium, sed claudicans, quia loco ultimi jambi habet spondæum, ita tamen ut penultimo loco sit jambus. In ceteris servat leges jambici senarii: atque adeo in secunda, & quarta sede habet jambum, vel tribrachum; in prima, & tertia jambum, aut spondæum, aut etiam anapæstum, & dactylum, quia tempore sunt compares spondæo, quum duæ breves uni longæ æquiveant; & tribrachum, quia compar est jambo. Pro exemplo sit illud Persii:

Nec labra fonte prolui caballino,
Nec in bicipiti somniasse Parnasso
Memini, ut repente sic Poëta prodirem.
... Quod si dolosi spes refulserit nummi
Corvos Poëtas, & Poëtridas Picas
Cantare credas Pegaseum melos.

Hoc melos torquet Grammaticos; est enim jambus in ultima sede contra leges Scazonis. Manutius, Emmanuel, & Gretserus putant imitatione Græcorum productam primam in $\muέλος$, sicut ab Homero producta fuit in hymnis. Politianus legendum censet neclar. Alii alia.

Trochaicum Alcmanium dimetrum est, & acatalecticum, constatque quatuor trochæis, recipit tamen sc-

secundo, & quarto loco spondæum, & primo loco pyrrichium. Tale illud Ecclesiæ :

Pange lingua gloriosi.

Tale & illud Catulli :

Age, cuncta nuptiali.

Trochaicum Hipponaëtium est tetrametrum acatalecticum, & constat octo pedibus, quorum impares sunt trochæi; reliqui aut trochæi, aut spondæi: apud Comicos vero, omnibus locis recipit compares spondæo, nempe anapaëstum, & dactylum: & compares trochæo, nempe jambum, & tribrahnum, excepto ultimo. Sit exemplum purioris:
Pelle tonfis terga Ponti, vela tende, jam pergamus.

Trochaicum Galliambicum tetrametrum est constatque vel trochæis, vel partim trochæis, partim pyrrichiis, & raro admittit pedes his compares. Exemplum esto illud Catulli:

Super alta vectus Atys celeri rate maria:

Alia versuum genera, quæ sunt innumerabilia, si velis cognoscere, adito Servium, & Terentianum in Centimetro: Nebrissensem L. 8. c. 8. Despauterium L. 5. Scaligerum in Poëtica, L. 2. &c. Pauca modo de Dithyrambo subnectam.

§. IV. De Dithyrambo.

DIthyrambus canebatur in honorem Bacchi, à quo nomen est sortitus. Bacchus enim ab antiquis dictus est Dithyrambus, quasi duabus januis in lucem emissus. Fabulas consule. Bacchum igitur, India perdomita, redeuntem in Græciam Satyri cum Mænadibus comitati sunt. Hi vino graves, & mente, ac voce parum constantes, carmina sine modo, ac numero victori Baccho decantabant. Illos imitati Poëtæ, & entheo furore correpti, carmina quædam audaci, tumido, vario stilo scripsere, quo canere modo ebriosi solent, permixtis in unum versibus omnis generis, & metri. Hæc origo Dithyramborum, & forma. Exemplum habes in Seneca Tragoœdo, post secundum Actum Tragoœdiæ, cui nomen facit *Oedipus*. Chorus, qui actum illum sequitur, merus est Dithyrambus: *Effusam redimite comam*.

Vates recentior partam de Turcis victoriam anno 1716. hoc genere carminis celebravit.

Surge, Phœbe, pone curas,
Sume plectra, funde lætum
Ore carmen, usitatis
Parce modis agitare cantus.
Clio docta cur moratur?
Cur Thalia lenta cessat?
Otiosa cur sororum
Turba monte torpet alto?
Huc adeste, convolate,
Quis Apollo labra sacro